

PETRI MOLINÆI

P. F.

Π Α Ρ Ε Ρ Γ Α.

POEMATUM

LIBELLI TRES.

I. Hymni in Symbolum Apostolorum.

II. Ecclesiæ Gemitus.

III. Sylva Variorum.

Huic editioni accessit mantissa
aliquot Poematum.

*Me verò primum DIVINÆ ante omnia Musæ,
Quarum sacra fero ingenti percussus amore,
Accipiant, Cœlique vias & sidera monstrent.*



CANTABRIGIÆ,

Excudebat Joann. Hayes, Celeberrimæ Academiæ

Typographus, M. DC. LXXI.

Impensis Joannis Creed, Bibliopolæ Cantab.

PETRI MOLINAE

1571

1572

1573

1574

Norman Moore
M.D.

a. d. vj. id. Aug.
MDCCCLXXXII.

Dom: custodis collegii D. Barth. in Smithf.
Lond.



*Prodeant & juventuti nostræ exemplo
præluceant, hæc pia, candida, &
antiquæ venæ carmina.*

Edm. Boldero *Procan.*

Jaco. Fletewood.

Petr. Gunning.

Jo. Pearson.





Illustrissimo Viro
D. ROBERTO BOYLEO,
Honoratissimi RICARDI
Primi Corcagiæ Comitis
Filio.



Ecolenti mihi memoriâ, Vir
Illustrissime, annos illos quum
in amœno secessu, convictu
tuo & virtutis tuæ consuetu-
dine me beavit Deus, verè
pronuntiare licet eos ætatis meæ dies mihi
candidissimos atque lætissimos illuxisse. Cùm
amicitiâ, quâ me quantumvis imparem pro-
vocare & tibi adjungere placuit, nihil vel ad
eruditionem efficacius, vel ad virtutem ex-
stimulantiùs, vel ad honorem præclarius,
mihi cœlitus indulgeri potuerit. Quare non
abs re vereor nè dum tantum beneficium
tuum agnosco, non tam grati animi debi-
tum persolvere, quàm existimationi meæ
videar

videar inservire. Quod quidem si publicâ
istâ nuncupatione fategero, omnes delicti
mei participes habuero qui ad te accedunt.
Accedunt verò & ad sapientiæ tuæ oracu-
lum frequentes commeant omnes qui bonas
artes elaborando, & eruditionis thesaurum
locupletando, sed magis etiam consuetudine
tuâ cupiunt inclarescere. Eos ego infra po-
situs tantum suspicio, contentus quos inge-
nio assequi nequeo laudibus prosequi. Cum
verò nulla literaturæ pars extra eruditionis tuæ
pomœrium possit evagari, patere quæso etiam
huic poëtico labori liberum aperiri apud te
angulum. Cui sanè postulationi ut te facilem
fore mihi met spondeam, tria faciunt. Unum
est quòd severiora studia poëtico melle dele-
nre tibi non est insolens, & in carmine ita
excellis, ut nisi excelsiores in te dotes emi-
nerent, ad id unum natus possis existimari.
Alterum est quòd horum poëmaturum nonnulla
jamdudum in manibus habuisti, approbâsti,
& cum iis familiaritatem inire non aspernatus
es. Potissimum est quòd cum ingenii & eru-
ditionis tuæ sublimitatem immensum quan-
tum excedat tua erga Deum pietas, & in ca-
pacissimæ mentis arce regina sedeat, non po-
terunt tibi non placere piæ ad Deum aspira-
tiones,

tiones, quas tutemet poetico spiritu altius
atque feliciter attolli non semel apud me pro-
fessus es, expertus apud expertum; adjectis
hortamentis, quæ mihi sunt mandatorum lo-
co, ut istam aream seriò tererem. Quod igitur
ex tua adhortatione tentatum fuit apud te,
Vir Illustrissime, depono; tuum tuo jure
totum. Neque juri tuo, quæ tua est huma-
nitas, quidquam decedere putabis, quòd in
singulorum libellorum fronte primariæ erudi-
tionis & pietatis viros compello; quorum
amicitiæ memoriam cupio cum isto opusculo
mihi superstitem. Jam provectæ senectutis
homo, ab omnibus mihi pridem notis semo-
tus, oblecto me in mea eremo clarissimorum
virorum memoriâ quibuscum necessitudo
mihi intercessit; eosque in mea pagina, quia
aliter non datur, mecum habeo, & absentes
alloquor. Quo in numero cui plùs debeam
quàm tibi (Nostri seculi decus) novi nemi-
nem; Memor quàm ingenuo, quàm con-
stanti amore me dignatus sis, & quid pre-
tium amoris tuo conciliet & dignitas tua, &
virtus Orbi notissima, Deo gratissima. De-
um (quod unum potest gratus animus me-
us rependere) precibus obnixis sollicito, ut
qui te mirabili ingenio & rerum humana-

rum atque divinarum cognitione supra gradus ante te celsissimos evexit, altiorémque etiam fecit pietate atque modestiâ ; idem primaria sua in te dona, lætissimâ inter homines felicitate, & æternâ demum gloriâ secum coronet. Vale.

POE.

P O E M A T U M

Libellus Primus.

H Y M N I XIII.

In

S Y M B O L U M

Apostolorum.

P s A L. 119. vers. 54.

זְמִירוֹת הָיִי לִי חֶקֶק
בְּכִית מְגִדִּי


CANTABRIGIÆ,

Excudebat JOANN. HAYES, Celeberrimæ
Academiæ Typographus.

Impensis Joann. Creed, Bibliopolæ Cant. 1670.

ANte triennium Hymnos istos cum praefixa Epi-
 stola miseram ad Celeberrimum Bochartum,
 necessarium meum suavissimum. Ille perlectis sche-
 dis, sive ex iudicio, sive ex amore, me instantissi-
 mè & satis pro imperio adhortatus est ut & car-
 men & Epistolam ederem, quàmque publica ista neces-
 situdinis & amicitiae nostrae testificatio sibi esset cor-
 di exaggeratiùs significavit. Virum maximis ope-
 ribus nobilem, cui vasta rerum atque linguarum
 cognitio, & mira in difficultatibus enodandis usus,
 peperit qualem iustissima fama dare potest immorta-
 litatem, subita mors ipsi felix, nobis acerba, me-
 liori immortalitati transcripsit. Multis ille quidem
 flebilis occidit, Nulli flebilior quàm mihi ejus
 σωτήρ, & propemodum ἡλικώτερος, qui incompara-
 bilem cognationis sanguinis legem excedente amoris
 vinculo complectebam, & cælo receptum etiam am-
 plector. Nolui charissimi capitis mandatis contra
 ire; Neque istius dedicationis quod expectavit de-
 bito me ipsius obitu exsolutum existimavi.

Viro



Viro Nobilissimo & vere
Magno

SAMUELI BOCHARTO

Amitino suo conjunctissimo,

PETRUS MOLINÆUS

S. P. D.



*Rigefimus agitur annus, Vir
Celeberrime & amicissime,
ex quo hymnos istos inchoa-
vi, in agrestissimis Bri-
gantium rupibus & sinuo-
sis convallibus agens, qua horrore vene-
rabili aptissimum ad sacras cogitationes se-
cessum prebebant, & ipsâ locorum facie
carminum Genium excitantem. Sed vix
quinque Hymnos absolveram, quum me nego-
tiorum turba à Poetico otio & amica Musis se-
de in tumultuosam scenam protraxit. Et ut
aliud ex alio incommodum nasci amat, exce-
perunt*

perant me longo ordine plurima adversa,
& ætiosa vita labor, inter qua longa fuit
carminum obliuio, qua secessum scribentis
& otia quærunt. Fam frugebat versificandi
Genius, quum ad horrendam illam Anglicanam
defectionem qua tot monstra peperit sacrâ irâ
Poesis incaluit, & versum sponte fecit indi-
gnatio. Ubi verò cum rerum facie ira illa
paulum detumuit, deserbuit quoque poeticus
ardor, & melioribus occupationibus, saepe
etiam sequioribus avocamentis locum dedit.
Tandem aliquid temporis subcissiui nactus in
amæni pradioli otio, quod longis procellis ja-
ctato diuina mihi concessit indulgentia, cæpi
de Hymnis meis recogitare, & sic mecum repu-
tare; Non posse me sine aliqua in Deum injuria.
cui quicquid hoc est poetici genii & me ipsum
debeo, sacrum istum conatum abjicere, Æta-
tem meam ingravescere, Noctem imminere
in qua nemo operari potest; Et ut longius mors
absit, breuè impetum istum frigore senectutis
intermoriturum; Quod quamvis mihi non
fuerit gravissimum, nec me cum Flacco tur-
pem senectam degere putaverim si citharâ ca-
rentem, me tamen summâ operâ niti debere ut
antequam hæ scintillæ evanescerent, illis uteretur
ad accendendum in hominum pectoribus amo-
rem

rem Dei, qui sanè legitimus est & primitivus
Poeseos usus: Neque aliud sunt Mosis, Davi-
dis, & Salomonis, antiquissimorum Poetarum
Hymni quàm sacra ἑρμηνεία. Cùmq; ita sint
comparati nostri ævi homines, maximè verò
populares nostri, ut nullam δεινότητα quantum-
vis vilem, nisi insuper blanda sit, in animos
suos descendere patiantur, non malè de hoc se-
culo merebitur qui Dei Opt. Max. laudes, &
doctrinam salutis, illà amœnitate vestiet, qua
rebus divinis in delicati palati ingenia prom-
ptum & mollem aditum conciliet. Quod qui-
dem carmine assequi est opus non obvii molimi-
nis; Videtur enim severitas materiæ poeta alas
intervellere, & impetum coercere; cùm præ-
sertim fictioni parùm indulgeat, quæ est
vel præcipuum Poeseos opus, unde & πένθος.
illi nomen. Eam qui Poeta adimit non patitur
eum plenè velis in altum provehi. Sanè mini-
mè mihi mirum sit Poetas qui argumenta à pie-
tate aliena sibi delegerunt, pronuntiare sanctitate
materiæ liberum poeticarum alarum remigium
inhiberi. Ego verò etiam adjuvari auctumo, &
si dicere fas est, experior. Compescit quidem
istà sanctitas locentiosam illam Poetarum eva-
gationem; sed dum vetat impetum latius ex-
currere, docet eum aliàs exurgere, & quod la-
titudini

titudini adimit sublimitate compensat. Quàm feliciter Religionis mysteria Poeseos melle condixerim usus probabit. Equidem voti damnatus fuero, si hinc bona mentes ad Dei amorem & laudem erigantur; Et Poesim à veteri studii inutilis probro, quo eam Nasonis pater onerat, vindicavero. Atque eo nomine aliquid Magni Salmasii memoria debuero, qui quinque priores hymnos recensuit & scribenti animos addidit. Tu quoque sermonum nostrorum candide Judex, pro eo quod possides in Rep. literariâ imperio, de his tentamentis pronuntia. Quis enim quid carmen sapiat rectius judicaverit quàm Bochartus, qui in re poetica eminet usque ad miraculum, quémque ingentem omnis eruditionis arbitrum nostrum ævum agnoscit, & ventura secula venerabuntur? Qui igitur mihi adolescenti adolescens praecepto & exemplo praeivisti, idem fac senex seni, & mihi ubi erraverim commonstra. Atque id tuâ maximè interest, nè si quid sequioris nota te annuente foràs emittam tibi imputetur. At si tibi hoc poema ità probatur ut me mihi credere audeas, fortè alia addentur ut fiat justum volumen, eâq; à pietate non aliena. Quam ut tuear facile patiar minùs Poeta quàm Christianus audire, satès felix (atque utinam tam felix)

si Domini mei gloriam promovero. Quanquam
videri possim gloriola mea appetentior, qui hos
conatus patrocinio tuo palàm commendem,
unde mea cum tanto viro & sanguinis & con-
suetudinis conjunctio latius innotescit. At sanè
jure meo utor quando necessitudine nostrâ &
summâ tuâ benevolentia me orno, cum cuique
liceat sua sibi vindicare & ad usus suos con-
vertere. Tulit superiore seculo familia nostra
Illustrem illum CAROLUM MOLINÆ-
UM: Ut alia antiquiora & recentiora decora
præteream, Illustrem SAMUELEM BO-
CHARTUM nostro avo tulit, cui plus &
paterni & materni atavi debent quàm ipse
illis. Vale generis nostri decus, & patria ho-
nos, necque tui amantiſſimum redama.

Errata sic corrigenda.

L *Ib.* 1. *Pag.* 6, *lin.* 16. *lege* fatiscendum. *p.* 12. *l.* 5. cœnum. *p.*
imperis. *p.* 20. *l.* 19. Sic fat. *p.* 28. *l.* 13. lavæque. *p.* 33. *l.* 7.
apellas. *p.* 37. *l.* 5. Devoluere. *p.* 51. *l.* 8. Calthæque. *Lib.* 2. *Epist.* *Le-*
flori. *p.* 5. *l.* 20. suggillaretur. *p.* 13. *l.* 33. reiciunt. *p.* 18. *l.* 7. reiciat.
p. 19. *l.* 4. nodo necit. *p.* 21. *l.* 15. Imbecilli. *p.* 36. *l.* 16. discipulum. *p.* 45.
l. 18. fulvo. *Lib.* 3. *p.* 1. *l.* 3. defetiscentes. *p.* 46. *l.* 5. meus. *p.* 47. *l.* 17.
vinclis. *p.* 59. *l.* 9. merens. *p.* 81. *l.* 13. Calicisque. *p.* 84. *l.* 4. fluctus.
p. 93. *l.* 6. conopea. *p.* 95. *l.* 12. Mendacis. *p.* 97. *l.* 2. cassibus.

(1)



IN
S Y M B O L U M
Apostolorum
HYMNI XIII.

H Y M N U S I.

Credo in Deum.



Umme Pater rerum, folio qui' celsus Olympi,
Magna super pavidas figis vestigia terras ;
Gloria cui capiti, rutilant cui vestibus ignes,
Et circum æternæ radiant tentoria lucis.

Ecce tibi ambabus Pax & Constantia palmis
Hinc atque hinc diadema levant, placidumque tribunal
Justitia & stabili firmat Clementia fulcro.

At procul Angelici subsellia sacra Senatûs
Te sanctum celebrant ; Geniorum albata corona
Stat venerans, trepidisque obtendit vultibus alas :
Omnibus unus amor, quo te per secula læri
Ter sanctum ingeminant, exercitumque potentem,
Et laudum integrant non enarrabile carmen.

Hei mihi quod regnum lucis faciémque verendam
Densa regunt subter glomerato nubila fumo,

B

Nec

Nec jubar æternum nostræ caliginis umbram
 Dissipat, & nubem tantùm discriminat ignis.
 Qualis in obducta nebularum nocte micantes
 Stricturas furtim insinuat lux aurea Phœbi,
 Rarâque de rupto sanduntur lumina nimbo.

At bene consultum miseris generique caduco
 Quodd latet, & totum lippis non explicat orbem ;
 Nec subit impuros oculos purissimus ardor :
 Ni lateat, carnem immundam mentisque nocentes
 Quippe voret rapidus, stipulâsque absumat inanes.

Sic ubi terrificæ petiit spectacula lucis,
 Distulit Omnipotens Mosem, renuitque benignus;
 Obtexitque manu magna sub rupe latentem,
 Dum Majestatis non aspectabile lumen
 Transiret, dextrâque Dei Patriarcha reductâ
 Augustum aversæ vidit cervicis honorem.
 Scilicet immensam mentem, causâsque priores
 Consilii æterni nè mens finita capebat :
 Posteriora patent, divisque effectibus uso
 Fas homini spectare Bonum, Justumque, Potentemque,
 Apparétque operum divina Essentia tergo.

At quæ pauca sui transmittit lumina Numen,
 (Vix heu ! vix miserorum inrerlucentia nocti)
 Credere nos non scire docent ; nam sedula rerum
 Aggreditur frontem, spectâtque Scientia causas,
 Impar nôsse Deum, rerum qui maxima causa,
 Principium finisque sui ; nescitque catenis
 Causarum æternam compingere Majestatem.
 Sed quò curta nequit ratione Scientia fulta,
 Alma Fides summi scandit penetralia Templi ;
 Lusca oculos, sed firma manus ; quæ pauca videre,
 Pluratenere valet, robustâque brachia cœlo
 Injiciens, oculos tanto in fulgore modestos
 Connivet, sentire Deum quàm cernere malens.
 Illam non Ratio, sancti sed semina verbi
 Progenerant, tacitoque accendit fomite Numen.

Nos igitur tali mentem inspirante magistra
 Credimus esse Deum, totum qui Maximus **ESS E**

Possidet.

Possidet, & seipso sese ditissimus implet ;
Quem nihil est extra, qui nil aliunde requirit,
Unde fluunt quæcunque vigent, quo deinde recurrunt,
Immensum pelagus fundique & littoris expers.

Olli summa quies, quam nec labor improbus urget,
Nec violat solidam rerum Inconstantia Pacem,
Sed movet immoto quæ condidit omnia nutu,
Nunquam sollicitâ disponens singula curâ,
Nec rerum implexus numero, nec pondere pressus.

Huic nec Tempus edax, motûs mensura caduci,
Imminet immortæ menti, nec falce minatur :
Dûmque jubet magno sese volventia Mundo
Tempora continuo sibimet succedere lapsu,
Ipse suum æternus puncto complectitur ævum,
Felix simpliciter, quem non bona multa beârunt,
Nec sibi multiplici nectit virtute coronam,
Una placet ; simplex illi substantia Virtus,
Virtutésque Deo cunctæ constantur in unam.

Ille quidem sese distinguit hypostase trina,
Non triplici ; Pater est Sermoque & Spiritus unum,
Nempe vigent & Possesse & Nôsse & Velle sub uno ;
Térque sibi æqualis semel est Immensus & Idem.
Quò feror alta petens ? hic fessas complicat alas
Celsa Fides nimium, nullásque in carmina vires
Addit, & ex alto se tempestitiva reducit ;
Quò malè ceratis Ratio temeraria pennis
Sæpe volans turpem passa est ambusta ruinam.

Atque utinam parcant docti infelicibus ausis,
Decretum æternum mortali pendere libra,
Quodque latet latuisse velint ; Ecclesia nempe
Hinc gemit, & lacera sordet moestissima palla,
Quòd parcit jam nemo Deo, nec sufficit ulli
Nôsse quod humano comprehenditur intellectu.

Indè caput morbi, finis præsaga propinqui
Cana Fides fugiens effœtum deserit Orbem ;
Credere non volumus sed cernere : fracta sigilla
Codicis æterni, solus nè solveret Agnus,
Proh facinus ! doctósque libet, non esse fideles.

Nec subit exordes animos, incedere visu
 Qui properat non posse fide, quæ sola salutis
 Præmia fert; & scire nefas quod credere fas est.

O quondam Omnipotens aliquam demittat Olympo
 Magnam animam, certas Rationi figere metas
 Quæ valeat, proprioque Fidem describere regno,
 Quodque jacet medium communi jure gubernet.
 Nè Ratio veritas effræna irrumpat in oras,
 Sed venerans miretur, & accersita ministrer;
 Nève oblita sui, Rationis libera regna
 Religionem premat, miscens civilia sacris,
 Jam non pura Fides, nascenti conscia typho.

Sed nè dira Fidem fluxæ contagio carnis,
 Aut falsum blandi flectat pellacia Mundi,
 Sanctorumve madens cæsis cervicibus ensis,
 Tu Pater infirmam cœlestis robore dextræ
 Assiduus firma: da dextrâ supplice dextram
 Tangere, da Fidei non unquam amittere clavum.

Heu satis errorum! vix longum in turbine nigro
 Hæreseon scopulos, ærumnarumque procellas
 Vixdum eluctamur, rabidi ludibria Ponti.
 Sed licet usque furant effusi carcere ventri,
 Et conjurati sævis cum fluctibus imbres,
 Austrorum Pelagique minis agitata carina
 Ire nequit pectus dum credimus: arbiter auræ
 Intus adest, vigilem carpens in turbine somnum.
 Cumque Fidem undarum multo firmaverit usu,
 Præferet os pelago sacrum, verboque fugabit
 Nubila, subsident fluctus, & sibilus Euri
 Voce Dei magnâ conterritus obmutescet.
 Quondam etiam fragili carnis compage solutâ,
 Aut quum supremos Tellus conceperit ignes,
 In priscum ruitura Chaos, tunc libera cœlo
 Tolleret colla Fides, animos addente ruinâ.
 Illa quidem nomen felici morte reponet,
 Non acres animos, & de vivace favillâ
 Surget Amor, propriosque rogi convertet in ignes:
 Et Christo æternum redamans ardebit amante.

Credo in Deum.

5

Hæc igitur precibus jamjam cœloque Deoque
Injiciat violenta manus ; sit mater Amoris
Servâque, nec pigeat meliori assurgere proli.

Spiritus alme Deus, dulci qui lampade corda
Verus Amor torres, & confers cuspide vitam,
Carne graves animos divinâ punge sagittâ ;
Subde faces Fidei, fac sancto spiret Amore
Dum viget, & moriens hæredem scribat Amorem.

B 3 *Hymnus*

HYMNUS II.

Patrem Omnipotentem, Creatorem Cœli & Terræ.

Euge Deum, pia corda Deum celebrate Parentem,
Ingenitum, fontémque sui, qui singula Verbo
Fecit, & influxu magni sustentat Amoris.

Qui sedet aurato lucis trabeatus amictu,
Et lateri angusto flammatum accingitur ense,
Tutantem oppressos, debellantémque rebelles.
En Deus auratum levibus dans lora quadrigis
Nimborum vehitur rutilo sublimis in axe,
Fulmineisque rotis larè concussus Olympus
Ingeminat crebros diris mugitibus ignes.
Ergò hominum quætit ossa tremor, flant vertice crines,
Et gelidus currit per membra rigentia sudor,
Ad vocem Cœli horrifonam, quo magna tonante
Æthra ruit, Pontúsque vadis exterritus imis
Æstuat, & gremium Tellus tremebunda reducit.

Euge Deum Natura gemens rerúmque fatifcentum
Ipse pavor celebret, exultémusque tremendo.
Æquora cum sonitu plangant ad littora laudes,
Laudes Terra parens cæcis tonet ima cavernis;
Flumina longinquæ gentes obeuntia traflu
Lætificent laudum mirantes murmure ripas:
Túque cavis laudes spira pulmonibus, Eure,
Inter adorantes submisso vertice sylvas,
Et sata certatim molli assurgentia fluctu;
Auritásque jube modulos addiscere cautes.

At laudum attonitis exceptans artubus auras
Omne pecus mugitu & multiplici balatu
Acceptas referant: tu squamea turba sub undis

Laude

Patrem Omnipotentem. 7

Laude Dei fremito, pinnae arrecta micantes,
Cumque modos nequeas, numeros servare memento.
Et nemorum querulis mulcens garribus umbras
Picta cohors sacros argutula dividat hymnos.
Vos gravidæ nubes, vos magni tela Tonantis,
Fulmina, grando, nives, flammæque ad jussa paratæ,
Obsequio laudate Deum, Dominique coruscet
Multus honos nimbis, & læto fulguret igne.
Vos melius puras purissima corpora laudes
Pangite, collisi miris concentibus Orbes
Astriferi, varioque modos miscete meatu.
Secula venturis tacite cedentia seclis,
Nox Luci, noctique dies celebrate Tonantis
Perpetuo annorum crescentes ordine laudes.

Tuque adeo, tu viva Dei viventis imago,
Præfekte Orbis Homo, cui Terra & Pontus & Aer
Latæque stellati famulatur regia Cæli;
Ecquid servitio Naturam, ingrata, perenni
Nequicquam premis ingentem? tunc cuncta superbus
Accipies reddesque nihil? solusne creata
Omnia ad Authorem per te nitentia fraudas?

Parce, nec injustus redeuntem intercipe Mundum;
Te mentem agnoscit, te solam hæc machina linguam;
Hæc quoties meritæ solvis præconia laudis,
Mente Deum linguæque colit; te tota silente
Bruta silet, frustra que viam molitur Olympo:
Qualiter Harmonico doctè compoſita cerebro
Musica charta silet, si vox modulamine prompta
Defuerit, vel charta lyræ consulta canoræ.

Eia hominis mens sacra, choros imitator ovantes
Spirituum, liquidis mulcent qui vocibus aulam
Sideream ingentem, & Cæli Terræque Parenti,
Pro Cælo & Terra, pro seminibus mirandis
Perfectorum operum, pro sancti robore regni,
Mirificas pangunt divino carmine grates:

Dicite Cœlicolæ linguæ venerabile Mundi
Principium; quænam facies primordia rerum
Anteivit, nullum cum tempora nulla per Orbem,

Nec mensurandi gliscebant tempore motus,
 Et nulla in nullo fulgebant sidera cœlo,
 Nullus ubique locus, complendus corpore nullo.
 Nec nihilum tamen illud erat; Deus omnia solus,
 Ipse sui plenus, divinum implebat amorem
 Amplexu proprio, & semet contentus agebat.

Ast ubi collibuit divam exercere potestatem,
 Omnipotens utero magni deprompsit inanis
 Materiam incultam, informem, quæ tota profundâ
 Diluvie & pigris horrebatmersa tenebris,
 Pondus iners, brutumque Chaos, quo condita rerum
 Semina sub lento torpebant frigida limo :
 Vita tamen suberat, crescentisque embryo Mundi
 Naturam tacitâ primum conceperat aurâ.
 Nam sacer ingentes motabat Spiritus alas
 Gurgitis in facie, sæcundo pectore grandi
 Incumbens massæ Mundumque fovebat in ovo.
 Qualiter ante alias Jovæ dilecta volucres
 Incubitu puro mollis foveat ova columba,
 Spem sobolis, pernóxque sedens, vi pectoris almâ
 Pullitiam niveis excludit sedula conchis.

Ergo ubi fructificâ forum virtute Parentis
 Intepuit, formæque Chaos maturuit ingens ;
 Ecce Deus sacro sermone silentia rupit,
 Magnifico inclamans tonitru, *Lux esto* ; repente
 Lux micuit, fulsitque rosis Aurora novellis.
 Illa fuit sine Sole dies ; ter nôxque diésque
 Alternas vertère vices sine munere Phœbi.
 Sol erat ipse Deus, qui natam ab Numine lucem
 Æternum agnosci voluit, Mundusque verendum
 Auspiciam, rerumque Deo quæ proxima fulget.

At magnum enitens utero Natura madente
 Prodiit, atque undas Opifex secrevit ab undis.
 Nam partem ætherii solidatam fornice Templi
 Omnipotens vitreos latè cuneavit in arcus,
 Partem aliam pelagi jussit discludier alveo,
 Et medium ambabus se pandere firmamentum.

Tum coalere solum, & terrâ con crescere limus

Coepit

Creatorem Omnipotentem. 9

Cœpit, & ostendit calvos sine gramine colles
Cœlo astris vacuo; mox sylvas iussa comantes
Fedit humus, foliis herbisq̃ue recentibus halans,
Et florum vario circum se fudit amictu.

Nec mora, maturâ sparsit cunabula fruge
Naturæ infantis, primo quæ grandis in ortu
Tempora pomiferis cinxit nascentia fertis,
Quaque die nata est frontem exporrexit adultam.

Continuò puris maduerunt gramina rivis,
Et nova per lætas trepidè labentia valles
Ipsa sibi pronum signârunt flumina callem.
Jâmq̃ue tener tremulis vix fidens gressibus Eurus
Blandulus innocuos agitabat in æquore lusus,
Primulæque intactas crispabant flamina lymphas.

Hæc ubi facta, Deus sparsæ per inania lucis
Semina vivificum Phœbi compegit in orbem.
Emicat ille alacer, rerum pulcherrima Cœlo
Ora ferens, ardens oculos, cursûque decoram
Cæsariem jactans, aurôque insignis & ostro.
Quem vitæ Genium, divæ quem lucis ocellum
Suspicit, & calidum prægnans Natura maritum.
Qui flammeis investus equis immania Cœli
Pervolat spatia, & duodena per astra volutus,
Alternas luci tenebras, brumamque calori
Continuam, certum rapit irrequietus in orbem.
Mox Lunam & stellas, nigræ solamina Noctis
Magna manus statuit, nativo lumine plura
Vivida, pauca almi radiis obnoxia Solis,
Nocturnum exhilarans gemmato emblemate Cœlum.
Discrevitque locis, & condidit orbibus orbes.

Quin ego lora premo, caligantésque profundo
Aspectu demitto oculos, terrâsque reviso?
Ut volucres primas tepefactæ effuderit undæ
Humida vis: stupære novis concentibus alni
Riparum, & raris sonuerunt plausibus auræ.

At genus æquoreum, phocæque & grandia cetæ,
Quisque alii tranant crysalla liquentia pisces,
Unda in gremio subiti crevere parentis.

Continuò

Continuò ruptâ pecudes tellure creatæ
 In vacuum venêre solum, quo primula tutis
 Gramina cum bubus placidi carpsêre leones,
 Permissâsque ovibus pavit Concordia tigres.

Deerat adhuc cui se lauto domus ampla paratu
 Subjiceret, & cum famulis fabrefacta supellex ;
 Cujus ope optatis Mundus se solveret ingens
 Laudibus, Authori vinco sociatus amoris,
 Gauderétque sui magnam cognoscere causam.

Ecce Deus magnum sibimet consultor, inivit
 Consilium ; Faciamus, ait, qui mente verenda
 Nos referat præclarum Hominem ; premat ille potente
 Imperio brutúmque pecus trepidâsque volucres,
 Regnator latè, liquidisque animantia Ponti.

Dixit, & argillam dextrâ pollente subactam
 Esse Hominem jussit, Mundi grave complementum.
 Materiem supplevit opus, nam Conditor almus
 Condidit effigiem divinam in paupere limo.
 Hinc amor Archetypi, celsóque admota Parenti
 Cognitio, compósque sui, sed recta voluntas ;
 Præteritíque simul memor & præsaga futuri
 Provida mens, sacróque sedens Reverentia vultu,
 Quadrupedum volucrúmque timor, Mundi que potestas
 Proxima supremæ, formidatúsque character.

Singula finierat, solio quum pronus ab alto
 Rex Superúm placido lustravit lumine Mundum,
 Arte fruens propriâ, sibimet mirabilis Author.
 Non ille immenso rerum molimine fractus
 Exactum projecit opus, factóque recessit ;
 Mirificúmve globum divinâ mente peregit,
 Ut foret insano quicum fortuna rotatu.

Luderet : Ipse Deus qui fecit singula, factis
 Imperat, & manuum tractat monumenta suarum,
 Non numero, non ille morâ, non mole fatiscens.

Strenua nempe quies vasto inviolata labore,
 Semper agit, proprio suspendit pondere Terram
 Ætheris in medio ; pelagi quatit humida fræna,
 Comprimit instabiles objectu littoris undas,

Creatorem Omnipotentem. II

Et mensurato celeres sufflamine ventos
Flare jubet, pluviz claudit referatque recessus,
Suscitat alipedes Lucis, Noctisque veredos
Circumagit, certis obliquat flexibus annum,
Ut servet sua signa sator, sua sydera messor,
Æstatique parem Phœbi secet orbita brumam.

Ergo laborantem magnâ vi sustinet Orbem
Dextra Dei, reparans constante propagine damna
Implacidæ Mortis; sibi mortua bruta supersunt,
Florésque, stirpésque, & decidui mortales,
Officio sobolis; vivacia semina surgunt,
Nulla suum mentita genus, quæ scedere certo
Et Cœli tepor arque soli tener educat humor.

Aspice convexo latè fulgentia Cœlo
Sidera, prægnantes foecundo nectare nimbos,
Terrai spatia ingentis, camposque liquentes,
Quas laxo Natura sinu pulcherrima pandit
Divitias; ubi non dextræ monumenta potentis?
Quæ vacat ora deo? quid non testatur amorem
Virtutémque Dei, magnum qui perpete cura
Servat opus, cui sancta sui dominetur imago?

At quamvis Furiis Dæmon instructus Averni
Divinam immundo speciem violaverit ungue,
Major in afflictis divina potentia rebus
Emicat; illa fores inferno poste revulsas
Pallentis Lethi cœlesti in limine fixit,
Rursus & è media pressit caliginè lucem.

Ergo sibi errorum fecit per devia callem
Gratia, qua major casûque illustrior ipso,
Enituit renovatus Homo, factûsque secundum;
Patritius Solymæ cœlestis & advena Terræ.
Hunc divinus amor blandè complexus, ocellis
Chariùs asservat, per lubrica Dædala Mundi
Lustantem implexos sursum contendere gressus,
Et patrio tandem servatum in limine sistit.

Nec tamen immensos oculos curamque sagacem
Effugiunt quos ipse later; non ille profanum
Securumque Dei neglectus negligit Orbem.

Sed quacunque vagus diffundit lumina Titan
 Per populos dat jura Deus, justosque periade
 Nutrit & injustos, pluit in blasphema benigno
 Ora cibo; donec scepro (mirabile) ferreo,
 Grandiloquos scelerum artifices, ceu fictile coenum,
 Sanguineosque fero confringat in ore molares.

Ille subalternas Cœlo fulgere coronas
 Curat, & aurato deductos stamine Reges,
 Cognatumque suo gaudet defendere culmen.
 Quondam etiam celsos apices devolvit, & imos
 Promittit ab obscuro, quos summi in luce theatri
 Protinus insueto vestit Reverentia vultu.

Non meriti, non te generis fiducia tollat
 Quisquis es; en Judex rerum qui tractat habenas
 Nos habet ut tales, numero quos ipse minore
 Vel majore notat; nec magna & digna requirit,
 Ipse facit dignos, sibi metumque est causa favendi.

O justum, O summi non perscrutabile Regis
 Consilium! qui quæ brutâ vertigine Mundus
 Multiplici temere perplexa ambage volutat,
 Ordine disponit tacito; cui iusta geruntur
 Cœlitus. injuste causis parrata secundis,
 Quisque hominum cæcis splendorem accersit ab umbris.

Euge quod ignari facitis præstate volentes,
 Sacra Deo soboles, insignis imagine divâ.
 Euge Deum celebrate Bonum, celebrate Potentem,
 Pangite Justitiæ non vestigabile textum,
 Consiliumque cavâ longè sub nube repostum.

Undique quâ roseo Titan se purpurat ortu,
 Aut vespertino nubes discriminat ostro;
 Quâ candente rotâ sitientes torret arenas,
 Aut ubi semestri glacie vix longa riger nox;
 Te rerum, Deus alme, Patrem gens omnis adorer,
 Corde pio, positoque genu, manibusque supinis,
 Linguaque devotæ referans penetralia mentis
 Immortale decus mortali voce celebret.

Summe Opifex, mihi qui divinæ particulam auræ
 Primitus indulsti, deformatumque reſinxti;

Heu me finge iterum : fac dignus origine magnâ

Sacrificem puras imo sub pectore fibras ;

Unde, Pater, puræ tibi fumer adorea laudis.

Me laudes Aurora tuas matura canentem

Andiat, & sero decedens Vesper Olympo.

Me populis memorante tuæ miracula dextræ,

Personet omne nemus, omnis lætum assonet Echo.

Donec post miseræ perrupta ergastula carnis,

Angelus in cœlis, citharâ spectabilis aureâ,

Dicam insigne recens, attento gratus Olympo.

Hymnus

H Y M N U S III.

*Et in Jesum Christum Filium
ejus unigenitum Dominum
nostrum.*

Quò me tumentem , Christe rapis tui ?
Quid palpitanti pectore fervidum
Exultat ? Ohe jam micantes
Est animus super ire zonas.

Hem parce , carro quo jubet impetus
Ardore sacro dulciter impotens,
Festinus alarum beatas
Remigio penetrare sedes.

Audire sanctos jam videor choros,
Longo canentes ordine Principem
Te Christe Mundi, te supremo
Progeniem similem Parenti.

O qui secundus pârque simul Deo
Regnas , & unus cum Patre Filius !
O qui coæterno perennas
Cum Genitore beatus ævo !

Tu Sermo , tu Mens , tu Sapientia
Summi Parentis : tu Deus à Deo :
Tu sola proles , cui Jehova
Nil genuit simile aut secundum.

Nondum profundo stabat in æthere
Librata Tellus ponderibus suis ,
Non mutua radice colles
Miscuerant lapidosa vincla :

Nondum caloris vivifici penum,
Non alma lucis munera limpidæ

Et in Jesum Christum.

15

Titan recludebat, rubente
Os nitidum radiatus auro ;
Quum tu paterno lumine fulgidus,
Lætas agebas cum Patre serias,
Solusque ditabas Parentem,
Ipse iuero locuples Parente.

En ut verendo magnificus throno,
Sacro decoris lumine gemmeus,
Lætos corona vibrat ignes,
Obsequium generans amore :
Splendore vultus mirifico nitens,
Divæ tremendus robore dexteræ,
Armisque, regalique quassans
Fulmineas humero sagittas.

Connata puro quem capiti beat
Lato coruscans Gloria firmate,
Cui nomen haud auri metalla
Aut pretium dederint pyropi,
Euge O curuli pacifica sedens
Faustus triumphæ, Maxime Cœlitum,
Præbente candentes utrinque
Justitiâ & Bonitate bigas.

Te circa ovariant millia millium
Præana grandi carmine concinant,
Cœlique percussi laboret
Aula sacro resonare plausu.

Exurge Cœlo, Justitiæ jubar,
Quovis renidens fidere dulcius
Terris, & aspectu benigno
Spes hominum refove jacentes,
Pendente nobis te jubar aureum,
Soles sereni ducimus aureos ;
Condente, mensam morte vitam
Tartareis agimus tenebris.

Quod non perimus muneris est tui.
In te movemur, vivimus, & sumus.
Vitæque, sperando beati,
Præcipimus melioris auram.

Per te scabellum quæ pedibus foret,
 Terram natantem stravit in æquore,
 Sedémque Cœlorum superbam
 Cæruleo laqueavit arcu
 Miranda promens ex tenebris Deus,
 Te iussu Verbo. Fecit amabilem,
 Tuimet exemplum secutus,
 Terræ Hominem mediūmque Cœli.

Ille ex creantis suave recens manu,
 Gnati decorus fulsit imagine,
 Parentis æternam creatâ
 Effigiem effigie reflectens.

At cùm verendam fœdus imaginem
 Orci satelles pœlluerit suâ,
 En Christus informem reformat
 Ad proprios velut antè vultus.

Te Christe fabrum, te Dominum sui,
 Te dignitatis prototypum suæ,
 Te gratus authorem salutis
 Dicat Homo, celebrétque, amétque.

Vix Mortis atris induerat plagis
 Caput scelestum, tu bonus exuis,
 Temétque promittens barathro
 Semianimem revocas Averni :

Te nempe plenis affore seculis
 Cedendo victorem, & pede saucio
 Draconis elisum prementem
 Sinciput, horribilésque chelas.
 Mox lacte verbi, & mollibus imperiis,
 Infantiam Orbis leniter educas ;
 Solósque, confusósque lapsu,
 Progenie recreas parentes.

Exinde Mundi, Maximus, Optimus,
 Robusta grandi lora quatis manu ;
 Legésque, mercedésque, pœnásque,
 Arbitrio sapiente condis.

Nam lætum inungens rore sacro caput,
 Rerum potentem te statuit Pater ;

Decúsque

Et in Jesum Christum. 17

Decusque & augustum decoris
Temporibus diadema cinxit.

Ergo Israël, nube latens cavâ,
Vocem imperantem desuper intonas;
Legemque proclamas magistrâ,
Fulmineo venerandus ore.

Loquente, laxis contremuit Polis
Emota Tellus, ignis edax jugis
Erupt, ardentes favillas
Et piceum glomerans vaporem.

Repente crebro nubila fulgure
Comprensa latè, cæruleos specus
Rupere, & horrendo tumultu
Infremuit sine more Cælum.

Furvos rotabat flamma rapax globos;
Audita cælo buccina fumidas
Clangebatur infandum per auras,
Semineci metuenda turbæ.

Heu nê, inquebant, grande loquens Deus
Vocis tremendæ non pariens lutum,
Lentâque compagem solutos
In cinerem minuatur nocentes!

Tu porrò Legem quando refert novam,
Læto serenus fœdere, fortium
Parcis loquelarum, & severos
A facie radios reducis.

Mortalis oris voce Deum sonans,
Demissa Cælo munera nuncias
Salutis, indutus nitentem
Ambrosiâ juvenem figurâ.

Qualis quieto fulget in æquore
Clarus videri, sed placidus tamen,
Titan reflexus; nec retundens,
Sed recreans oculos videntum.

Vel quale sudo limpidus æthere,
Mirè venustis Lucifer ignibus

C

Faustum

Faustum renidet, gemmeoque
Ambiguam facit ore noctem.

Salve diei Phosphore perperis,
Quem mox remoto carnis operculo
Solem fatemur, liberantem
Nocte oculos animamque morte.

Salve salutis Conditor unicæ,
Qui plus amoris vulnere saucius
Quàm militum armis barbarorum,
Te proprio decoras cruore.

Te per salebras, per vada lubrica,
Per tela, per tesqua Orbis inhospiti,
Crucis triumphantem tropæo
Consequimur, Cruce militantes.

En Christianus sanguis ut undique
Divo redemptus sanguine funditur
Contemptus, impinguatque campos,
Et trepidum pelagus cruentat.

Clausi carinæ fictilis alveo,
Vesipientis ludibrium sali,
Pœnæque, peccatîque, fontes
Ilicet obruimur procellâ.

Heu nè misellos sperne homines homo;
Nè facta dextræ sperne Deus tuæ:
Fratresque juxta subditosque
Serva Hominis medius Deique.

Tandem benigno fidere cœlitus
Singultientem respice Conjugem,
O qui colentum te fideli
Utre pius lachrymas reponis.

O quando carnis compede liberos,
Tui sacratos sanguinis unguine,
Reges Sacerdotesque magno
Propitius statues Parenti?

Tandem supremis fulguret ignibus
Nubes Olympo te reducem vehens.

Et in Jesum Christum. 19

Sis faustus ; optatæque longum
Rumpe moras propere diei ;
 Ultrice flammâ terribilis malis,
Bonis amœnùm lucidus aspici ;
Mundique convulsi fideles
Incolumes faciat ruina.

C 2 HYMNUS

HYMNUS IV.

*Qui conceptus est de Spiritu Sancto,
natus ex Virgine Maria.*

O Quos longa premunt hyberni frigora secli,
Tædia qui vigilēs infelicēsque tenebras
Vincitis excubiis, vobis pecorūque caventes,
Pastores ovium; vester si pabula verbi
Grex amat, & pernox felices ruminat herbas,
Maſti animis, qui curat oves oviūmque magiſtros
Advenit, & mediam diſtinguit lumine noctem.

Cernitis ut clarā devectus nube coruſcat,
Quem circum mites accendit Gloria flammas
Angelus, & ridente polum diducit hiatu,
Paciſero trepidum ſolvens ſermone pavorem.

En vobis placido fauſtus demittor Olympo
Nuncius, & toti quondam lætiſſimus Orbi;
Nāſcitur antiqua proavi Davidis in urbe
Ille laborantis dudum expectatio Mundi:
Qui Cœlum & Terram grandi moderatur habena
Induit infantem, Mater quem paupere panno
Fāſciat, & viles præbent præſepia cunas.

Sic fatiſ, niveis glomeratim adremigat aliſ
Progenies lucis, Geniorum turba volucrum,
Et cantu Cœlum omne cient, & laude canora
Concelebrant, tali malcentes æthera metro.

Te Deus immenſis exceluſum æterna coronet
Laudibus, & propria præcingat Gloria luce.
Aurea Pax Cœlo placidè deſapſa benigno
Incolat innocuas Terras, hominūmque volentum
Candida ſinceras perfundat Gratia mentes.

Succēſſere polo. Quid nos, quid noſtra moratur

Officia?

Officia ? O lætos citior nè Phosphorus ortus
Acceleret, puerumque Deum Sol festus adoret,
Quàm jubar Eoum Christi veneramur ovantes.

Salve magna Salus Mundi, lux alma remotis
Gentibus, atque tui justissima gloria Judæ.
Ingredere æterni soboles æterna parentis,
Nunc hominis nova progenies, quæ scødere miro
Suscipis humanam servato Numine carnem.

Hui ! quæ tanta fuit, summi Moderator Olympi,
Causa tibi miseræ reptandi in compede carnis ?
Tén' vermem impuris imi sub fæcibus Orbis
Demersum, terræ qui vicitat excremento,
Incolere ? fragilîne Deum te condere testâ ?

Nimirum facis historiam quæ fabula nuper,
Devinctum ingenti Sponsæ mortalis amore
Descendisse polo Superumque hominumque Potentem,
Humanæque suum Numen vestisse figurâ.
Huc amor, huc te Sponsa Deum deduxit amantem,
Illa tuâ Jesu redimenda Ecclesia morte.

O magna Angelicæ stupeant mysteria mentes,
Pennarum niveo tectæ velamine vultus,
Attonitis homines animis linguisque favete.
En Amor æternum socius Natique Patrisque,
SPIRITUS ipse DEUS, processio magna duorum,
Virginis in gremium puræ descendit, & almos
Implevit virtute sinus lætæque pudore.
Protinus intactæ, dictu mirabile, Matris
Virgineo divum concrevit sanguine semen ;
Quo tu, Christe, latens, hominem Deus induis, Author
Fis opus, & propriâ Genitor de prole crearis,
Ipse creans, Pater ipse tui, Pater ipse parentis,
Matris alens uterum foetus, gestansque gerentem.

O quam te memorem mulierum gloria Virgo !
Virgo salutanti Superum veneranda Ministro.
Primus amor Cœli, lucis Matuta beatæ ;
Magnus honos sexûs, Geniis miranda coruscis,
O quam parte sui condivit Graria quintâ
Nectaris, & capiti fragrantia balsama sancto

Coelitus instillat ; quo tu perfusa capillum
 Unguine , divinos latè virtutis odores
 • Spargis , & ambrosiæ decus admirabile frontis.
 Scilicet augustæ populos reverentia formæ
 Subjicit attonitos, quos Majestæte serenâ
 Lærificas terrésque simul, victûsque Cupido
 Lumina pura fugit castam vibrantia lucem.
 Non tibi completæ facies argentea Lunæ
 Par micat, aut roseos accendens Lucifer ignes ;
 Non gemmis radiata comas Aurora superbas,
 Et vario sudas pingens emblemate nubes.

Vos teneræ factæque procis idola puellæ,
 Cedite, non regit hæc vulgares forma recessus,
 Non oculi mortale micant, quum conscia Virtus
 Demittit placidos, fœtûsque capacia tanti
 Intentata pavent conceptum viscera Numen.

Felix virgo Parens, rerum fœcunda Parente !
 Quem penitus fœtum Fidei vitalibus auris
 Fers utero, sed corde magis ; cui pectus Olympus,
 Virgineûmque latus templum , sanctûmque tribunal.
 Ecce satellitium summi regale Tonantis
 Te Legio Dominam stipat prætoria Cœli :
 Prægnantemque thronum Domini pia turba tuetur.
 Mox ulnis decimo faustum te mense jacentem
 Sublevat, & dextras tibi porrigit obstetrices.

Illustres stabuli latebras ! præsepia clara
 Cunarum officio, collucentésque tenebras !
 Angusto cedat tegeti tua regia Cæsar.
 Imperiosa truci cedant Capitolia mole.
 Hic micat æterni divina infantia Christi ;
 Hic revehens Mundo melioris secula lammæ,
 Una Dei soboles ; ingénsque puerpera Virgo,
 Et pecudum circà venerans timor obstiparum.
 Hic non visa priùs, nec post spectanda coruscat
 Stella salutiferi felix anteambulo Regis.
 Ecce novos oculos aperit, nova lumina Cœlum,
 Divinûmque larem curâ propiore tuetur.

Protinus astrorum gens consultissima, stellam

Insuetam

Natus ex Virg. Maria. 23

Insuetam stupuere Magi ; non æquore tingi,
Sphærarum rapido non se committere gyro,
Sed signare novum vicino lumine callem.
Ergo sequi quâ monstrat iter, magnûmque Salutis
Vestigant famulo signatum fidere sidus.
Nulla quies, mora nulla piis stellamque secutis,
Donec in oprato stabuli se culmine listat.

Ut ventum divi plebeia ad limina Regis,
Inclines puero vestitum Numen adorant :
Thesaurósque graves auro, myrrhæque suaves
Apponunt genibus lachrymas, & idonea Christo
Thurea dona Deo, virgæ sudata Sabæ.
Sed Pietas alio sacrabat aromata thure,
Et statam fidei & casiam spirabat Amoris.

Altera nascenti quid cessat munera Christo
Funderè luxurians cornu Natura beato ?
Et fragrante rosâ, & puniceo hyacintho,
Vernantes inspersa sinus, redimita capillos,
Et vario lætùm sibi discolor indumento.
Floribus implexæ texant cunabula fruges,
Strata croco, laurique vagis illusa corymbis.
Scilicet hoc quondam juvenescet Principe Tellus,
Sole novo splendens, flammisq; recocta supremis :
Fundet ager segetes nullo violatus aratro ;
Aurea flumineis pendebunt mala salictis :
Sponte suâ, stimulisque rosæ nascentur inermes.
Horrida nectareis mitescet spina racemis.
Lilia pro tribulis, pro rusco laurea surget.
Mutabunt steriles latè pomaria sylvas.
Conversæ solido rupes adamante micabunt.
Et crocei lætis spargentur nubibus imbres.

Sic tibi, sic festo quondam regnetur in Orbe ;
Et seclî æternùm potiaris Conditor auro :
Te duce Virtutum confundant oscula rurmæ,
Alternisq; Salus Fidei complexibus hærens.

Euge ! decus sacrum quo te Deus alme coronas,
Quære iterum nunc factus Homo : tibi Gloria surgat
Per trepidos casus, per virtutésque, dolorésque,

Et splendor tenebris, & surgat vita sepulchro.
Interea trepido submissi corde genúque,
Te Puer immensum colimus paupercule Numen,
Et pedibus proni libamus basia parvis.

O cui participem placuit te reddere nostri,
Participes nos redde tui : vicibúsque benignis
Mentem, Christe, tuam nostrá pro carne repone.

HYMNUS

HYMNUS V.

*Passus est sub Pontio Pilato
crucifixus, mortuus.*

Quò premitis populi, totis quos Regia valvis
Vix recipit densos humeris, tardósque ruendo ?
Nempe salutandum natali Cæsar in ostro
Sese offert, nitidos urget cui laurea crines,
Ingenuam viridi laurum mentita smaragdo,
Purpureum medius Procerum, ceu ducit Olympo
Illustres Diana choros, illustrior ipsa.

O vanas hominum mentes ! O vana securas !
Siccine pendentes stupeatis arundine quassa,
Frivola quam vestit perituri gloria fuci ?
Huc oculos, populi tandem contendite rectos ;
Hic major Salomone, throno quum fulget eburno
Aurea cui gradibus surgunt anabathra superbis,
Stant solidi ex auro bislenni utrinque leones.

Hic Deus humanos non dedignate dolores,
Candidus & proprio rubicundus sanguine fulges,
Et Regum exstinguis victrici morte triumphos.
En Erebus Christi prostratus morte, profundum
Murmurat, & fracto nequicquam dente coruscat.
En fremit infernus collisâ fronte satelles,
Sub pedibus Rex Magne tuis, calcémque terentis
Ore terit, pressis stridente molaribus iras.
En Mortem propriâ confossam pectora falce.
En Scelus & Sceleris comites à stirpe revulsos
Tartareâ ; fugiunt pacati finibus Orbis,
Improba vipereos quatiens Discordia crines,
Incurvûsque Labos, tectóque Infamia vul-u,
Et titubans Pavor, & lugentia monstra Dolores
Innumeri, flagróque furens Vindicta cruento.

Parte aliâ canâmq; Fidem, Pacémque serenam,
 Fundit ovans divo Tellus respersa cruore.
 Justitia & Bonitas adsunt Par nobile Cœlo ;
 Stat media ambarum Vitæ mirabilis arbos,
 Crux Domino insignis, Nemesique maritat Amorem,
 Astra Solo, Morti Vitam, Pœnâmq; Saluti.

O Deus æternâ decoris radiate coronâ,
 Temet amans temetque beans, quo maxima rerum
 Perstat, & immoro series Rectore moverur.
 Têne tuum Numen, quod Gloria crescere summa
 Haud patitur, potuisse attollere demittendo ?
 Supremûmq; decus summum per dedecus auges ?
 Ut quondam in tabula pictor sic lucida fuscis
 Temperat, ut vivens umbris exurgat imago :
 Aut ubi terribili contorquens fulmina dextrâ
 Alcitonans, piceis eructat nubibus ignes,
 Acrius implexæ rutilant fuligine flammæ :
 Talis lethiferis effulges, Christe, tenebris,
 Major adhuc factus quàm Maximus ; ipse dolorum
 Fons tibi melle fluit, luménque accenditur umbrâ.

O quicumque sacra carpis de Morte Salutem,
 Huc ades, hanc lætis simul & miserantibus hauri
 Mortem oculis, lachrymâsq; Dei cum sanguine misce.
 Aspicias ut mortem solo nocturnus in horto
 Præcipiens, imis transfixa per ossa medullis
 Sentiat irati flammantia tela Parentis ?
 Scilicet ægra coquit dirus præcordia fervor,
 Quo nitente foras totus sudore cruento
 Liquitur (infandum, & nulli spectabile seculo)
 Excoctisq; rubens venis exuberat humor.
 Sic sceleris nostri moles gravis incumberebat,
 Ut cruor expressus vegrandis pondere præli
 Curreret, & Terram divinus tingeret imber.

Protinus armato stipatus milite, gnaro
 Lethifer occurrit Furiis accensus Iudas ;
 Monstrum hominis, nulli non execrabile seculo,
 Vejovis inferni soboles, pejorque parente.

Ille dolis instructus, hero, falso ore renidens,

Oscula dat, multam dicens adimēnsque salutem.
Cætera turba ruit, Jesúmque hoc indice vinculis
Impediunt, Annæque inimica ad limina trudent,
Mox Caiphæ. Stetit in sævo divina Senatu,
Nec flexit Proceres sanctæ reverentia frontis.
Crimina vana simul, nullo conficta colore,
Allecti falso falsi sub Iudice testes
Improperant Justo; tandem Justoque Deoque
Obfuit esse Deum, nocuit Justúmque Benignúmque,
Æternúmque genus dictis factisque tueri;
Hoc crimen fuit, hoc flagris & cæde piandum.
Consurgunt incensi animis, ludibria dio
Ingeminant capiti, sputisque alapisque petitur
Ad fera Romulei Proconsulis atria raptant.

Ille Deum, melior Phariseo iudice, sensit,
Expavitque reum: Scribæ clamore fatigant,
Et justum damnare adigunt, & tradere morti.
Ante tamen vivo lustratis flumine palmis,
Sic, precor, innocui purus sicut sanguinis, iacuit.
Judæi huic contrà, Nobis sobolique perennis
Hæreat. Audivit qui Terram & sidera nutu
Quassat, & iratus voti damnavit iniquos;
Ergo gravis soboli serisque neporibus hæsit,
Ipse sibi horrendum Judæâ cæde parentans.

Ast ubi damnatum sensit perjurus Iudas,
Uritur ultrices gestans in pectore diras,
Ætatēque suam furiatāque devovet ausa.
Tum sceleris nummos irritamenta nefandi
Projicit impatiens, sævum si pectore possit
Excussisse nefas; sed Pax fugit alma scelestos:
Ergo Deum, & semet, lucēque exosus iniquam,
Elidit sceleratam animam; faucēsque revinctus
Infelice malum vibratur ab arbore pondus:
Viscera tensa crepant, stimulisque latentibus ardens
Rumpitur, & laqueo pronus demittitur Orco.

At latus ambrosium morti damnatus Iesus
Romanis patiens violandum fascibus offert.
Cœlicolū parent cui millia mille Monarcha

Se ludos fieri patitur, fannisque malorum
 Servorum excipitur, Regisque irrisus honore,
 Coccineam jussus sumitque & ponit abollam.
 Pro radiante Poli, plexas diademate sentes
 Gestat adorandum Cœlo caput ; ergo coronam
 Ornat, & ex falso verum deducit honorem,
 Ingenuâ Regem se Majestate coronans.

Jâmque satis ludi, sitit impia turba cruorem.
 Ducitur immani sub pondere Christus anhelans
 Et crucis & nostri sceleris ; non ille dolores
 Detrectare Crucis, vel se subducere Morti.
 Atqui aderant Domino, si quid jussisset, in armis
 Angelicæ præstò dextrâ levâque cohortes.
 Spectabant arrestæ animis, fixisque micantes
 Luminibus, divi quo se patientia Regis
 Verteret, infernos debellatura dolores.
 Et Crucis obstipæ mysteria scrutabantur.

Interea medius fatali in stipite vinctus
 Tollitur hinc atque hinc palmas confossus Iesus,
 Extantique ambas confixus in assere plantas.
 Subsiliunt toto labefacti corpore nervi.
 Æstuat ebullans terebratis artubus ichor,
 Rore pluens sacro, & Terrâ sitiente receptus
 Expiat injusto violatam sanguine Terram.
 Ergo Salus riguæ gremio Telluris oborta
 Pullulat, & justo tandem placata cruore
 Justitia, & discit Terris inolescere Cœlum.

Te tamen, O tantæ pretium vindæque Salutis,
 Irarum quatiunt decumanis fluctibus undæ ;
 Quas Pater humano repetens de crimine pœnam
 Accumulat, quas turba furens, quas Dæmonis atri
 Virus atrox. Tanti fuerat moliminis Orbein
 Tartareo sceleris constrictum exsolvere vincolo.

Vidit, & avertit ora indignantia Titan,
 Involviturque suos velis horrentibus ignes,
 Pullatus moriente Deo, lucemque perosus
 Ipse suam, & Cœli non dignas lumine Terras :
 Cùm nec in Occiduo properaret limite currum

Solvere,

Solvere, sed medii spatio sudaret Olympi ;
Nec Phœbe opposito fraternam pectore lucem
Præriperet Terris, alio sed plena sub axe.
Sol quoque Iustitiæ lethi feralibus umbris
Mergitur, at mersus non occidit ; immo nec ullam
Eclipsin patitur, sed lumen continet ultro.

At sua configi spectabat viscera Mater,
Heu tristis Mater, gladio trans pectus adacta ;
Hanc oculis Jesus in morte natantibus ægram
Respicit, & curâ nunquam moriente, Johannem
Orbæ substituit comitem Natûmque Parenti.

Nec stetit hîc divinus Amor ; servare latronem
Pœnarum socium, sociûmque adsciscere regni
Curat, & ignosci fixus figentibus orat,
Quémque malè effundunt parat illis sanguine vitam.

Ast ubi complevit patiando oracula vatum,
Auxilium supplex dextræ ferientis adorat,
Orâque robusto gemitu morientia solvens,
Efflavit divinam animam clamore jubentis,
Sèque suæ Dominum vitæ mortisque probavit.

Protinus emoto latè fundamine Tellus
Contremuit, rupti lapides, cautésque vetustæ
Egêrunt grandes laxâ compagine rimas.
Scinditur oppositum Templi penetralibus imis
Velum augustum ingens, & claustris spontè reductis
Non aspectandi vulgo patuère recessus.
Surrexêre Patrum longâ compôsta quiete
Jussa sepulchrorum de molibus antiquorum
Corpora, & horrificæ passim erravêre figuræ.

Territa dirigit magnis gens impia monstis.
Et priscum timuère Chaos, gelidûsque per artus
Horror anhelantes & conscia corda cucurrit.
Pars melior juga mota quidem, dirâsque tenebras,
Sed magis innocui portentum sanguinis horret ;
Et manibus rursæ liventia pectora matres
Ora rigant lachrymis, & mœsto murmure vulgus
Dant victas tibi, Christe, manus ; te, Christe, fatentur
Naturæ Dominum, quo Sol patiente labori

Deficit,

Deficit, & fessi luxatur machina Mundi.

Inventus tamen indomito qui pectore saxa

Vinceret ad Christi mortem dirupta, larúsque

Exanime intortâ crudelis rumperet hastâ.

It cruor, & cæso vivax de pectore lympha,

Ambobúsque fluunt præcordia sacramentis.

Felicem O duplici saturatam nectare Terram !

Sanguineis vitreo distinctis flumine venis.

Tale rubet pratum roseum quod manè salutar,

Quam teneras gemmis ros almus acuminat herbas,

Quas vix dimidiis nascenti lumine Titan

Purpurat, ambiguo varians crysalla pyropo.

Euge salutifero foecundum vulnere pectus !

O geminos uno fundens de fonte liquores !

Sanguineo nos rore pia, lymphisque lavato :

Sanguine poena gravis peccati, & sanguine labes

Eluitor, labésque prius quàm poena facessat.

Maxime cui trepido nutavit cardine Mundus,

Et pavidæ venis rupes crepuère solutis,

Heu pigros animos, divinâ morte tremendus,

Succutez & ingenitam duro sub pectore cautem

Contere, contrito ducens de corde triumphum.

Mentibus heu fractis clemens illabere victor,

Devictæque viam carnis tibi sterne ruinâ.

Horreat heu ! nostro contractas crimine poenas

Saucia mens, clavisque tuis & cuspide fixa.

Mox oleo recrea divini sanguinis ægram,

Salvifico lateris vitam de vulnere fundens.

HYMNUS

L.
L.
N.
Pa.
Hi.
Sib.
To.
Fre.

HYMNUS VI.

Mortuus & sepultus.

MOrose Titan, rúque lugentis Poli
 Pullata facies, & tibi Tellus gravis,
 Succussa pigrum motibus trepidis latus,
 Obambulánsque horrenda Manium cohors
 Tumulis citata; rúque ruptarum fragor
 Moriente Christo rupium, O jam parcite;
 Satis tremoris mentibus datum & solo.
 Sol redde lucem, dum suo componimus
 Jesum sepulchro. Terra parce motibus,
 Liceat quietis ossibus recumbere.

Josephe propera pendulum refigere,
 Felix opimas tollere exuvias, Deo
 Etiam calentes; ferto Nicodeme opem,
 Incipe diurnus Messiam sectarier.

Tu mœsta Nardo Magdalena tempera:
 Nec delicatis balsami sudoribus
 Myrrhæve lachryinis mortuum unge, sed tuis;
 Et cinnamomi suppleat vices amor,
 Thuris Sabæi cor pium, stactæ fides;
 Tibi ordo totus aggemat fidelium,
 Eadémque tecum conferant aromata.

At luctuosis temperate lēssibus,
 Lachrymis parentet sola Pœnitentia;
 Lugere Christum qui Deum credit nequit.
 Non ingemiscant Messæ, gemant sibi
 Passæ capillum filiæ Jerusalem,
 Hic Mortis atris exsolutus cassibus,
 Sibi superstes, & cruore proprio
 Torvè decorus, Vejovis Strygii tremor,
 Frementis Orci victor exiliet specu;

Et quod cruentis asperatur sentibus,
 Recline, pallens, lictibúsque luridum,
 Penetrabit astra mox revicturum caput,
 Radiísque divæ fulgurabit gloriæ.

Vobismet ergò, filix Jerusalem,
 Natísque vestris ingemiscite, non Deo.
 Uteros tumentes perperámque lacteas
 Ferite mammas, heu ! genus ferax malè,
 Ferro, rapinis, servituti, vinculis,
 Pestis, famique, ergastulo, cruci, fugæ,
 Cruento arenæ barbaræ ludibrio !

Nempe instar illa sanguinis vindex dies,
 Quæ cæde cæso justa solvet Messix ;
 Totámque ab imis erutam radicibus
 Gentem, rapaci Martis horridi impete
 Vertet ferétque, qualis incubuit solo
 Eurus sonoro rura verrens turbine,
 Solidásque latâ clade sternens fraxinos.

Jamjam severi dexteris ultricibus
 Aptantur enses ; jam fremit Latio ferox
 Rabidis Enyo dentibus crepans minas ;
 Mox Aquila curvis involabit unguibus,
 Ingens, vetusta, cædibus nullis satís
 Potis rigare sanguinis siccam sitim.

Heu quanta lævis excidí prænuntia
 Portenta Cœlis ! æthra quàm minacibus
 Caperata rugis triste & infandum rubet !
 Solymæque dirus ensis imminet super,
 Ignitus, horrens : quódque majus prodigís ;
 En mitis ille Titus invitus furit,
 Cogente fato. Singula invadit Furor ;
 Aras Sacerdos immolatur ad suas,
 Proprióque sacrum extinguit ignem sanguine.
 Pereunt cruentâ cæde dulces liberi
 Ante ora patrum, ante ora natoꝝum patres ;
 Ulnísque in ipsa morte adhuc tenacibus
 Peritura matres implicant pignora.

En ut perempti in mutuis amplexibus

Avent miselli conjuges confundere
Animas calentes ; Virgines bis occidunt,
Nec antè ferro quàm priùs libidine,
Paucae beatæ quæis licet castis mori.
Non vagientum, non senum capularium,
Agnoscat ensis fervidus discrimina.
Stagnant cruore porticus, fora, atria,
Sionis ater colle rivus defluit,
Quem mox rotati compitatim incendii
Exsiccat ignis : fumus abscondit diem,
Sed flamma reddit, flamma singulis repens
Stridente rectis intonata turbine.
Ruit illa Templi quæ pater Terra inclyti
Verenda moles, Gentium & Judæ timor :
Ardet vetustæ regium gentis decus,
Ingensque Solyma tota fit rogos sibi.

Has, Christe, morti reddat inferias tuæ
Scelerosa turba : dum reget Phœbus diem,
Noctemque Phœbe, cædis infandæ scelus,
Dirisque Nemesis sæviens ultricibus,
Seris perennis hæreat nepotibus.
Sic semper hostes, Christe, sic pereant tui.

At qui nefandis sempiternus hostibus
Incumbit ultor ; ille pœnitentibus
Piisque sanguis expiator hæreat ;
Ipsoque diræ cædis expiet reos.

Nos, heu fatemur, heu Redemptor unice
Ignosce fassis, nos tuæ cædis rei :
Te scelere nostro fiximus Regem Cruci,
Superis tremendum : hæc hasta confodit latus,
Hoc felleum acetum est, hîc trabales malleus
Manuum pedumque nervæ compagini
Clavos adegit : Tu tamen nocentibus
Quas sauciârunt porrigis miserans manus,
Et mortè mortis redimis authores tuæ.

At te scelestis parcere, haud sceleri decet,
Nosmetque nostrum persequi decet scelus.
Tuum ad sepulchrum, Liberator unice,

D

Quod

Quod expiasti sanguine occidat scelus.
Hic Livor ater, hic Amor cæcus sui,
Hic impotentis æstus Iracundiæ,
Rupto tumore Fastus extremum crepans,
Alasque fractus impudicus Aliger,
Hic Fraudis artes, hic opum Bulimia,
Ditum Tyrannis, pauperum furacitas,
Frontemque rugis asperata tetricam
Rixa immoletur; Comus hic, Gula, Alea,
Hic turpè titubans Crapula ultimum cadat.
Sic semper hostes, Christe, sic pereant tui.
Tuum ad sepulchrum, Liberator unice,
Hæc monstra dira penitus, hi nefarii
Maſtentur hostes, his parenterur tibi.
Munus tibi istud esto bustuarium.

HYMNUS

HYMNUS VII.

Descendit ad Inferos.

EN viræ Dominus potensque Mortis,
 In cæci penetralibus sepulchri,
 Clausis morte oculis, jacens supinus,
 (Quod Mundus venerans, & intuentes
 Obstipo capite Angeli stupefiant)
 Regnum mortuus obtinet silentum,
 Regnator Superorum & Inferorum.

Ecquid Dæmonibus tuis catenas
 Sub caligine perpetes Averni
 Jam jam incudibus audiens crepantes,
 Nigri Vejovis aula contremiscis ?
 Nempe hic est, tetrici Tyranne Averni,
 Quem durâ attenuare perstitisti,
 Tentator vaser, esuritione,
 Per tesqua horrida bis dies viginti ;
 Ut cum carne animis fame solutis,
 Mox technis subito omnibus peritus,
 Præberet facilè tibi triumphum.

Hunc tu præcipitem ex domo Parentis
 Ut sese daret ausus es jubere.
 Quin hunc omnibus Angelis verendum,
 Tu turpissimus omnium rogasti
 Ut pronus tibi cultor advolutus,
 Te rerum Dominum juberet esse,
 Prorex scilicet Orbis universi
 Sub te Rege latrone mox futurus.

Hunc ut tu malè perderes, appellas
 Judæos Furiis agens cruentis,
 Romanum quoque militare vulgus
 (Hui ! crudele genus, genus profanum)

In sanctum caput unus incitasti,
 Ut flagris lacerum, horridumque spinis,
 Suffixum rigidæ Cruci necarent.

O qui conditus angue, belluarum
 Versutissimus unus audiebas,
 Quàm tu bellua bruta, belluisque
 Appares magis esse belluinus!
 Qui molimine maximo, tuopre
 Jumento tibimer malum attulisti.
 Hunc jejunia, flagra, sputa, fannæ,
 Sudor sanguineus, Crucis dolores,
 Clavi, spinæque, poculumque æeto
 Diluti malè fellei veneni,
 Et Mors denique, Mors pudenda, acerbæ,
 Perfecere bonum, addidere forti
 Victoris decus, attulere digno
 Evectam super astra dignitatem.

Hæc ipsâ Cruce, ceu trinode clavâ,
 Perfregit tibi, virulente Serpens,
 Perjurum caput, hui! caput malorum,
 Et fractum licet, atque vix cohærens,
 Heu vivax nimis & nimis nocivum,
 Frendens dentibus, asperumque morsu:
 Frustra, nam velut Israël's ægris
 Diris moribus anguium igneorum,
 Serpens reddidit æneus salutem
 Desperatam, oculo appetente visus;
 Te morsusque tuos, maligne Serpens,
 Conspectus Fidei supino oculo
 Imbelles facit irritosque Jesus.
 Quodque omnes Superi Inferique, vultu
 Pulchrum prodigium stupente cernant,
 Quod plùs tu stimulo arque dente sævis,
 Hoc plùs viribus & decore præstant
 Christi Discipuli, ut priùs Magister.

At jam quassa labat tibi Tyrannis;
 Jam nutans tremit, hinc & hinc vacillans,
 Portendens sibi proximam ruinam.

Descendit ad Inferos. 37

Tu de sidereo axe devolutus,
Prono vertice Terreum imperisti
Orbem, pondere saucium cadentis.
At te longius haud ferente Terrâ,
Devolvere modò in Stygis barathrum,
Infra quod nihil est loci malique,
Quo possis malè tertiumque volvi.
Illic sulphureo lacu ustulatus,
Torrenti pice luridâque flammâ,
Exhalante olidam tibi mephitim,
Et noxis gravis, & gravis catenis,
Tormentum hoc tibi sponte solus addes,
Urentem invidiam, tuis cruentis
Elapsum unguibus horridisque malis,
Suspectans procul Imperi coruscum
Cœlestis solio & decore Jesum.

D 3 Hymnus

HYMNUS VIII.

*Tertia die resurrexit à mortuis,
ascendit in Cælos, sedet ad
dexteram Dei Patris Omni-
potentis.*

O Qui diras dans alieni
Sceleris pœnas, tota scelesti,
Iuste Redemptor, persolvisti
Debita Mundi, divinus præ
Hominum generistorius unus;
Cum tu nec asse sis onustus ultimo
Immanis hujus debiti,
Cur tu severo Mortis hæres carceri
Post exsolutum debitum?
En tibi, pacato veniens à Judice, listor
Aliger excusso referavit cardine limen
Durum, luctiferum, non exorabile Lethi.
Indignata suis captivum Terra teneri
Visceribus Dominam, sua jam penetralia pandit,
Surgentique Deo, devolventique ministro
Saxea claustra favet, magnos emota per artus,
Et quasi parturiens cæcis concussa cavernis.
Agedum prodi Mortis specubus
Dominus vitæ victor ab imis;
Téque Tonantis summi Natum
Dominâ Lethi virtute proba.
Nam te præter nemo arbitrio
Quisquam proprio posuit vitam
Sumpsitque iterum; mortuus ultrò;
Spontè resurgens. Téne sepulchri

Clauſur

Resurrexit à mortuis. 39

Clausum tenebris lux exoriens

Tertia cernat ?

Præverte Solis Sol melior diem ;

Vulta tenebras discute fulgido :

Attolle matutinus almos

Vivificæ radios diei.

En dulce ridens Luciferi vice,

Te Christe Solem Justitiæ præit

Accensus alarus , rosisque

Pallidulum rubefecit Ortum ;

Vestis verendæ syrma trahens sacrum,

Candore puras exuperans nives ;

Latéque vibratum coruscat

Ex oculo radiante fulgur.

At mentis impos barbara militum

Custos sepulchri contremuit cohors ;

Et luce perculsi stupendâ,

Semineces populêre terram.

Lux nempe Christi percutit impios,

Piis serenum vivida conspici ;

Seclique bubones supernâ

Cæcutiunt pereuntque luce.

Interea Lethi Jesus eduxit ab antro

Sanctum animæ hospitium, divâ virtute recoctum ,

Augustum , ambrosium , nulli tractabile damno.

Et cum linteolis quicquid mortale, Deique

Haud ultrâ patiens tumuli sub mole reliquit ;

Jam Cælum spirans , Cælum, patriamque, Patrémque,

Cœnosam despectat humum ; Sed grande Saluris

Perfecturus opus, perfusurusque recenti

Lætitiâ Matrémque & Discipulos lugentes,

Distulit in Cælum reditum ; paucisque diebus

Indulsit semet Terris, fideique suorum,

Ora admirantum redivivi nota Magistri.

At nunc repetit Natum Genitor,

Bisque viginti Fidei jussit

Satis esse dies. Nunc ætherio

Corpore Christus vix terrenas

Patitur fæces. Nunc cœlesti
 Proprius Terræ turbidus ær
 Est alienæ spiritus auræ.
 Nunc Angelicæ Domino turbæ
 Decertanti nuper famulæ,
 Victoris avent ora tueri.
 Nunc Cœlicolûm sacra Spirituum
 Millia, poscunt Mortis avaræ
 Claro spoliis ducere festum
 Læta triumphum.

Ergò sequens vocem Christum sitientis Olympi,
 Protinus ut postrema suis mandata reliquit,
 Emicat, & nullo vectus super æthera curru,
 Ut quondam ignitæ vatem rapuere quadrigæ,
 Sed raptus virtute suâ, fursum æthera tranat
 Arduus, oppositas transcendens vertice nubes.

Procumbunt comites, cursûmque volantis adorant,
 Dum licet, ardentes oculos lachrymisque madentes,
 Brachia, distentâsque manus, & hiantia fursum
 Ora intrendentes: donec spectantia nubes
 Lumina corripuit, divum discludere jussa
 Nec mortali ultra spectandum lumine corpus.

Ut flos aureolus calendarum.

Quum Sol Hesperio latus cubili
 Fessum deposuit, sinum micantem
 Lugens contrahit, & recline collum
 Languens dejicit, haud purans relicto
 Vitalem esse sibi absque Sole vitam:
 Solem languiduli suum latere
 Moerent Discipuli exeunte Christo;
 In Cœlum licet, at procul remoto,
 Illuc unde negant redire quenquam.
 Atqui spes erat ut nigrantis Orci
 Ruptis postibus, hostiûmque victor,
 Æternum decus, æviternus ipse,
 Regno Rex stabiliret Israëlis,
 Rector Gentibus omnibustremendus.

At dum mista gementium

Admiratio

Admiratio questibus
Mentes ingenuas quatit,
En Lucis soboles, duo
Cœli Principis Angeli,
Albo firmate gemmei,
A Rege alloquium suo
Solaménque ferunt pium :
Quid vos attonitos Polo
Figentes oculos, \ iri,
Statis ? Qui petit æthera,
De Cœlo repetet solum,
Quo Cœlum perlit modo.
Hæc oracula mentibus

Excepère viri certa fidelibus.

Permulsitque animos Fides,
Firmatúmque Dei scedere gaudium.

Dicite Cœlicolúm cœlestia gaudia linguæ,
Quantis alta Poli reboaverit aula triumphis,
Quantáque Seraphicæ celebrârint júbila mentes,
Quum trepidans plausu convexi regia Cœli
Victori Regique Hosanna Hosanna sonaret.
Amplexúsque Patris semet Natúmque beantis,
Et secum à dextra sublimi in sede locantis.
Dicite Cœlicolæ, vobis hoc muneris esto,
Spectavistis enim. Nobis heu ! carnis opacæ
Fæcibus immerfis, & iniquo pondere pressis,
Enarrare nefas festi magnalia Cœli.
Nemo oculo fluxæ lustravit carnis, honores
Delatos reduci Nato, æqualésque Parenti.

Hoc Fidei satis esto, sedere Hominémque Deúmque
Dilectum æterno, similem, dextrúmque Tonanti,
Salvifici fontem meriti, quo pondere lanci
Judicis imposito, vincit delicta suorum ;
Concilians homini Numen, precibúsque favorem
Ingenuis, tandémque beans pia pectora Cœlo.

Protege, Christe, tuo partam tibi sanguine gentem.
Te Dominum Sion. Dominum te Mundus adoret,
Propitium justis, conculcantémque malignos.

HYMNUS

H Y M N U S I X.

*Indè venturus est ut judicet vivos
& mortuos.*

Qualis absentis cupiens mariti,
Heu procul longum peregre morantis,
Nupta cui castum generosa pulsar
Flamma pudorem,
Phosphoro tardum veniente Sponsum,
Hespero Sponsum redeunte luget,
Et jacens Sponsum viduo requirit
Frigida lecto.

Tædium pigrae nequit illa noctis,
Et nimis longæ tolerare lucis;
Littora & fluctus nihil audientes
Questubus urgens,
Et notans longè numeransque vela,
Conjugem si quæ referant morantem,
Singulas venti variantis aure

Excipit auras.

Talis ad æternum spirans Ecclesia Sponsum
Uda tenet patrio lumina fixa polo.
Nempe bis octonum superans absentia seclum,
Pectora sollicito mœsta dolore premit,
Téque fidemque tuam promissi, Christe, tenacem
Invocat à reditu pendula tora tuo.
Et quàm longum, inquit, Cœlore Sponse reversurum
Operior, viræ Vita Salusque meæ?
Operior certè, & vivo quodd vivere fas est
Viventi reditus spèque fidèque tui.
At quot fessa malis, quantisque erroribus acta!
Et peccati atrâ quàm labefacta lue!

Hinc

Hinc Mundi rabies, illinc pellacia carnis,
Et bellum Dæmon hostis utrinque movet.
Dúmque meus pro te sociatum Dæmonè Mundum,
Et carnem, & Memet vincere certat amor,
Sæpe tuâ, licet amoti, virtute triumpho,
Sæpe meâ viacor debilitate cadens.
Non habilis sine te, nec tecum vincere digna,
Exterior varias, Conjugis orba, vices.
Parce precor, non orba queo nec sola vocari,
Juncta tibi æterni fœdere conjugii :
Quanquam orbx propior, dum Sponsi ab sede remora,
Nec tua sunt oculis ora videnda meis ;
Nec licet alternas audire & reddere voces,
Figere nec dextræ basia fida tuæ.
Blanda nec optato circum dare brachia collo,
Nec mirari oculos sidera fœulta meis.
O cùm summa tuo reditu mihi gloria surgat,
Nixâque pollicitis sint mea vota tuis,
Rumpe moras, Sponsæque animam refove languentem,
Accendens reditûs lumina viva tui.
Devehitor rutilo densa inter nubila curru,
Alipedes ventos ad tua fræna vocans.
Me puram, similémque tui, dulcissime rerum,
Aspectu præsens effice, Sponse, tuo.
Aut lateri vivam renovato corpore junge,
Aut tecum ut possim vivere, coge mori.
Dum loquor, obscuras distinxit purpura nubes,
Et sensim aurato rutilârunt nubila limbo,
Ignibus ex furvâ passim erumpentibus æthra.
Nec mora, quâ vasti patet ardua regia Cœli,
Fulmineis latè radiis exarsit Olympus.
Cernimus ? an gratam sperati limitis horam
Anticipat Christi in nimbis fulgentis imago ?
Ecce sedet medio sublimis in Iridis arcu,
Ducentis miros æterno à Sole colores,
Splendidus ignito narivi luminis auro,
Extinguens Solem radiis, Sol unicus Orbi :
Et solidum liquidis firmans sibi nubibus axem,

Quadrijugis

Quadrijugis dat lora volans super æthera ventis.
 Mox currum mutans folio, sacroque verendus
 Ore, dat immotâ se Majestate videndum :
 Scilicet attonito pœnas & præmia Mundo
 Et tandem extremi solemnia jura ferentem
 Judicii. Modò fiderei subsellia Scribæ
 Implent ; codicibus cœlestis Curia magnis
 Instruitur, cœloque frequens celebratur aperto.

Judicium ad magnum, summique ad Judicis ora,
 Fulmineæ clangore tubæ tonitrûque tremendus
 Angelus ire jubet, Cœli quicunque sub axe
 Aut habitant Terras, aut æquora cœrula verrunt.
 Emissâsque animas, artûsque in Morte rigenres,
 Conjungi jubet ; & folio se sistere Christi.
 Audivit trepidans latèque exterritus Orbis ;
 Audivit Natura sui mandata Monarchæ.
 Producuntque animas ad mortua corpora retro,
 Et Cœlum candens, & nigri regia Ditis.

Felices animæ, quibus
 Carnis dissociabili
 Nondum carcere liberis,
 Magnum flectere Judicem
 Ipsi meritis datum,
 Sincera applicitis fide,
 Factis frugiferâ bonis ;
 Ipsiûsque sequacibus
 Sanctâ quâ præiit viâ.

Illis renidet Judicis Optimi
 Fulgore miro vultus amabilis,
 Fulgore quo terret malignos,
 Flammivomo metuendus ore.

Hi nempe vultum Judicis expavent,
 Non expiato crimine noxii,
 Inobsequentes, infideles,
 Queis sua fraus fuit ipsa fraudi.
 Illos verendâ Judicis ipsius
 Circumvolutos Justitiæ togâ,
 Ullas reformidare pœnas

ut judicet vivos & mortuos. 45

Judice criminibus severo

Et ipse nolit : nec patitur suo

Dudum exsoluti sanguine debiti

Dari ad tribunal actionem,

Crimine jam vacuis iniquam.

Mox liberatis labe fidelibus

Carpenda restant præmia ; nec pios

Virtutis imperfectioris

Muneribus vel honore privat.

At nos carne graves, maculosi pectora culpâ,

Qui Fidei varias & Amoris duplice remo

Vix dum eluctamur Carnis Mandique procellas ;

Adventus optate tuos Judexque Redemptorque,

Heu fessi mediis in fluctibus expectamus,

Sperantes trepidique simul ; virtute vigentes

Auxilii, Rex Christe, tui, nostraque jacentes,

Salvifico pavidum zelo relevante pudorem.

O quum vindicibus venies, Rex Maxime, flammis

Ultima per fontes glomerans incendia Terras ;

Gensque inimica tibi, diræ sibi conscia fraudis,

Dia perhorrescens flammantis lumina vultus,

Emotos in se scopulos cautésque rogabunt

Corruere, & gravibus tritos operire ruinis ;

Tunc tua nos hilaret facies, noxæque solutæ

Longum expectaram Sponsæ da, Christe, coronam,

Tæque prius ; lateri te Conjugis indivulso

Applicatum, & nullo removendum tempore Sponsum.

HYMNUS

HYMNUS X.

Credo in Spiritum Sanctum.

Angeli lucis genus æviternæ,
 Seduli cunctis celebrare seclis
 Oris arguti liquidâ verendum
 Voce Tonantein.

Ista mens fervens, studio innocenter
 Invider vestro Superi. O canori
 Ex Chori linguis mihi quis canenti
 Commodat unam ?

Spiritus castis animis amici,
 Noster à vobis celebrare discat
 Spiritum à cujus capit omnis ortum
 Spiritus ore.

Vah ! quid appello minùs audientes,
 Qui solent raro, Dominisque jussu,
 Alloqui in terris animas opacâ

Carne gravatas ?

At vitam & vivo prægnantem Numine mentem,
 De te dicturum, Sanctissime Spiritus, à te
 Non à quoquam alio sperare & poscere fas est.
 Tu mihi quodcunque hoc Genii, numerosque modòsque,
 Suppeditas ; sanctâsque dabis in carmina vires.
 Tu nostri populos secli, seròsque nepotes,
 Virtutem laudésque tuas me vate docebis.

Tu principio, tu fine carens,
 Nullo vivis Genitore satus,
 Patris & Nati, tecum unius
 Numinis, æqua productio stas,
 Communis eis, intra trinum
 Numen residens, ambobus par,
 Simul æternus ; Natùmque Patrémque

Amor

Amor amplectens, ab utroque fluens,
Utrumque petens. O parce precor
Spiritus ingens, si nos humiles
De natura, Deus alme, tua,
Heu ! minus aptis loquimur verbis :
Ut quum pingunt pueri nigro
Solis rutilum carbone jubar.
Heu ! cur homines imbelle genus
Altum sapimus ? cur inscia gens,
Magna ter uni secreta Deo
Cognita soli, deterit audax
Ore pusillo ?

Esto satis timidè pennâ tetigisse modestâ
Interiora Dei, nos exteriora sequamur.
Ut formæ incumbens informis materiai,
Vix tandem obscuris ex sæcibus emergentis,
SPIRITUS iste Deus grandes motaverit alas,
Claras, vivificas, quarum felice fugârît
Incubitu, lentâ torpens uligine frigus ;
Ut modò confusa de mole erepserit ordo,
Lux vincens tenebras, mutans deformia forma.
Ut divo afflatu vitalis primitus aura
Duxerit insuetos per inertia corpora morus.
Utque idem Cœlos divini Spiritus oris
Finxerit, & tremulam longè vibrantia lucem
Sidera, morosam gemmis hilarantia noctem.

Aspice quâ Cœli facies se cunque revolvit,
Terrai spatia ingentis, tractûsque liquentes ;
Singula quæ Natura parens terrâque marique
Educat, ætherium viræ carpentia munus :
Quòd spirant, quòd læta vigent, quòd denique vivunt,
Omne tuæ debent, Dominator Spiritus, auræ.

Quid memorem sacram mortali in pectore mentem
Humanam, Mundi sub te moderamine lætam ;
Quæ docilem doctæ Naturam accommodat arti :
Virtutes rerum arcanas, elementâque vera,
Intento penetrans oculo rimatur & igne ;
Ingentem quocunque jacet sub sidere, certis

Metitur

Metitur spatiis & circumnavigat Orbem.
 Non illam fugiunt, hui ! quantum immane remoti
 Orbes fiderei, & avis stellæ ignoræ,
 Per miranda oculo noviter specularia notæ,
 At quot mens eadem Genii virtute sagaci
 Invenit, aut sapiens inventas expolit artes ?
 Quas leges, quæ jura dedit ? quâ provida curâ
 Et parat imperium partumque in pace gubernat ?
 Horum nil sine te, Princeps Sapientia, cujus
 Est quodcunque sapit, nostrum est quod desipit omne.

Tua majus istis edidit Virtus opus,
 Prono stupentes quod verentur verrice
 Avidisque ocellis contuentur Angeli.
 Quum carne semet induit nostrâ Deus,
 A te paratâ. Virginis divæ in sinu,
 Serente nullo, te jubente, coaluit
 Semen verendum : tumuit intactæ ferax
 Uterus Parentis ; puduit ipsa conscia
 Integritatis pariter & foetus sibi,
 Quæ nulla stare viderat simul dies,
 Natura jungi posse non nôrat prius.
 Certat modesto cum pudore gaudium,
 Cœleste, mirum, se videntis fœminas
 Lectam inter omnes, cujus alvus Messîæ
 Carnem, atque Mundo Sospiratorem daret.

Sic læta Terræ manè subridet pudens,
 Aurora vernis purpurans rosis genas ;
 Solémque radiis advehit surgentibus,
 Ut Virgo Christum : melior ista, quæ vehit
 Aurora lucis æviterne Principem.

Te plenus tenero pectore Messias,
 Penè infans superavit sapientia
 Doctores Phariseos,
 Mirandus senibus puer.

Quumque æras Homini plena fuit Deo,
 Tu sancto capiti cœlitus infides,
 Sub candente columbæ
 Formâ gemmeus aspici.

Pendentem

Pendentem rigida de Cruce roboras,
Torpentem gelidâ morte resuscitas,
Et notam petis ædem,
Nati Spiritûs & Patris.

Te verum experta est Christo surgente renascens
Læta Patrem, tenerûmque Ecclesia nutritorem.
Læta tibi Christi vitis propago, beatos
Debet Apostolicis illapso mentibus ortus.
Hanc à te afflati vates per plurima retro
Secula venturam decantavêre Salutem.
Præconesque sacros hodie virtute magistrâ
Induis, & latum indutos emittis in Orbem.
Tu fontes miserans, verbi fera pectora malleo
Conteris; & fraudum sub iniqua môle gementes,
Lurida peccati quibus obversatur imago,
Ad rectam revocas mentem; mox spèque fidèque
Lætificas, oleoque intus perfundis amoris.

Maxime qui sacros inspiras vatibus ignes
Spiritus, & fidis mandas oracula servis,
Da verbo Deus alme tuò robûrque, aciemque
Sanctè vulnificam, quæ duræ pectora læmnæ
Intima transadigat, penetrètque infixæ medullas.

Spirituum Genitor, quàm longùm Numinis altas
Effigies, orisque tui spiramina, mentes
Humanas, pateris nigrum pectus ire sub Orcum,
Spiritu servas inimico hominûmque tuisque?

Pelle salutiferâ lethales luce tenebras;
Vivifico clamore vocans jam Mortis onustos
Ante diem laqueis, & noxæ compede ferrea.
Funesta excutiant redivivæ lintea mentes,
Lazarus ut quondam. Sævos compone tumultus
Queis intus miserè laniata Ecclesia languet.
Pax tua seminecis tot hiantia vulnera claudat,
Et Sponso admotam post bella exacta coronet.

E H Y M N U S

HYMNUS XI.

*Sanctam Ecclesiam Catholicam,
Communione Sanctorum.*

Conjugio Nymphæ Christi dignata superbo,
 Te canimus summi Nata Nurusque Dei.
 Te Deus æterno sibi met sociavit amore,
 Prævertitque tuos Sponsus amore dies.
 Nam nondum fueras quum tu dilecta fuisti,
 Sis licet annofo penè cœna Crono.
 Non faciem rugis tibi sulcat anilibus ætas,
 Nec formæ officiunt secula longa tuæ.
 Non secus ac Phœbi nullis sordescit ab annis
 Aureus, & Phœbes gemmeus oris honos.
 En Deus in pulchris desigit vultibus ora,
 Deperiens formam quam dedit ipse tibi.
 Nam sis fusca licet, Solisque afflata vapore,
 Non decori quidquam defluit indè tuo.
 Nec minùs indè places, nec mundi firmior axe
 Deperit hinc Sponsi, sed magè crescit amor.
 Nam gratum & memorem quos sumas fida labores,
 Quos patiaris amans, admonet iste color.
 Quem quoties voluit de pulchro protinus ore
 Eluit, & Solis purius orbe nites.
 Quódque favens vatùm commentis Græca vetustas
 Delapsum è Cœlo finxit amore Deum,
 Tu verum experta es; cujus deductus amore,
 In terras supero venit ab axe Deus.
 Te Deus humanâ vestitus carne, venustam
 Ambivit, simili factus in ore procus.
 Utque suum fuso firmaret sanguine foedus,
 Quem Deus haud poterat fundere, sudit Homo.

S. Ecclesiam Catholicam. 51

O quot vulneribus, quot telis cæsus, amorem
Quærit amans magnus demeruisse tuum ?
Quanta tulit, vicitque tuâ discrimina causâ ?
Quot viras divi damna cruoris ope ?
Téque genúsque tuum, dulcissima pignora, Mundi
Et Satanæ diris illaqueata dolis,
Proh Deus ! æternâ peritura in Morre redemit,
Morre suâ Mortis victor & exitium.
Nec satis hoc ; Mundi functæ certamine Sponsæ
Dux præiens facilem sternit ad astra viam,
Seculorum secum sine limite regnaturæ,
Aspectu lætæ conjugioque Dei.
En Domini Tellus porrat sua munera Sponsæ,
Et fundit varias prodiga ruris opes,
Frumento tibi canet ager, tibi parturit arbos,
Inque tuos vergunt mitia poma sinus.
En tibi pallentes violæ, tibi lilia florent,
Calthæque luteolâ stat redimita comâ.
Suave tibi spirant casæ, vaccinia rident,
Mistæque fragranti cana ligustra rosâ.
Gramine prata virent, sylvæ sunt fronde comantes,
Pellucet rivi lenè fluentis aquæ.
Se tibi circumagunt replicatis flexibus Orbes
Queis debent solitas nôxque diésque vices ;
Et succum stirpes, munúsque animalia vitæ,
Agricolæ lætos ubere frugis agros.
Quicquid habet tibi fert cornu Natura beato,
Atque tuis nectit florea festa comis.
His certè fruitur, nimioque exuberat usu,
Gens inimica tibi, gens aliena Deo.
Tolle Dei in Sponsam, quo Mundus perstat, amorem ;
Naturæ subito destituentur ope.
Et quæcunque Parens curâ Natura tuetur,
Protinus in priscum sunt ruitura Chaos.
Quid video ? Furiis exercita turba cruentis
En invadit opes, Regia Nympha, tuas.
Pelleris extorris, ter Magni magna Parentis
Cura, Deo proles, uxor amata Deo.

Per semes, per saxa fugis, per inhospita tesqua,
 Nuda pedem, fufis mœſta per ora comis.
 Vepretis lacero tellurem verris amiſtu,
 Ipſa rubis teneram dilaniata curem.
 Expulſam inſequitur ſudibus gens impia, ſaxiſque,
 Ut ſolet aſpectum ruſtica turba lupum.
 Lugentes Nati Matrem pia turba ſequuntur,
 Queis dulce eſt ſancta cum Genitrice pati.
 Hui ! ſcena ut verſis diſcedit partibus ultro ;
 Ea ſibimet bellum gens inimica gerit !
 Iratiſque cadunt per mutua vulnera fures,
 ut ſerpentino dente creata ſeges.
 Túque fugam ſiſtens pacem diſcordibus oras,
 Ad mentémque vocas impia corda piam.
 Quin etiam contra luſtantibus oſcula figis,
 Hi tua compenſant oſcula vulneribus.
 Mox hoſtes ſimul, & ſocios in crimine, telis,
 Téque magis, ſtulti mente furente petunt.
 Quid facis, injiciens inimicis brachia collis,
 Amplexúque fovens pectora ſæva pio ?
 Hæc mea, reſpondeſ, ſi neſcis, pignora noſco,
 Hi mea ſuxerunt ubera ſemiferi.
 Commiſeror natos lymphatâ mente furentes,
 Materni obliſos uberis, atque ſui.
 Hoſtibus immiſtos video noſtriſque, Deique,
 Non paucos noſcit quos Deus ipſe ſuos.
 Non me, ſed quam me malus error ſuggerit eſſe,
 Ægri animo telis opprobriſſique petunt.
 Hoſtiliſque ſuum feriunt ſub imagine corpus,
 Tranſverſos quoties noxiuſ humor agit.
 Parcite, ſi pudor eſt, diſturbæ pauca Parer ti,
 Onondum proles inſiciata mihi.
 Non inſueta ſero ſævas ex hoſtibus iras,
 Nec mihi pro Sponſo eſt dura ſubire novum.
 Sæva priuſ tulimus ſcleroſi jurgia Mundi,
 Diluvii juſtis quàm premeretur aquis.
 Me juga preſſerunt Pharii Syriſque tyranni ;
 Multiplici tulimus ſub Babylone jugam

S. Ecclesiam Catholicam. 53

Exilio nostri constant & carcere Fasti,
Et pro Consulibus vulnera nostra notant.
Ista sub hoste pati Christum insectante beatum est;
Triste est ab Christi talia prole pati.
Triste Dei & Sponsæ, communia viscera Natos,
Sanguineâ semet dilacerare manu.
Hostibus hæc Christi contingant monstra nefandis,
Semper ab ipsius sint aliena grege.
At non horridi numen Mahumædis adorans,
(Heu nimium concors in mea fata pecus!
Hos paritur Manes, non Guinea Numinis experts,
Altilibusque Diis India nuda frequens.
Et Furiis nigri non tam malè convenit Orci,
Nec similis scindit Tartara dira furor.
At mihi mens placida, & sancti sibi conscia veri,
Ærumnam hanc isto mitigat alloquio;
Inima sanctorum nostrum Communio vinculum,
Non semper prodit conspicienda foras.
Nescia germani generis fera prælia miscet,
Et cæde alternâ pignora nostra madent.
Ast eadem, nostri partes, & mytica Christi
Membra sub angusto corpore conveniunt.
Nec se pugnares refecant, te, Christe, precante,
O Pater errori parcito, parce tuis,
Parce ægris, qui se, qui Te, Matrêmque cruentant,
Nec quid agant animo cæcutiente vident.
O quas, summe Pater, laudes tibi grata rependam,
Vincula quàm tecum sancta perenne ligant?
Vincula non avidis obnoxia dentibus ævi,
Vincula non lapsu dissoluenda Poli.
Magna creatarum solvantur vincula rerum,
Dissilient solidi saxea vincla soli,
Quando crepans Tellus, igniti turbine venti,
Flammarum undantes volvet ad astra globos.
Cuncta licet pereant, nunquam compago peribit
Quam sacer in Christi corpore fecit amor.
Hæc unum numerosa fide coeuntia corpus
Membra facit, quanquam dissociata locis.

Scilicet in Christo capite & radice coimus,
 Ille omnes unus Spiritus intus alit.
 Ille triumphanti pugnantem colligat aulæ,
 Et jungens capiti non sinit esse duas.
 Nempe duæ Christi Sponsâ coalemus in una,
 Heu ! cur sorte duæ dividimurque loco ?
 Cur dum pace fruens solidâ pars altera nostri
 Se beat in patria, luctor in exilio ?
 En ut Threicius vegrandi mole Tyrannus
 Bella movet nostris exitiosa sacris.
 En ut agros rurmis abscondit, & æquora classe,
 Et fundos ferro vastat & igne meos.
 Nec minùs hinc nostro vulgus se nomine jactans
 Fratribus & Marri perstitit esse nocens.
 Sed Christum exosis pariter Christumque professis
 Amborum jaceo præda petenda manu.
 O quando emeritam solves, Dux Magne ; reficens
 Militiæ victor signa vetusta meæ ?
 Quem tandem, O quem das finem, bone Sponse, laborum ?
 Quando dabis patriâ, pacéque, té que frui ?
 Quis mihi nunc fessum demissis coelitus alis,
 Angelus Angelicâ vestiât arte latus ?
 Effugiam tristes pennis sublata procellas :
 Nec nemorum latebras antrâque coeca petam :
 Nubiferos pennâ penetrabimus alite tractus,
 Et celeri superans sidera celsa fugâ,
 Tandem Cœlicolæ jungar pars reddita parti,
 Quæ Sponsum & requiem Sponsa beata tenet.
 Intonuit lævum qui Terram & Sidera nutu
 Concurrit, & læto diduxit fulgure Cœlum.
 Protinus optatas, Cœlo demissus ab alto,
 Lævibus aptavit costis sacer Angelus alas,
 Grandes, sidereas, quales super ardua Cœli
 Seraphicas mentes, Domini mandata ferentes,
 Sustainant ; queis ætherio fulgore corusci
 Alternant varios plausu trepidante colores.
 Continuo mollis per brachia candida pluma
 Pullulat ; & divo jam tota volucris amore

Communione Sanctorum. 55

Emicat alta petens, suspensâque remige penna,
Despicit impositas excelsis montibus arces ;
Turcarumque acies Orbis terrore superbæ,
Eminus apparent nigra agmina formicarum.
Aëra jam vacuum pura in regione secantem,
Quem neque concutiunt venti, nec nubila spissant,
Despectare juvat circumvallantia Pontum
Littora, montanos Terram firmantia tractus
Cingula, septissimum totumque ab origine Nilum.

Nutantem observat, Christi consorte fugatâ,
Pondere sub sceleris Mundum ; periturâque regna,
Præcipiti miserè secum commissa ruinâ.
Celsior angustos fines, punctumque requirit
Dira quod Ambitio ferro divisit & igne.
Altiùs evectæ Mundus procul evaneiscit,
Jamque sui similis celsæ nihil esse videtur.

At meliora implent oculos spectamina sanctos,
Admiranda quibus nitidum caput inserit astra ;
Queis neque vel motus requiem, vel secla vigorem
Imminuunt, numeroque senex intercidit ordo.
Acceditve die splendor, vel nocte recedit.
Conspicit astriferos, non suspicit ampliùs orbes :
Nec spatio languens dubitantes lambit ocellos
Sideris ambiguus fugitanti lumine fulgor ;
Sed propiùs stellis circum radiata, tuctur
Sidereos oculis inconniventibus ignes.
Singula miratur, nec eam tamen ulla morantur ;
Altiùs ad cælum meliorâque lumina tendit,
Seque minùs dignos stellarum præterit O. bes,
Subjeclumque premens pulsât pede firmamentum.

Hoc nisu, Scythico citiùs quàm missilis arcu
Torra sagitta volat, levibus volat ocyor Euris.
Et dicto citiùs superam pervenit ad aulam,
Miliriæ finem longæ, metamque viarum.
Illic magnifico veniens excepta triumpho,
Seque triumphanti tandem cum parte rejungens,
A Sponsi amplexu non divellenda pependit.

HYMNUS XII.

Remissionem peccatorum.

MENS rea culpæ, sed Christo vindice pœnis
 Libera quas debent Tartara nigra reis;
 Pange Redemptori meritis lætissima laudes,
 Et pariter culpæ tacta pudore tuæ.
 Nam quæcunque tulit Sponsæ moriturus amore,
 Has illam pœnas commeruisse monent.
 Ergo admiranti sua præmia, sæpe recurset
 Quæ mala commisit, quæ mala commeruit.
 Nec pigeat coram delicta agnoscere, quanquam
 Commemorare piget quæ meminisse puder.
 Nunc agè, quàm felix humanæ gentis origo,
 Quàm misera amissâ stirps bonitate fuit
 Dicamus, mox ut sancta ad primordia surgat;
 Et mihi principium qui modò finis erit.

Maxima conspicui solus miracula Mundi
 Condiderat, semétque suâ virtute beârat
 Omnipotens Opifex, & rerum providus Author.
 Spectabat viridi Tellurem veste recentem
 Ipsa recens, gemmis distincta micantibus æthra,
 Terra puellares violis inspersa papillas,
 Sole superba proco, radiis ambita novellis,
 Se totam calido redamans præbebat amanti.
 Floribus implexæ fruges, nucibûsque racemi,
 Texebant capiti redimicula festa decoro;
 Frondentésque comas Zephyri ludente susurro
 Mulcebant, comptos vèriti turbare capillos.
 Limpida mobilibus crispabant æquora ragis,
 Udâque florentes crystallæ rigantia campos.
 Securæ damæque canum, capræque luporum,

Gramina

Remissionem peccatorum. 57

Gramina tondebant, & ovis sociata leoni.

Hæc expers hominis quondam novus Orbis agebat
Otia, pacificum venturo principe regnum.
Obsequiūque parans; Naturæque divite cornu
Ingenuas Telluris opes & gaudia fundens.

Ecce Deus sextæ postremum & grande diei
Finxit opus, clarum singentis imagine divâ
Proregem, sanctamque sui spiraminis auram.
Imperium impressit fronti, mentique serenum
Justitiæ lumen, magnique Authoris amorem;
Et rerum, dominamque sui, rectamque voluntatem,
Æternum lætæ spectantem præmia vitæ

Vix venerandam Patris effigiem
Mundo intulerat modò factus Homo,
Protinus almos Natura sinus
Luxurianti fruge resolvens,
Hominem stringit molli amplexu,
Propriumque sibi sumit alumnum,
Lætâ blandum fronte renidens.
Quicquid pedibus nova rura teret,
Quicquid pennis aëra tranat,
Homini subito properat semper
Sillere Regi, pronoque suum
Capite acclinans veneratur herum.
Intepet aër Sole sereno,
Nulloque caput fervore coquit,
Cui sola comæ tegmina præstant:
Teneramque cutem tantum innocuo
Simplice rectam nondum penetrans
Frigus adurit. Præbent umbræ
Tecta virentes; præbent facilem
Gramina musco commissa thorum,
Fugientis aquæ lenia suadent
Murmura sonnos.

Hæc Pax exterius, Pax intus major amici
Numinis, alternique inter mentemque Deumque
Prompti aditus, hærensque suo conformis imago
Archetypo; nec eam maculosæ nubila culpæ

Et malè conscia mens à Numine disjungebant.
 Nam nec opum maleuada Fames, nec dira Libido,
 Nec mortis damniue metus, nec tristis Egestas,
 Merferat indignis Authoris imagine magnâ
 Fœcibus intentam circùm cœlestia mentem,
 Nec sanum malefanus Amor spoliârat Amorem.

At O breviculam Regiæ Dei prolis
 Felicitatem ! vix bene intulit primum
 Pedem beati sedibus sacris regni ;
 Ecce impotenti felle lividus Dæmon
 Aggressus Hominem Tartari dolis, justum
 Sed labilem, sibi que vix adhuc notum,
 Ex sanctitatis arce dejecit magnâ.
 Ex qua suâmet ipse fraude depulsus,
 Et devolutus axe cœlico nuper,
 Deo Deique imagini movet bellum,
 Malum malignus imputans sibi lucro.

Postquam ergo lævæ factus est Homo mentis,
 Hosti Parentis impio gerens morem,
 Fidei Dei diffusus, & suam rumpens ;
 Superna si qua dona habebat ex pacto,
 Suzque non congenita dona Naturæ,
 Ex mente lævâ penitùs exulaverunt.
 Nam destitutam luce cœlicâ mentem
 Obnubilavit penè concolor Nocti
 Tenebrosus Error, involutus, & centum
 Et mille nimbos impliantibus nimbis
 Densus ; supersunt nocte pauca sublustri
 Lumina, notântque sanctitatis amissæ
 Vias amore carnis exollescentes.

At Sanctitas & Vita cùm gemellæ sint,
 Primâ inreremprâ vix soror supervixit.
 Precariâque jam trahens Homo vitam,
 Ægram improbo labore, vixque vitalem,
 Præcepit horrens præmium sceleris Mortem.
 Circumsteterunt prodromi horridi Mortis,
 Metus, Dolorque, Cura, multiplex Morbus
 Memorisque noxæ conscius tremor mentis.

Ergo

Remissionem peccatorum. 59

Ergò audientis Judicis sui vocem
Per quassa subiit membra frigidus sudor :
Novum pudorem sensit, & tamen serum ;
Fictis opacâ perperam comâ velans
Corpus, videnti pectora ima pellucens.
Mox ex fluente mille delicis horto,
Nè poma Vitæ carperet reus Mortis,
Rubente frameâ fortis Angeli pulsus
In contumaces, heu! miser fuit campos,
Qui sauciati sarculo darent agrè
Sudore frugem anhelitûque conditam ;
Versare iussus usque pulveris glebas,
Et esse pulvis-pulverem, sui donec
Gremio Parentis pulveris revolvatur.

Attramen exilii durum præmissa laborem
Dulcibus alloquiis molliverat promissio,
Contriturum olim perjurum sinciput Anguis
Artificis scelerum semen verendum sceminæ ;
Fundamentum ingens, & primula semina Mundo
Salvificæ Fidei, miserante perditum Deo.
Mox ubi surrexit, deductâ in sanguine culpâ,
Stirps numerosa virûm, nocens & hæres criminis,
In medio scelerum vigilavit turbine summi
Provida cura Patris, semen verendum protegens.
Hoc, cùm vindicibus periisset tota sub undis
Gens scelerata hominum, supernatavit æquori.
Hoc Furias, Ægypte, tuas evicit & undas,
Ora Erythræa tuas sicco penetravit pede.
Per trepidos casus, per mille pericula belli,
Servitii, exilii, senisque falcem Temporis,
Sustinuit sanctum, sternens obstantia, semen,
Deliquiis placidus, suisque fœderis memor,
Ille Author perfecti Hominis, lapsique Redemptor,
Ægra salutifero sanare certus semine.
Tandem expectanti spe major prodiit Orbi
Virginis absque viro vir mirus ortus semine ;
Magna Dei Soboles æterni æterna Parentis,
Regibus ex atavis à Matre ducens sanguinem.

Ille Dei vitam retinens, Hominisq; verendi
 Accipiens, veteris Draconis obrivit caput ;
 Ipse lacer spinis, clavis suffixus adactis,
 In cruce sanguineâ supremum agens anhelitum :
 Nempe erat in fatis ut noxam Morte piaret,
 Utque cruore rubens culpæ foret remissio.
 Huc genus omne homines, O conscia pectora culpæ,
 Seu mala blanditur, seu cæcâ cuspide pungit,
 Vertite dejectos pudibundi crimine vultus.
 Ecce reis Mortis Vitæ mirabilis arbos,
 Unde Hominem gladio Genius flammante fugârat,
 Nunc nullo prohibente patet ; ipsôque vocante
 Quisque pari pendit pœnas & crimina lance,
 Dignâque qui meritis meretur præmia Iudex:
 Ille quidem, quam culpa negat mortalibus ægris,
 Justitiam expectat Justus, scelerisq; tremendus ;
 Nec sine Justitia Deus est placabilis ulli.
 Ast idem dat Justitiam qui lege severâ
 Exigit, & quam dent hîc sponte carentibus offert.
 En Cruci fixus manibus benignè
 Porrigit Christus meritum cruentis,
 Vulneratarum manuum superbo
 Murice tinctum,
 En reos, quaquâ patet Orbis, omnes
 Hinc & hinc tensis avert implicare
 Brachijs, quicunque suo gravantur
 Crimine fessj.
 Brachia ex dira Cruce mox refixa
 Curvat amplexu miserans, fovétque
 Pectori appressos sua deferentes
 Crimina fontes.
 Cernitis ? ut placido meriti Pacisq; vapore
 Ante thronum fumet tersantisq; ora Parentis
 Agnus, chara Deo nullique obnoxia labi
 Victimâ, pro lapso sola acceptissima Mundo.
 Victimâ cui pretio gemmati gloria Cœli
 Et cum coelicolis totus non certet Olympus.
 Hinc nobis meriti, nobis hinc flumen amoris

Remissionem peccatorum. 61

Fonte fluit largo : nec tantùm hinc diditur illa
Sontibus exoptata remissio peccatorum,
Sed licet indignis virtutum præmia digna,
Virâque Justitiâ Christi reparata recurrit.

At hæc quibusvis non datur reis Salus,

Sed pœnitentibus reis,

Credientibusque. Nec repentè credere

Aut pœnitere dixerim,

Qui se resignat, Christe, Justitiæ tuæ,

Pravusque negligit suam.

Vitiisque lugens & simul fovens malum,

Fecisse mœret & facit.

Quasi lachrymarum rore peccatum riger,

Ut lætiùs repullulet.

Sed illa demum dicitur Fides mihi,

Vera illa Pœnitentia,

Quum nempe Credens per Fidem sit obsequens,

Vitiùmque plangens deserit.

Nec se redemptum, nè quidem per somnium,

Sine Sanctitate cogitat.

Nate Deo, domitor tenebroli Principis Orci,

Me tua victorem faciat victoria tecum.

Ut victor virtute tuâ capita horrida cædam

Peccati, sine te non exsuperabilis Hydræ.

Sed quia devictâ labes manet improba culpâ,

(Heu carni connata hærensque in sanguine labes)

Parce reo, Clemens Judex, ignoscito fasso :

Quàmque nego mihi met veniam concede pudenti.

HYMNUS

HYMNUS XIII.

*Resurrectionem carnis & vitam
æternam. Amen.*

IN vallem fervente animo delatus eandem
Quam pius Ezekiel, exsuccis ossibus albam ;
Prisca recognoscens lachrymosi signa duelli,
Spectator tacitus mortali in sorte legebam
Ipse meam, Mortique aut ore aut vulnere vitam
Reddendam ; quàm non noceat caruisse sepulchro,
Nec Morti esse locum proprium minùs aëra terra.

Protinus humanâ major vox aëra totum
Implevit, sonitu quatiens loca sola tremendo ;
Exuvias tristes animarum in morte silentium
Cœlitus appellans ; O lætis ossa medullis
Jamdudum vacua, & longis arentia seclis,
Vivite ; Sic jussit vitæ Maximus Author.
Territus obrigui, steterantque horrore capilli.
Ecce autem subito (dictu mirabile monstrum)
Mortua terrifico latè concussa tremore,
Sponte suâ cumulis emota albetibus ossa ;
Pulveris ut surgit, nullo cernente moventem,
Unguibus effossus talpæ scalpentis acervus,
Mox discreta suis accedunt singula passim
Corporibus, propriisque apponunt artubus artus.
Sicca prius pingues ossa implevere medullæ ;
Et modò tendinibus nervisque astricta coivit
Carnea compages, cute mox vestita novellâ.
Cætera materiam vel perficientia formam,
Artificis magni verbo rediére jubentis.

Nam simulac animæ jacuere capacia priscæ
Corpora, quadruplici misit de cardine ventos,

Queis

Queis Sacer addiderat viralem Spiritus auram.
His afflata virum surgit rediviva propago.
Suspiciunt lucem insuetam, semérque, diémque
Mirantur fremitu denso, vocésque recentes
Confuso strepitu miscent exercitus ingens ;
Ut fremit insolitas emissum examen in auras,
Et procul incussos imitatur murmure fluctus.

Non hæc verusti perperam spectamina
Cecinêre vates. Hæc Deus præludia
Dedit supremæ, carnis & animæ simul,
Post seculorum plurium divortia,
Coitionis ; hæc imago rem præit.

Aliquam dederunt anchoram tantæ Spei
Illi Prophetæ precibus aut Apostoli,
Hominisve jussu agentis in Terris Dei,
Ætheris ad auras evocati mortui.
Aliudque certo certius pignus fuit
Reditionis mentis ad carnem ultimæ,
Quodd se approbavit Mortis & Vitæ arbitrum
Christus supremum quando agebat halicum,
Subito sepulchris excitans ab intimis
Rediviva membra capitis augusti nece ;
Vitæ recludens & sibi & suis fores.

Cætera mox vitam capitis pia signa sequentur,
Deteriore sui sub Morte jacentia parte ;
Pars melior vivit, vigilat, regnatque beata,
Dum sequior facilem carpit sub pulvere somnum ;
Quem facile excutiet : limes nunc ultimus instat,
Quando novo totâ gaudebit in Orbe salute
Totus homo, & Christum cognatâ in carne videbit
Læta Caro, divo tandem assimilata Magistro.

Nec miri tamen hâc mali resurgent
Virtute, assimilante membra Christo
Divino capiti ; at gravi citante
Ad magnum imperio reos tribunal ;
Quum turpes animas facelles Orci,
Flammis sulphurei ignis ustulatas,
Jussus relliquiis suis reponet,

Peccati

Peccati sociis, brevique pœnz
 Tristi conjugio simul futuris.
 Surgite, surgite ; jam pulvereis
 Languida stratis membra levate,
 Populi gelidâ morte soluti.
 Vocat ecce bonos pariterque malos,
 Solis ab Ortu ad latus Hesperium,
 Diva tremendum buccina clangens.
 Vocat ipse ambos, conspiciendus
 Christus utrisque, Judex istis,
 Vindex aliis. Reduces animæ,
 Pridem positas carnis amicæ
 Sumite vestes : en reparatæ,
 Rursúmque novæ, propriæ vobis
 Aptæque sedent. Quid cessatis ?
 Jam vos omnes rupisse moras,
 Jam vos Domino in nube sedenti
 Sistere oportuit : agite, accurrite,
 Buccina clangit.

Non ego Seraphicæ si detur jungere menti
 Angelicam linguam, supremæ immensa diei
 Judicia, & justum formidandúmque tribunal,
 Aut ausim aut digno possim describere versu ;
 Nec Deus humanas jubet hoc contendere vires.
 Præstiterit magnam ante diem cum Rege pacisci,
 Qui paribus referet pœnas & præmia factis.
 Quámque fide nixis & quam servantibus æqui
 Promisit, jam jam amplexu firmare Salutem,
 Sanctæ præproperos, prælibantésque repostum,
 Post exacta pijs Mundi certamina, nectar.

Suspiciate intrepidi magnum, pia corda, tribunal ;
 Quâm bonus & felix, quâm lætâ fronte serenus,
 Vitam pacifero vobis pronunciet ore,
 Sedem augustam implens vester pro Judice Vindex.
 Huc ait, O nostro dilecta propago Parenti
 Scandite, Cœlorum vos Regia postulat ingens,
 Nobiscum secli sine limite regnatos.
 Regia principio cui non contenderit ævi,

Aut

Resurrectionem carnis. 65

Aut illa inferior gemmis radiata coruscis,
Aut inconcusso stabili fundamine Tellus.
Nam neque stabat adhuc Tellus, nec sidera stantem
Irrequieta citò circum ibant concita gyro,
Quum vobis hæc nata Salus, hæc parta coronæ,
Qui dapibus nostram esuriem relevastis, & ora
Sicca siti pota vires renovante rigastis,
Membræque fovistis vestrà frigenia lanâ.
Vos patriâ extorrem tecto excepistis amico.
Invalido vobis operam dare decumbenti
Cura fuit, vinclisque gravi, vel carcere clauso.
Hæc membris benefacta caput sibi reddita ducit,
Immemor offensæ, tantum pia facta recordans;
Pro quibus æternæ reddit diadema Salutis,
Angustæque operæ largissima præmia pendit,
Præmia non ulli nisi danti debita Christo.

An sacro quisquam mihi candidato
Perpetis vitæ, superumque regni,
Oggerat vitæ fragilis nocivum

Cæcus amorem?

Hinc procul si quis mihi sumivendus
Venditat Mundi vacuos honores,
Qui quidem adverso varios reflectunt

Sole colores,

Sed citò pallent fugiuntque, pictæ

Iridis ritu, simul aura glaucam

Dispulit nubem, fluido sinaragdo &

Murice tinctam.

Nil opum luxum moror invidendum,

Queis bonus nemo fuit & beatus;

Prægrave in summoque hominis periculo in-
utile pondus.

Quod licet pigrum celeri volatu

Deserit nos; papilionis instar,

Qui prius vermis, subitò novellis

Evolat alis.

Me nec aggesto gravis Orbis auro,

Nec coronarum cumuli morentur,

F

Ingredi

Ingredi vitam cupidum beatâ

Morte perennem.

O rēque quatēque, iterūque quater

Me felicem, quando solatus

Carnis opacæ pondere terreo,

Linquam hospitium, repetamque domum,

Sublimē volans nuper sumptis

Ardus alis; Angelus animo,

Corpore pulvis.

Felicem iterum quando recoctos

Ignē supremo repetens cineres;

Nec ut antē gravi compede pressus,

Mentis Christum carnisque oculis,

Uno intuitu totus cernam,

Pariterque Patrem Nati in facie.

Quando vitam mortē carentem

Mihi spirabit Spiritus idem

Qui magnam animam tibi sub tumuli

Mole rigenti, Christe, redūxit:

Nec possit aliam nisi, Christe, tuam,

Sine fine ullo mihi conringet

Vivere vitam.

Quid Mortis moror ampliùs

Clavem salvificam, quæ referet mihi

Vitæ perpetis ostia?

Dum supra rigidas jamque mihi fores

Clausas lata patet via,

Quâ pennâ ad patriam præpete subvehar,

Lentæ non patiens moræ?

Jam sese Angelicis cœtibus inserit

Mens alis volucris Spei;

Jam muros Solymæ conspicit aureos,

Fundamenta adamantina,

Bis senâsque sacri jam stupet oppidi

Gemmis fulgere singulis

Portas; utque rosas dulcē rubens dies

Noctis non patitur vices,

Intra urbis nitidæ lucida mœnia.

Jam

Vitam eternam. Amen. 67

Jam festos agitans dies
 Queis Agni celebrant foedera Cœlites
Cum Sponsâ genialia,
 Canto cum celebri Cœlicolûm choro
Lætum gratus Hymen ; Deo
 Nexam conjugio non resolubili
Humani generis decus,
 Nympham, cæde suâ quam procus ambiit ;
Nympham cui speciosius
 Formosâ facie candida mens nitet :
Quamvis candidior nive,
 Quamvis vere novo verna magis micet
Florentis facies Nurus,
 Cui semet socerum constituit Deus,
Agni cuncta regens Pater.
 At splendet roseâ Conjuge purius
Sponsus, quo radiante Sol
 Extinctus latet, ut Sole oriente amant
Evanescere sidera.
 O quàm te memorem par soboles Patri !
Sponsæ magna Salus tuæ,
 Quam fuso redimis sanguine perditam,
Partâmque associas tibi.
 Effer te thalamo, Sponse, serenius
Attollens placidum jubar,
 Quàm pulsus hilarat lucida nubilis
Fax Mundi croceum diem.
 Vultum pande tuis faustus amabilem ;
Tanto concilians magis
 Flagranti populos obsequio tibi,
Quodd belli facie minas
 Misches pacificis magnanimus notis.
Conspirant Amor & Metus
 Sceptro corda tui subicere Imperi,
O cujus venerabilem
 Curram Justitiæ juncta trahit Salus !
Hoc lætus recinens Hymen
 Magnis Conjugibus, jam videor mihi

68 *Hymnus XIII. &c.*

Succos ducere nectaris,
Accumbens Epulis Regis Olympici,
Sponsali nitidus togâ,
Prævertens animo proxima præmia.
O vos carnis & improbi
Peccati maculis agmina libera,
Aulæ Cœlitis incolæ,
Quorum sorte brevi & colloquio fruar ;
Mecum laude sacrâ Patrem
Magnum Conjugii tollite pronubum :
Cum Nato nece qui suâ
Despondet miseros nos homines sibi.
Cum sancto quoque Spiritu,
Qui turpes Domini sanguine nos lavat ;
Æternis ut amoribus
Cum lotâ societ Conjuge Messiam.

P O E M A T U M

Libellus Secundus.

E C C L E S I Æ
G E M I T U S,


Proximo post piaculare Regi-
cidium mense, *Londini*
primum editi.

Huic Editioni accesserunt alia ejus-
dem aut cognati argumenti.

Νῦν κακῶρται δυσχεῖ καὶ ὀτυχῇ.

C A N T A B R I G I Æ,

Prostant venales apud *Johan. Creed*
Bibliopolam. 1669.





MERICO CASAUBONO

Magni Parentis Magno Filio S.



Amdudum, Vir Clarissime, in lucem denuò prodire jubes hoc opusculum, quod tanquam ^{ἑωλον} literatis iterum apponere non sustinebam. Sed cùm hæc quantumvis exigua erudito tuo palato sapiant, & ea tibi placeat ab interitu vindicari qui ipsis ex exemplarium penuriâ imminet, non potuit mihi displicere quod tibi semel placuit: Neque verò illis displicere verebor qui scelerum suorum memoriam refricari indignantur, dum ipsi scelerosis incœptis
F 4 suis

suis infistere nunquam desinunt,
novos identidem motus cientes; &
in publicæ rei trepidationibus, ad
patriæ & mitissimi Regis exitium,
cujus clementiæ debent quòd etiam
vivunt, continenter arrecti. Sciant
malè feriat homines qui parricidi-
um & sacrilegia ut heroicæ virtu-
tis ἀνδραγαθήματα attonito Orbi o-
stentabant, fortunâ dolci ebrii;
non defuisse Deo suos testes, qui
in florentissimo perduellium regno
triumphans scelus condigno sti-
gmate inuñere ausi sint, vitæ suæ
securi; & posse veritatem atque
justitiam, etiam carmine propu-
gnari. Equidem dum animo vol-
vens tot scelerum monstra pietatis
colore fucata longas noctes inso-
mnis agerem, zelo Dei flagrans,
& justissimâ irâ æstuans; sensi
carminum

carminum venam incallescere &
spontè eruptionem facere. Sivi in-
genuum impetum excurrere, eò
liberiùs & longiùs, quia fluente
carmine dolor sensim detumesce-
bat; Et omnino opus erat poëti-
cum vigorem advocare qui legiti-
mæ ultionis tela robustiùs intor-
queret. Hîc igitur ardori meo pro
domo Dei indignissimè proculca-
ta, non Theatrîco plausui litavi.
Quem ut nè aucuper satîs erit me-
minisse, mihi contiguum habitare
Mericum Casaubonum, multiplicis li-
teraturæ penum, cui pro multis
magnîsque operibus eò plûs gloriæ
hæret quò de gloria minùs est soli-
citus. Illa enim (scias esse um-
bram) prosequentem fugit, fugi-
entem sequitur. Certè ex te vicino
hoc gloriæ usucapio, quod nemo
jam

jam negaverit me ab erudito non
procul abesse. Fortè etiam ut quæ-
dam semina solum fœcundant, &
adnascentes plantas vegetas & feli-
ces faciunt, mihi profuerit in eo-
dem tecum solo esse consitum. Est
mihi, sitque diu precor, vicinia
tua solatio, virtus exemplo, & a-
micitia decori. Vale.

Lectori



Lectori meo S.



Non abs re vereor, Mi Lector, ne concitator horum carminum stylus tibi me alium exhibeat quam mei mores ferunt, & tota vita mea ratio. Fortè non videbuntur vehementes isti spiritus hominem sapere à turba intra semet recedentem, alienis vix unquam sese implicantem, adversum nemini. Nec deerunt qui diras quibus in parricidas animosius detonui mea de Pace animi Diatriba plurimum disconvenire pronuncient. In qua tamen & ingenii & consuetudinis mea characterem agnoscunt omnes qui me nòrunt. Ego certè à Magno Magistro nostro quàm sit mitis & humilis corde discere, & id alios tum verbo tum exemplo docere studui & studeo. Quinetiam & Philosophià & Experimentià magistrà didici, cùm res humana omnes stultitià litent, & quadam sint temporum quasi vertigines quibus popularis stultitià in insaniam & rabiem effervescit, sapientis esse & sua quieti consulentis μη ἀντιπρὲιν ἀνέμοιοι, & Epidemica

demica mania morbidos impetus ex sana mentis arce quasi ex sublimiori sphaerâ contemplari: Quibus qui nimis sollicitè adversatur eorum ipse fit pars, vorticibus torrentium similis, qui filo fluminis contrahentes ipso filo magis exastuant, & mox magno fluente sese tradunt. Didici etiam erranti viam leniter esse commonstrandam; & frustra quem prius fustibus contuderis, à te postea salutaribus documentis institui. Hac inquam mihi minime sunt nova, sed nullum horum me in hac causa Dei segniorem aut remissiorem facere debuit. Nam quod me attinet, qui qualem me Deo approbem quàm quid homines de me opinentur magis laboro, mihimet probè sum conscius auream illam animi pacem, quam scriptis orno & vitâ tueor, istâ vehementiâ apud me neutiquam interturbatam esse. Illâ enim demum splendidissimè fruimur quando quod officii nobis incumbit prestamus diligenter. Fateor quidem me zelo Dei superatum, & sacra ire imparem, publicam & Dei & Ecclesia injuriam acrius ultum ivisse, insuper habitis Philosophiæ præceptis, quæ sapientem jubent quum publicè & sine spe remedii desipitur; sibiimet sapere, & plebeiam amentiam commiseratione & lento risu excipere. Quam quidem regulam

regulam in publicis aliis paroxysmis egregiè
observavi, mecum habitans dum alii populari
æstu abripiebantur. Sed transversam egit ple-
bis Anglicana colluviem ea phrenesis ad recta
consilia obsurdescens ut cum agros inutile fu-
erit alloqui, sanis injustum fuerit silere; cel-
siore sapientiâ quam Philosophi non consulue-
runt discipulos suos docente Deum toto pectore
diligendum, & lesam ejus gloriam totis viri-
bus esse vindicandam. *Quæ flagitiorum prodi-
gia longa illa in Anglia defectio pepererit, om-
nes audiverunt, nos spectavimus; Regem san-
ctissimum à subditis suis obtruncatum, Legi-
timum heredem ad necem quasitum, totâque
adeò stirpem regiam exheredatam & regno ex-
actam, Regi fideles contrucidatos, aut patrimo-
niis exutos, Religionem violatam, Ecclesiam
proculcatam, Leges reflexas, jus datum sceleri,
præmia criminibus, supplicia virtuti. Hos
Mænes viginti ferme annis passa est Anglia.*

Objiciat aliquis, Stupet hæc qui jam post
terga reliquit Sexaginta annos? Nonne te re-
rum usus & aliqua rerum ante te gestarum cog-
nitio minùs attonitum facere debuerint ad re-
gnantis criminis impotentiam, & jurium di-
vinorum atque humanorum interversionem;
res tritas & in Mundi scenam sapiùs pro-
ductas?

ductas? Reponere possim peculiarem furoris
Genium defectionem illam exagitavisse nulli
ante aetati spectatum. Sed duo sunt quae vel
sedatissimi pectoris homini (modo cordato &
bono) persuaferint istius aevi & loci crimina
non debuisse silentio excipi, aut sine acerrima
indignatione oppugnari. Unum est quod scelero-
sa ista immanitas zelo domus Dei tota se tuetur,
& Deo, imò ipsi Deo sua scelera imputat: Enim-
vero teterrimum omnium post Christi cadem
parricidium cum exquisitissimo precum & jeju-
norum apparatu perpetratum fuit, & re confe-
ctâ splendidissimâ gratiarum adversus Deum
pompa coronatum. Omnes parricidii authores,
patroni, administri, meram crepabant sancti-
moniam, & propheticos spiritus anhelabant;
ipsi interibi rem gestam scriptis ad sidera tol-
lentes, & omnibus populis ut pietatis & justi-
tiae sacrum exemplar exhibentes imitandum.
Nullum unquam sacrificium cum severiore
sanctitatis ceremoniâ & ostentatione celebra-
tum fuit. Alterum est quod hinc maxima toti
Ecclesiae Christianae conflatur invidia; cum ma-
levoli homines nos eodem cum lymphaticis istis
sicariis fasce compingant: Unde Christi Re-
ligio miserè traducitur, eamque profitentes in
ultimum discrimen adducuntur; quippe Regi-
bus

bus suis exhibiti ut Regia dignitatis inimici,
Legum eversores, Regum mactatores, idem ubique
quod in Anglia tentaturi quoties eos ad
idem audendam facilitas invitaverit. Tum
scelus heu ! nimium diu felix, quod apud vi-
les animas pro virtute habetur, non leve erat
ejusdem farina hominibus ad consimile facinus
authoramentum.

Duabus istis rationibus adductus Religionem
& Ecclesiam mihi vindicandas esse duxi, quod
solutâ potissimum oratione plenius exequi co-
natus sum Gallicâ Diatribâ justi voluminis
& libello cui titulus est Clamor Regii sangui-
nis ad Coelum, in cujus calce Oden ad Sal-
mafium, & Iambum ad Miltonum apposue-
ram, quæ cum aliis ejusdem argumenti versi-
bus hîc etiam exhibeo. Quod stimulus non pe-
percerim, & omnem vehementiam nimis lenem
existimaverim quâ tam criminosa & portento-
sa vesania sugillaretur, nemo opinor qui Dei
gloriæ zelo accenditur, Religionemque sartam
tectam & Ecclesiam cupit incolumem, me in-
clementis & immoderati animi reum faciet.
Quid nobis reliquum erat, rebus perduellium
prosperè fluentibus, & parricidio triumphante,
latamque portam ad Regum Majestatem vio-
landam omnibus populis aperiente, quàm ne
grandem

grandem invidiam Religioni creatam, & paucorum hypocritarum crimine bonorum omnium capisibus impendens periculum quàm maximâ averfatione & detestatione amoliremur.

Hoc fi cum aliquo fructu à me tentatum est, est quòd Deo Optimo Maximo magnas habeam gratias, cui me totum debeo, & hanc operam ex animo confecro.

ECCLESIAE

1
P
L
D
B
D
S
O
In



ECCLESIAE GEMITUS

*Sub Fanatica tyrannide, in
Anglia impotenter bacchante
atque sæviante.*

METRUM I.



Uam triste Coeli pallet Occiduum latas !
Imoque fidens axe Justitiæ jubar,
Vix nube sacrum proferens piceâ caput,
Orbi tenebras sempiternas præparat,
Lucem perôso seculo lucem invidens.

En longa brevibus umbra de gurgustiiis,
Et parva quæque magna mentitur pavor.
Ferule stridunt Noctis infernæ striges,
Lymphata stolidæ plebis Ignorantia,
Discordia ungue secta pectus livido,
Erroris cestro falsa Religio furens,
Dirisque raucæ devovent ulularibus
Solem cadentem; qui licet nitidum jubar
Obsessus atris hinc & hinc vaporibus,
In margine imo purus & totus micat,

G

Radiôsqûe

Radiósque in atrâ nube vibrat aureos.

Hunc Sponsa Christi quâ nihil venustius
Viget Orbe, pulchra, sed perusta solibus,
Intenta rectis torum ocellis excipit;
Qualis Tonantis Aquila Titanem solet
Fixa irretorto contueri lumine.

Hoc nempe cunctis restat exutæ bonis,
Cœleste lumen; prædia, argentum, domos,
Ipsamque Terram perditæ, penè ærem,
Catharorum ademit barbara Reformatio,
Cœlum reliquit. Orbis obtineant opes;
Ecclesia merâ spe fidèque se beat.
Vivat supernæ nuda lucis pabulo.

Extorris, exul, improbæ tyrannidis
Opima nuper præda, mox ludibrium,
Decora largis ora fletibus rigans,
Cruore stillans, ictibusque lurida,
Scissam vepretis in fugâ pallam trahens,
Lacerósque crines; per loca aspera, squallida,
Nullo pede errat, sola, deserto magis
Deserta Nympha. Fessa tandem humi sedet,
Ad veteris orni caudicem retorridum,
In quo vigorem sera lux & languida
Refractione molliter recolligit.

Hic calidum ab imo pectoris gemitum trahens,
Dilecto in Astro mœsta figens lumina,
Sic fatur. Itâne destitutæ sustines
Latere, divi magna fax Evangelii?
O sola virtus quâ movemur, quâ sumus,
Hujusque vitæ causa, & ejusdem brevi
Finis futura! Sol sacer longum Vale,
Per quem valemus, quo cadente extinguimur.

Bene est, neci me dedet occasus tuus,
Sed reddet idem quam mihi vitam rapit.
Nusquam fugis; te viva te moriens sequar,
Ubique fulges: quâ præis sequor impigra.
Jam jam reducto carnis ægro pondere,
Mobilibus hærent hinc & inde brachiis

Plumæ volucres; gestic animus aliger
 Noctis supremum limitem prætervehi,
 Prævertere Euros, aſſequi elapſum diem
 Pernice pennâ; tota jam emineo foras;
 Agè Mors amica, jam recluere carceres,
 Liceat volare: qualis arcu Serico
 Excuffa arundo properat, & ſtridens ſecat
 Superâtque nubes, in polum me torqueat
 Robuſtus extremi impetus ſuſpirii.

Mox ter quaternis cincta gemmarum caput
 Rutilabo ſtellis, Sole limpido, & meo,
 Amicta, trabeâque involuta luminis;
 Quid loquor, amicta? tota ſolida lux ero.
 Calcabo victrix Lunam & Errorem vagum;
 Pedibus premetur Nox & Inconſtantia.
 Deliquia Phœbi non mihi dabunt metus,
 Præſaga peſtis & duelli lugubris,
 Phœbæſve facies varia ventorum arbitra;
 Nec me furentes æſtibus reciprocis
 Ultro citroque Fluctus aut Tempus ſerent.
 Pacem Deumque ter beata poſſidens,
 Secura degam quid ſub axe mobili
 Turbetur infra, quæ tremendum mugiant
 Tonitrua dira, ſchiſmata, armorum fragor;
 Totus procellis, me proſectâ, turbidus
 Horrebit æther, Orbis ingens ſanguine
 Stagnabit atro; moxque non numerabiles
 Oeſtro impotente factiones percitæ,
 Iris frementes mutuis, Eccleſiæ
 Inane nomen ferro & igne dividunt
 Poſt rem remotam. Proh ſcelus, monſtrum, nefas,
 Pietatis umbra colitur, ipſa vapulat!

Pietas quibuſdam tota prominet foris,
 Micare digitis docta gesticulantibus,
 Canora, nitida, comis, exteriùs placens,
 Sed ſub doloſo pallæ honore ſplendidæ-
 Jejuna & ægra; ut viva ſolo cortice
 Latè comantes alta ramos porrigit

Annosa fagus, intus exesa & cava.

Exilis aliis colitur in merum nihil
Pietas recocta, larva meteori levis,
Enervis, exsucca, absque corpore impotens
Animam tueri, non ferens oculos vapor,
Lychnéque flamma humore defecto evolans.

Pietatis hujus otiosæ, umbratilis,
Vexilla adorant improbe, & stipendia
Palàm merentur, impotens opum Fames,
Ambitio præceps, insolens Rapacitas,
Libido, cædes, omne fas versum & nefas,
Genus omne Fraudes; nil inausum linquitur,
Animante fraudes hæresi sanatica
Ad prava, per quam cuique quod libet licet,
Et ipsa sceleri sanctitas prærenditur.

En perduelles, sacrilegi sicarii,
Veteres Prophetas sanctitate provocant.
Cædes parentum, justa queis lex culeum
Crucémque debet, perpetrantur sobriè;
Pietas vocantur, his ad astra tenditur.
Nil tam nefandum, nil ità est sævum aut atrox,
Quo non peracta sanguine Reformatio
Utatur, aut quod non probet; nil non placet
Zelo impudente sanctitatis oblitum.

Dum sic dolori Nympha fletibus litat,
Et verba gemitu terriata vix fluunt,
Ecce è propinquo protinus luco advolans
Inopina bruto militum turba impetu
Mediam querelam rupit, & queri vetans
Queri coegit, questibus causam ferens.

Talis salutem proditor Jesu dedit,
Dandóque ademit: Talis illa militum
Judam secuta dira sævit cohors;
Illa ausa Sponso afferre sacrilegas manus,
Hæc ausa Sponsæ: hoc differunt quòd unicum
Turba illa Judam habebat, ista plurimos.

Sed proh Deus! qui tandem, & unde? quod genus?
Circumforanea inertium errorum manus

Temere coacta, qui laboris tædio
Prædæque amore à malleis & follibus
Ad fabricandam convolant Ecclesiam.
Vares novelli ex plebe sellularia,
Docti in tabernâ subulæ sutoriæ
Ecclesiæ quæ solda segmenta assuant.

Heu quos tumultus, quas dedit tragædias
Zeli dolosi candidus gypso Furor !
Oestroque fervens scilicet Prophetico
Desidia plebis, bilis atræ lurido
Incocta succo : temperamen improbum !
Ignita pulsans corda & emorum caput.

Ergo igne, ferro, cædibus promiscuis,
Parant nefandi Messæ mitissimo
Immite regnum, prout sibi finxit Furor.
Ecclesiâque uti reforment, vah scelus !
Jugulant parenrem, si modò hostium est parens.
Quales senile guttur hauserunt patris,
Mentem venenis efferatæ Colchicis,
Peliæ puellæ, fundere effœtum senis
Juvénemque aventes sanguinem refundere :
Hui dira Pietas habilis in solum nefas,
Adimere vitam prompta, reddere impotens !

Sacra & profana corruunt promiscuè ;
Jus ense stricto dicitur , leges silent
Ubi jura dat vis , arma sola altum sonant :
Quicquid timetur jûsque servat, impii
Injurioso milites pede proruunt.
Nempe ut verendi sacra lex Evangelii
Armis latronum sola in Orbe sit potens,
Violatur ante ; & militat scelus Deo.

Rex ergo quo nil sanctius & augustius
Indulsit Orbi Maximus rerum Parens,
Horresco referens ! mille post ludibria,
Heu sacra diro colla cultro præbuit.
Hic Musa vasto merfa luctus gurgite
Paulum resiste ; non tenet numeros dolor.

METRUM II.

AT turba zelo percita stolido, effero,
 Duces sequuntur altioris ingeni,
 Tetricos Tyrannos, subdolum & sævum genus,
 Adulterina sanctitatis infula
 Obnubilatos artifex scelerum caput ;
 Nullo putantes arbitro mortalia
 Temere rotari , & utile Dominis Deum
 A plebe credi, credere ipsis noxium,
 Simulare prudens, ut sonus sine re Deus
 Flectendo frænum sit popello simplici,
 Quocumque avaræ placuerit tyrannidi.

O quot cachinnos clam Tyranni mustitant !
 Quum iussa telis objicit stultum caput,
 Animâsque viles prodigit plebs obsequens,
 Pietatis ergô ; dum student curi, gulæ,
 Lucro, popinis, & vagæ libidini,
 Læti saginis de cruore publico,
 Et Atheorum militat cupidini
 Zelo tumentis bruta turbæ amentia.

En ut popelli colla sublimes premunt,
 Rifu superbi ; qualis urfi morio
 Nare alligati firmius dorso insidet,
 Vanumque vulgus ora distortuens trahit.

Sed ut Tyranni commodè rebus suis
 Mobilibus animis inserant fanaticas
 Regântque Erynnes, ad manum Tyrannidis
 Habent ministros, leguleios rabulas,
 Et demagogos ferreæ frontis viros,
 Queis pulmo largus, clara vox, vacuum caput,
 Et lata crudo felle turgent pectora ;
 Diras crepantes ore fulmineo minas,
 Cædes, ruinas, perduelles spiritus,
 Meram Megæram, cujus afflatu igneo
 Anhela flammis corda plebis æstuant ;

Similes

Similes juvenis igneis Jasonis,
 Flagrante tacta concremantibus haliu ;
 Nec habent magistri plus in arca pectoris,
 Ignea gerentes ora, mentem bubulam.

Porro Magistri moribus proprias suis
 Piceas, olentes, squallidas faces ferunt,
 Luminis avaras, prodigas fuliginis,
 Nigrore cujus ferus arratur dies,
 Faciesque sordent improbae gerentium,
 Turbaeque vilis ; nempe uti depingerent
 Reorum in ore crimen atque infamiam,
 Vultumque menti concolorem redderent.

Ergo atra turba, ferro & ignibus horrida,
 Sulphureum odorem Tartari late ferens,
 Nympham saluant, dona portant seduli,
 Injuriisque tot ferunt quot munera.
 Hui dira dona, quae solum & caelum horreant !
 Largum cruore fervidum innocuo lacum,
 Gladiumque eodem purpuratum murice,
 Etiam calentem ; tum coronae divitis
 Manibus scelestis dissolutae flosculos,
 Et comminuti moesta sceptri fragmina,
 Trabaeque clarum syrma, gestamen pii
 Magnique Regis, & sacri si quid super
 Habitus verendo nuper erepti Duci.

At munus aliud, saucias Proceres manus
 Post terga victos, infimi mastigiae
 Trudunt trahuntque, stemmata & mitras rudi
 Collecta fasce, grande furciferis onus,
 Dorso gerentes. quo ferant furcam aptius.
 Haec trita, quassa, jacta tandem humum gravi
 Fragore pulsan, ad meros Nymphae pedes :
 Falsusque vates splendida impudentia
 Rectaeque mentis caeteris odio prior,
 Haec munera instar omnium unus offerens,
 Sic dura verbis ora solvit igneis.

Formosa Christi Sponsa, Coelorum genus,
 Princepsque Terrae, causa nostris unica

Finisq̃ue bellis, sume quas soboles tibi
 Dudum probata consecrat manubias,
 Piè cruenta, sanguinem, exuvias, duces
 Mancipia factos; sume primitias leves,
 Latè patentis donec Orbis unica
 Victrix, superba ubique colla demetas
 Regum tremendorum: obtere augusti notas
 Fastus, & omnes Principes letho dare
 Assuesce in uno, sede quem dejecimus
 Axis Britanni, dignitate noxium;
 Ut sola celso conspicanda fulgeas
 Regina solio: Jure sive injuriâ
 Insuper habemus; jura sub nostris jacent
 Protrita pedibus, nulla Majestas super,
 Jurata stolidi cessat obsequii fides,
 Tuzque, Mater, pulsa cedit gloriæ.

Hæc fuscum abundè gloria cruorem eluit,
 Quem medica venis elicit rabies tuis.
 Malum omne laudes alma quod sequitur Salus.
 Per prava nobis ad bonum teritur via,
 Nil nos moratur sanguinis sacer pudor,
 Nil fœderaris sacra jura, nil fori,
 Legumque justis insita reverentia,
 Simplèxquè honestum quando pugnat utili.
 Araneorum stamina hæc solos queunt
 Culices morari; fregimus nos impigri,
 Et tota penitus rupimus subtemina.
 Famam ergò Sancti futilem illam tempsumus
 Virtutis umbram, corpus ipsum extinximus
 Si quando nocuit, insitumque mentibus
 Equum bonumque, quando nobis obsuit;
 Promittere leves, pejerare strenui,
 Injuriâsque seduli rependere,
 Benefacta nunquam; splendide & sanctè omnia,
 Quia te reformant, commodisque serviunt
 Nostris tussque, Corda noscentem Deum
 Testamur, ista candidè, sanctè & piè
 Rectâque mente perpetrata crimina.

O mira Pietas ! tene quis celebret satis !
Quâ surgit ipso à crimine Reformatio,
Merâque spirat omne virtutem scelus.

Horreant quisquam templa Marte diruta,
Et sacra Templis exultantia dirutis,
Mendica passim villicorum examina
Villis adustis, æqua terræ moenia,
Patriosque campos ossibus canos suis,
Tria concremata regna, nostro spiritu
Præbente folles halitusque flammeos,
Et sancta amarè devotentes prælia,
Confossa juvenum pectora amplexos patres.
Illa illa tandem sæva sed prudens via
Christo tibi que, Sponsa, regnum comparat :
Non tanta vacuis res venit sermonibus,
Queis rauca latè pulpita & scholæ strepunt ;
Cædite, cremate, perditæ, rapite, vertite,
Sic arma mancam sarciant Ecclesiam,
Sibi sic habere res suas ceremoniæ
Citò jubentur ; ista prævalet via,
Linguisque melius tela falsum dedocent.

Atqui docendo sæpe doctores boni
Pereunt, rapitque mors Theologos milites
Acerba ; quid tum ? illi occidunt, nos vivimus ;
Hâc nempe sorte nascimur hominum genus,
Ut clade multorum unius constent opes :
Congesta celsos nos levant cadavera.
Quisquam ruinis horridam patriam objicit ?
Bene est, ruina publica est nobis lucro ;
Hinc larga sanctis metitur ensibus seges ;
Nam Terra solis coelitus Sanctis datur,
Et totus Orbis fundus est Ecclesiæ.
Quod jure nostrum est jus finit per vim capi.
Hinc hinc colonos exigamus improbos,
Opibus feroces servulos herilibus,
Amalechitas, crucibus & securibus
Devota capita, noxios prædæ datos.
Sit Terra clausa queis Olympus clauditur.

Agè nunc triumphâ, nunc fruerè victoriâ
 Generosa Nympha, nunc sacris furoribus
 Immitte habenas, hos pede impios preme
 Sancte protervo, nobiles, fortes, suo
 Ausos Monarchæ (cæde plectendum nefas)
 Perstare fidos: Adde vim justissimo
 Furore dextræ fulminantis ictibus:
 Cæsisque Regis hunc rubentem sanguine
 Ensem nocentum penitus abde pectori;
 Committe capulum vulneri, manum impio
 Imple cruore, cæde, trunca, confode,
 Omnes coronæ perde rivalet tuæ,
 Et in Orbe toto regium si quid super:
 Nec sit cruentis finis antè cædibus,
 Quin fræna equorum proluat inundans cruor,
 Malisque cæsis in vacua veniant boni.
 Tunc tu impiorum (quod piis promittitur)
 Victrix lavabis sanguine hostili pedes;
 Tuâque Sponsi conferes victoriæ,
 Cum nempe fuso sanguine ambo vicerint.
 Tua turba fratrum sanguine, ille proprio.

At te per illa chara Sponsi vulnera
 Mater rogamus, O procul procul exulet
 Hoc viperinum virus, hæc Siren tibi
 Falsum renidens, hydra, portentum, lues,
 Ereboque Erinnys orta quam Pacem vocant.
 Eheu tremendæ dira procedet comes
 Justitia Paci, alumna, nutrix & soror.
 Hæccine gubernet, & tuis rapri nihil
 Natis relinquat? Hæcne cuique quod suum
 Immisericordi sæva lance dividat?
 Cædes, rapinas, acta quæ prophético
 Æstu calentes perpetravimus pii,
 Severâ trutinâ pensiter politica?
 Nec prosit hilum dicere, imperu entheo
 Jubente, quodvis liberè admissum nefas
 Pietatis ergo? nec mali causam Deum
 Finemque citimini advocatum adducere?

An Marte parta, miles ex domino reus,
Lances tenenti Virgini cæcæ dabit ?
Sparsosque flores in coronam denuò
Coalere cernent in suam Sancti necem ?

Hem ! dira nobis nomina, obsequium, fides,
Pax, Rex, vetusti sacra Majestas soli,
Quæ audita nobis cholica cient tormina,
Nostræne pergent premere conscientias ?
Amica potiùs arma semper imperent,
Gladiùsque victor, edito fulgens loco,
Latè tremendus suppleat sceptri vicem.
Quin patria rivis antè sanguineis fluat,
Et sola campis horreat ferri seges,
Quàm nostra prisco colla subdamus jugo ;
Regemque, nomen semper electis grave,
Victoriarum miles immemor ferat.

Neque hæc Britannno littori coërcita
Domi quiescet inquieta regii,
Sitis cruoris ; Euge Sanctorum Furor,
Per Orbis omnes angulos victricia
Circumfer arma, per mare & terras feros
Persequere Reges ; nec sit armorum modus,
Quin totam ab imis erutam radicibus
Scirpem superbam & nominis vestigia
Exterminarit Orbe victor Israël.

Sic cùm supremis purpuratus ignibus,
Nubis coruscæ flammeis vestus rotis,
Cælo redibit Christus, Orbis unicus
Princeps futurus, hui ! quibus se gaudiis
Mulcebit ? istis conspicans Terras sibi
Armis subactas ; facta, transacta omnia,
Nihilque sceptro conterendum ferreo.

Prædis onusti, laureis victricibus
Comam impediti, Regisque sanguinis
Ostro decori, Messix Regi obviam
Ibimus ovantes ; Duxque magnus debitam
Gestis rependet bellicis adoream.



M E T R U M I I I.

Sermone diro, dum furori crimina
 Intrita cæco, Tartari teterrimum
 Miscent odorem, Nympha dirigit comas.
 Labefacta subitus ossa concussit tremor,
 Trepidumque pectus, idæque fero fulmine
 Orationis, cecidit exanimis solo.

Ut quando pressus nube sulphureus vapor,
 Tonitru tremendus humido erumpit specu,
 Celerique rapidam concipit flammam impete,
 Simulac volucres Auster alas addidit,
 Præceps corusco tramite secatur aërem,
 Obviaque sternens cuncta, pastorem solo
 Affligit, ille pallidus, gelidus, stupens,
 Vitæque sensu vacuus immotus jacer,
 Non pulmo motus pressus alternat suos,
 Non vena pulsus mutuos reciprocatur.

Sic Nympha jacuit, donec illam idem dolor
 Per quem stupebat excitavit, acrius
 Pungens jacentem. Signa vitæ primula
 Lachrymæ venustis largitur riguæ genis;
 Quæ postquam acerbus affatim indulsit dolor,
 Primusque torrens nonnihil desæviit,
 Locumque voci fecit, hoc silentium
 Sermone rupit. O mihi veneranda Crux!
 Cunabula meæ prima quondam infantæ,
 Nutrix, corona, angusta cœlorum via,
 Scholæ, Magistra, debeo virtutem tuæ;
 Oppressa vireo, & calcibus tyrannicis
 Calcata surgo; sed malorum hoc insolens
 Immane pondus me profundo deprimit,

Quodque

Quódque ante nervos fuscitabat conerit.
O parce, nimis O jam nimis sedes gravis.

Unci, leones, picea tunica, torminum
Sævitia quicquid cudit ingeniosior,
Docuère fessam fortiùs resurgere,
Vegetique lassis Martyres tortoribus,
Semustulatis jubilabant faucibus,
Tædis sacris amoris atque gloriæ
Flammæ calorem hostilis absorbentibus;
Ut Sol minores luce vividus aureâ
Extinguit ignes. Crescit adversis Fides.

Sed ut odia artus extera istos roborant,
Interna frangunt. Quid animi mihi super,
Quum parricidæ mente lymphatâ truces
Nati cruentant Matris intima viscera?
Hoc morte pejus, detrahunt vivæ cutem,
Ægræ, trementis, carne totâ sauciæ,
Mendacia unde pallia & larvas secant,
Quibus colorem præferant Ecclesiæ
Ipsa interempta: En ista vix languens traho
Laniata sævis membra factionibus,
Orbæque casâ prole, plus tamen dolet
Furiôsâ Erinnyes veste traduci Fidem:
Et quod patratur, non mihi quod infligitur,
Stimulis doloris urit acrius malum.

Tumidâ feroces mente, fortunâ ebrii
Nimis secundâ, crimina ostentant palâm;
Nefanda Matri dona, natorum ferunt
Calidum cruorem, victimâsque Maximo
(Qui cuncta justis facta pendit lancibus)
Abominandas, filios mactant Patri:
Evangelique Pacis impositum sibi
Multum frementes rejiciunt collo jugum.
Christum docentes scilicet, quàm non bene
Parum virili prefferit jugo suos,
Ignava strictis colla cultris imperans
Præbere mites, & genas cædentibus;
Crucémque fortes terre, non imponere.

Sublimiorem moribus terunt viam
 Habiles scelesti, Principum folio graves,
 Regum Tyranni, regna sanguine regio
 Christo parantes, mentiumque erroribus
 Simplex ferentes pharmacum, errantium necem.

At qui uniformem diligit normam Deus,
 Oculis ab alto lucidis vigil notat,
 Zelo priorum Christianorum aureo
 Immane quantum discrepet lymphaticus
 Novitiorum parricidarum impetus.
 Nec tantum ab Ortu distat Hesperium latus,
 Capreisque tigres differunt, agnis lupi,
 Quantum vetusto diffidet zelo hic novus;
 Hoc nempe priscis hisque convenit novis,
 Quod Martyribus & horridis lorariis;
 Istis necare strenuis, illis mori.

Atqui coronam utrique comparant sibi,
 Spinam ex verenda Martyres Crucis arbore,
 Aurumque cæso Principum capite alteri.

Acerba læti sustinentes Martyres
 Fregere atrocis impetum Tyrannidis;
 Iræ, potestas, arma, Majestas, furor,
 Scuto dederunt fortis Obsequii manus;
 Sic Christianum se repens miratus est
 Subactus Orbis, Imperique Messias
 Regnavit aulâ: sed perit, perit, heu! novâ
 Rebellionem quicquid obsequium vetus
 Christo paravit; quippe qui nondum tibi
 Nomen dederunt, Christe, diris omnibus
 Zelum latronum devovent sicarium,
 Dominis minacem, Principum & Regum luem,
 Legemque Christi ferreum vocant jugum,
 Lethale regnis; criminique vertitur
 Christo mihi que quicquid isti insaniunt,
 Hominumque culpam sacra plectitur Fides.

Vos testor omnes, degener genus, mihi
 Nunc abdicandum, Mænadum potius genus;
 An me docente spiritus lymphaticos

Hausistis?

Haufistis ? unde hæc disciplina cædium,
 Rabido boatu strepera rumpens pulpita,
 Patrium rubente Martis eluvie solum
 Latè cruentans & ruinis obruens ?
 An ille Cnristi Spiritus sacer & meus
 Leges refigit, dejicit solium loco,
 Jus fasque mente ? Promite Annales sacros,
 Consulite Fastos, si qua vestræ forsitan
 Patrocinentur improba dementiæ
 Exempla Patrum : præferunt vobis facem
 Donatus, Arius, & Simones efferi,
 Galilæus alter, alter ortus Gazara.
 His vos magistris, nequiores discipuli,
 Mihi didicistis dare Thyesteas dapes,
 Vestro necata scelere chara pignora,
 Capitiq; corpus immolare Ecclesiæ.

O mihi lique scat anxium lachrymis caput !
 Quibus fleatur Phosphorum extinctio,
 Quos clara nuper explicabat sidera
 Britannus axis, pro quibus positas gemit
 Tenebricosi foetidas ignis faces,
 Picei rotantes squallidos fumi globos,
 Lucere segnes, fervidas incendere.

Audetis etiam cædibus tot nobiles,
 Laniique fratrum, me Parentem dicere ?
 An me putatis copulâ execrabili
 Vestro parenti conjugatam Dæmoni ?
 Ille ille vobis ingerit lymphaticos
 Animi tumultus ; ille vos sibi liberos
 Similes adoptat, litis & cædis parens.
 Sed mea quæto Pacis almæ Spiritu
 Proles creatur, obsequens, mitis, placens,
 Procul modestâ fronte supercilium & minæ,
 Nulli nocere prona, prodesse omnibus,
 Et Christianâ mirigans infantiâ
 Si quid severi Rector imposuit jugi ;
 Cedendo victrix, lenis & fortis pati,
 Etiam data Principi jugulum suo.

Dirique

Equidem furentes mente sedatâ queo
 Hostes amare, at indè materno nihil
 Perit vigori, iræve decedit sacræ,
 Quibus abdicatos læsa Natos execror;
 Ditique prolem nunc adoptatam suo,
 Quorum sceleribus diva sordent nomina
 Religio, Zelus, sanctâque reformatio.

O Christiani generis ingens dedecus !
 Zeli obtegentes parricidium togâ,
 Perjura turba, torridæ belli faces,
 Siticulosæ jamque plenæ hirudines
 Nostri cruoris, Cerberi, Corvi, Lupi,
 Ecclesiæ ulcus, dira regnorum lues,
 Ut hanc Averno consciam vesaniam
 Superûm Inferûmque Conditor malè perduit.
 Attrum furorem quotquot in vivis boni
 Abominentur ; ac velut visum procul
 Rictu cruento ovile vastantem lupum
 Clamore ruris insequuntur incolæ,
 Urgent molossis, sudibus & saxis petunt,
 Vos totus irâ prosequatur vindice
 Orbis, nocivam gentis humanæ luem.
 Et quæ mihi hæret macula per vestrum scelus
 Vestram profundo frontem inurat stigmate,
 Verósque Mundus vos nocentes horreat ;
 Nisi fortè Christi cœtibus pulsos, ferum
 Mahumedis atri vos sibi societ pecus,
 Paritate moris incitatum, quippe quod
 Legem propagat cœdibus latè suam,
 At hercle vobis Principi fidelius.

Hinc fugite tesqua in sola fœdi vultures,
 Crudâmque fallant carnis humanæ famem
 Projecta equorum vel canum cadavera.
 Repetite Furia Noctis infernæ Chaos ;
 Audetis etiam cernere aëra lucidum ?
 Infusa porcis legio dira Dæmonum,
 Orci in barathro protinus malos malè
 Datura pessum. Vosque Dæmonum hospites,

Febri culoso

Febriçuloſo ſœta zelo peçtora,
 Quibus à maligno liberam mentem jugo;
 Sanũmque peçtus, læſa quamlibet, precor;
 Audite veſtris digna factis præmia.

Ut miſſa Cœlis fulmina indignantiſſibus
 In vos rubente certa vibret dexterã
 Qui celſa Olympi teſta tonitru concutit.
 Sublatã ut omni partium diſcordiã,
 Natura concors juret in veſtrum caput.
 Si quid beato copia ſinu porrigit,
 Stomachos voraces prægravet, non nutriet;
 Scelerisſque veſtri Terra pondus non ferens,
 Neſanda fidens lubricet veſtigia.

Vobis præcellas ſpiret & malum Jovem
 Luẽmque ſtatus peſtilentis Africi;
 Comẽsque peſtis ignis exedat ſacer
 Fervente toſta veſtra zelo viſcera,
 Ignisſque amicis ignis uſque ſit comes.
 Quæ perduellis devorãrunt Abiræ
 Comites ſceleſtos flammeæ voragines
 Veſtris tremendæ ſtent faces conviviis,
 Vino ſepultos ebriõsque crimine
 Invadat ignis; mox rotato incendio
 Curia Tyrannis plena bis centum ruat,
 Ambuſta lapſu proterens cadavera.

Pauci ruinæ publicæ ſuperſtites,
 Poſt longa fracti bella, & exhausti fame,
 Per cuncta veſti maria, fruſtra vindices
 Fugiatir iras æviteri Judicis,
 Qui vos perſoſo, naufragos, inopes, vagos,
 Oſtendat Orbi, exempla parricidii
 Inviſa Superis, execranda gentibus;
 Nec ſit malignos qui lare & foco juvet.

Ergò reſectis classiſ impia navibus,
 Paſſura divinæ ultionis turbines,
 In rabida pelagi tormina extrudamini.
 Mox hinc & indè verberatas fluctibus
 Illidat æſtus Syrtium brevibus rates,

H

Ratiũmque

Ratiúmque tabulis Afra pulset litora :
 Tum Maura sævis sævior gens fluctibus,
 Manus malignas tendat enatantibus,
 Factura servos remigésque, & rustico
 Robusta membra destinans ergastulo :
 Sed innox rebelles agnitos, Britanniz
 Orbisque pestem, relíciat madidos truci
 Statim hauriendos ne solum inficiant salo.

Tamen hæc scelestis mors malorum terminus
 Sit expetenda, si nocentúm spiritus
 Efflatus ore fusus in nebulas leves,
 Sensúque vacuus, cedat in liquidum aëra ;
 Quibus negatur esse nil restat pati.
 Sed vivit eheu ! possit ut semper mori.
 Mors dura, sævi líctor Orci, perfidos
 Impœnitentes rapit in obscurum Chaos,
 In quo rebelles magnus ille rebellium
 Parens fatigat, dum sui similes nimis
 Amplexus ulnis implicat pater igneis.
 Genuina torrens, tostus ipse, pignora.

Imò ante lethum jura præcipiens sua,
 Uncis rebelles sæpe prensat unguibus,
 Et ægra Stygio corda torquet verbere.
 Scitis scelesti, gravia crimine pectora,
 Quæ vos silente monstra nocte terrent,
 Quis membra stratis subitus eripiat tremor,
 Quoties quietos excitant innoxii
 Gemitus cruoris, visa sub pedibus feris
 Lacera supremum patria ducens halitum ;
 Et CAROLUS ingens, cæsus, exanguis, jacens,
 Tuens acerbùm, conscia urit pectora,
 Nocuóque sacras injicit jugulo manus.
 Sæpe & videtis debitam in somnis crucem,
 Fulgura cadentum fulminum in nocens caput,
 Cultros, secures, & per hiscentis soli
 Vastus hiatus Tartari caliginem.
 Vigiles & ista somniatis, hæc jecur
 Pejus Promethei cura vulture lancia ;

Laqueúmque,

Laqueúmque, Judæ pharmacum narcoticum,
 Mox inquietis, perditis, insomnibus,
 Obtrudit horrens Ditis inferni manus,
 Faciliq[ue] collo nectit, & collo induit.
 Hui ! vósne cujus facta dira imitemini,
 Funesta stultos fata non horrescere ?
 Agedum salutare agite pœnitentiam,
 Dum cessat etiam extrema desperatio.
 Lachrymarum amarâ victus undâ strideat
 Ardor ferox, ut ignis ære torrido
 Humore merso multa murmurans fugit.
 Est pœnitentis crimen omne piabile.
 Pietate nullum majus est Christi malum.
 Qui nuda saxa melleo Mannæ Deus
 Inspergit imbre, corda dura sapius
 Læti favoris rore perfundit sacro ;
 Germana adhæret Pœnitentiæ Salus.

Quid hoc ? tremendæ vocis ic̃ti verberè
 Fremitis scelesti ad Pœnitentiæ sonum !
 Iræ impotentis conscius pinxit rubor
 Facies ahenas ; ignis oculis emicat,
 Frontemque firmat impudens severitas,
 Prævum induente mente robur perfidâ,
 Quæ spernit Orcum, Pœnitentiam timer.

Hui ! quæ efferata torvâ fronte lumina !
 Pellens ruborem pallor, oris asperi
 Rugæ minaces, tum ferox gladii mœnus
 Inserta capulo quid paretis indicat.
 Agite, fidelis sæva præmia consilii
 Mihi date cædem ; sanguinem sitientia
 Guttura rigate rabida vestræ sanguine
 Quondam Parentis, pignorumque funeri
 Adjicite Matrem. Dire quid cessas Furor
 Perficere Matris cæde natorum struem ?

En iste lato fervidum ebullans lacu
 Nostri recenter prodiit venis cruor :
 Hæc vestra vobis, hæc refundo munera,
 Sic fata toris Nympha viribus lacum

20 *Ecclesiae Gemitus, &c.*

Humo levavit, & suum certâ manu
In ora misit perduellum sanguinem.
Et noster in vos, inquit, & vestram genus
sanguis recurrens fumes ultorem ad Deum,
Nocuaque genti semper incumbat gravis.
Iacti cruoris perperam nil excidit :
Vilisque turba sanguine icta missili,
Menti cruentæ congruos vultus tulit.

METRUM

E
C
A
T
N
T
S
In
R
P
N
A
Q
T
H
V
E
V
F
C
A
S
S
C



METRUM IV.

UTrensa quondam retrahentes vincula
 Sparsus juvencos agitat in rabiem cruor,
 Perfusa rore sanguinis lymphatica
 Exarsit irâ dirâ latronum cohors.

Repentè strictis impetunt mucronibus
 Christi maritam, & alia menti vulnera
 Truces acutis duplicant convitiis.

Execrabilis Megæra quam Parentem perperam
 Credidisse vel vocâsse seriò Sanctos piger,
 Arma tûne sacrosancta sæva nobis eripis ?
 Tûn' pii stimulos furoris sustines retundere ?
 Nô sine mancos, nô sine claudos, reddis ex victoribus ?
 Tu maligna, tu noverca, perdere electos paras ?
 Sicne nervos exsecandos sancta præbeat suos
 Imbecilla fortitudo victa pœnitentiâ ?
 Regium redire culmen, cadere nos & conteri ?
 Pœnitentia esto soli fœda peccato comes.
 Non finit peccare sanctos Christus in sanctis manens.
 Attamen facti fideles unius nos pœnitet,
 Quòd te honore prosequuti ter veneficam fumus,
 Téque vitæ ducere auram tam diu permisimus.
 Hæc moram pensabit hora, lamia trux peri, peri ;
 Vulnerumque fer tuorum Tartaris tragœdiam.

Traxit minarum turbo grandinem ictuum ;
 Et diva mille Nympha telis saucia,
 Vulnúsque tota præssit exanguis solum.

Repentè tetricus imbre sanguineo pluens
 Cohorret æther : vidit, expavit nefas
 Attrâque Titan condidit caligine
 Superfluum jam lumen absque Ecclesiâ.
 Cardine reflexo utrinque nutârunt Poli.

Fatiscere Orbis læsa compagem sacram
 Natura stupuit : indè fatalis tremor
 Luxata Terræ concutit fundamina,
 Sceleris iniqua non ferente pondera
 Basi vetustâ. Sic ubi veteris domûs
 Casum moratur imminentem sublica,
 Illâ remotâ corruit premens onus,
 Quassîsque tectis horrifer Cælo it fragor.
 Bombi tonitruum, sibili serpentium,
 Stridor strigum, raucisque corvorum soni,
 Vagæque circum compita infernæ canes,
 Tenebrosa diro horrore complebant loca.
 Strepunt cavernis orta ab imis murmura
 Ditis profundi, & Dæmonum jubentium
 (Cavo sonore qualis ex adytis sonat
 Emota Phœbas) jam sibi Terram dari ;
 Pereunte nempe destitutam Ecclesiâ
 Factam repentè Tartari provinciam,
 Sua regna Avernum jure nunc reposcere.
 Tænaria terris umbra noctis incubat ;
 Lux nulla, nisi quæ nubibus ruptis micant
 Intorta fumo lurida ignis spicula.
 Ruit sonoris æthra tempestatibus,
 Clausûsque cœcis montium radicibus
 Concepit ignes ventus, & sursum viam
 Sternit ; barathro rumpitur vasto solum :
 Convulsa ab imis Terra mater sedibus
 Et lacera retro properat in priscum Chaos
 Natura volvi. At illa rerum publica
 Ferit ruina parricidas publicos.
 Flagrante latè mista grando fulmine
 Impacta, cuneos perduellum discutit.
 Vagos dehiscens noctis æternæ in specum
 Sorbet vorago, montiûmve ruentium
 Novos Gigantes gravia truncant fragmina ;
 Superstitésque dissipant per avia
 Fulgura, procellæ, grando, nox, ventus, furor,
 Armata flammis ira vindicis Dei,

Pejorque letho conscia mentis pavor.

Ac dum procella sævit, & Tellus tremit;
Nymphæ jacentis, non malis superabilis,
Pax dia Christi firmiter solidat solum,
Magisque mentem; quam Deo conjunxerat
Victrix doloris sancta amoris ecstasis.
Divæ cruorem Terra fasum combibens,
Fœcunda violas sponte fundit & rosas.
Circum teporis vernat Elysii tenor,
Aër procellis liber, & tenebris dies.

Nam Cœli ab alto lapsus axe Messias
Sponsæ benignus sospitator affider,
Quatiensque magna fræna ventorum manu,
Rapidi tumultus aëris verbo fugat.
Reliquum per Orbem impune tempestas furat,
At Christi amicæ sedeat æternum comes
Pax læta Cœli, & ille cui somnos leves
Quum navigaret attulit jactatio
Fluctus protervi, turbine in simili suam
Suæ quietem nunc jugali commodet.

Sed nè jacentis fugiat anima vulnere,
Dextrâ medente lata claudit vulnera;
Venas cadentes fulcit, & natantia
In Mortis atro lumina excitat lacu;
Animæque fortis & vigentis indicem
Faciem serena temperat fiducia.

At candidati, sedula cohors, Angeli
Ægram benignis recreant odoribus,
Alisque lenes aureis Zephyros creant;
Tum cruda fuso vulnera ungunt balsamo,
Cui torus Orbis par habet pretio nihil;
Quod nempe Christus sanguine & lachrymis suis,
Largo salutis imbre fufis in Cruce,
Confecit ipse; vulneribus Ecclesiæ
Præsens medendis omnibus sat unicum.

Mors ergò gelidis abstinet complexibus,
Quæ fauciam ulnis comprimebat offeis;
In rigida sensim membra reptavit calor,

Et pura vivo tinxit ora murice :

Amor Fidésque utrinque, pulvilli vice,
 Medicis recline sustinent manibus caput ;
 Mollémque præbens Innocentia culcitram,
 Placidam quietem, non adhuc somnum facit ,
 Cui nempe crassis aridum vaporibus
 Nuper cerebrum liquerat fusus cruor ;
 Idémque ademptrâ fæce sublimaverat
 Animam capacem ; quæ vigil, compos sui,
 Admota Cœlo, magna, mira illustria,
 Accepit oculis visa perspicacibus,
 Hebente carnis non videnda lumine.

Obsessa nullis lucida nubilis
 Lætis refulsit æthra coloribus,
 Risûque diducti benigno
 Sponte fores patuère Cœli.

Repentè Cœlo prodiit Angelus,
 Titana claro lumine provocans,
 Cui syrma virgatum pyropo
 Et rutilo radiabat auro.

Pingebat alas fulgida remiges
 Intexta gemmis purpura cæruleis,
 Aurique distincti micabant
 Igniculis virides smaragdi.

Sæpe in virorem purpura transiit ;
 Ostrum fefellit cæruleus nitor :
 Pelluntur alterni colores
 Arbitrio trepidantis alæ.

Plausus volucris remigii frequens
 Demulsit auris æthera molliibus,
 Sparsitque cœlestes odores,
 Et crôceo pluit imbre Cœlum.

Vibrata vultus lumina flammei
 Attemperabat dulce nitens decor ;
 Qui pectus & vultum jacentis
 Vivifico recreavit igne.

Agnovit almuin Nympha legatum alitem,
 Qui nempe Sponso cœlicum alloquium dedit,

Prope quum minantem mente præcipiens Crucem,
 Sudoris horrens rore sanguineo foret,
 Lachrymis remitto ; nunc parem merſæ malis
 Opem maritæ præſtiturus advolat,
 Ille ergò ſacrâ fronde nexam porrigens
 Cœlo coronam, dulce & auguſtum ſonans,
 Sic ora ſolvit ; ſubſtitit venerans Polus.

Nympha genus Cœli, ſummi Nurus alta Tonantis,
 Hanc tibi quæ cingat victricia tempora laurum
 Promeruit proprio perfuſam ſanguine Chriſtus.
 Hæc licet ambabus cœleſtia præmia palmis
 Sp̃eque Fidẽque ſimul teneas ; non tempora circum,
 Donec anhelantes extremo in pulvere ſolvas
 Carnis equos victrix, toto certamine functa.
 Sic Sponſo gradibus ſurrexit Gloria miris,
 Dedecoris, ſævæque Crucis, morisque cruentæ.
 Ergò horrens ſpinis, torvè ſudore decorus
 Sanguineo, immenſiſque laboribus exantlatis,
 Arduus aſtriferum victor per. upit Olympum
 Vertice, & æterno ſpinam diademate vertit.

Nec tamen auratis collucens Gloria pennis
 Militiæ finem poſuit ; commilitat ultro
 Compariturque tibi. Sponſo quid junc̃ta tremiſcis,
 Militiæ conſor̃s, oſimque futura triumphĩ ?
 Euge ! brevem obdura fortis tolerare laborem ;
 Jam te triſte jugum laſſâ cervice ferentem
 Proxima Libertas niveis circumvolat aliſ ;
 Nempe labans Tellus labefactâque regia Cœli
 Mox facient grandes quaſſo fundamine rimas.
 Protinus erumpes è carcere libera fracto,
 Obtritiſque ferent laxâ compage ruentem
 Sacrilegi propriis emorum fraudibus Orbem.

Non alios carnis ſervili compede vinc̃tæ
 Libertas aditus aperit ; fruſtrâque timorem
 Sp̃emve tuam exercet rigidæ falx aſpera Mortis.
 Illa quidem certâ carpit tua pignora dextrâ,
 In Matrem nil juris habet : deponat amico
 Naufragio in portu magnæ tua membra Salutis,

Altera succedent ; mediâque in Morte superstes,
 Membratim moreris, sempérque renata perennas.
 Cynthia dum vario fulgens argentea vultu
 Legibus æquoreos certis moderabitur æstus,
 Lumina nocturni dum scintillantia Cœli
 Sublustres facient tremulo fulgore tenebras,
 Alternâsque vices brumæ melisísque reducet
 Qui duodena rotat volucrem per sidera currum,
 Fortia perpetuæ produces flamina vitæ,
 Non nece, non senio, non expugnabilis hoste.

Ille quidem effusus furiatæ mentis habenis
 Te flammâ ferroque ferox uritque secâtque.
 Sed modò vivaci prodis generata favillâ
 Lætior, & fuso de sanguine cœla resurgis,
 Ut melior secto succrescit palmite vitis :
 Et tecum torp pugnans Acheronte, nihil te
 Debilius cernit nec sentit fortius hostis.

Maeste Dei Conjux, inimici terror Averni ;
 Et tua non ulli cedens tolerantia damno,
 Exuperet priscum Terræ durabilis axem,
 Et mensurato libratos pondere montes,
 Fixâque constantes volvenria sidera gyros.
 En Natura tuo mensuram ducit ab ævo ;
 Nam simulac carnis perrumpes vincula, stabit
 Tempus, & injiciet celeri sufflamen Olympo,
 Mundus & antiquo nihili subsidet abyssò ;
 Scilicet à veteri removeberis axe columna,
 Magnum Atlantæis sustentans viribus Orbem.

Hunc modò sensisti te deficiente fatiscentem,
 Horrifico subitam fremitu minitante ruinam :
 Sed Deus ut pateant venturæ tempora proli,
 Ecce tibi paucos trepidum firmavit in annos.

Vanus & ille timor quo te, Regina, fatigas,
 Nè Sol Justitiæ, virâ tibi charius astrum,
 Occidat, & nigrâ faciem caligine condât.
 Hostibus ille tuis, at non tibi, Nympha, latebit,
 Et ferrugineâ merget radios Eclipsi.

Scilicet

Scilicet indignans rabies quod dira catervæ
 Lucifugæ, excludens tecto duplicique fenestrâ
 Dulce jubar, fatuos privatim accenderit ignes.
 Illicet æternâ quam quærunt nocte fruuntur
 Gaudentes ululæ tenebris aut luce malignâ :
 Eumenidumque faces, nocturna incendia, torres,
 Sole procul, præstent tenebrôsæ lumina turbæ :
 Sed tua salvifico radiabit lumine Goscen,
 Dum mala Tænariis Ægyptus torpet in umbris.
 Et prius effracto lucis temone quadrigæ
 In diversa ruent, aurigæque pronus Olympo
 Excidet in Terras, & cum Titane cadet lux,
 Quàm vel Evangelicus nigrâ Sol nocte tegatur,
 Vel quæras oculis cœlestia lumina cæcis :
 Sed clara æternum divinæ filia lucis
 Stabis, & in medio figes tētoria Sole.

At quæ fœda jubar circumstant nubila sanctum,
 Obsceno hostilis sceleris collecta vapore,
 Fundet in authores immani rupta procellâ,
 Invertens gravidos irarum grandinis utres,
 Qui paribus pendit crudelia pectora pœnis.
 Et tuus in fontes, ignito plurimus imbre,
 Armatus Nemese descendet vindice sanguis.
 Ille petita diu victorum præmia portans,
 Tempora non lauru, sed tortâ cannabe collum
 Cinget, & eliso sub Tartara gutture mittet
 Sacrilegos, paucis communi à sorte redemptis,
 Auxilio, pia Nympha, tuo ; quo sæva rependens
 Vulnera, post Sponsum facies hæc mitia vota,
 Clavis fossa manus, & acutis tempora spinis,
 Parce Pater, meritæque feros nè perde ruinâ,
 Qui nostrum effundunt ignarâ mente cruorem.

Pectora quorundam feri verique doloris
 Transadiger gladius, scelerosi conscia facti.
 Paulum etiam factum de percussore videbis.
 Qui creat ex duris Abrahamo pignora saxis,
 Mortua vitali qui corpora suscitât aurâ,
 Marmoreos quandoque sinus inimicæque corda

Molliet, & flamma divini finger Amoris.
 Legitimus recto decurret tramite zelus ;
 Quisque prius nocuit quondam tibi serviet ardor.

Sic tandem dubiis surget tibi Gloria rebus,
 Bellum, incerta quies, intextaque tristia lætis,
 Damna trahens lucrum, commissa infamia laudi,
 Cætera quæ cæcâ raptum vertigine Tempus
 Multiplici temere perplexâ ambage volutat,
 Omnia conficient magnam tibi, Nympha, salutem,
 Jactatæque Deus faciet per devia callem ;
 Donec fulmineo latè tremefiat Olympus
 Angelicæ clangore tubæ, Tellúsque labascens
 Mugiat, atque imis reboet concussa cavernis,
 Antrorumque cavis eructet faucibus ignes ;
 Queis incensa crepet, comprehensaque machina Mundi
 Corruat, & rerum moles resoluta fatiscat,
 In priscum revoluta Chaos : Túque alite curru
 Ardua quadrijugis rapiaris in æthera ventis,
 Occursura tuo clara inter nubila Sponso ;
 Quicum siderium ducens Regina triumphum,
 Angelicos inter plausus, Matremque beantes
 Felices natos, æterni ad limina Regis
 Pervenias, qui te vitæ fonte jubebit
 Impleri, & toto divini fluminis alveo ;
 Emeritumque caput justâ radiare coronâ.

Angelus id ægræ gratus alloquium dedit,
 Penitusque totam ademit ægritudinem.
 Sed læta vocem clusit admiratio.
 Radiósque lucis æviternæ vividos
 Mortalia ultrà non ferentia lumina,
 Demissa sensim roseus invasit sopor ;
 Qui blandiente dulce ludens somnio,
 Abiturientem penna Amoris alite
 Inferuit Astris & beavit spiritum,
 Gemmea reducens ora mitis Angeli,
 Sibique divinum accubantem Conjugem,
 Qui spe futuris jam fruentem præmiis,

Totamque

Totámque amoris colloquentem gaudio,
Lentis amicum continuit amplexibus.

CANT. iii. v.

*Adjuro vos filia Jerusalem, per capreas cervosque campo-
rum, ne susciteth, neque evigilare faciat dilectam, do-
nec ipsa velit.*

MAGNI



MAGNI MANES

CAROLI PRIMI

Regis & Martyris.

Finierat lucis Nox intempeſta labores;
 Inſpergens tacitis lethæa papavera terris;
 Sed mihi blanda aliis invitamenta ſoporis
 Nutribant vigiles nocturna ſilentia curas,
 Lugenti Regiſque necem, Templique ruinam,
 Et mœſto penitus de pectore ſingultanti.

Protinus ad Phœbes vitreis inſerta fenestris
 Lumina, viſa fuit ſancta & feralis imago
 Ingentis CAROLI; non quo nunc ſidera vultu
 Sideriûmque Patrem divinâ luce coruſcus
 Aſpicit, atque Dei ter Majeſtate verendus.
 Sed quo ſacrilegis interfectoſque ultor
 Imminet, & fœdas hominésque Deûmque perofi
 Angit Oliveri fauces, ſtratîſque rebelles
 Eripit, occulto torquens fera pectora flagro.
 Pallor in ore ſacro, macies, cava lumina, torvus
 Aſpectus, cervix cæſa & malè ſarta, vacillans
 Vix caput attollens, delabentémque coronam.
 Juſſerat impexos ſanies concreſcere crines.
 Et crudo horrendum ſtillabat ſanguine barba.

Ille cavum, tumuli tanquam de fornice, murmur
 Edidit. O noſtros, inquit, miſerate labores,
 Quantum animi virésque dabant; quæ præmia Virtus
 Noſtra ferat cernis: hos nempe Senatus honores,
 Promiſſos longum, longum oblatóſque paratósque,

Ecce

Ecce mihi tota cum sorte & fœnore solvit.
Nam mihi quam triplices non indulserunt coronæ,
(Densius heu tribulis quam gemma aurorque rigentes)
Dira piam potuit requiem præbere securis,
Æternumque decus ; sic dat leo roscida mella,
Sic fert spina rosas, sic fit medicina veneno.

Atque utinam Mors hæc , magnæ mihi janna Pacis,
Hanc pareret Terris, nec nostris hostibus esset
Fauſta minus quam læta Mihi. Vox sanguinis hujus
Æternum per me ſileat, nec Principe cæſo
Cædibus alternis Regi tria regna parentent.

Vah ! nil vota juvant : ſumat tellure receptus
Nunquam arens frigensve cruor ; juſſusque ſilere
Ejulat infandum, & gemitu cœlum omne remugit.
Eheu quam tetricis denſatur in æthere nimbis
Regali de cæde vapor ! quis ſulphuris atri
Turbo ruit, rutilæ contorta volumina flammæ
Agglomerans, aliam mox exuſtura Gomorram !

Tum Dæmon tumidos genio vertiginis utres
Fundit in inſanum pelagus fluitansque popelli ;
Unde ciet ſpumas ſeſe frangentibus undis,
Et quem vorticibus limum corraſit ab ino
Ad ſummum attollit, tum rursus in ima reſorbet :
Littora mox ſuperans, diſſectis undique legum
Molibus, horrificam nullo cohibente per agros
Diluvium volvit, medium facit omnia Pontum ;
Oppida, villæ , arces, Regum monimenta vetuſtorum
Intereunt ſubito, longis vix condita ſeculis.

Ecce jacet noſtro fundens de vulnere vitam
Regnum antiquum, ingens, in Principe detruncatum.
Et miſeranda comes conſoſſa Eccleſia Regi
Incubat, atque ſuum Domini cum ſanguine miſcet.

Euge ! animos ipſa de cæde Britannia carpit.
Non toti occidimus ; diraque Tyrannide preſſa
Fortius erigitur confringi neſcia Virtus.
Ut quondam impoſiti ſaxis arctata Veſævi
Multa fremens alitur ſecreto fomite flamma,
Indè cævum lætè montem comprehendit, & omnis

Obicis impatiens solidi penetralia saxi
 Rumpit, & effractis sursum ruit alta caminis.
 Æquora sulphurea fervent Tyrrhena procellæ,
 Arvæque candentes torrent Campana favillæ.
 Terrifico motu, atque horrifono mugitu
 Littora tota tremunt; trepido fugit agmine vulgus,
 Ardentes pagos, & tecta ruentia vitans,
 Palantum insequitur piceus vestigia torrens.
 Non alios rapidè Mea gens erumpet in ætus
 Irritata malis, & iniquo pondere sudans,
 Displodétque graves diris ultricibus iras.

Tum Mea progenies ubi nullum invenerit hostem
 Obsequii memorem sua quem Clementia servet
 Viribus insurgens divis, & jure paterno,
 Herculeos ardens animos, animisque lacertos
 Tollet confimiles, & formidata rubente
 Fulmina torquebit dextrâ; quæ bruta Gigantum
 Agmina, versa suis mixtim cum montibus, alto
 Culmine de solii cœnum in natale revolvit.
 Titanisque novi scalarum mole suarum
 Obtriti, propriis sic fraudibus urgebuntur,
 Ut gravis Enceladi premis ignea pectora tellus
 Trinacriæ, centumque gemens incudibus Ætnæ.

O nè fracta malis regalia corda fatiscant!
 Per mille arctarum perplexa volumina rerum,
 Per trepidos belli casus, modò gloria surget
 Multa Deo sobolisque meæ; requiéinque Britannis,
 Grande decus regno, sua per contraria condit,
 Mirandis vicibus, magno molimine Numen.
 Sic vitam ex letho, lucémque accendit in umbris
 Consilii æterni non vestigabile textum.

Dixit, & extemplo majorem assumpserat ingens
 Humanâ speciem, sacer augustusque videri.
 Ore procul macies, & torvo lumine squallor;
 Sed roseo fulgore nitens, oculisque serenis
 Dulce jubar vibrans; mox Phœbo clarius ipso,
 Indutusque homini non aspectabile lumen,
 Mortales oculos fugit, Cælósque revisit.



Magno SALMASIO
pro Defensione Regia Ode

ὠδὴ ἐπιστρώ.

Sic Orbis omnes pervolitans plagas,
 Linguisque centum Diva potens loqui,
 Te Magne Salmasi celebret,
 Te tabulis adamante factis

Inscribat, O quâ verticibus Poli
 Utrunque nautas oppositis regunt,
 Supreme Musarum Sacerdos;
 Innumeris spatiis secundum

Sub te relinquens ! hui dubium facis
 Herôsne major vel melior fies ;
 Quem numen admovit benignum
 Artonitis trepidisque rebus,

Orbis salutem jurâque principum
 Stylo tuentem regia Principe :
 Quem frontis expertes, nefandi
 Furciferi didicere nuper

Quid Marte possis ; quo Genius tuus
 Hastile juris fulmine torqueat :
 Quantûsque propugnans Monarchas
 In clypeum gladiumque surgas.

Juvat valentis robore dexteræ
 Videre quassis monstra molaribus,
 Durôque sub castu cruentas
 Terrigenum crepitare malas :

Videre collo Tartareos canes

34 Ode ad *Salmasium*.

Fuſtrâ catenas concutere arduo,
Te lucem ad inviſam trahente
Viribus Herculeis moſſoſos.

Videre coram Judice Maximo,
Pendente juſtis crimina læncibas,
Reos peractos perduelles,
Perniciem Furiâſque ſecli.

Tandem ergo tali tempus erat regi
Umbone Reges, quos furor impius
Exterminaturus per Orbem,

A C A R O L I capite auſpicatur;

Quo nulla dâdum ſplendidior malo
Illuxit Orbi lampas, & in Polo
Non ſidus ullum puriore
Lumine Cœlicolis renidet.

O te Parentem juris & Imperi
Læſi laceſſat gloria numinis!
Exurge vindex, & rubente
Sacrilegôs jaculare dextrâ;

Sacræ nocentes cædis alaſtoras,
Profeſſioni dedecores ſuæ,
Qui februis nullis piandum
Hui facinus pietate fucant.

Huc arma, huc iras vertite Principes,
O qui Deorum fungimini vicem;
Vos perdere hanc decet *Megæram*,
Vos decet his vacuare monſtris

Hui! ſub ſtupendi pondere criminis
Mundum gementem: fundite, vertite
Piaculares parricidas,
Puſ olidum ſcoriâmque Terræ.

Vos docta magni pectora ſpiritus,
Sævite pennis tela acuentibus,
In publicos donec latrones
Publicitus moveantur arma.

Nunc Muſa diras, ignea nunc cedo
Hamata dura ſpicula cuspide,
Queis Cerberos Diti magiſtro

Devoceam,

Ode ad Salmasium.

35

Devoveam, puerósque Terræ al-
lidam Parenti, quos ego! sed satis
Frontes inussi stigmatè noxias:
Has felleo strumas aceto
Perfricti, ætherisque salis.
Stricti & soluti hanc trivimus aream,
Sed solus Hydra perdomita potens
Tu Magne Salmasi triumphas;
Nos pedibus sequimur quadrigam,



I 2

In



*In impurissimum Nebulonem
Joannem Miltonum, Parricidarum & Parricidii Advocatum.*

Quò quò citato ruitis injussi pede
Acres Iambi ? nempe properè calcibus
Tritum Gigantum ignobilem nepotulum,
Regum Patronum dente rodentem fero,
Ipsosque Reges. Méne virus hoc malum
Hoc carcinoma tangere ? Ah piget, pudet.
An quem nisi unco tangere haud licetor ferat,
Sed nare pressâ rapiat in Gemonias,
Calcibus honestem alastorem, me polluam ?
Fastidiosum sed licet pedem abstinens,
Haud te, sceleste, patiar acceptam tuæ
~~Impunitatem~~ ferre turpitudini.
Eho ! latronem pessimum Lorarii
Corripite jam jam ; quadrupedem constringite :
Debeo celebre Virgidemiæ sacrum,
Vos hunc futurum discipulum Cruci, prius
Stimulis forare, grande præsidium popli,
Columen Senati ; fuste perjurum caput
Commitigate ; bubulis pollincite
Coriis, Sabæi thuris & myrrhæ vicem ;
Lorisque totum facite sit tuber larus.
Cæsaris etiam ? cædire, fodite, dum malam
Bilem cruentus quâ tumet stillaverit.
Post quum cutem flagella vermiculaverint,

Pexum

Pexum & fricatum vimine politicum sopum
 Jubete plorare ante Salmasi pedes
 Majore qui te mactet infortunio
 Impure scurra. Qualis infontem vafra
 Lycum geronem pestis, haud ut tu coquum,
 Raptum valente torfit iratus manu
 Oetæus Heros ; ille diffractio procul
 Latè cerebro saxa resperfit cadens ;
 Patièrè similis robur Herois miser
 Corripere ni te foetidum & totum lucem
 Abominetur : tum gravem forsàn queas
 Eludere manum inanitate nubilâ
 Quid faciat ingens te levi Salmasius
 Tenebrione, tam minuto, tam nihil,
 Quem prepsat incassum Ultio, non invenit.
 Tén' sterquilinum, tén' cucurbitæ caput
 Ausum Monarchas rodere & Salmasios !
 Nunc bufo pardum, bubalum mus verberet.
 Opicus leonis vellicet forex jubas,
 Insultet urso eruca, milvîo culex :
 Scarabæi amicam concacent avem Jovi.
 Ipsumque merdis inquinant albis Jovem.
 Quidni in nova (si Diis placet) Republica,
 In qua sceleribus summa rerum devenit
 Ad diabolares servulos, faciem incram,
 Aut si quid imâ fece faculentius
 Dirâque Matre Nocte nocturnos magis.
 Hi nempe faciunt, Regis immemores Dei,
 Pedibus coronam suppedamentum suis ;
 Mimûmque honoris adstrantes vernulæ
 Perpetua sperant ista Saturnalia.
 Hi sacra Regum capita ceu pûas habent ;
 Et interempto Rege per summum nefas,
 Jussêre semet esse Principes sibi ;
 Domosque cæsi, purpuram, fundos, opes,
 Inter sodales dividunt sicarios,
 Cædis patratæ præmia, & quantum queunt
 Tororis animi scilicet lenimina.

Porro ut profani crure sublato canas
 Quidquid supra se est gessunt commingere,
 Si quidquam honestum, nobile aut probum est super,
 Violare gaudent ultimi mastigia:
 Virisque magnis imputatur crimini
 Quod sint fideles atque iustifundii.

Hic dicat aliquis rebus in nostris novus,
 Cives, quid ad me Darius an Darius regat,
 Plures vel unus? publica an privus morer,
 Præbere doctus colla cuiusvis iugo?

Paucis reponam. Nullius iugum abnuam,
 Modò non fidele juris excutiam iugum,
 Nefasque dirum calculo approbem meo.
 Non si supremis prona dignitatibus
 Præbere populos colla Paulus præcipit,
 Ideo parari parricidis culeos.

Cruces, secures, entheus doctor verat,
 Si qui latrones culmen ad summum sibi
 Fecere tetro parricidio gradum.

Nec dum nefando perduellum crimine
 Rex sacrosanctus stat foris, pulsus domo,
 Fidem arbitrùmque foederum appellans Deum.

Decet quibus jus & fides intos salis
 Extorrem avito arcere patrimonio;
 Nè nempe morem non gerant latronibus.

In quos tyrannos miles est quisvis homo.
 At cuncta ferrem, plebis unus, ut in Deum
 Imò in Deum ipsum caderetur hæc faba.

Nam quod sceleribus omnibus magis scelus,
 Vasto gementem pondere Orbem deglavet,
 Hæc sæva facta, foeda, dira, tyrannica.

Ipsùmque CAROLI immane parricidium,
 Quo nil peractis vidit ante seculis,
 Quo nil futuris Sol videbit atrocius.

Hæc dira facta, hæc scelera parantur palam,
 Severioris sanctitatis gestibus,
 Ipsi imputantur fini & Authori Deo.

Opima Princeps victima offertur Deo,
 Scelere

Scelere litatur, scelere libatur Deo:

Hic succus atræ pestifer lolliginis,
Ecclesiæ urens toxicum præcordia,
Orci triumphus gestientis, & sacræ
Professionis horror & pudor simul,
Cæli solique grandis execratio.

Tamen repertus (proh Deum) in terris homo,
Hominiſve speciem præferens fortis Stygis,
Qui luctuosum sæculi ultimi nefas,
Quod Mundus horret, quod bonos omnes coquit,
Solémque rugis improbantem contrahit,
Pudoris expers audeat defendere:
Tenebricolus rabula, pus & fel merum,
Atróque cœnum maceratum sanguine;
Innominandus balatro, qui quod non potest
Virtute apisci nomen ambit crimine.

Conductus ergò litterator Tartaro,
Conſarcinavit mille ſycophantias,
Mendacia, dolos, mille contemnarus eſt,
Malum bonumque neutiquam discriminans,
Ut ſorde quavis lundet anguſtum caput,
Sacrumque ſcindat Martyrem immerito ſuo,
Salmaſioque rabidus oblatret canis.

Adeſdum alaſtorgnaye, paucis te volo.
Tén' ergò in iſtam ſpem patrem pauperculum
Eduxe, genium ſæpe fraudentem ſuum,
Ut tu bonarum ſugereſ hac artium
Quàm præſtitiffet te bubulcitarier,
Agitare plauſtrum, vel melas trifatiles
Verſare aſelli ſorte ſimplicior rudem
Saltem poteſſes, nil tuæ patriæ nocens,
Occluſio em habere ſtultiloquentiam,
Nec in malam rem compuliſſes literas,
Ut eſſet unus qui ſui Regis necem
Piacularem comprobaret, improbus
Grammaticaſter, igneo calamo ferox,
Nec parricidis advocatus deſoret.

Námque inter iſtos belluis ipſiſſimis

Plus belluinos, & feris magis feros
 Enthusiastas, nullus (absque te foret)
 Pro parricidis atque parricidio
 Queat Latinas explicare copias.
 Indè intumescis verbero ; Salmasium
 Doces Latina verba, proletarius
 Locutule insularum Principem,
 Porcus Minervam, Nestora hesternus tyro.

Tantàmne cuiquam inesse sincipitis cavi
 Vacivitatē, sit licet muco grave ;
 Ut se suamque perditum famam ruat,
 Doctisq̃ue cunctis & bonæ mentis viris
 Volens sciēsq̃ue debeat ludibrium ?

At te timore libero ludibrii :
 Graviores pressant ; ira risum summovet ;
 Tot fœda sanctos in Dei vicarios
 Convitia, probra, injuriæ, calumniæ,
 Aggesta crimina altius, nè perpluant,
 Horrore mentes efferant legentium,
 In pectore iram, in ore lachrymas cient,
 Tibique tantum, furcifer, odium creant,
 Ut non adæque spumant rabiem canum,
 Atrūmq̃ue virus oderint serpentium,
 Non succubantem Dæmoni sagam Infero,
 Tetram inferentem gregibus & satis luem,

O si timendus omnibus tantum fores
 Quantum execrandus, nemo formidatior
 Effet per Orbem ; mox & ejulantibus
 Mâtres alumni inronarent asperæ,
 Miltonum adesse, formidandum dentibus
 Ut cultra longis, qui pueros esurit.

Bene est, quod hostis publicus, minis ferox,
 Sinone vastior, sævior Busiride,
 Quærente catulos tigride incitator,
 Idem es fugaci imbellior cuniculo,
 Populo execranti simiâ contemptior,
 Minor pediclo, turpior bufonibus,
 Summanianis nuribus inquinatior ;

Nec

Nec quisquam inanes quos fremens bombos crepas,
Vertiginosi vaticinia spiritus,
Phaleras minaces, unius pili facit.

Hinc publica modò crescit indignatio;
Quæ te nefandum, ni repens vertis solum,
Obruet, ut hostem generis humani lupum:
In quem agminatim plebs agrestis undique
Pagis relictis sudibus & saxis furit.
Mox ut bidental publicè vitaberis,
Cognominésque, si satis sapiunt, tui
Abjudicabunt nomen infautum brevi
Infontibus nè pœna fontis incubet,
Odiisque quondam publici fiat victima.

O tene cæcorum omnium cæcissimum
Non cernere, æstro percitum lymphaticò
Mala quot creâris capiti & ætati tuæ,
Cædis magister dum venis prædonibus
Tuumque monstis omnium immanissimis,
Ruentibusque in maximam malam crucem,
Vesanus offers succidaneum caput.

Humana quid non corda cogis aggredi
Lucri dolosi turpis esuritis?
Hinc nempe, avare nebulo, carpis maximas
Opimitates, dum tui Reges regunt.
Agedum sceleste, commodum sere & mete;
Nunc horrea imple donicum est serenitas:
Æqui bonique uberrimo dispendio
Rectæque mentis præstina multas opes;
Er quo pudore pectus est vacivus,
Hoc esto nummis factus marsupium,
Prudensque vili conscientiam cave
Vendas. Sed heus tu quod facis citò fac:
Sir venia dicto triste si verbum eloquor;
Rex CAROLUS instat: Ecquid hem! mala merx tremis?
Cum Rege Virgo vindicem gladium gerens
Justasque lances, horridas tyrannidi.
Ade latro, quicquid factitas, fac si facis;
Quod mentiendo, fraude, sutelis potes,

Quod

Quod insolenti fortis impudentiâ,
 Quod sanctitatis subdolis præstigiis,
 Nugis canoris, molle pellitis strophis,
 Si quid dolosi, si quid est in te viri,
 Nunc duplicatis prodeat conatibus.

Jam jam siglinâ sis rotâ versutior,
 Zonam secante fure confidentior,
 Agyrâ alente viperas vocalior.
 Mendaciôrque, chiromante nequior,
 Pejor Cromello, audentior Ravillaco,
 His nebulo, mactus milita virtutibus,
 His vos Tyranni, vósque Legati foris
 Sicariorum (proh Dei atque hominum fidem !
 Legationem obire parricidium

Audet per Orbem) capita conferre oculis,
 Movete nervos, nil inausum linquite ;
 Hoc agite celeres, est periculum in morâ ;
 Hoc agite si quâ proximam vobis crucem
 Effugere detur, vestra quæ jam pectora
 Pavore quassat, spiritus in faucibus
 Angit nocentes, & cibo negat viam,
 Dirâque somnos sæpe rumpit imagine.

At fortè mentes nupta intulsa lacit
 Speique musto inebriat * victoria,
 Pax ! fata notam mox sibi inveniunt viam.
 Nec festinantes clauda fontes deserot
 Vindicta Cœli, poena post equites sedet,
 Et propria iustæ jura constabunt cruci.

Produce jam vos ad crucem sacris fiet,
 Huic vos relinquo. Quod bonum sanctumque sit,
 Tibi resigno collocandos, Crux mala,
 Hos candidatos, & tuos mando tibi.

* Vigor
 niensis
 Anno
 1651.

In



In Zelotas rebelles.

anno
548.

O Qui lucifugas inimico lumine fraudes
Prodīs, & ex anro nudas producis Avernī,
Huc oculos adverte Deus, Satanāq; profunda
Fac pateant latē claustris arcana reuulsis;
Quodq; vides videant alii: fas esto per Orbem
Nōsse incrustatos falsā pietate rebelles.

Ecce tuum divi torquendo oraçula Verbi
Impingunt tibi, Christe, scelus; tibi cæde tuorum
Sacrilegi dirum meditantur condere regnum;
Crudeles flukrine magis, qui sanguinis arro
Cemento expectent Christi coalescere Templum;
Scilicet huc jejuna dies trigesima tendit,
Jejunæque preces, jejunus sermo minacis
Zelotæ furias populo spirantis & ignes;
Hoc veneranda volunt collegia vaticinantum
Textorum, è dolio qui ferre oracula sucti
Pulpita nunc implent, & vulgus mobile versant.
Huc spectant tories vano inclamata popello
Publica libertas, & summi jura Senatūs;
Nempe ut jus detur sceleri, legūque refixis
Limitibus, jussaque forās pietate vetustā,
Sceptra gerat latē Pietas sine lege novellā.
Qua liceat (sed post sacra conventicla precēsque)
Exercere piis sacras impune rapinas,
Enthea stupra, pias cædes, incendia sancta,
Effractæ pateant puris nebulonibus arcæ,
Mactatisque piè rubeant concivibus agri.

Ar CAROLUM ingentem, quo nil præstantius Orbi
Collus indultum, solio detrudere iusto,
Pellere proscriptum, strictoque invadere ferro,

Hoc

44 *In Zelotas rebelles.*

Hoc Pietas & jura volunt, sic itur ad astra.
Stringite tela viri ; furiis accendite mentes,
Igne domos, sacram configite Majestatem :
Quotquot legitimo gladios intendere Regi
Abnuerint, ferro fontes tollantur & igne,
Sic Pietas Pharizæa jubet, sanctusque Senatus.

Hæccine, Rex Superum, per quem dant jura Monarchæ
Cernis, & ex alto penitus scrutaris Olympo ?
Et pateris ? cur tela tibi, cur fulmina cessant ?
Euge ! tibi aspersam latronum crimine labem
Blas, juste Deus, tua si tibi gloria curæ.
Hem converte, secus Catharos evertte rebelles
Funditus, ut validi quondam gravis impetus Austri
Stravit humi vullas imis radicibus ornos.
Incute vim telis quæ ter justissima torquet
Numinis ille tui Majestatisque character
Proximus à Christo CAROLUS. Committite illi
Porta tonans Coeli, decertantique ministret
Fulmina perjuros debellatura Gigantes.

EPICE.



EPICED IUM

Illustrissimi

HENRICI CLIFFORDI

CUMBRIÆ Comitis.

FInge pares numeros Heroi Musa relato
Divorum in numerum ; da fortis metra cothurni,
Non molles Elegos. O magno nomine major,
Gloria quem niveis attollit lucida pennis,
Cui generis splendor Fastos antiquior omnes

Exuperat, celâque cavâ sub nûbe vetustas
Nobile principium, ceu Nilus originis expers.

Clara tuo pendent quæ circumpecta feretro
Stemmata non te æquant. Virtus tibi stemmata Virtus
Sanguine nobilior meliori finxerat auro.

Quæ tecum alternis artè complexibus hærens
Se tibi jungebat comitem, propriâque dicabat.
Virtutûmque caput Pietas Regina sedebat
Intus, & ingentes animi tractabat habenas.

Quàm bene conjugio Virtus sociatur Honori !
Sic gemmam rutilis accendit bractea flammis,
Fulgorem adjiciens pretio ; sic arte docetur
Aurificis fulvo radiare pyropus in auro.

Miremur memores in magna sorte ferentem
Majores animos, sed eundem mente benignâ
Æqualem imparibus, infra semerque minoresque
Ut Jesus humili se pectore demittentem.

Miremur placidam forti sub pectore pacem

Magnanimi

Magnanimi Herois, nam qui visore laerto
 Torsit in adversos certissima tela Gigantes,
 Antè diu sacram prætendens miris olivam,
 Pacis inire vias, Martemque avertere regno
 Heu frustra voluit, fero quærens Britanno:
 Conatusque pios elusit fraude Petasga
 Prostratus, supplèxque prius, modò perfidus hostis.

Ergò Deus bellum tribuit capientibus, idem
 Cliffordò ingenti pacem, quâ Rector Olympi
 Sebeas, & seipso ter constantissimus implet.
 Illo pæcè fruens magnâ placidissimus Heros,
 Jam sedet in portu, dum nos vertigine Mundi,
 Bellorum eventa vario, brutoque tumultu,
 Semineces rapimur, tumidi ludibria Ponti.

Heu miseri proprio violamus viscera ferro;
 In primumque Chaos metuit labefacta reverti
 Anglica luxato nutans fundamine tellus.

O diris erepte malis! cur fletibus urnam
 Prosequor elapsi, tempestivumque recessum?
 Sed lachrymis nutritur Amor, et iusta volentes
 Solvimus, invitique simul; longumque Valero
 Dicimus, & lachrymis magno libamus amori.

PSAL. II. 4. *Si fundamenta
 subruuntur quid faciet justus.*

Sicubi porticibus surgit laqueata superbis
 Regia celsa vetus, illæcia falce temporis;
 Territa si subito concussò cardine Tellus
 Tërque quaterque tremens solum columnis subrahât,
 Protinus alta cadunt subductis tecta columnis,
 Casus & ipse novo Terram tremore concutit.

Nostrarum

Nostrarum hæc rerum facies, ruit ecce columna,
Dêque domo patriæ saxum angulare demitur.
Heu quor præcipuas Martis tremefacta tumultu
Imperii miseri Tellus columnas subruit !
O nè robustis Atlantibus orba fatiscat
Regia celsa verus, & cum columnis corruat !
Christe Salus Mundi, nullo tibi cune fultæ
Auxiliare domo ; jamjam labantem sustine.

Poeta ad seipsum.

Hui cur carmina funditis inepte
Quæ nemo legat ? occidit patronus
Musarum & tuus, ille qui solebat
Nostros esse aliquid putare versus.
Quin cum Judice carminum tuorum
In crypta genesi sacra verusto
Exanguem jubeas jacere Musam.
An speras tumulum superbiorem ?

Nobi-



1649.

Nobilissimo Puer.

Ingenuus, nātūſque ſacro ſub Principe liber,
 Quid moror hīc ? ubi Tartareis educta cavernis
 Inſidet ingenuis atrox cervicibus Hydra
 Multorum capitum. Satis eſt vidiffe coronam
 Plebeiis tritam pedibus, dirāmque ſecurim
 Auguſto impactam capiti. Non poſſumus ultra
 Regali in ſolio bacchantem cernere vulgi
 Colluviem ſœdam. Vivant ſub legibus iſtis
 Quos raptō vixiſſe juvat, queis regia cœdes
 Et dulces præbet direpta Eccleſia prædas.

Hinc mecum Generoſe Puer ꝑ ſuge littora mecum
 Barbara, deformem ſemefis artubus aulam
 Cyclopum, ſaniēque domos tabōque fluentes.
 Quām longūm hīc imæ populi ludibria fœcis
 Servorum augemus numerum ? dam libera contra
 Gallia magnanimos regalibus excipit ulnis ;
 Gallia legitimo Imperio magnōque Monarchā
 Lærior, ambroſiis quām fronte comante racemis ;
 Queis te, Chære Puer, toto cum divite cornu
 Pomorum invitāt ; tibi brachia deprimit arbos,
 Et cultā hortorum blandè Pomona renider
 Luxurie. Tibi magnifica Lodoicūs in aula
 Nobilium fautor generoſum pandit Aſylum.
 Outinam *CAROLI* germanā mente miſertus
 Exilium, jam tela parēt, jam fulmina mittat
 Sanguine Terrigenūm nuper rubefacta, ſuperbos
 Fraterno è ſolio deturbatura Gigantes.

P O E M A T U M

Libellus Tertius,

S Y L V A

V A R I O R U M.

*Sunt certa piacula quæ te
Ter purè lecto poterunt recreare libello.*



CANTABRIGIÆ,

Prostant venales apud Johā. Creed
Bibliopolam, 1669.

1700

A



Generoso Viro, pietate eruditio-
ne & moribus antiquis insigni

THOMÆ FOTHERBIO.

Quod in ista senectute, & severo hoc
vitæ instituto, ad carmina animum
appulerim; non opus habeo, Vir a-
micissime, consilium meum apud te
tueri, qui compertum habes meæ vitæ modum.
Quam operam sacro meo muneri impendam;
& quibus occasionibus ad ea conscribenda com-
pulsus fuerim, quæ à carminum vena toto cælo
distant, tu probe nōsti; & quæ me curæ iden-
titem arietent ipse experior. Durus fuerit qui
labore fesso & turbellis implicito innocua hæc
delinimenta negaverit, quæ ingenium dum re-
laxant acuumt. Nulli tam sunt graves, nulli
tam occupati viri, qui in medio negotiorum æstu
non soleant interjungere, & ludo aliquo aut
hortulo, aut deambulatione lassum animum re-
ficere. Hic verò est ludus meus, hic hortulus,
hæc vireta, quò prodeambulare libet quando la-
bore aut molestiâ contractus animus amæni-
tate aliquâ postulat exporrigi. Neque sunt ho-

rum poematum pleraque omnia ab Ecclesiastico
meo munere aliena, utpote Dei Opt. Max. ce-
lebrationes, & virtutis adminicula, & pietatis
alloquia, quibus memet erudire & ad Deum eri-
gere studui. Quod officii si aliis etiam prasti-
terint non erit cur me hac edidisse pœniteat. Sa-
nè si quandoque verè ludere mihimet permisi,
non commisi ut severissimorum Aristarchorum
censuram virgam jure possim reformidare.
Non adèò mihi blandiuntur mea hac oblecta-
menta ut sperem fore ut omnes iis perinde de-
lectentur; Satis erit mihi si piis candidisque
ingeniis placuerint, abundè si profuerint. Tu
interim, Virorum candidissime, opusculum
istud, quod eruditi & castigati iudicii tui exa-
men subiit, patere ad te recurrere, & quantum
tibi debeam, quàm te ex animo colam, palàm
profiteri. Equidem nisi te præcipuè coluero,
mihimet plurimùm defuero. Si ve enim pri-
mariam tuam eruditionem admiror, si ve pium
candorem specto, si ve tua in me merita recolo;
Nullum novi ex quo inter homines versor, di-
gniozem quicum sacro amicitia fœdere con-
stringi eligam, aveam, & seridè ambiam.
Vale.

POEMA-




P O E M A T U M

Libellus Tertius,

SYLVA VARIORUM.

P S A L. CXXXVII.

*Super flumina Babylonis Para-
phrasis liberior.*

 Aptiva Judæ turba, præda barbari
Victoris & ludibrium,
Labore longæ defatiscentes viæ, e
Tandem assidentes flumini
Diræ Babelis alluenti mœnia,

Mœstam quietem carpsimus,
Illinc superbâ mole surgentes feræ
Turres notantes regiæ,
Dum victa Sion pristinum ostendit decus
Celsâ ruinarum strue,
Toti in solutos ejulatus fervidi
Acri dolore erupimus,
Solymæque fletus umbre profusissimo
Funesta iusta solvimus,
Patriæ jacenti perperam populus memor
Suo sepulcræ pulvere.
Lyras verendi cantibus Templi sacras,
Tunc lugubri silentio

2 *Paraphrasis Psalmi*

Sortis querentes dura captivæ mala,
 Ramis salicti proximis
 Laceris revinctas fidibus alligavimus,
 Serviliter dependulas;
 Cavisque ventus intonatus nabliis,
 Spirante luctum sibilo,
 Raurum sonorem consonum gementium
 Admurmurabat planctibus.
 At ecce victor insolens has instrui
 Doctæque pulsari jubet.
 Canite sacratos, inquit, illi quisquis est
 Hymnos Abramidum Deo;
 Quos ritè festis læta dum Noviluniis
 Albata pangebant cohors,
 Sublimis ædis aureis laquearibus
 Reciprocabant fornices.
 Tum nos silentes, ora defixi solo,
 Sic mente inussitavimus,
 Itâne tumentes rubra fletu lumina
 Solvemus ora cantibus?
 Itâne Babelis ebrizæ lubentizæ
 Judæ ministrabit dolor?
 Inimica Terra, gens profana, nefaria
 Hymnósnæ sanctos rideat!
 Ingénsque Jovæ fastuosos hostium
 Nomen triumphos augeat!
 Sed ante nostrâ fraude quàm Solymæ malis
 Accedat hoc dirum nefas,
 Cæsæque natos Matris, heu! superstites,
 Invadat hæc oblivio;
 Oblivio sacræ longa nos teneat lyræ,
 Artisque blandæ tædium:
 Linguâ palato hærente, mutos deserat
 Arente fauce cassâ vox,
 Dum dulcis ille totus in lachrymas abit
 Nativus humor faucibus.
 Te Solyma sancta, mente te revolvimus
 Augusta Templi machina;

Promasque

Super flumina Babylonis. 3

Promúsque lucis ingementes nos tibi,
Conduſ querentes aſpicit :
Nullúmque lachrymis ponimus finem aut modum ;
Exordiúmve gaudiis,
Ni cauſa lachrymis ſtrata Sion, præbeat
Cauſam reſurgens gaudio.
At ut profundis præſtet aliquod in malis
Ægris levamen ultio,
O qui improborum crimina memor annotas,
Iráque pleſtis vindice,
Memori reconde mente quot diſteria,
Quám ſæva, quám procacia,
Ferox Idume perditis ingeſſerit,
Noſtris ruinis ſe beans ;
Quum rupta Solymæ barbaro ariete mœnia
Hoſti paterent impio.
Vertite, boabat, rapite, rumpite, perдите ;
Templum, domos, arces, fora
Effoſſa ab imo ſubruite fundamine.
Ignara Idume quas vices
Divina Nemefis volvat ! O quanto brevi
Hoc crimen invidentiæ
Velis redemptum, quum tibi nocens caput
Ruina gravior obruet !
Et tu protervo proterens gentes pede,
Siticuloſa ſanguinis,
Sævas ſuperbi, viſta propediẽm Babel ,
Patiẽre victoris vices.
O quis beatum ſemer ultorem ſacræ
Sionis everſæ feret,
Tuóque, ſclerum dira Mater, ſanguine
Noſtro litabit ſanguini ?
Felix parentis qui malæ mala pignora,
Ut ova calcans aſpidum,
Arrepta pedibus, uſque & uſque cautibus
Incuſſa duris conteret :
Sparsóque ſobolis proluet cerebro ſinum
Et uda Matris lumina.



Christiana Felicitas.

Beatatus ille quem Deus piamine
 Cruoris aspergit sui ;
 Qui se perosus improbum, vilem, reum,
 Genioque diffusus suo,
 Iræ Parentis, Filii, supplex nocens
 Opponit innocentiam.
 Qui fraude puras rollit ad Cælum manus,
 Largâsque tendit pauperi.
 Cui pectus instar turris est aheneæ,
 Æqui bonique conscium.
 Qui non sibimet vivit, at totus bonis,
 Aris, amicis, patriæ ;
 Cui facta dictis consonant, urrisque mens,
 Prudens, serena, candida.
 Qui non Lyæo, non litat Cupidini,
 Sacræve nummorum fami ;
 Non inhiat ostro Principum, non publici
 Auram favoris aucupat.
 Sed irretorto spectat aurum lumine
 Fasces, voluptatem, decus.
 Non semet ultra nititur, sed limitem
 Intra brevem se contrahit.
 Quovisque dignus decore, Virtutis jubar
 Securus umbræ possidet.
 Non ille rebus insolescit commodis,
 Nec efferatur arduis.
 Parique vultu utramque fortunam regit,
 Compos suinet & Dei.
 Non delicatâ mente portentum foveat
 Informis ægrimonix ;
 Sed læta sensu Numinis tranquilla mens
 Sanum sibi servat larem.

Arx mea Deus.

5

Hæc mente Mortis sponte rictus offeas
Salutis ut portum appetens,
Æternitatis candidatus aureæ
Jam mente Cœlum præcipit ;
Et expetitur corporis repudium
Nunc inchoat fastidio.

Arx mea Deus.

PRati virentis in novello gramine,
Quod verna pingit flosculis amœnitas ,
Loquax fluente rivus argento secat,
Zephyris sereni recreabar æris,
Serenus ipse, aurâque temperator.

Non puriores à Deo recens Homo,
Amœnitatem Edenis æmulans sua,
Spirabat auras ; quando Pax infantiam
Mulcebat Orbis, Innocentiæ comes.

At ut secunda tristibus cedunt, ubi
Subitò retrorsum circumegit se rota ;
Repentè nimbis Africæque sibilo
Facies Olympi nigricans inhorruit ;
Tum mugientum murmur audiri procul
Nube è corusca fulminum, & jam non procul ;
Tonitru tremendi concutit Terram fragor,
Insequitur imber ingruens : Ego me in pedes ;
Ædémque vici proximi cursu peto,
Arcem salutis deligens domum Dei,
Divæque sedeo tutus in custodiâ ;
Dum tetrica flammis ardet erumpentibus
Rutilisque turres æthra telis dejicit.
Jugis refusi saxa torrentes rotant,
Suisque mistos volvit opilionibus
Greges aquæ vis turbulenta, concita.

Spes

Spes longa messis, & boum perit labos ;
 Et vorticoso devoluta turbine
 Impacta latè sternit eluvies domos,
 Ipsúmque quod me protegit Templum ferit.
 Frustrà ; impetitur firmat ingens incola,
 Súsque fretas arce mentes præsid.

Ac sicut undis arietatur irritis
 Circumfremente scopulus illæsus salo,
 Contra procellas atque sæcla pertinax ;
 Infracta Mundi assultibus domus Dei
 Frustrà feritur, sospitatis arx meæ,
 Cœva Cœlo, cura Cœli maxima.
 Hæc ergò ventis præbet immotum latus,
 Ferocientes hostium minacias
 Spumis refringi cogit indignantibus ;
 Supràque nimbos, infimæque turbidos
 Auræ tumultus erigit placidum caput.

De tam benigno plurimi tutamine
 Plurima celebrent, plura plurimis ego ;
 Qui tot periclis, tot malis exercitus
 Ab æstuosis enato torrentibus ;
 Deoque tutus Martiales tot lupos
 Tuli irruentes, tot togatos vultures
 Incolumis, uno nè quidem pilo minor.

Huc huc frequentes commeate, hîc figite
 Sedem supernæ vos domestici domûs ;
 Quam dum procellæ verberant extrinsecûs,
 Perennis intus Pax Dei tutam beat,
 Vivóque fonte simpulóque argenteo
 Cœlestis hilarat intus ebullans Charis.
 Hîc est manere nos bonum ; hîc ridet Salus,
 Divini amoris gustu inenarrabili
 Æternitati Gloriæque prævia.

Natura



Naturæ Fanum.

TE festi Genium loci
 Augustum veneror, Te nemoris sacri
 Magnum suspicit incolam
 Mens hæc plena tui, Conditor unice.
 O fontis vitrei latex,
 Argutis avium questibus obstrepens ;
 Soli non penetrabiles
 Umbrarum latebræ, roscida gramina,
 In Cælumque minantium
 Scabrorum scopulorum horror amabilis :
 Hic sylvæ spatium vagus
 Quærebam, & Zephyri flamina mollia ;
 Hui ! Templum invenio, Deum
 Hic respiro Deum mente calens novâ.
 Hic numen trepidantibus
 Fibris, haud temere credulus, haurio.
 Papæ ! si nemorum comis
 Tantum conspicui Numinis insidet,
 Horrorémque pium, gravi
 Mistum lætitiâ, mentibus incutit ;
 Quàm præsens solido Deus
 Implet sideriam Numine regiam,
 Lætum lucidus aspici ?
 Quantus Coelicolum mentibus influit ?
 Quàm se vivificum meæ
 Infundet Superum cœtibus additæ ?

Est



Est Deus in nobis.

S P O N S A.

P Er spissas nemorum ramis coeuntibus umbras,
 Per muscosa in rupibus antra,
 Per liquidos fontes, per prætextentia ripas,
 Florida prata & glauca salicæ,
 Per juga subjectas circumspèctantia valles
 Et speculam præbentia celsam,
 Acribus en oculis cursûque volucris anhelò
 Dilectum errabunda requiro.
 Quæro oriente die Dilectum, quæro cadente :
 Quæque ejus vestigia lûstro
 Nullibi non video ; & placito nisi ludor amore,
 Trans virgulta trementia vento,
 Et dubias Euris ramos agitantibus umbras,
 Dilectum formâ speciosum
 His oculis vidi, vel me vidisse putavi :
 Ast ulnis astringere visum,
 Et magnum amplexu satiare ardentis amorem,
 Non datur. Ah ! quum prendere nitor,
 Amplexu in medio fugit, heu ! fugit amplexantem.
 Pastores qui rupe sub ista,
 Saltibus in riguis vigiles, & pura secundùm
 Flumina, Sponsi pascitis agnos ;
 Dum latus umbrosa depono sub ilice fessum,
 Si vos Christi tangit amicæ
 Cura laborantis divino vulnere, vestris
 Semianimem fulcite lagenis.
 Dicite quos lucos præsentì Numine Sponsus
 Illustret, quas diligit umbras.

Dicite,

Dicite, nam nōstis, quā Sponsum sedula curā
Inveniam, inventūque retentem.

P A S T O R.

Nympha alias tantum formā præstante relinquens
Quantum stellas Luna minores,
Quid formam insignem, divo quam Sponsus amore
Deperit, ipsā morte redemptam,
Solibus infuscas rapidis, & pulvere currens
Collutulas sudoribus uda ?
Desine quærendo quæsitum amittere Sponsum.
Intrus habes quem dispicis extra ;
Non tibi ruspando per culta, per avia fessæ
Venanti procul inveniendum.
Est Deus in nobis, est in penetralibus imi
Pectoris ; hoc purgare memento,
Intrus enim vivit, sed velo carnis opacæ
Obductus non exerit omnes
Luminis & vitæ partes, sanctique caloris.
Tum peccati noxia labes
Densum oculis glaucoma infert, capitique stuporem ;
Nec nisi per nebulam finit ægram
Cernere, vel præsens Numen sentire Mariti.
Tu semel istas elue sordes,
Splendet puro tibi cordis in æquore Christus,
Ut Sol munda fulget in unda,
Quum pelagi Rector tranquilla silentia ventis
Indixit, pontoque quietem.
Sanctus Amor diā comprehendens pectora flammā,
Contemptus Mundique suique,
Verbo nixa Fides, patrii Spes incola Cœli,
Mens recti consulta tenaxque,
Juncta voluntati Patris inconcussa voluntas
Quidquid agat, quocumque vocarit,
His est, Nympha, tibi Sponsus quærendus in antris,
Hos lucos, has diligit umbras :
Hi liquidi fontes Sponso inspectante beati
Illustrantur imagine divâ ;

Hic tibi quæsitus Sponsus sese offeret ultro :
 Mox etiam spectabilis extra ;
 Sive sub Occasus roseæ coloribus Ortus
 Effulget, seu fragrat in hortis ;
 Seu varix lætū Naturæ in fronte renidet :
 Quin medio de fonte dolorum
 Melle tibi fluet, è propriâ dulcedine præsens
 In nectar mutabit acetum :
 Ipse comes, dux ipse viæ, per dædala Mundi
 Recto ducet tramite tutam.
 Perpetuus lateri custos hærebit amico.
 Consilium & vires trepidanti,
 Afflicte alloquium, vitæque in Morte perennem
 Divinus præstabit amator.

S P O N S A.

At te pro monitis, Vir Sancte, fidelibus ornet
 Magna Salus vernante coronâ.
 Hui ! Cælo admoveor, Cælumque in pectore, Sponsūque
 Invenio sapioque beata.
 O Sponse, O qui me quærentem quæris, & idem
 Me trahis ! O mea Vita Salusque !
 Dum pectus, proprium solium tibi, sedula purgo,
 Tu præsens virtute refinge.
 Hic regnato Fidem sublimis & inter Amorem.
 Hic Æqui rectique Creator,
 Virtutumque sede docili stipante catervâ ;
 Has tecum proprias mihi præsta.
 Me tua flagranti succendat gloria zelo.
 Istæ sint tibi semper apud me.
 Deliciæ ; hi mecum saltus, hæc culta vireta
 Æternū te Sponse retinent.

Schola



Schola Morbi.

INvictæ morbi assultibus *Casaubone*,
 Heroa Græci desinant Tyrrhenum
 Convexa supra templa Cœli tollere
 Quod bajulavit ; & catenatos novis
 Actos labores, præliisque prælia,
 Canenda Famæ centilingui tradere.

Minus est leones contudisse, & ardua
 Fregisse Lernæ colla, rictusque horridos,
 Quàm tot dolorum monstra dira, renium
 Penetræ & imi lancinantia pectoris,
 Et quæ medullis intimis exæstuant,
 Superâsse miti gnaviter patientiâ
 Ferendo victorem. Hæc mihi victoria
 Habetur ingens, si libenter induas
 Quodcunque collo Rector imponit jugi ;
 Deoque concors quod jubet tibi imperes.
 Jubeasque carnis consilere murmura.

Hanc ipse de se rettulit victoriam
 Jesus, amarum de Parentis dextera
 Sumens volenter hauriensque poculum :
 Hanc tu Magistri fortiter magni sequax,
 Tua dum voluntas ad voluntatem Patris
 Devota semet examussim comparat.

Est hac in arca delicati pectoris,
 Et destituto viribus corpusculo,
 Erecta pressu carnis ægræ sana mens,
 Morboque ab ipso colligens vires Fides,
 Crescensque damno : si tamen damnum vocas
 Nocuum malarum fomitem cupidinum
 Extingui, amicâ quum Deus mittit manu

Morbum

Morbum salubrem, residibus virtutibus
 Diam palæstram, labis & noxæ luem.
 Et omnis intrus fuscitamentum boni.

Hinc ut ciborum, sic voluptatum subit
 Et inanitatum seculi fastidium.
 Hinc mens docetur à bonis fugacibus,
 Malo propinquis, ad perennes erigi
 Beatitates ; hujus à carnis luto,
 Noxæque mœrorisq̃ue contubernio,
 Ad Sanctitatis Gloriæque regiam,
 Regemque ad ipsum. Grande id est solatium
 Animæ revinctæ carnis ægræ vinculis,
 Urgente morbo si caro sit ægerrima ;
 Tunc nempe rinam ducit hoc ergastulum :
 Opicus ruinam carcer extremam trahit ;
 Alisq̃ue circum læta plaudit candidis
 Cruore Christi parta Libertas piis.
 Tum corruentis trans hiarus carceris
 Palmam videre est summi in Arbitri manu,
 Addentis animos, & levantis pondera,
 Supremo agone quæ laborantes premunt.
 Tum Pax serena, nobilisque Gloria,
 Patente Cœlo, desuper luctantibus
 Blandum renident, & benigno lumine
 Hilarant dolentes, spèque cœlesti beant.

Tibi hanc dolorum vellicato morsibus
 Ipsi dolores cœlicam Spem suscitant.
 Et amore carni mortuus, vivus Deo,
 Habere Mundum res suas jubes sibi.

Bene est quod istis unice solatiis
 Insistis, ardens solvi, & esse cum Deo.
 Sed id cavebis, nè sis cœlestium
 Quam roborare debeat patientiam
 Infirmer, actis si Deus certamina
 Agenda plura destinavit addere.

Si terminandi morte culmine Imperi
 Nè non fruatur justus hæres, quolibet
 Sumptu & periculis mille depaciscitur ;

An æviteri scriptus hæres Imperi,
Christi cohæres, arduum quidquam putet
Quo Cœli aditur permanens hæreditas ?
Christine miles præstantis perpetem
Cruce ac cruentis gloriam sudoribus,
Eò vocantem subsequi nolit Deum,
Et inire eandem quam suis trivit viam ?

Vir Magne, cujus plurimis exercita
Morbi & laborum fortitudo præliis,
Suam approbavit Imperatori fidem ;
O perge quidquid est super certaminis
Certare : perfer hoc tibi incumbens onus :
Precare, spera, fide, sancte pertinax,
Perennitati prævium lætissimæ
Acerbitatis omne tempus est breve.

L T H Y R



THYRSIS.

PALÆMON.

THyrsi quid immeritas obrundis questibus ornos?
 Mēq; vagum tacitæ per amica silentia sylvæ?
 1d Hoc bene, stultitiam mutis quod testibus istam
 Effutire liber; nimium crudeliter istud,
 Quod teneras cultro violas infantia fagos

Ligna, sacro si quæ tibi vulnere digna probantur,
 Nugarum omne genus, figmentorūque capaces
 Arboreos libros Amaryllide conscribillans.

At fortè egregii monumentum vulneris omnis
 Diligit, atque tuis accedit amoribus arbos.
 Ipsi (quis dubiter?) Zephyri miserantur amantem,
 Et sua sponte tuis mœsti suspiria miscent.
 Te solatur amans turtur, querulūque gementi
 Aggemit; & tremulâ fons hinc admurmurat undâ,
 Indè ex rupe cavâ miserans, miserabilis ipsa,
 Te juvat alternis resonans singultibus Echo.
 Nec cessare volens aliis miserantibus una,
 Illachrymat vernis Tithonia floribus uxor,
 Prosequiturque tuos lachrymoso rore dolores.

THYRSIS.

Tu mihi debueras ægro fomenta, Palæmon,
 Non adhibere salis nigri & mordacis aceti
 Rodens unguentum peioraque pharmaca morbo.
 Sic valeas, ut nulla Venus radiantis ocelli
 Præpetibus jaculis juveni tibi pectora fixit;
 Nec tua dicturum taciturnis tormina sylvis
 Egit in umbrosæ nemorosa silentia vallis.

Ac

Ne
Ips

At nunc emeritus miles, glaciéque senectæ
Frigidus in Venerem, Veneris myſteria rides.

PALAMON.

Id mihi vel primum eſt ſenii inter commoda, Thyrsi,
Quod ſævi imperio pectus ſubducit Amoris.
Aſt ego, ſi rectè memini, ſic ſemper amavi,
Ut fruerer, non opprimerer malè ſanus Amore,
Nec nemora & ſurdas pulſarem queſtibus aures.

THYRSIS.

Nimirum modicæ modicas in peſtore flammas
Accendunt formæ; tibi proletaria, quale eſt
Uxorū vulgus placuit, primaria nobis:
Quâ non nobilior Paridis præcordia, totâque
Ilion incendit; ſed caſto armata pudore
Forma ciet rapidos tantò vehementiùs ignes,
Ipsa mari placido vernâque ſerenior aurâ.

O oculos clara aſtra meis! O frontis honorem
Ambroſium! O teretes ulnas! O candida colla!
O labii Charites ad quæ negat oscula nati!
O dulcè illicibus ſurgens ſidensque papillis
Horridulum pectus, durum velut ipſa repellens!
Hei mihi, non noſtro penetrabile pectus amore.

PALAMON.

At mihi non aliud ſonipes hinnire videtur
Indomitus, ſimul hauſit equæ tremebundus odorem:
O caput argutum! O cervix erecta comâſque!
O laſos habilésque armos, pectûſque toroſum!
O teretis lateris Veneres, & clunis obeſæ!
Una tibi & pecudi dominatur bruta libido;
Quâmque cupit ſpeciem turbatis ſenſibus offert.

THYRSIS.

Hoc vero ſermone, ſenex odioſe, videris
Non mihi ſed Marri Naturæ indicere bellum;
Ipſe Deus, Mundo Naturæ nomine notus,

Femellæ illecebras, maribûsque cupidinis æstum
 Addidit, & volupe indulgens geniale Creator
 Providus amborum nexui, prolestat amantes ;
 Ut dulcem sobolem, damnis ab Morte medelam
 Orbi præstet Amor, quem Terra, & Pontus, & Aër,
 Agnoscunt Mundi Genium, rerûmque Parentem.

PALÆMON.

Tu modò Naturæ sequitor documenta magistræ :
 Illa cupidineos rectâ ratione furores
 Comprimit, & placido faciem se præbet amanti.
 Illa tuis multas advertet amoribus aures.
 Quoque sitim Veneris sedes, flammæque repescant,
 Nullibi non promptum est ; potior nisi Fastus Amore
 Importuna tulit stolidæ fastidia menti,
 Nec placet ulla tibi nisi formosissima conjux.

At tibi non tripodis vates, non antra Sibyllæ,
 Responsum dederint scito constantius isto,
Nulla voluptatem promittens mira supremam
Forma fidem servat ; sed cæcum & amore furentem,
 Magnum expectantem quiddam, parilésque decori
 Delicias, longum optato potientis in æclu
 Fallit ; & illa quibus sitientem donat amantem.
 A toto pariter donantur præmia sexu.

THYRSIS.

Téne, Amarylli meum, vitâ mihi charior, ignem,
 Non modò quòd sæva es, sed quòd formosa relinquam ?
 An mea diffingam quanquam non mutua vincla,
 Et mutem pulchros ullo diademate casses ?
 Ante rosas glacie mutabit Flora Decembri ;
 Sólque celer spretâ lucis radiante quadrigâ
 Tardigradis bubus volvet sarraca Bootæ.

PALÆMON.

Non mihi cum pulchrâ lis est Amaryllide, Thyrsi ;
 Est tecum : quia tu decus hoc muliebre, quod Author
 Lætificare jubet, non imperitare, negato

Invitum

Invitum imperio dirâque tyrannide vestis.

Nempe tuam precibus sperâsti flectere Divam,
Dum libas lachrymis, & cor pro thure Sabæo
(Cor ~~miserum~~) flammis adoles, hanc pronus ad aram. *stolidum*
Téne puellarum non noscere ventosarum
Ingenium ? faciunt suspiria nostra superbas :
Sævas tristis Amor reddit, festivus amicas,
Et promptos aditus aperit ; risûque, jocóque,
Lætis simpliciter, nec adhuc ætate malignis,
Nectit Hymen cauto retinentia retia lusu ;
Atque foris lachrymosus amans plorare jubetur.

THYRSIS.

O morum consulte senex ! tua vera repulsus
Exterior responsa procus ; qui nempe jocosam,
Serius, & magno liquefactus amore puellam
Aggressus, pavesci amens, precibusque fugavi,
Ante mihi facilem, risûque necante benignam.
Hinc magis urit Amor, cui Desperatio folles
Subdit, & indignâ læsum irritante repulsâ,
Acrior in vetitum, nullâ quia pectus amatum
Arte ferire potest, in se sua tela retorquet.
Ergò exspes ægérque vapor, lucis que meique
Pertæsus, proprio præbens alimenta dolori ;
Sollicitóque meas & motu ventilo flammæ.

At tu cui pietate gravem, placidèque sagacem
Excoluit rerum longa experientia mentem,
Consilii miserere inopem ; trepidæque celocis
Sume gubernator cauto moderamine clavum.
Et si qua poteris (& quid prudentia cana
Non poterit) portui jactatam appelle cupito.

PALEMON.

O miserum, & nullâ pectus medicabile curâ,
Cujus ab alterius pendet fors anxia mente !
Thyrsi, tuam aggrediar lepidis Amaryllida dictis,
Et molles tenrabo aditus, & fortè movebo ;
Nam neque marmorea est, neque tu non dignus amari.

L 3

At

At tu, sive alios sibi fœmina legit amores,
Sive tuos optat, temet plûs semper amato;
Nec natum servire viro, virtutè minorem,
Fœmineum sexum cervici impone virili.

Hoc habet adversum Naturæ effrœna cupido,
Seu Venerem, seu quæris opum sitibundus acervos
Quod per eam sese imperio spoliare jubetur
Præses Homo Mundi, summique Parentis imago.
Et sibi subjectis semet submittere rebus.
Is demum imperio rerum lætatur & usu,
Qui compos dominûsque sui, ratione magistrâ
Vota regit Venerémque domat, subponere spernens
Particulæ pecudis divinæ particulam auræ.

T H Y R S I S.

Hæc Sophiæ præclara tuæ documenta, PALÆMON,
In mea descendunt altè præcordia; sed tu
Concessæ Veneri castoque procantis amori
Asperior præter justumque æquumque videris.
Nam mea casta cadant & subventanea vota,
Si vitium labemque alieno offerre pudori
Atque meo, mea molitur malefana cupido.
Et quisquam licito litem intentabit Amori?

P A L Æ M O N.

At tuus hîc licitos, si te scrutaris, amores
Reddidit illicitos furti sibi conscius ardor.
Quid magis illicitum quàm quem sibi Magnus amorem
Conditor asseruit Dominæ donare puellæ,
Quam sibimet Numen finxit tua priva libido?
Huic totos animos: huic tota offerre precantem
Intima sacrilegis fumantia pectora flammis?

Bella tibi quantum satîs est Amaryllis ametur:
Quantum te sequior, quantum virguncula, quantum
Lectæ tibi in thalami sociam, fidamque jugalem;
At Deus immensum quantum, sine fine modoque,
Immensum Bonus, immensum Magnûsque Decorûsque;
Immensa est etenim nobis hoc sine cupido

Indita,

Indita, vel toto non exsaturabilis Orbe,
 Ut foret *Immenso* plena & satiabilis *Uno*.
 Iste tuum (ac totum) sibi vindicat Unus amorem.
 Huic summo te ritè decet Dominóque Deóque,
 Libantem lachrymis, imi penetralia cordis
 Sacrificare pium, puris ardentia flammis.
 Huic tu fidus amans *Immenso* gratus amanti,
 Ejus quicquid habes totum sacrare memento ;
 Hanc spirantem ejus divò spiramine vitam,
 Ereptam innumeris hoc assertore periclis ;
 Hæc tot pasta bonis, & dantis idonea laudi
 Ora ; insignitam Genitoris imagine summi
 Istam cœliginam mentem, tandemque futuram
 Cœlicolam ; nisi tu ad cœlum te, Thyrsi, vocanti
 Surdus, ad indignum despectis origine magnâ
 Servitium ; Patris oblitus, patriæque, sacrîque
 Fœderis, inque alios pravè translatus amores.

THYRSIS.

Siccine me vacuum reris pietate, PALAMON,
 Ut mutem æternum mortali Amaryllide Numen ?
 Hoc verò avertat, mentem qui condidit istam,
 Transfugium ; Tellúsque mihi priùs ima dehiscat.

PALAMON.

Nempe amor iste tuus divino est æquus Amori ;
 Rêsq̃ue suas Christum nondum sibi jussit habere,
 Cultor & ipse Dei. Sed nil moror aurea dicta,
 Queis adimunt malefacta fidem, corâmq̃ue repugnant.

Conditor iste tuus, cui das bona verba merenti,
 Vapular, atque tui depulsus pectoris arce,
 Exulat, hospitibus jussus sua regna novellis
 Cedere, regna suum facilè ejurantia Regem.

Hoc tu, Thyrsi, memor menti committe fideli ;
Quicquid eo quisquam flagrans affectat amore
Qui sibi gaudia, spem, votum, trepidûmq̃ue timorem
Mancipat, hoc ipsi Deus est ; licèt ille sacellis
 Consuetis Numen patrio de more salutet.

Nè tibimet, mi Thyrsi, volens impone sciénsque.
 In pectus descende tuum ; temétque citarum,
 Veràque fassurum, coram te iudice siste.
 Quæ tu summa levi fingis tibi gaudia mente ?
 Quod summum tua vota bonum spe mulcet amœnâ ?
 Quæ tibi sollicitos exercet cura tumultus,
 Pectoris, heu ! miserum, decumanis fluctibus æquor
 Exagitans ? Ciet hos varios in pectore motus,
 Seu vehit Occasus Vesper seu Lucifer Ortus,
 Una implens animum victricis imago puellæ ;
 Una vorans fluidâ species in mente natantes,
 Lucius ut pisces arctâ populator in undâ ;
 Una facultares animi regina gubernans.
 Et tu, Thyrsi, tibi dominans Amaryllida numen
 Indigétare Deam cessas, cœloque locare ?

T H Y R S I S.

Heu nimium veris (fateor pudeoque Palæmon)
 Urgeor & vincor, mihi que est victoria vinci.
 Hæc tua, sancte senex, Sophiæ documenta serenæ
 Me mihi met monstrant, utinam quoque reddere possint.
 Heu cupio metuoque simul mea vincla resolvi :
 Jam pultare fores Pietas exclusa laborat ;
 Libertasque mei trans rara foramina retis
 Conspicitur, nostroque in pectore dilucescit.
 Jam mens hæc dominos fastidit vineta minores ;
 Adque Deum mens rursus avet fugitiva redire :
 At tu propitio suasor mihi Numine misse,
 Perge favente Deo, méque istis eripe vinclis.

P A L Æ M O N.

Pergravis est, humana tamen, tua noxia, Thyrsi,
 Est pronus juveni lapsus, cui pectus amore
 Æstuat, & blando contra blanditur amor,
 Subductam Christo Veneri transducere mentem.
 At spes est sic ingenuè delicta fatentem
 Versurum attritum studia ad cœlestia pectus.
 Nec te destituent magno in certamine vires,

Auxilium

Auxilium illius sincero corde rogantem,
Qui summo affectu summè perfectus amari
Poscit, amatorem facturus amore beatum.

Id tibi nulla suo præstabit amore puella,
Sit licet una sui ter præstantissima sexûs.
Advoco tot testes quot sunt in amore magistri,
Venari formas celebres, captisque potiti.
Si nec capta beat, num te capienda beabit ?
Expertum toties tristes Amaryllidis iras,
Et malè fida tuæ promissa cupidinis. O quot
Non exauditas venti rapuère querelas ?
Quot lachrymæ periére tibi ? dum ducit in hortis
Læta choros paribus Amaryllis cincta puellis,
Aut cantat violisque sinum fragrantibus implet.
Quin & adire times, & ei quæ quercubus istis
Dicere, nè coram non sit tibi copia fandi,
Nève odium proritet amor, questusque rigorem.

At quicumque animi Christum penetralibus imis
Diligit, à magno dulcè invitatus amante,
Non lachrymas, non incassum suspiria fundit.
Quippe Deus, summi quanquam regnator Olympi,
Nullibi non quæsitus adest, auditque gementis,
Oprantisque etiam voris attentus amorem.
Utribus ille suis gemitus, lachrymasque lagenis,
Constanter redamans, fidorum condit amantum.
Indè procul charos absentia dira jugales
Dissocians ; tecum ille domi, peregrèque, fidelis
Usque comes lateri custosque hærebit amico.
Ipse tibi clypeus, tibi lux, tibi fluctibus æsto
Anchora, consilium dubio, pressoque levamen,
Servato sapiens placidâ moderamen in undâ,
Libera pax animi, domitrix curæque tumultusque.
Ille tuam somno facili, lætæque quiete,
Mulcebit vigilem studia ad cœlestia mentem.
Et dudum admotam Cœlo, sedesque supernas
Spirantem, Cœli tandem statione locabit.

Elige nunc malisne excors imbellè subire
Servitium, flammisque jecur captivus aduri ;

Exigere

Exigere extorres animo Pacémque, Deúmque,
 (Qui malè rivalis patiens, se sponte repulsus
 Subducit, longúmque jubet plorare pusillum,
 Quicumque æternis fluxos vesanus amores
 Ante habuit) ribimétque exspes lachrynisque relinqui.
 An sub Rege Deo rerum gaudere tuique
 Imperio liber, regnóque & Rege potiri ;
 Ante diem in Cœlum tolli sublimibus alis,
 Quas Amor aptavit lateri, geminæque sorores,
 Firma Fides, vitæque vigenes Spes alma futurâ ;
 Subjectas pedibus longé spectare trementes
 Idalii febres pueri ; risúque puellæ,
 Moxque supercilio, fluctus hinc indè volutos
 Mancipiis Veneris, sibimet discordibus intus ;
 Spémque metúmque inter vario trepidantibus æstu :
 Dum stabili in centro divi stas fixus Amoris,
 Extra quod digressus Amor sine fine vacillat ;
 Jáque Dei te Pace beans, dum fidus amator
 Assimilare tuum divino tendis amorem.
 Hoc etenim summe Christus præstabit amarus,
 Ut bonus, ut felix, ut pulcher, ut omnia fias,
 Omnia possideas charo communia Christo.
 Felix cui simili major, majórque gemello,
 Cum magno Sponso est amor unicus, una voluntas,
 Unáque desponsas compingens Gratia mentes.
 Quos animos hæc dicta tibi, charissime Thyrsi,
 Ingenerent, lachrymis quas gaudia dia pudori
 Interfusa cient, cœlum penetrantis ocelli,
 Testaris ; totóque Deus tibi vivit in ore.
 Ipse Deus, divo cujus succenderis igne,
 Perficiat quod cœpit opus, factúmque coronet.
 Sed densas nemorum densans magis Hesperus umbras,
 Nos abigit, nigrâque jubet decedere sylvá.



LIVIA.

LÆLIUS.

O Pertinaci functa luctu LIVIA,
Satis superque ; iusta quæ solvis tuo
Orbata Crispo, semet irritans dolor
Injusta fecit. Planctus iste forsitan
Patrocinari possit immodicus sibi;

Si rupta viræ fila questibus queant
Conglutinari vel renodari tuis;
Semelque clausæ Mortis ærata fores
Faciles recludi lēssibus matrum fient.

Equidem recenter orbitate sauciam
Materno amoris plusculos sivi dies
Lachrymis litare ; nam nec in fluxu volunt
Sisti catharos Æsculapi filii.
Sed ut tumore paululum maruruit
Commotus humor, pharmacis vellentibus
Humoris audent officinas aggredi.

LIVIA.

Severe LÆLI, si parentem debitum
Lugere luctum destitutam non sinis,
Aut esse Nati me parentem non sine,
Aut redde Natum. LÆLI. Quémne ineluctabilis
Lethi sepulchro condidit necessitas ?

LIVIA.

Aut tolle Nati sub cruentâ imagine,
Oculis oberrans horridum spectrum meis.

Qualis

Qualis profundo colla fossus vulnere,
Tumultuoso Martis ex discrimine
Domum relatus, & meo impositus thoro,
Generosum in isto spiritum effudit sinu.

Videor videre sanguinis coagulo
Fatale circum vulnus applicitam comam,
Nuper fluentem colla circum candida;
Labii decentis versa pura corallia
Lurore diro, decoloratas genæ
Rosas rubentes pallido Mortis gelu;
Oculos sub imâ fronte cedentes retro,
Heu lumina modò clara, nunc cæcas faces!
Meam hoc ubique phasma præsens territat
Retinetque mentem, mèque dum torquet trahit;
Et omnis oculos alia forma incurfitans,
Ipsùmque lumen aureum invitis adest.

At quando fessæ degravat oculos sopor
Lachrymis tumentes. Natus intus unica
Imago regnat, cæsus hunc premens sinum.
Visûsque (referens horreo) nuperrimè
Dum nocte curas solveret hominum quies,
Meas gravaret, vocis exili & cavo
Sono vocâsse, Mater O Mater veni.
Subirò inquieto territa exilui thoro,
Et venio, dixi, Nate; non longum traham
Hanc misera vitam, sola & ægra, per tuum
Jam cæsa vulnus; Nate, quò præis sequor:
Tuo in sepulchro suppetit Matri locus,
Tumultuata Marris jam tegente viscera.

LÆLIUS.

Livia dolentes, non amantibus minùs,
Ipsi sibi sponde sponte fingunt somnia.
Ea nempe Nati cura sollicitat tui
Manes sepultos, ut genitricem vocet
Mutum cadaver: jugis has inanias
Et dormienti luctus & vigili creat.

At ille cuncta falce demetens senex,

Et

Et pertinaces demetit luctus Cronus ;
 Lachrymâsque in urnam filii fusas tui
 Siccabit ætas : Spes remitte flebiles ;
 Sola lachrymarum fonte fluxit perpeti
 Lachrymosa Biblis, proprium poetico
 Miraculum ævo. Nemo non facit sibi
 Finem dolendi qui dolet quantum potest.
 Virtutis esto fructus, haud opus moræ,
 Lachrymis dolorem quod fovere defines.
 Remedium iners est, ultimæque imbelliæ,
 Desinere flendi flere lassitudine.
 Temporis amica ratio contrahat moram,
 Rationis alma contrahat Pietas opus.
 Animos jacentes erige, & finem dies
 Quem præstitura est, Livia, hæc præstet dies.
 Properet diei crastinæ prævertere
 Hodierna munus. Quid moraris lucidam
 Recipere mentem, dissipatâ turpium
 Mœroris arri nubium caligine ?
 Hanc dissipabit firmiter adhærens Deo
 Amor Fidêsque, qui quod optimum suis
 Sapiens Bonusque certus est semper dare.
 Hinc ut fugatis Noctis umbris Sol micat,
 Animo redibit núbilo serenitas.
 Humana subeat omnibus fors didita
 Mortaliratis, quam tuo ex utero tuus
 Cum sanguine hausit Natus, & vitæ intulit.
 Cur ergò iniquis Mater ejulatibus
 Quæ traxit à te Filium quereris pati ?

L I V I A.

Num traxit à me quod cruentis ensibus
 In flore verno cæsus ante diem cadit ?

L æ l i u s.

Traxit quod ullo tempore aut casu cadit,
 Nam nec rubentem à matre, ceu Thetis suum,
 Fugante vulnus tinxeras Natum lacu,

In illum adactus ut resisteret chalybs.
Sed fabulosi fabulosa non fuit
Damnata voti Mater ; haud ulla iliis
Non vulnerandos Mater Heroas tulit.

At tu tremore parce vano Livia,
Fauces cruentas & repandi vulneris
Feralem hiatum mente versans lugubri.
Hoc schema, mortis omnium lenissimæ
Est involucrum ; fata præbent exitus
Violenta mites. Omnium Cæsar sibi
Lethi viarum deligit promptissimam.
Martis furentis qui rapaci turbine
Exterminatur semet haud sentit mori.

Tu fortè febres aut aquas intercures,
Ægrum minutis enecantes ictibus,
Magis tremendas, horreas tamen minús.
At iste vitam morte pejorem trahens,
Moriensque semper, mortuus nunquam, tuo
Nato inuidebit, cui licet semel mori.
At sive ferro, sive febre, ergastulo
Mortalitatis exeundi fit via,
Pio perinde est qui Deum exiens adit.
Seu migrat ore spiritus, seu vulnere,
Quâcunque portâ emissus ad Cælum volat.

Ergò cruenta quando succurret tibi
Imago Nati, tu cruentum cogita
Christum, redemptos qui suo sistit Patri,
Sui cruoris purpuratos unguine.
Istâ decorus purpurâ (nam nec minús
A te educatus Matre cum primis piâ
Sperare potuit, ipse cum primis pius)
Tradux Olympi, flexuosum post iter
Redux eódem ; si quid indè cerneret
Quod in malorum tetricâ farragine
Turbatur infra, te querentem accerferet
Injuriarum, quæ beante gloriâ
Cæli coruscum, turbidis mortalium
Rebus solutum, perpetim desideras

Gemebunda,

Gemebunda, Nati non amatrix, sed tui.

Dic tu (per ipsum te, Parens, Natum rogo)

Crispus quid isthinc exiens reliquerit

(Excipio Matrem filio merito sacram)

Desiderator cujus esse debeat,

Non despicator. L I V I A. Me quoque includas licet :

Anus vietæ fabulæ & larvæ sumus.

At census ingens, flos juventæ, regii

Zephyrus favoris, & bonæ formæ comes

Summos honores pollicens summum genus,

An sunt apud te nullius numeri & loci ?

O mustulentæ subdolan spei fidem !

Tibi parabam, Nate, consortem thori,

Nulli secundam dote, formâ, stemmate ;

Jam spe nepotes in meo eductos sinu

Deosculabar, avia jam, nunc nec parens.

Proh casta vota ! nunc nurûs, nunc liberum

Spes heu perivit. L æ L. Sed perivit & metus ;

Nam nec jugalem dote vel natalibus

Ferocientem ducet infauftâ alite,

Famulus maritus, quæ sibi nimis placens

Aliis præoptet esse pulchra quàm viro ;

Creætque curas quæ levare debeat.

Non pignora thori conjugalis pro suis.

Aliena tollet ; aut suum si maximè,

Informe & ore & mente degener genus,

Strumas parentis, atque carcinomata.

Quod sæpe patribus optimis usu venit.

At ille Crispo Zephyrus obludens tuo

Regalis auræ, quor sefellit aulicos ?

Non perputantes dædalas aulae vices,

Sorte intimorum vestientis extimos,

Et ima summis gestientis vertere,

Ex imperantum amore desultorio.

Noster secundo flamine usus occupat

Portum, procellas tristis Invidentiæ

Depræliatus ; ille præmia flagiti,

Et mollicella sceleris irritamina,

Fugiendo

Fugiendo fortis, non egebit ampliùs
 Piæ vigore mentis eluctarier :
 Felix ademptus ultimùm certamini
 Cum blandientis incitabilis mali,
 Potuit placere cui nihil quàm quod Deo,
 Pejúsque damno cui fuit semper nefas.

Sed finge nulli noxiæ superabilem,
 Nullísque damnis ; istiúsque munere
 Viræ fruentémque & valentem filium :
 Túne involutam rebus humanis queas
 Inanitatem turbidam revellere ?
 Ut fundus illum, gaza, conjux, liberi,
 Faciant beatum ? nempe quod majoribus
 Nostris negârunt, nec dabunt minoribus.
 An purioris quod metalli secula
 Non præstiterunt, nostra præstent ferreis
 Pejora secla ? secla bello fervida,
 Trahente veteres assecclas, famem, luem,
 Miserósque luctus, & datum jus crimini.

Hic post duelli pontici discrimina,
 Passæ capillum matribus mistæ nurus,
 Versant in alga filiorum & conjugum
 DiffRACTA rarium tabulis cadavera,
 Dubiósque vultus : unde confusis super
 Notis peremptorum inter orbas flebilis
 Viduátque lis est, planctibus communibus
 Mox dirimenda, publicóque funere.

Quid dicam, ut urbem gentibus mirabilem
 Et invidendam, maximum patriæ decus,
 Actúque longo temporum structas opes,
 Populator ignis, heu brevi quatriduo
 Favillæ acervis propriæ tumulaverit ?
 O rerum egenos omnium, exutos lare,
 Cives redactos ultimas ad incitas,
 Pejore flammis adjuvantium manu ;
 Miserandum & ipsis hostibus spectaculum !
 I nunc opésque delicatas cogita,
 Tuo asserendas filio, ipsis filium,

Si fata possis fletibus retexere.
 Quin ille major avocet tuum dolor.
 Lachrymarum inundet civicus torrens tuas.
 Privusque luctus sorbeatur publico.

Cum provolutam sordidamque pulvere
 Proculcet hostis impotens Ecclesiam,
 Dorsóque pronæ Conjugis Christi impium
 Infigat altè vomerein, & sulcos ferus
 Ducat cruentos; pudeat in domestico
 Lamenta casu perdere: huic reliquas decet
 Te diritati, proh Deus! acerbissimæ,
 Servare lachrymas, Livia, & pro filio
 Lugere Matrem. Sed tamen quovis Deus
 Exerceat nos summus Arbiter malo,
 Sive populari, sive singulario,
 Justum dolori quamlibet justo modum
 Adhibere oportet, terminumque figere.

Rebellionis alligat se crimine,
 Deoque pugnat, immemor luctus modi.
 Quid enim? Deo sic collibet, secus tibi.
 Dei sacra indè stat voluntas, hinc tua;
 Utram sit æquum prævalere judica.

LIVIA.

At ille Cœli templa qui tonitru quatit,
 Me diro ad imas adigat umbras fulmine,
 Ejus voluntas ni mihi est potior mea.

LÆLIUS.

Nil dejerare est hîc opus, sed obsequi.
 Tu, si Tonantis cedit arbitrio tuum,
 Amatque quod vult velle, quid contrà gemis,
 Et id quod ore prædicas, actu negas?
 Fati trabales non refigi lessibus
 Clavos, magistri te duo fidi docent,
 Natura & Usus; te docent sequi Deum,
 Meliùsque semper esse duci quàm trahi.

At celliore discis in Christi scholâ,

Hos esse clavos à ter Optimo tibi
 Rectore fixos, tēque Sapientissimo;
 Cui res tuæ sunt notiores quàm tibi,
 Et chariores. Cedere huic est vincere.
 Quòd te alligantes terræ fibras spei
 Clementer asprâ falce succidit Deus,
 Majoris utrūm amoris an sapientiæ
 Sit æstimandum jure, Livia, ambigo.
 Tūque impotente vah nimis luctu probas
 Secante falce quàm tibi sit adhuc opus;
 Tua cū profundis hæreat radicibus
 Terræ tenaci mens amore pervico:
 Quasi mentis hujus cœlitis beatitas
 Glebæ lutosæ sic ab ubere pendeat,
 Ut si quid indè quod placebat defuat,
 Defecta liquidò & destitura concidat.
 Superstitem ergò sis memor tuo Deum
 Faventem adesse filio, & tibi adfore,
 Decem tibi instar filiorum præstitem,
 Mali levamen omnis, & fontem boni;
 Si potes amorem filio ab demortuo
 Vivum ad Parentem perpetēque vertere,
 Amore amandum continenter unico,
 Amore amantes qui suos unus beat.

LIVIA.

Læli, efficaci do manus scientiæ.
 Adsum parata quò Deus vocat sequi,
 Jam non trahenda. Verberet, cædat, secet;
 Ego vel necantis osculor dominam manum.
 Unum ille quod me colligabat vinculum
 Mundo recidit; hoc benignè & providè,
 Quod solum amoris illicem, mihi & Deo
 Interjacentem, solus ipse diligi
 Dignus removit; nè quid interverteret
 Tributum amoris debitum soli sibi.
 Caduce Munde, res tuas habe tibi.
 Opes solutæ nivis instar effluunt.

Surgunt

Surgunt honores ut ruant ex edito.
 Fugit Juventas more prati, Sirius
 Quod torret ardens, falx avara subsecat.
 Terras relinquit spiritu expirantium
 Emissa Virtus; quæ putes firmissima
 In Orbe fulcra (vah ! perita usu loquor)
 Subitò sub innitente corruunt manu.
 Et quæ renident omnium dulcissimè
 Sunt blandientis plena falsimoniz.

Tibi ergò amorem, vota, spem, fiduciam,
 Refigno soli, Christe, præsidium tuis
 Non deferiscens, dentibusve obnoxium
 Edacis ævi. Summe fac rerum potens,
 Ut ista Coelis orta mens, Cœli Arbitro
 Tibi obsecundet impigra, ut Cœlum solet,
 Cœlique cives; hoc beati quòd tui
 Legem volentes exequuntur Imperi,
 Volantque quod vis, teque præter nil volunt
 Curantque quidquam velle & expetissere.



S E R E N A.

S E R E N A fausti nominis præstans fidem ;
 Veneri dicato Phosphoro serenior,
 Venustiorque ; fluxit à fonte ingenI
 Hoc innocenter illecebrosum decus,
 Bonæque menti debet hanc formam bonam.
 Cerussa faciem pura candidans tuam
 Est candor animi, pacis & recti tenax ;
 Miniúmque quo te purpuræ sanctus pudor :
 Sua nempe pulchra pulchrior palatia
 Omnibus adornat excolitque gratiis
 Pia sceptræ mentis obtinens intus Charis.

Talis beato læta temperamine
 Adulta in ipsis mater incunabulis
 Tellus vigebat, emicanti primulùm
 Amata Soli, & ambienti blandulum
 Proco renidens, qui novellæ nuperis
 Sponsæ implicabat fruge nexis floribus
 Comas virentes, ventilandas halitu
 Infantis auræ, differente aromatum
 A crine odores. Nympha non vultus tui
 Planum atque fulgens perpolita marmora
 Æquare possint ; non tuæ mentis piam
 Æquanimitem cardo constantis Poli,
 Antrisque clausis Æoli placidum mare.

Tuâ, Serena, mente tranquillus minùs
 Castis ab aris thureus sacer vapor
 Sursum in quieto se rotabat æthere ;
 Placidèque votis vectus in cœlum piis
 Quâvis amorem suaviorem adorea
 Deo offerebat. Jugis hoc adoles placens

Summi

Summi Tonantis thymiaa naribus,
 Cordis quieti, mitis & puri sacrâ
 Fumans ab ara ; dum nihil sanî movet
 Deoque quicquam simile & acceptum vehit
 Animi impotentis æstuans satagentia,
 Torquente spumas vorticofior freto.
 Nec enim procellis hispido & rapido mari
 Phœbea lampas, mente nec præservidâ,
 Vitiis lutosâ, turbulentâ affectibus,
 Augusta imago Numinis reflectitur,
 Tux, Serena, mentis in crystallino
 Speculo refulgens, pace quod pacis Deus
 Solidavit almâ, & æviterno lumine
 Radiavit idem luminum magnus Parens.
 Hic verus, hic est unicæ fons unicus
 Serenitatis, quam nec humorum probè
 Amussitatum præstat æquilibrium,
 Nec ille mendax, arte multâ Stoicus
 Nolente Naturâ elaboratus rigor ;
 Nec vora vincens floridæ fortis tenor :
 Sed cor adunans pacis & lucis Deo,
 Patrique mentem mentis assimilans amor.

Cùm se æstuoso volvat ævum turbine,
 Quicum pacisci pro quiete non magis
 Quàm cum procellis stridulis ventro queas ;
 Nullâ nisi intus in recessu pectoris
 Miseri fruisce pace mortales queunt ;
 Intrûsque nullâ, ni Deus veniæ dator,
 Satôrque recti, pacifer, salutifer,
 Sedem sibi intus deligat, parvæ domûs
 Regnator ingens, cordis affectus tenens
 Sibi mancipatos servitute liberâ.

Qui possidere semet & domi aureum
 Cupit serenum, subditos premat pedo
 Rationis omnes impetus, ipsam Deo :
 Penitûsque ab imis eruat radicibus,
 Sibimet amicus, singula in numen Dei
 Hostiliteratis factiosa semina.

Faceſſat omnis dulce pellacis mali
 Amara radix: diſſidens animus Deo,
 Quietis expers diſſidebit & ſibi.

Non territatum Judice ſcôlerum Deo,
 Tortoris animi vâpulantem verbere,
 Serenat auro ſors & argento fluens,
 Non Orpheorum dulce flexanimum melos,
 Epulîſve menſæ dapſiles genialibus.
 Beſatſar acer in Deum, inter regii
 Ferula paratûs, pectore & genibus tremi-
 At Paulus aſprâ crura tritus compede,
 Flaminîſque in iſſis Tres-viri pſallunt Deo,
 Cura metuque liberi, mox vinculis.

Sic efficaci melle amara condiunt
 Amor Fidêsque: quippe veræ nucleus
 Eſt fauſtitatis cum Deo concordia,
 Robur ſalûſque mentis; hæc ubi deeſt,
 Ores, honores, vacua ſunt putamina.
 Tamen iſta vulgus improba bulimia
 Glubit, malâmque contrahit glubens famem:
 Podium caveâque vulgus æquæ ſunt mihi,
 Puſillæ homulli mentis in quovis gradu;
 Cucurbitarum capitâ vento turgida,
 Inaniarûmque unicè famelica,
 Quibus ut cupido ſemet inferſit ſemel,
 Jejuna remanet; ſi bis, eſt jejunior;
 Eſurit abundans, eſurit regurgitans,
 Nec totus iſtam Mundus exſaturat famem;
 Sive ipſa rerum peperit hanc inanitas,
 Hominûmve cæcæ brutitas cupidinis,
 Pretiisque rerum pervica ignoratio,
 Per quam caduca præferunt perennibus,
 Vaciva ſoldis, turbidæ libidinis
 Ægrum titillum gaudio mentis bonæ.

Hanc porro vitii famulus ejurat libens,
 Nec cum Deo ipſo teſſeram confringere
 Dubitat, coruſcæ quum ſitis lamnæ laci-
 Famêsque honorum molle ſuffodiat jecur

Lucri ut dolosi pinguefactus polline
Plumâ superbus subvehatur pensili.

Sunt certè honores, sunt opes donum Dei,
Fontis bonorum quæ mali faciunt mala.
Ac mihi benignam perputanti copiam
Quâ vestit homines largus in suum genus
Ingens Creator, id quod antiquo Sopho,
Cujus cerebrum nardi onyx demulserat,
Succurrit ; in rem gurgites abeant malam,
Qui bellam abusu sustinent rem perdere.
Malè Naso clamat, O misellum homines genus,
Innato habentes fœta gaudia crimine !
Malè feriatis hæc querela convenit,
Qui res amœnas utilisque non valent
Prehendere ansâ, quam bonus præbet dator ;
Sed ad fruendum rebus apprimè bonis
Malam maligni comminiscuntur viam :
Cum postularis justa naturalibus
Terenda cunctis regia pateat via,
Et obsequentes legibus sacris queant
Frui puellis innocenter ut rosis.

Probis, modestis, quod sat est cupientibus,
Natura ridet ; simplicisque industriæ
Præmia beato læta porrigit sinu.
Nec jura potuit sic Dei intervertere
Dæmon Tyrannus, quin siet consultius
Sequi bonorum præmiatorem Deum,
Dantem fatori criminum mensem mali.

Recti sibimet conscius, concors Deo,
Et angue pejus omne formidans nefas,
Penetrare amore cœlites audet plagas.
Nec si quid hujus Orbis ad manum jacet
Dulce aut opimum, perperam tristis fugit ;
Sed per vireta pergulâsque obambulans
Sortis benignæ, quam bonis actis facit
Benigniores, puriores sobrius
Gustu minores hæc fruendo percipit
Amœnitates, quàm nepotes ebrui.

Non possidetur opibus, illas possider,
Ut commodatas, & relinquendas modò.
Meliora spectans, dominus usurarius,
Adversa miti mente lenit, nubilis
Serenitatem commodans rebus suam :
Nec gravia curâ degravat stultâ volens,
Quod querula vulgi facit servilitas ;
Sed trans pericla, trans ruinas publicæ
Cladis suâsque, firmat intrepidum gradum,
Placidus valensque vindicis dextrâ Dei.

His tu, Serena, te beas virtutibus
Utriusque sortis, lacteo premens sinu
Animos viriles ; sive rugis asperat
Sors læva frontem, seu favens exporrigit ;
Tutaris omen nominis constans tui,
Decora, recta, semper æqualis tibi.

VOTUM



VOTUM

P R O

S E R E N A.

Sic læta tui stamina fati
 Filo velleris aurei
 Neat renidens candida Fauſtitas.
 Faſtoſque componens tuos,
 Totum feſtis impleat album,
 Nihil diebus linquat infauſtis loci.
 Invium favens tibi,
 Edenis hortum janitrix recludat,
 Vitæ conſpicuum perpetis arbore;
 Sed angue nullo noxium,
 Difficilémve dolis.
 Nec te ullus flammante machærà
 Territet ad ſacros tollentem brachia ramos;
 Quin ora dio tota proluas ſucco
 Fœti beatitate pomi,
 Deliciis ſuperante vota.
 Quo tu cunque gradus Nympha decens fleſtis amabiles,
 Flores ingenuos ſub pedibus fundat humus tibi.
 Farta fruge ſeges, luxurient gramine paſcua,
 Fœturâ pecudes, arboreis fœtibus hortuli;
 Spirent læta crocum blandiculi ſtabra Favonii.
 Illucens oculi dulce jubar tui
 Riſus & Charites creet,
 Et ſi quid placido Vereſerenius;
 Damnoli facies mali
 Et nimbos abigens Sole potentius.

Te

Te tangente, rosaria
 Carpendas tenerâ manu
 Exarment stimulis rosas.
 Umbellæque vicem serena nubes
 Præstò sit tibi prodeambulanti,
 A vultu niveo & sinu tenello
 Arcens flammiferi Leonis æstum.
 Quis ex beatis huc feret Insulis
 Flores odoros, perpetuos, quibus
 Texam perannantes Serenæ
 Ambrosio capiti corollas?

Ohe! jam satis est, Serena, lusus;
 Tandem seria vota nuncupemus.
 Ut Pax Justitiæ comes sorori,
 Mentis, Nympha, tuæ sedens in arce

Te (quod diceris) asserat Serenam;
 Et se teque simul, piæ gemellæ,
 Amplexæ mediam, deosculentur.
 Mater quietis, sit tuo Fides lecto
 Sublime fulcrum, Spes Amórque cervical;
 Quâvisque plumâ mollior
 Sit culcitæ tibi vicem
 Cœlestis Innocentia.

Et quod quieti comparandæ maxime
 Adminiculatur omnium,
 Vinco ligentur semper insolubili
 Dei voluntas & tua.

Nam nec optando faciemus unquam,
 Dum frequens annona viget malorum,
 Quin tuum lappâ tribulisque quondam

Horreat arvom.

Candidis atrae tenebras diebus
 Vesper inducit; faciem sereni
 Lucidam tristi lachrymosus Auster
 Contrahit imbre.

Sors trudit subito severa mitem.
 Istis motibus haud movetur unquam
 Unita arbitrio Dei voluntas,

Cui rerum Dominum unicè sequenti
Quod vult Optimus, optimum videtur.
His armis placidis necas, Serena,
Curas carnifices serenitatis ;
Quâ nil aureolâ beatitate
Majus vel melius potest haberi.

Quis verò abstineat quin voveat tibi
Plusquam Pannonicis conditur horreis ?
Cum tu quotidie muneribus munera duplicans,
Multorum miseram divitiis pauperiem leves ;
Te spectantibus approbans
Divinæ docilem discipulam munificentia.

Ergo precamur ut tuæ pinguis vapor
Benignitatis, actibus amico bonis
Cœlo receptus, nube densetur sacrâ ;
In tæque largo pressus imbre depluat,
Divi favoris divitiisque copiae.

At tibi dante Deo tæque accipiente parantur
Præmia digna magis, quam quicquid in aëre crasso
Aut in limosæ concrevit viscere Terræ.
Gloria cœlesti lucis radiata corona
Prævia cui roseos ridens exporrigit ortus
Gratia, ceu Solis jungens Aurora jugales,
Te primis jubaris radiis nascentis inaurat.
Ah nè te nimium properè sibi Gloria totam
Afferat, & patriis jubeat confidere regnis !
Nec te Cœligenam cœlo velit antè beare,
Quàm felice diu Terras virtute beâris !

Temporis



Temporis & vitæ flumen.

DEvectus amne lenium lenissimo,
Hoc molle, purum, læve, pellucens vitrum
Violare tonsis remiges meos veto ;

Nè minina planum ruga marmor asperet,
Dum cœlum aquarum semet in speculo videns,
Duplicésque ripas, & salictorum comæ
Species in unda pronus oculis haurio.

Sed has narator iste , mox lembus sequens

Turbabit : en ut in sinus longos aqua

Se pulsa cogit, arborúmque imagines

Sursum deorsum fluctus undatim quatit,

Paulâ resident hæ quiete imagines ;

Nocte exolescent. Sed manens, licet fluens,

Ipsóque fluxu imago constans Temporis

Est fluvius ipse ; semper accedens sibi,

Sempérque cedens, alius atque idem simul.

Unda fugatur undâ, tempus tempore,

Præsens futuro, terga præteriti premens

Obliviosi, mox in ipsum defluens ;

Mortalibúsque curta pars volubilis

Temporis ut amnis usque præterlabitur,

Non possideretur : hanc sibi sapiens modò

Ulu capit dum præterit, non mancipat ;

Cùm nec superbi, quos tremens Orbis colit,

Rerum potentes, viribus regni queant

Unam sibi horam mancipare temporis,

Aut sistere arctâ lege momentum fluens.

Præsentè fixo sola Majestas Dei

Fruens, ab alto flumen ingens Temporis

Integrum ab ipso fonte spectat ad ostia,

Simul,

Temporis & vitæ flumen. 41

Simul, semel, perennis, aspectu unico.
Quondamque longum fluere flumen desinens,
Æternitatis gurgite absorbebitur.

Nobis ut amnis vita dum durat fluit,
Hæc pejus amne, quod fluendo defluit ;
Nobisque simulac hora defluit fugax,
Pessum it rapaci Mortis in voragine.
Id omne nobis mortuum est quod viximus,
Et vita quam nunc vivimus mors est fluens ;
Cujus fluendo limitem figet modo
Extrema vitæ gutta, & arens alveus.

At ubi renatis Numen in fbris salit,
Vitæ huic edacis falce decessit Croni
Superfit alia illæsa dente Temporis.
Ut magna aquæ vi Sequanæ longè obviâ
Procurrit æstus, flumini miscens mare,
Animis amanter ad Deum tendentibus
Perennitatis æstus ingens influit,
Suum receptus intemis præcordiis
Miscens saporem : mox piæ mentes suo,
Suoque flumen se resignabunt mari.
Discrimine isto, quod in amaro gurgite
It flumen almam perditum dulcedinem,
Simulque semet : at futura permanens,
Fluentum amarum perpeti in dulcedine
Pia mens reponit ; & fluens quicquid super
Fluxumque fixa sorbet ultimum quies.

SPON



Cant. 5. 2. *S P O N S Æ*
lapsus & pœnitentia.

A Dblandientis in tenace lectulo
 Sortis benignæ, languido in confinio
 Vigiliæ inertis & soporis blanduli,
 Meas ad aures semisomnes cœlitis
 Vox dia Sponsi me vocantis appulit ;
 Sed sic veternum carnis & primus sopor
 Oppressulârat mentis obsessas fores,
 Ut extimorum sensuum ægè lamberet,
 Non pultitavit ostia allapius sonus.
 Geminata tandem vox sibi fecit viam
 Obscuriorem. Chara, air, sororcula,
 Mea turturilla, melle amica dulcior,
 Electro & auro purior, aperi mihi,
 Mihi rorulentæ cui madent stillis comæ,
 Crudæ pruinis hispido noctis gelu.

Ego cum soporis degradata fastino,
 Nec magni Amantis, nec satis memor mei,
 Vestem reposui, quisquis es (dixi) & lavi ;
 Thoro levandum fessa deposui latus :
 Somnum & quietem suadet intempesta nox.
 Hem ! quânnè nuper exui stolam induam,
 Recénsque lotos pulvere inquinem pedes ?

Repulsus ille, mox levi pulsu ostium
 Hiare cogens inserit divam manum,
 Ad clara Lunæ conspicandam lumina ;
 Quam tandem apertis ut notavi palpebris,
 Meumque Sponsum & noxiâ agnovi meam,
 Pavirante subito tota corde cohortui ;
 Sponsique sermo qui soporatæ prius

Animæ

Sponsæ lapsus & pœnitentia. 43

Animæ innatarat, intus haud subsederat,
Nunc excitaram, turbidam, iratam sibi,
Penitus profundis usque & usque aculeis
Figit foditque. Conscium exhorrens thorum,
Plumas nefandi sceleris irritamina
Refugio saltu, fugere si crimen queam.

At prima properè cura surrectæ fuit
Aperire Sponso; verùm id ægrè præstitit
Tremens & ægra palpitantis dextera,
In rigida seræ & pessuli manubria
Sudore manans frigido, ut myrrham sua
Exudat arbor, gummiis niveis fluens.
Patente portâ patuit & damnum meæ
Immane noxæ, Sponsus heu discesserat;
Ab amica amicus (proh pudor, monstrum, nefas!)
Pulsus, fugatus, nunc dolente perperam,
Animique semet lancinante moribus.
Adedò recurrens me misellam confodit
Exclusi amici blanda vox, procans, gemens,
Supplex, repulsa; sæva nunc vindex sui,
Penetransque mentem nunc magis postquam silet.
Ah! non videndum prosequor luctu ejulans
Non audienda. Væ mihi! nimis audiit
Mea dicta Sponsus, ejus haud satis audiit;
Ter digna ut ille, cui vocanti absurdui,
Meis vicissim precibus aures obseret.
Sed clamitando & queritando haud desinam
Quin à vidente comminus tandem audiar;
Manusque, genibus advoluta, supplices,
Et corda amara fracta pœnitundine,
Oculosque fletu diffuentes offeram.

Mecum hæc volutans, urbis omnia compita
Aëra laceffens planctibus circumferor,
Laniata vestem, lacera diffusas comas,
Sponsumque Sponsum voce claman, lugubri,
Atque ut malo uni prodit alterum comes,
Ecce in severo, urbis custodiæ
Vigiles oberrans & quiritans incidi,

Noctivaga,

44 *Sponsæ lapsus*

Noctivaga, sola, injuriis obnoxia.
 Hi mœstam & ægram barbari indignis modis
 Habuêre, duris contudêre fustibus,
 Rapuêre plagis sauciæ velamina.

Geminate (dixi placida me pulsantibus)
 Et probra & ictus confitenti noxiæ.
 Aliena non me facta lædunt, sed mea.
 Dolet gementi sub malorum pondere
 Quam perpetravi offensa, non quam passa sum.
 Spurnenda cunctis quæ colendum spreverim,
 Nullisq; non pulsanda contumeliis.

At hæc procella non tuo sine Numine,
 Divine Sponsæ, noxium hoc ferit caput.
 Magnam verendi Judicis nosco manum,
 Et verberantem dexteram deosculor;
 Felix satq; Dilecte, si te invenero,
 Vel sævientem: tu modò haud adeò velis
 Sævire, Sponsæ Sponsus ut lateas tuæ,
 Heu! surditatis ad tuam vocem reæ,
 Sed pœnitenti, & semet in mentem novam
 Repastinanti; quæ tibi intus audiens,
 Attenta, lychno semper accenso vigil
 Te præstoletur, vixque carni indulgeat
 Vigilem soporem; Tu modò, O qui me vides,
 Da te videndum: discute nebulam, meæ
 Iniquitatis sordidis vaporibus,
 Tuzque fumo vindicis Rhamnusiæ
 Mixtim coactam, tristiter Cœlo & mihi
 Interjacentem; sed licèt densissimam
 Facilem resolvi splendidis radiis tuæ
 Benignitatis, Hanc mihi parariam
 Tui ad tremendam, Sponsæ, Justitiam Patris,
 Flexis requiro genibus, heu supplex nocens;
 Summi Parentis attamen Nata & Nurus,
 Tua æviterno Sponsa matrimonio.
 Cui nec ipsa noxa, nec noxam premens
 Vindicta justa scripserint divortium,
 Dum pectora ista, trita pœnitentia,

Amor

Amor fovet, Spes erigit, fulcit Fides ;
Ejúsque amorem qui mihi iratus latet
Intus loquuntur, intus obſignant, in hoc
Ab amante Sponſo ſeminata agellulo :
Et quín ſua ipſi ametur agricolatio,
Suísque amoris proles, an Sponſa ambigat ?

Nunc ergò Sponſæ, vâh ! malè merita lætes
Dilecte, ut olim pervicis infantibus
Matres amant latere quum quæri volunt.
Vis, Sponſe, quæri ; quódque ſpes noſtras fovet,
Vis inveniri : te Fides certò invenit
Etiam latentem, plûs prehensens quàm videns.
O Sponſe ſtabilis quære Sponſam erraticam ;
Et ſi inveniri vis, priùs nos inveni.

At mox reperta ſi magis plectenda ſum,
Hem plecte, Sponſe, plecte, ſed manu tuâ.
Aut ſi tuis me vis feriri ab hoſtibus,
Et hoc feremus. Sed per illa vulnera
Queis me piâſti Sponſe, te ſupplex rogo,
Procul faceſſat à tuis pomœriis
Immanis illud flagitii piaculum,
Ut ſoſpiraris à ſuæ cuſtodibus,
Chriſto ſacratís, Sponſa Chriſti vapulet ;
Quod vel ab Anubis vel Jovis cultoribus
Chriſti maritæ perpeti levius foret.
Tua membra amoris vinculo coeant, tui
Conglutinata ſanguinis coagulo.
Ubicunque Verbi fulgor aſſulget tui,
Comitem ſororem Veritas Pacem vehat.

N R E D L



Reditus ad Deum.

Cœlestis aura quam meo Deus luto
 Infudit, altam quando originem tui
 Repetes beata, quum suo lutum luto,
 Cœloque Cœli gnata reddetur suo?
 Ad te, Creator Magne spirituum, mens
 Avet reverti, vah nimis nimis diu
 Peregrè vagatus, languidus contagio
 Terrestris auræ deprimentis cœlitem.

Piget morari donec alis ardua
 Anima Angelorum subvehatur aureis,
 Carne expedita, patrii ad Cœli plagam.
 Agè mens volucris, experire quid queant
 Ætherea proles, alæ Amoris & Spei.
 Hæ nempe missæ cœlitus cœli viam
 Callent, meroque Gratiz instinctu duce
 Benigna ad ora Magni & amplexus Patris
 Siftunt precantem; nec nisi his alis iter
 Trans crassa carnis nubila adnixa prius
 Emoliamur limen ad celsum Dei,
 Suas solutis carne & enitentibus
 Superas ad oras commodabunt Angeli.

Longa licet illuc sit via, est iter breve :
 Fides id uno conficit suspirio.
 Ac sicut uno Conditor mirus, sui
 Icona mentem condidit spiramine;
 Spiramine uno redit ad Authorem sui
 Viva hæc imago : At hei mihi quàm segniter
 Sursum movetur ! quam deorsum ocyssumé !
 Moveor frequenter sursum & admoveor Deo ;
 Sed immorari vix queo admorus Deo :

Tum

Tum quod facultas res amatas lucide
Imaginandi, nil nisi id quod objacet
Vel objacere sensibus potest capir;
Ansæque nullas sensibus præbet sui,
Ingens amoris & beatitudinis
Objectum, at uni cognitus sibi Deus.

Tum quod gravata carne mens, & altero
Carni gemello pressa noxæ pondere,
Ad sanctitatis Spiritum celsissimæ
Vi magnâ Amoris vecta naturam supra,
Sine vi retrorsum sponte fessa volvitur.

O quem invenire nemo scit, ni sit prius
Inventus à te, nemo nî tractus sequi;
Debetur omnis ardor hic tui tibi,
Carnis veterino frontibus contrariis
Commisus, & se viribus tutans tuis.
Huic adde vires; fac licet vinculus gravis
Et pressa mole graviter mens emicer,
Vincente pondus concita lubentia,
Ad Conditorem te sui, ad te ipsissimum;
Semelque juncta jugiter tibi hæreat.

Et ut adsit aptum schema cui mens hæreat
Vestita carne, sensibusque obnoxia;
Incide grandem, Christe, clavo uno Crucis
Crucis characterem intemis præcordiis.
Temetque fossam bis pedes bis brachia,
Lacerum cruentis sentibus sanctum caput;
Latus flagellis; os adorandum Angelis,
Deforme sputis, ictibusque luridum;
Te mille pro me traditum ludibriis,
Datumque Morti principem vitæ; tui
Opus stupendum amoris, & stimulum mei;



Alere Matrem Christi.

PRO criminosa stirpe Adami, criminum
 Ingens piamen Christus, horrendam Crucis
 Pœnam subibat : proxima adstabat Cruci,
 Verenda largis ora fletibus rigans
 Augusta Mater ; stabat eximius simul
 Jesu Johannes, pectus illud mutuo
 Amore fidum. Chara Jesus contuens
 Capita, Parenti, Natus hic esto tuus,
 Infit ; Johanni, Mater hæc esto tua.
 Mox æviterni fundit in sinum Patris
 Magno salutis opere functum Spiritum.

Repentè gratam gratus hospes hospitam
 Novam Parentem Natus excipit novus.
 O præferendus omnibus sceptris honos !
 O invidende juvenis omnibus piis,
 Quotquot fruuntur aut fruuntur munere
 Vitalis auræ ! Nam quis in cujus salit
 Fibris amoris ulla flamma cœlitis,
 Non se, Johannes, concupiverit tuâ
 Beare sorte ? quisve Jesum diligens
 Monarcha, Crœsis Attalîsve ditior,
 Non præstinârit omnibus gazis tuam
 Felicitatem ? Sed licet cœlum incolat
 Beata regno Mater & Nato fruens,
 Omnes benignam queis Deus penum instruit,
 Beare semet sunt potes sacram Dei
 Alendo Matrem ; nemo votis irritis
 Annumeret istud ad manum votum jacens.

Semel rogatus Christus ut Matrem foris
 Stantem atque fratres conveniret, dextera

Alere Matrem Christi. 49

Mota audientes indicavit Discipulos ;
Hæc Mater, inquit, hi mihi fratres cluent.
Meique velle quisquis exequitur Patris,
Mihi est sororis fratris & matris loco.

Hanc ergò Christi cœlicam disquirere
Cognitionem cura sit perpes piis,
Inopésque sanctos qui voluntatem Patris
Rerum potentis exequuntur seduli ,
Quisquis piorum, pro suæ modo rei,
Recreare lætus ex suâ curat penu,
Is cum Johanne, Christe, alit Matrem tuam.



Deo Liberatori sacrum.

Hanc ego carceribus juvenis dilapsus Iberis,
Signo senex lucem candidiore notâ.

Hâc mihi natali semper potiore, pericli

Effugiique decet me meminisse mei.

Téque fidémque tuam celebrare ex hoste receptum,

O Deus, O vitæ sônique salúsque meæ.

Sic quondam Herodis periturus carcere Petrus

Auxílio sospes prodiit Angelico.

Custodum médius recubabat nocte duorum ;

Mulcebat placidus lumina mersa sopor.

Hanc requiem vincísque gravi, cædisque propinquo,

Pace Dei, & forti conciliante Fide.

Angelus ecce Dei demissus sede, jacentem

Impulit, impulsi fugit ab ore sopor.

Carceris horrificas pepulit lux diva tenebras ;

Vincula sponte sacras exolüere manus.

Subligat extemplò pedibus sandalia jussus,

Componísque humeris pallia jussa suis.

Vinctáque compedibus nuper, nunc libera crura

Miratur, sanctum consequiturque ducem.

Quòd stat, quòd graditur, sibimet non ipse videnti

Attonitus credit, veráque ficta putat.

Intima decipitur custodia, móxque secunda;

Cœlitus immissus Somnus utramque premit.

Tertia restabar, ferroque rigentia claustra,

Ferratæ subitò dissilüere fores.

Paulùm progressi visum fugis Angele, solus

Petræ manes, urbi redditus atque tibi.

Redditus agnoscis quem jam tibi cernere non est,

Divinámque saris cernere ducis opem.

*Elapsus
carcere
Dunker-
kano,
Dec. 22.
1624.*

Hanc

Deo Liberatori sacrum. 53

Hanc ego confimili liber virtute celebros,
Hanc ego, cura Dei, laudo receptus opem.
Hæc mihi servato læta & spectabilis hæret;
Hæc sedit ad nostrum pervigil usque latens.
O mihi nè sensum minuat longæva senectus,
Delapsi memorem cœlitus auxilii.
Idque quaterdenos quamvis præcesserit annos,
Se præsens animo sistat ubique meo.
Oceani ferme decumanis obrutus undis,
Navigii laceri triste vehebar onus.
Ecce velut damnis vulgò se damna propagant,
Hesperia navis præda pusilla fui.
Illa suæ metuens, rapti malè conscia, noxæ,
Pandebar celeri carbasa tota Noto.
Quum ratis impulsu tetigit vada cæca sonoro,
Clamore & strepitu nautica transtra fremunt.
At Rector pelagi capto & captoribus æquus,
Arbiter ille bonis providus atque malis,
Assistit afflictis, glaucóque tridente levavit
Implicitam faxis explicuitque ratem.
Littora nota petit brevibus deducta vadosis
Navis, & in rutâ se statione locat.
Excipit appulso statio tristissima captos
Carcer; at hanc unâ non nisi nocte tuli:
Nam me præpositi classis reique marinæ
Accitum hospitio derinuere suo.
Quicquid erat quoddam me secum voluere morari,
Præstruxit nobis ad meliora viam.
Quid referam multas ut me tibi jungere vellem
Præses blanditias insidiosæ tuas?
Tot motura animas invitamenta superbas,
Et gravis auratis horrea pollicitis?
Ast ubi consiliis asper responsa molestis
Fronte (fatebor enim) tetriciore dedi,
Intonuere minæ, micuerunt lumina flammâ,
Irata accendit fervidus ora rubor.
Addicor scelerum tormentorumque magistris,
Devotis gentem discruciare piâ.

52 *Liberatori Deo sacrum.*

Quóddque rapi subitâ non me mandaverit irâ,
 Mira fuit vigilis provida cura Dei.
 Summoveor tantùm, summotus præstolor usque
 Jussus in invisâ tristia jussâ domo.
 Quid fugiam certus, non quâ ; nam fallere quærens
 Hospitibus plenam militibûsque domum,
 Ignôtos pariter notôsque, & singula mœstus
 Circum me vigilum lumina pertimeo.
 At quam nemo potest precibus præcludere, certam
 Molior ad cœlum conficióque viam.
 Indè meis rebus nova lux affulsit egenis,
 Indè mihi in dirâ perditione salus.
 Nam (quod post multos tandem rescivimus annos)
 Præsidis assessor, vir pietate gravis,
 Paulùm digressus, simili pietatē fidelem
 Solers pandocheum sevocat hospitii :
 Hunc properè juvenem prædonibus eripe nostris,
 Dixit, & effugium quâlibet arte juva.
 Mature egreditor ; dum Curia nostra sedebit,
 Egressum nemo qui remoretur erit.
 Pandocheus pia jussâ facit, nascûsque quietas
 Et pópulo vacuas constitit ante fores :
 Méque vocans, aliud similis mihi dixit agenti,
 En agè rumpe moras, hâc via monstrat iter.
 Custodes intus vino invitante relaxant
 Ad lxtum curas lassâque membra focum.
 Ipse comes potu & vario sermone cavebo
 Ut mora longa tuo tuta sit effugio.
 I comitante Deo, nobis que faventibus opta
 Ut velit assiduè divus adesse favor.
 Dixit, & abcessit, nè grates nempe rependens
 Eriperem properæ tempora parva fugæ.
 Felices animæ, Cœli nunc sede receptæ,
 Hæc accepta Deo vos benefacta beant.
 Vos beat æternùm, memori sub Judice recti,
 Reddita pro nostra magna salute Salus.
 Atque urinam, Jesus Præses tibi faverit, hostem
 Quem mihi non mala mens sed malefana dedit.

Egressus,

Egressus, portas inimicæque moenia linquo,
Linquo etiam fugiens paucula chara mihi.
Parya quidem, sed nostra tamen; juvenilibus annis
Quæ fuerant studiis evigilata meis.
Hæc mea cum variis combusta fuere libellis,
Sic malè barbaricâ lege jubente loci.
At vestes, & non multa & pretiosa supellex,
Commoda militibus præda fuere malis.
Nil habui, nihil amisi, divæque salute
Mirificâ, mecum quæ mea cuncta fero.
O ruros! O magnificos! O sorte beatos!
Queis cultos, queis res cessit opima Deus.
Respicio, lapidem progressus ab urbe secundum,
Tres procul admissis ponè sequuntur equis.
Mecum ego, si retrahor sævo fugitivus ab hoste,
Quàm si mansissem sors mihi pejor erit.
Sed cui crediderim novi; facilisque salutem
Bis poterit, potuit qui mihi ferre semel.
Mox equites pediti spatio brevior propinquant:
Tres video Gallos, è quibus unus ait;
Servitiúmne fugis, popularis noster, Iberum?
Nos tibi devotâ mente feremus opem.
Hujus equi firmas agilis conscendito clunes,
Tertia nos patriis finibus hora dabit.
Quid facerem? bonitas hominis si ficta fuisset,
Tres fugere haud poteram vel superare viros.
Clunibus insilio, popularem amplexus amicum,
Agresti geminus more creatus eques.
Hoc mihi subsidium soli, peditisque vagoque
Fecit in hostili cœlica cura solo.
Invisam quodd eques terram post terga reliqui,
Et tetigi spatio Gallica rura brevi.
Dum vocat elapsum Præses, seroque requirens,
Pandocheum probris exagitatque minis.
At tibi, Magne Parens, gratus soteria solvam,
Dum reget hos artus reddita vita mihi;
Vita adimerenda mihi, vel pejor morte futurâ,
Ni tuus eversam restituisset amor.



Quid retribuam Domino ?

Quâ laude gratæ mentis adorea,
Quâ voce, Vindex Optime Maxime,
Te vindicatus à tenebris

Carceris Hesperii celebrem !

Tu destitutum, tu malè perditum

Jam bis Creator restituis sibi.

Tu Mortis atris impeditum

Cassibus hoc caput expediti.

Circumstrepentum trans vigilum globos,

Me duxit ingenti incolumem manu,

Hic sospitator, qui rubentem

Isacidas penetrare pontum

Jussit ; profundo sub pelago via

Calcanda sicco strata fuit pede,

Crystallinis utrinque muris

Instabiles rignère fluctus.

Faceffire hostes ; nos adamantinis

Hinc indè muris cura regit vigil

Roburque Terrarum patentem

Imperio moderantis Orbem.

Tutum potentis viribus Imperi

Non me obsidentum fregerit impetus,

Utcunque crabrones strepentes

Et numero superent & irâ.

Non fabulosus Centimanus Gigas,

Si verus esset, fulmineos vomens

Ignes, licèt surgens prementem

Excuteret suribundus Ætnam.

Nihil

Quid retribuam Domino? 57

Nihil timendum te didici duce,
O Liberator non vice simplici ;
Per quem maris terræque recta
Contueor facie pericla.

Per te Tyrannos, Albionis luem
Latè tremendam, spernere perstiti ;
Strumamque perduellionis
Incolumis pupugi imperantis.

Quot tela scuto fracta jacent tuo,
Quo protegebar tutus ab hostibus !
Haud immerenter perduellum
Invidiæ jaculis petitus,

Quos sæpe multo perfricui sale,
Fidelitatis crimine noxius,
Tyrannidis foedæ rejectans
Ingenuo juga dira collo.

Fornace ut aurum clarior exii,
Ipsisque damnis dirior, horridum
Rodente cor, & viperinos
Invidiâ lacerante crines.

Quid exsolurus mille periculis,
Quid mille donis auctior offeram ?
Nihil meum, nec memet ipsum
Esse scio, tuus usque totus.

Et istud ipsum quod tibi reddere
Amore memet percupio, tuum est.
At semet Authori rependens
Liber amor, tibi, Christe, donum est.

Sese ergo munus mens tibi servida
Amore, fibris reddit ab intimis :
Minusque quam debet, sed omne
Quicquid habet sine fraude reddit.

Vah mène purum fraudis ut autumem !
Incogitanti quæ latet immeans,
Interlinens sinceriorum
Hæu tacito pia facta fuko.

At tu Creator, tu penetralia
Hujus revolvens excoque pectoris,

Ut

56 *Quid retribuam Domino?*

Ut scoriis purgata puræ
Thura queant adolere laudis.

Fac ut salutis multiplicis memor,
Dictisq; factisq; & fidibus lyræ,
Me totus in sanctas resolvam
Dum superat mihi vita laudes.

Aula



Aula Somnium.

Non nocte cœcâ si qua dormientium
 Imago mentes ludit, id statim putes
 Bonum ominari vel malum portendere ;
 Sed inde melius corporis vel ingenii
 Habitum notari : ex somniis certissimè
 Quid regnet intus quidve peccet æstimes.

Rarenter ipse somniis exercitus,
 Hominumque vitâ qui fruuntur, maximè
 Incuriosus, morbidi nec corporis,
 Videre memini me sopore languidum
 Quæ me mihimet indicant imagines.
 Illas honestas & metris idoneas
 Hic exhibemus. At Salus sic me beet,
 Vigilantis ista non fuere somnia,
 Genio placentes quod poëtæ factitant.

Matrona formæ præferens sacrum decus,
 Cultusque & oris dignitate regiam
 Professâ sortem, verba fecit hæc mihi.

Integritate vir verendâ prædite,
 Fidèque canâ ; Rex egoque Conjuges,
 Titulum supremi jûsque robûrque Imperii
 Hujus rogamus ut tuæ facilis finas
 Fidei relinqui ; te sacris insignibus
 Augusti honoris indui, nos exui.
 Mox Rex creatus, viribus regni potens,
 Nostro coronam sponte tradas filio.
 Morbi quid istas nos ad ambages agat
 Dissimulo prudens : scire cuique sit satis
 Si quid malè hæret, nutat, aut labat domus,
 Tu modò quod in te jamdiu novi situm,

Prohem

Probam hîc piâmq; sedulus præsta fidem :
 Pro tam auspicata rebus in summis fide,
 Meritus merenti Regis haud deerit favor.

Regina, nil te fallis, inquam, quod mihi
 Tutò coronam posse concedi putas,
 Quam nec vel anam vertici horulam meo
 Velim insidere, tum meæ sortis memor,
 Tum quot corona sit procellarum seges.
 At cum nefas sit se tuis subducere
 Regina iussis, & fidem tibi meam
 Non approbare flagitanti sit pudor,
 Agè, experire iussa quid possint tua.

Repentè pompâ diffuente regiâ
 Excipimur aulâ ; cognitum me comiter
 Proceres salutant, & jubente protinus
 Rege & Senatu tunc sedente, Principis
 Sese abdicantis sede sublimi locor.
 Sacer tiaras crinibus, sacrâ manu,
 Cinctus corona imponitur solemniter.
 Gentile honestat dexteram sceptrum meam.
 Humerósque circum, more prorsus regio,
 Multo refulgens ardet auro purpura,
 Radiante pendens hinc & indè symate.
 At massa splendens aureo toreumate,
 Gladiúsque robur Imperi ad pedes jacent :
 Et hinc talenta magna, robur alterum ;
 Et indè mundi gaza larga gemmei.
 In nostra jurant verba tres Regni Ordines,
 Et quicquid ex re jusserim regni, fore
 Fixum ratúmque jure summo sanciant.

Ego nil moratus, regnet ergò filius
 Hæresque Regis ; Ipse jam jam liberæ
 Obscuritati reddar, & reddar mihi.
 Hæc prima nobis esto lex & ultima.
 Dixi, atque dicto promptiùs Regi libens
 Diadema, sceptrum, purpurámque tradidi,
 Brevis catenis exsolutus aureis :
 Et comprecatus faustitatem plurimam

Regi atque regno, sede regni per gradus
Descendo placidus, nemo quod quivir prius.

Regina sed me prodeuntem retrahens,
Tene hinc abire, dixit, immunem sinam,
Integritate prædicandum nobili;
Cui regna minus est possidere quam dare;
Satisque nullo præmiandum munere?
Hoc præmiaror haud velit fidei Deus.
Has ergo gemmas, hanc tibi gazam miferens
Monimenta magnæ parva virtutis cape.

Regina, dixi, sorte major regiâ,
Nullum putâris esse dignum præmio
Quod non bilinguis & nefarius fuit,
Nec alligavit fraude perjurum caput.
Non aucupetur dona solvens debitum:
Fidemque præstans debitum se solvere
Nôrit. Fides est præmii satis sibi.
Fidem Supremopendimus non vendimus,
Talenta nervos Imperi, Regi; tuo
Baccata collo linquimus monilia.
Hæc irretorto contuemur lumine.
Vitæ parùm isti sufficit, morti minús,
Fuerimque abundè sorte contentus meâ,
In æde Christi si mihi detur locus,
Laboriosi qui sit otii ferax,
In quo quietus servulus famuler Deo,
Mundi tumultu liber, & turbâ procul.
Isto repentè fugit in voto sopor.
Fugit corona, gaza, sceptrum, purpura,
Merûmque semper fugit aula somnium.



P S A L. Xliii.

Judica me Deus.

Asfere jus Deus alme metam, justamque tuere
 Sublimi ex solio, Judex justissime, causam.
 Me numero pressum, technisq; hinc indè petiturum,
 Gentis inhumanæ crudelibus eripe malis.

O Deus, O solo cujus me robore tutor,
 Cur miserum reicis? fuscum quid ab hoste maligno
 Me pateris luctus demersum errare tenebris?
 Luce tuâ tandem mea vera & justa coruscet
 Causa; sacrum ad montem tuâque ad sacraria tuto
 Me sistant tua lux tua pura & vivida Virtus.
 Tunc alacer sanctis præsens altaribus, ad re,
 Te solidam mihi lætitiâ nitârque ferârque.
 Te Deus, O sanctum, semper mihi Maxime, numen,
 Carminibus fidibusq; lyræ celebrabo canoris.

Cur prostrata jaces? cur te malefana dolore
 Dejicis, interno mens exagitata tumultu?
 Expecta Dominum; parat ille ingentia laudis
 Argumenta tibi, tempestivóque resolver
 Auxilio in lætas, hæc ora, hæc pectora, laudes.
 Hæc bona præstabit nostræ Deus ille salutis.

Lucidum



Lucidum intervallum.

ECce jaces, qui me, furiis lymphatus Averni,
 Triginta insanis vexasti litibus annos;
 Et stratus furis usque minis, & torva rueris.
 Sic aper adverso totum qui pectore telum
 Excepit, rabido prensat venabula morfu;
 Et rictu spumante fremit, spiratque minaces
 Nequicquam extremis frendens grunnitibus iras.

Ah quoties victor nequicquam extrema putavi
 Quæ vix ducebas suspiria mœsta supinus!
 Mox reddente malum nunquam moriente vigorem
 Nequitia, veteris renovasti prælia rixæ.

Rex Superum, qui me per iniqui tormina ponti,
 Syrtésque, scopulósque, & difficiles anfractus,
 Jactatum exerces, perque ipsa pericula servas,
 Aut semel horrentes verbo compesce procellas,
 Aut tua jactato longisque erroribus acto
 Gratia sufficiat: da mentis lene serenum;
 Quo facilem Jesus in tempestate quietem
 Carpsit, & ipsa mihi faciat jactatio somnum.

Euge, senî parvum restat maris æquor arandum,
 Nec longè jam portus abest, securus, amicus,
 Pace Dei, Pacisque Deo sine fine beatus.

O

In



In Deo tutus.

Sic Pastor teneram fidelis agnam,
 In qua jam lupo improbum cruentus
 Dentem fixerat, eripit voranti,
 Ereptam incolumem pedo tuetur;
 Læto in gramine floridisque ripis
 Curâ languidulam fovet benignâ;
 Ut me Maximus Optimus retraxit,
 Quem rictu rabido impetens læna
 Jam spe glaberat, & siticulosas
 Ardens sanguinis irrigare fauces,
 Erecta exitu meo inminebat.

Sed tor Maximus ille Sospitator
 Me frendentis ab ore sospitavit.
 Nunc fessi inque sua reclinis umbra
 Membra aurâ reficit levi, mihi quam
 Motis divus Amor creavit alis.
 Hæc per tempora ludibunda, pèrque
 Diffusas fluitans comas, amorem
 Nostris molliter auribus susurrat.

Pastor provide, quem pium Parentem
 Appellem potiùs, tuam paternam
 Curam multiplici salute doctus;
 Quodd non Tænariis premor tenebris,
 Quodd vivo & valeo, hoste quodd vidente
 Et ringente, malis resurgo major,
 Totum id Sancte tuo Parens amori
 Acceptum refero; tuusque torus
 A te pendeo, te sequor vocantem,
 Ad te te appropèroque gestiôque,
 Tanquam escæ cupiens avis tenella
 Nitendo tremulûmque pipilando,

Tensis faucibus appetit parentem,
Implumésque inhians coruscat alas.
Tu pastum tepidis fove sub alis,
Qui me spontè tibi resigno totum.
Sic dum me tibi debirum resigno,
Magnam conficio mihi salutem.

In Deo fortis.

Spectari dignum est, horroréque gratus ipso
Quum subrigentem luridas setas aprum,
Scintillantem oculis & stricto dente minacem,
Venator acer excipit venabulo;
Pérque ferum pectus penetráque viscera, totum
Ad ima ductum transigit ferrum ilia.
Sed melius læto spectamen præbet Olympo,
Oculisque Regis Cœlitum placens magis,
Vir quem diva Fides clypeo, quem Spiritus ense,
Deique totum Christus armis instruit;
Queis Luxum atq; Metum, & scelerum frendentia monstra,
Et belluinas conficit cupidines.
His inactus trepidos animoso pectore casus,
Nullâ remissus excipit formidine.
Ferrea vincla, cruces, insultantisque Tyranni
Patiendo fortis despicit minacias,
At cùm larva mali plusquam mala vera minetur,
Et multa vulgus perperam vocet mala,
Diripit intrepidus larvæ pallentis hiatum,
Et à minaci noxium determinat.
Hic mihi succurrunt immani mole Gigantes,
Quos in theatri ludicris vidi puer;
Æquales furno rictus, oculisque patellis,
Nigrans equinis horridus crinis jubis;

Penula fulgebat mentito scortea ferro,
 Nodosa grandis clava dextram armaverat ;
 Monstra horrenda , pavôrque meis æqualibus ingens,
 Donec gerone cum suo cecidit Giges,
 Et tunicâ crassæ fraudes patuêre reductâ ;
 Pravè retortâ crate vix hærens sibi
 Heros vimineus, veteri cui ficta canistro
 Animosa stabant ante casum pectora.
 Hinc pueris largus pulsâ formidine risus,
 Ipsaque risus largior formidine.
 Non quicquid caperat frontem , vel corva tuetur,
 Intus tuenti incusserit formidinem.
 Sæpe magis metuunt homines ridenda timendis,
 Solùm intuentes id quod exterius parer.
 Sed sapiens fortisq̃ue Deo, quique intima rerum
 Momenta doctus lance pendit sedulâ,
 Deteriora videt blando ridentia vultu,
 Quàm quæ severâ fronte rugas contrahunt.
 Ista fugant, à sèque monent ut ab hoste cavendum ;
 At illa risu sæpe nos ipso necant.
 Naturâ fruitur, nec pravâ interpolat arte
 Quæ læta fausto contigerunt Numine.
 Non ea, non alios, non semet denique, sorte
 Excors opima sustinet corrumpere.
 Ditat opes virtute suas, titulisque decorus
 Decoriozem se facit modestiâ.
 At si illum sors parva gradus detrudit ad imos,
 Deo in Parente regium invenit genus.
 Lætus in adversis animus, majorque periclis
 Serenitatem impertit adversis suam.
 Instructum vegetumque fide non urget egestas,
 Cùm possidentem cuncta possideat Deum.



In Deo quies.

CUrarum vacuus, thoro recumbens,
 Dum se circumagat silente passu
 Noctis concubiæ nigella biga,
 Quâ pascam meditatione mentem,
 Huic postquam cerebro quies amica
 Blandi debita præstitit soporis ?

Ad te principium meæ quietis
 Ipsa hæc alma quies vocat quierum.
 Te Somnus riguus jubente, lecto
 Se nostro insinuat, benigniorum
 Alludente cohorte somniorum.
 Tu curas vigili fugas edaces.
 Tu sedas animi vagos tumultus.
 Amplexûque tui fovens Amoris
 In curæ gremio tuæ reclinem,
 Præstas incolumem & piè serenum.

Sic Matris teneris puellus ulnis,
 Ceu cunis, agitatione molli,
 Lento murmure, tinnulôque cantu,
 Appressus sinui piæ parentis,
 Ad somni requiem silentiûmque
 Blandè pellicitur, sopore donec
 Vagitus superante conticescat.

O te magna animæ quies fidelis,
 Sub cujus lateo quierus alâ,
 Non pigram requiem otiûmque votis
 Ignavum rogo, sed negotiosum.
 Quæ me, Christe, tuis sacravit aris,
 Præstanti officium tuas ad aras
 Donec Gratia strenuam quietem.

Infraſtam aſſiduo labore mentem,
Et nulli ſuperabilem dolori.

Hoc quæcunque petent latus ſagittæ,
Ad ſcurum fidei obtegens petitur
Fractæ diſſiliant : gubernet intus
Divinâ ratione paſſionem
Pax Regina, Dei verenda proles,
Virtutum genitrix, medela mentis;
Pax ſancta anticipans fide beata
Puræ gaudia Cœlitum quietis.

Deus amoris in ira memor.

JAm noſtra dudum fulminis æmulis
Circumſonârunt littora machinis,
Et alluens largo cruore
Mars rigidus rubefecit æquor.

Hæc extra, at intus dira furit lues,
Utrique planctus, dum ſine ſanere
Funelta feſtinanter indunt
Corpora vel pelago vel undæ.

At iſta lætis triſtia temperat,
Amoris, irarum in medio, memor,
Eccleſiæ magnus Redemptor,
Qui tenebras hilarare luce

Aſſuevit; illo libera præſtite
Pax noſtra tutò rura perambulat,
Nec fervidi circum duelli
Pellitur horriſco tumultu.
Frumenta ſecuri agricolæ ſecant.
Carros vehentes copia degravat.
Lætique cum clamore fauſto
Invehitur bona meſſis horreis.

Deus amoris in ira memor. 67

Rarò oppidorum mœnia transilit
Acerba clauso pestis in aëre :
Nostròsque per colles apertos
(Sic voluit dator ille vitæ)

Maligna nondum toxica miscuit
Auræ salubri : ducimus hanc Deus
Grati, & pati quidvis parati,
Ultima quòd meritis rependi

Rerum jubebis Maximus Arbiter:
Virtute tu nos tu modò roboras,
Seu pestis atræ sive belli
Nos fera diluvies inundet.

Ter sancte, peccati ingenitam luem
Ab his potenter mentibus elue ;
Et quidquid hostiles focillat
In te animos penitus revelle.

Sic alma nos Pax, sic bona Faustitas
Brevi revisat ; sic lacerantia
Se membra Christi ingens amoris
Spiritus ipse Deus rejunget.



Orate pro pace Ferusalem.

PAcis Christe dator sacræ,
 En Ecclesia quam tuo
 Empram sanguine Conjugem
 Patri concilias Nurum,
 Illa, inquam, malè feriata Pacem,
 A te, Sponse, tuæ neci propinquo
 Postremis tabulis sibi relictam
 Reicit, projicit, imemor Datoris,
 Projectamque pede insolente calcat.
 Militat adversis sibimet contraria membris;
 Urgetur pede pes, dextra est commissa sinistra,
 Alteraque alterius malesano robore nervos
 Exsecat, in propriam properans habilisque ruinaam.
 Sic miserè pereant per mutua vulnera fratres
 Anguis Tartarei rabiosis dentibus orri.
 At bona Pax, rectoque Salus soror intima Vero,
 Unanimes Sanctos Cœli pia pignora servant.
 Mundi procellis à suis cunabulis
 Vexata fuit Ecclesia :
 Propriis sed ipsa Ecclesia simultatibus
 Facta est procellosum mare.
 Exurge Christe ; voce perculsi tuâ
 Hi consilescant turbines.
 Aut fac ab isto turbine ad portum sacrum
 Ut Morte sospes enatem.

Summum



*Summum nec metuas diem nec
optes.*

EN Mors repōsto nunc brevi manubrio
Falcis, sibimet deligit longissimæ
Rigidæque lignum perticæ ; hanc ferro induit,
Latósque ducit hinc & indè sæviens
Gyros, ut una in civitate, uno die,
Bis mille cives convenásque demetat
Utriusque sexûs. Proh Deus ! quantæ strues
Juvenum senúmque, cámque matribus suis
Infantium lac & luem fugentium
Ab ubere uno ! O vastitas, pestis, fames,
Urbis misellæ, destitutæ, languidæ,
Cui vix suorum quartus hæret incola,
Dum turba vitæ prospicit fugâ suæ ;
Mânénsque numerus multitudinem suam
Solâ fatetur funerum frequentia !

At fortè tutâ consulant fugâ sibi,
Si deserentes foeta peste moenia
Se fugere possent ; mente lævi, qui luem
Sinu foventes in fugâ circumferunt,
Et rura damnis urbis infelicitant.

Non ulla ab istis statio tuta, non mihi
Ruris colono, qui salubrem collium
Incola remotæ villulæ duco aërem.
Sed hîc & ipso Pestis in regno, Salus
Si quos tuendos tradidit Deus sibi,
Pennis focillat sospitatrix candidis,
Alisq̃ue moris noxii circum aëris
Diffilat vapores : hæc jubente te, Deus,

70 *Summum nec metuas, &c.*

A matris alvo sospes hoc caput fover.

At si lues nos, te jubente, demetat,

Magis fovebit, te jubente, nos Salus.

Ruptisque carnis improbae repagulis

Quiete nostram, sanctitate, gloria,

Animam beabit. Sic premente spe metum,

Libérque vitæ rædio, & Mortis metu,

Intueor æquo sortem utramque lumine,

Nihilque præter Optimum timeo Patrem,

Qui nil quod usu non sit optimum dabit.

Omnes amore qui Deum colimus pio,

Deum timere nos decet, non à Deo.



P S A L. Xcviïi.

Cantate Domino Canticum.

- v. 1. **E**Ia novum cantate melos Dominóque Deóque,
 Robore pollentis dextræ validíque lacerti
 Magna per attonitas latè miracula Terras
 Didenti, semetque suâ virtute tuenti.
 Quem quocunque feros gressum fert acer in hostes,
 Et tremor & rapidis anteit Victoria pennis.
2. Hoc oritur victore Salus, Astræaque gentes,
 Sursum aspectantes Cœlo demissa revisit.
3. Nempe sui memorem populi, fidique tenacem
 Fœderis Isacidæ noscunt; magnamque Salutem
 Gentibus auditam sub utroque jacentibus axe,
 Ipsæ amplectentur, sub eodem vindice tutæ.
4. Ergò salutifero soteria debita Regi
 Solvat ovans Tellus; laudum lætissima plausu
 Tota sonet, resonet repetitis plausibus Echo.
5. Nunc lyra, nunc citharæ, citharæque animantia nervos
 Carmina, cum nablii modulis, vocisque maritæ,
 Et Domini laudes, & gaudia nostra celebrent.
6. Parte aliâ sacra cornicines præconia pangant,
 Et magnum vacuo tuba grandis in aëre nomen
 Buccinet, & festis reboet clangoribus æther.
7. Æquora littoribus fremitu collisa sonoro,
 Coram Rege Deo plausus imitentur ovantum.
 Quâsque sinu refluo complectitur Amphitrite
 Unanimes agitent sollemnia gaudia gentes.

8. Lætitia

8. Lætitia saliat nitidis illisa lapillis
Garrula rivorum modulato murmure lymphe.
Lætitia jacent nemorosa cacumina montes.
9. Quippe Pater rerum flammis radiata benignis
Ora ferens, hilarans propiori numine Terras,
Regnaturus adest ; qui Maximus Arbiter Orbem
Liberet æternum noxis & fraude maligna ;
Æternum populos justus clemensque gubernet.
-
-

Terræ



Terræ Gemitus.

Immenso scelerum sub pondere Terra fatiscens,
 Perpetuam vitii se dedignata ministrā,
 Jamdudum ignitis prodit singultibus iras.
 Indè vomit flammās diris mugitibus Ætæna,
 Indè cavernosum quatiens penetrāle Velsævus

Ardentem eructat patulo cratere favillam.
 At tandem cumulis injusti ponderis impar,
 Dum scelus aggestum sceleri magis usque magisque
 Degravat oppressam, pulsâtque cacumine Cælum,
 Succuriit latus impatiens; quo saxeā motu
 Vincula luxavit, montanâque cingula Mundi;
 Antrâque cæca fremens vasto patefecit hiaru:
 Ipsa sibi tanquam properaret fessa cavare.
 Effoetæque simul Naturæ immāne sepulchrum;

Protinus os tetricum sacris venerabile rugis,
 Turrigerôque caput redimitum tempora peplo,
 Magna anus exeruit; connixâque pectore toto
 Exstare, & foedum magno molimine pondus
 Excutere, hoc ipso gravior molimine, prona
 Concidit, in proprias penitus revoluta cavernas.

Indè sonore cavo, quantum sub pondere penè
 Faucibus elisis licuit se solvere questu,
 Ejulat. O per quem nullis suffulta columnis
 Undique librato sapienter pondere firmor,
 Cur me dira premunt alienæ pondera noxæ?
 Pondera quæ veteris violant libramina formæ,
 Portenduntque Chaos. Vah! cur mihi stulta ruinam
 Extimui? paream, nihilique voragine cæcâ
 Demergar; sic exonerer vel morte levata,
 Atque hoc fraudis onus, me gestatrice remota,

Præceps

Præceps Tartarei volvatur ad ima barathri.

Hoc melius, quàm me servis servire protervis ;
Sustentare meâ pravos virtute rebelles,
Sanguine iustorum, latronum crimine tingi.

Scilicet idcirco dorsum proscindor aratris,
Et laceror rastris durisque ligonibus artus,
Hostibus ut, Rex Summe, tuis frugisque merumque,
Lurconumque gulæ pretiosa obsonia fundam ,
Vulneribus multis confossa, maloque coacta.

A famulis hæc, Christe, tuis & amantibus æqui
Multum erat ista pati, queis nempe innata veterni
Hæret adhuc labe. Notum est tibi, Conditor Ingens,
Quàm cupidè, quàm fronte hilari, quanto ubere fruges
Uncis vomeribus non sollicitata ferebam.

Quando recens proles, concorsque Parentis imago,
Sanctus Homo, diuum totus spirabar amorem.

Tunc ego, tunc gravidas pomis & flore nitentes,
Veris an Autumni ambiguas, locuplete colebam
Luxurie sylvas : crocesque per aëra venti,
Vernaque temperies æstivâ fruge benigna,
Mulcebant Hominem ; cui nullæ pectora curæ
Pulsabant, nisi sola Deo pia cura placendi,
Naturæque tuo facies ridebat amico.

At Stygii simulac inimica ad signa Draconis
Transfuga defecit, Mater Natura novercam
Induit, & parcâ mensa est sua munera dextrâ.
Omnis ager tribulis, & inhorruit æthra procellis.
Nuda novo fontis tremuerunt frigore membra.
Mox pecudum exuvias pelles indutus, inopsque,
Vix filicum venis ignem, vix pulvere victum
Extudit, & multo tristis sudore paravit.

Sed mala progenies nimis ad sua commoda prompta,
Ad tua iussa socors, quæ vult mihi mille per artes
Nolenti extorquet : nec sat putat illa virentes
Expilare sinus almâ ubertate beatos ;
Bruit ex imis nostræ penetralibus alvi,
Divitiis inhians, vicinum Manibus aurum.

Indè fores Erebi marrâ curvóque bidente

Pulsar,

Pulsat, & exciri faciles pulsator avarus
Evocat Eumenidas: quæ mox non segniter auro
Mancipiisque graves auri cultoribus hærent.

Nec Furia unius generis trepidos mortales
Exercent, miseros dubium magis annè merentes.
Quot variae Eumenidum facies ! seu scæda libido,
Seu lucri sitis, aut ardor maleficus honorum
Transversos rapit ; aut eos exitiabilis ira
Diva Superstitione, quæ crudum cædis amorem
Religione tegens Furiarum maxima sævit,
Quin Regum (tremebunda loquor) sacra colla verendorum
Abscindit, scelerique jubet jus esse nefando.

Quid memorem, quod dira tibi Blasphemia bellum
Inferat ? historiam faciens quæ fabula nuper,
Aggressos Cœlo horriferos certare Gigantes,
Atque ipsum folio Regem detrudere Cœli.

O longum patiens Superum Rex Maxime, quando
In linguas Cœlo obstreperas, inimicæque corda,
Ignea fulmineo torquebis tela lacerto ?
Ecce tuos ignes alius nunc provocat ignis,
Ignes queis nova sit conflagratura Gomorrha,
Flagrans indomito scædæ pruriginis æstu.

O si urbes ipsumque solum furiosa libido
Perdidit, accendens diris ultricibus iras ;
Cur ego comprehensis non ardeo tota caminis,
Tota hominum vitiis olidum nunc facta lapanar,
Tota venenosæ fraudis litisque theatrum ?

Est flammæ ingens intra mea viscera fomes,
Jamdudum expectans felicem tæque quatérque
Illam, Christe, diem, quum vinctus nube coruscâ
Elicies illinc supremos Arbitræ ignes.
Queis tota hæc latè Mundi compago soluta
Absiliat, mihimetque rogum mea flamma ministret.

His ego, ceu magnâ penitus fornace recocta,
Purior electro eveniam, pretiosior auro,
Terriculis Sanctis & Christo Rege superba,
Terra Parens hîc conticuit, diductæque labra
Compressit, virides adducens chasmatibus oras.

sponsa



Sponsa mittit ad Sponsum.

Conscia nostri Comites amoris,
 Filia sanctæ Solymæ, puellæ;
 Si pias vestræ studiosa tangit
 Cura sororis,

Ite, divinam properate Sponsum,
 Purius Phœbi radiis micantem
 Quærere, à cujus meus usque pendet
 Spiritus aurâ.

Dicite invento recubare Sponsam,
 Fœdere æternò sibi conjugatam,
 Sauciam divi jaculis fidele
 Pectus amoris.

Ardeo totis penitus medullis;
 Ardeo puris liquefacta flammis:
 Hic tamen charâ est mihi sanitate
 Charior ardor.

Nec mihi optârim superesse vitam,
 Ni meus juxta superesset ardor,
 Qui meam solus facit esse dignam
 Vivere vitam.

Cùmque non Sponsi liceat potiri
 Libero amplexu nisi morte carnis,
 Quamdiu amplexus caro pigra nostros
 Viva moraris?

Quando ad amplexus nimium morantes,
 Pessulo carnis faciet reducto,
 Mutuum flagrans aditum flagranti
 Sponsus amicæ?

O veni tandem mea vita Christe,
 Afferens vitæ melioris auram,

Morte

Sponsus mittit ad Sponsam 77

Morte quam felix adeam, tuâque
Morte paratam.

Dicite hæc Sponso, comites amoris,

Dente livoris vacuæ Sorores.

Unus is plures bene ducit, at nos
Nubimus uni.

Sponsus mittit ad Sponsam.

Filiæ celsæ Solymæ puellæ,
Nuntia Sponsæ, comitésque amoris,
Hæc laboranti mea iussa vestra

Ferte sorori.

Nè frui pleno mea Sponsa Sponsi

Speret amplexu, nisi nuptialis

Solverit ritus nocuæ gravatam

Compede carnis.

Nec morâ languens alios amantes,

Quos Caro & Mundus malesuadus offert,

Immemor nostri, & propriæ salutis

Deligat amens.

Es mihi absenti (pia Sponsa) præsens,

Qui tuos sancti gemitus amoris

Audio, quamvis mihi nullus inter-

nuntius adsit.

Quòd meo ferves & amore plangis,

Auribus Sponsi melos est canorum,

Qui tuum multo sibi præstinavit

Sanguine amorem.

Testis ille imis ruber ex medullis

Membra perfundens labefacta sudor,

Horrido flores viridantis horti

Rore cruentans.

P

Testis

78 *Sponsus mittit ad Sponsam.*

Testis hic dextræ cruor, hic sinistra,
Vulnus hoc duplex pedis utriusque,
Hoc caput spinis lacerum, hoc ferâ cor
Cuspide fixum.

Hos amans pro te subii labores,
Hos tuæ noxæ proprios dolores,
Fortis invictam patiente amore
Vincere Mortem.

Te, nigræ victor necis, ex avaris
Faucibus raptam sitientis Orci,
Et mihi assertam, statui ad perennis
Limina vitæ.

Pro meis in te meritis id unum
Flagito, ut Sponsum redames amantem,
Et mei serves tibi profutura
Jussu Parentis.

Perfer, obdura, breve post laboris
Tempus amplexu fruitura nostro.
Jam Salus ridet tibi, jam propinquis
Advolat alis.

Dicite hæc vestræ comites sorori,
Sauciæ nostri jaculis amoris;
Quæque ei mando referenda, vobis
Dicta putate.

Sedulæ accensis vigilate lychnis,
Hæc mea est demum sapiensque virgo,
Cui Fides ardet pia, Charitatis
Pinguis olivo.

Beatus



*Beatus Domine quem tibi ad-
moves.*

Non poenitenda corda poenitentia,
Divóque amore saucius,
Genibus, Redemptor, pronus advolvor tuis,
Lachrymis tuos rigans pedes.

At tu benignâ provolutum dexterâ
Clementer inclinis levas.

Molli levatum lenis amplexu foves,
Ut prodigum pius pater.

O quanta amoris intus efficax creat
Amplexus iste spicula !

Beatitatis permeans acerrimo
Sensu recessus pectoris,

Oleóque læto dulce fibras proluens,
Mulcet medullas intimas.

O suavitates neuriquam sermonibus
Edifferendas ! O sacras

Opimitates gaudio effertissimas,
Diam inchoante gloriam !

Ingens Redemptor, qui reo & terrâ gravi
Cælum benignus admoves,

Si sic sapit jam extra suum Cælum locum,
Quid in suo sapiet loco ?



Sursum corda.

TE cordis penetralibus,
 Te desiderio non satiabili
 Dilectum sitio Deus,
 O lux, O animæ magna Salus meæ !
 Te noctu vigil ambio ;
 Te cùm lenta sopor lumina degravat
 In somnis video, meum
 Sidus, trans vitreum carnis operculum
 Attollens roseum jubar.
 O quàm dulce nites miris Homo-Deus !
 Quondam victima perditis,
 Mundi turpe nefas cæde pians tuâ :
 At nunc principe Gloriâ
 Nativis radias clarus honoribus,
 Lucis torrida vividæ
 Aspectu placido spicula temperans.
 O quando mea fictili
 Mens, Lethi officio, carcere libera,
 Ad te principium sui
 Lætam remigio se volucris feret ;
 Ardens plena frui Deo,
 Nec sedare Dei perpetuam sitim !

Velle



Velle quod vult Deus.

NEmpe ad sinistram fors cadit, quam pendulus
 Ad dexteram expectaveras.
 At quis serenum, non procellis hispidum,
 Cœlum tibi promittere
 Te Marce jussit ? non potens rerum Deus,
 Sed impotens amor tui,
 Menti supremæ providæ rerum arbitraz
 Subjicere nescius suam.
 Atqui Tonantis Filius compar Patri,
 Non ut voluntari suæ
 Festus litaret, sed voluntati Patris,
 Se carne jussus induit ;
 Cœlicisque, Summi traditi Patris manu,
 Fæces amaras ebibens,
 Non nostra, dixit, quicquid imperas, Pater,
 Fiat voluntas, sed tua.
 Magni sequamur Imperatoris piam
 Lætâmq; fortitudinem.
 Ignavus ille miles est, nec miles est,
 Qui sequitur ejulans Ducem.
 Cedet oneranti fortis & sapiens Deo,
 Pusillus obluſabitur ;
 Ferétque vinctus more jumenti jugum,
 Quod ferre sponte noluit.
 Quod vult potest, cui velle quod potest sat est,
 Idemque velle quod Deus.



Mentis Serenum.

Non si procellis horrificis frequens
 Nubes opacas agglomerat Notus,
 Imbrésque portendit nocivos
 Frons tetrici caperata Cœli,

Nostro serenum pectore diffugit.
 Forsan procellas qui vehit, avehet
 Turbo hic ; & inversos aquarum
 In pelagus vacuabit utres.

Quodcunque damni craftina parturit,
 Tua quieti, Christe, faventia
 Carpemus hanc lucem : gravamen
 Cuique suum satis est dici.

Non missa nimbis tela tonantibus
 Nolente quemquam contigerint Deo ;
 Volente, nil certam Tonantis
 Profuerit fugitare dextram.

Frontem serenet vel caperet Polus ;
 Plutus crumenæ defluat, affluat :
 Te sortis Authorem utriusque
 His alacres fidibus canemus.

Pacis



Pacis cœlestis Anticipatio.

SEdens in axe cœlico crystallinæ
 Serenitatis, dia quam colit Fides,
 Quo non vapores terrei cupidinum
 Metuúmve scandunt ; cerno sub pedibus procul
 Ex his coactas improbis vaporibus
 Nubes creari, quæ subinde turbines
 Irarum & atræ bilis eructant globos ;
 Et obtenebrant mentium puram diem
 Curarum opacâ tristium caligine.

Parùm putârim Terram ab alto cernere,
 Stellâ ab æquo ; ni supervchi queam
 Rotatione perpeti cœlum inquires,
 Et à supremo petere Cœlo mobili
 Immobile illud, Maximi rerum Arbitri,
 Qui cuncta nutu motor immotus movet,
 Sedem verendam, diva quam beat Quies.
 Quò tendis anime ? Têne dum carnis scaphâ
 Vectus laboras in procelloso mari,
 Penetrare Cœlos, & fores celsissimæ
 Serenitatis pultitare fas putas ?
 Quidni ? minùs nil suadet illa Cœlitum
 Divæ Quietis quæ pias mentes manet
 Cœlis vel ipsis firmior promissio.

Hanc nos quietem dulce festinâ Fide
 Præoccupamus : Jam Fides celsum caput
 Inseruit Astris ; Jam corusco vertice
 Transcendit Astra : Jam bonæ Pacis Dei
 Penetrâle pandit clave Amoris aureâ.



Senectuti gratulatur.

S Alve mœsta aliis, nobis jucunda senectus,
 Recta, serena, vicens, quam non nodosa podagra,
 Non mala nephritis, non tussis anhela farigat.
 Non numero superans quot volvit fluctus arenas,
 Quot nivium Boreas brumali turbine floccos,
 Morborum omne genus ; vel primæ sæpe senectæ
 Triste satellitium : Nos absque satellite tui,
 Expertes morbi & medici, te, Christe salutis
 Hujus & æternæ authorem veneramur ovantes.

Nil confido tamen senisve hyemisve sereno.
 Nec mihi multa super promittunt tempora vitæ
 Hæ capitis mentique nives, hæc serior ætas,
 Quæ modò bis senis mihi lustris addidit unum.
 Annorum fluvius se Mortis ad ostia raptat ;
 Arctæque dilapsi volvendis tempora linqunt.

Anno 1665.

Interea fruimur præsentibus atque paratis,
 Securi & placidi. Mihi non sincerius unquam
 Delicias faciles ridens Natura probavit.
 Mulcemus lento vitæ incommoda risu.
 Hic animus certis nescit spontanea damnis
 Addere, cum nummis animi perdendo quietem.
 Id quod adest amat eximie ; nec dissita longè
 Quærit, ut in paucos spes longas inchoet annos.
 Et breve cum sit iter non multa viatica condit.

Ipsa ætas, comitem semet cui Gratia fecit,
 Frigore brumali juvenes compescuit æstus.
 Præcipites venti ponunt, animique tumultus.
 Pax intus, per quam si quid trepidaverit extra,
 Aut componitur, aut minimum terrere jubetur.

Sûnque

Súntque sui brumæ fructus, est messis & herba ;
Et si non flores, sunt florum imitamina quædam.
Concretis ut quum nivibus pomaria cudent,
Longa pruinosis ubi pendet stiria ramis,
Aut plana aut gemmis pulchrè glomerata coruscis,
Quas Sol exorlens radio vibrante colorat,
Et mox sapphiro modo transmutare pyropo
Gaudet, & in prasinos variare adamanta smaragdos.
Hanc veris speciem nonnunquam incana senecta
Exhibet, & studiis floret ludisque juventæ.

Hoc habet eximium Christo devota senectus,
Quod pretium longi tangit finemque laboris ;
Et gravis excoctis divinæ frugis aristis
Messorem sponte invitat : mox plena, volensque,
Demetitur, matura Deo ; magnóque Salutis
Longum expectato lætissima conditur horreo.

Pietas florida.

NOn auro tripodas graves
Aris, Christe, damus tuis ;
Sed quos noster ager tuo
Felix imbre tulit, tua
Hujus spargimus ingenI
Circum altaria flores.

Ruris divitias Deo
Sacrabat Pieras vetus,
Fruges floribus implicans,
Et nectens apio rosas ;
Nos paucas dedimus tuo
Fruges, Christe, sacrario :
Paucos nunc cape flores.

At paucos dare sit pudor ;
Cum sancti pateant mihi

Parnassi viridaria.

Si quæ dulce rubet rosa,
Aut caltha aureolum micat,
Sertis implicitas meis
Has ritè offerimus, Deus,
Flexo suppliciter genu,
Aris impositas tuis.
Quicumque ingenuè nitent
Debentur tibi flores.

Quæ me biga volucrum
Curru subvehat arduo ?
Ales mirificus petam
Hermonis rigui juga,
Sionisque nemus sacrum.
Per lucos Charitum vagus,
Si quis collis Arabicis
Lætus fragrat odoribus,
Quotquot Græcia floribus
Aut halat Latium ferax,
Visam sedulus, ut sacros,
Aut dignos fieri sacros
Decerpam tibi flores.

Hic multam pueri rosam,
Hic plenis calathis crocum,
Hic duplex date lilium,
Hoc aurum, id superans nives ;
Narcissum, colocasia,
Flectentemque calendulam
Ad Solis radios caput ;
Et qui versicoloribus
Distincti areolis patent,
Et qui murice luteum
Virgati variant decus ;
Flores spargite seduli.
Aras cingite floribus.
Templi floribus area
Latè strata renideat.
Plus Templum decoret rosas

Quàm

Anima pia Thronus Dei. 87

Quàm Templum decorent rosæ.
Nulli viviùs rubent,
Nulli candiùs micant,
Quàm qui corde pio, Deus,
Sacrantur tibi flores.

Anima pia Thronus Dei.

R Eclude portas claviger cordis mei
Amor ; en Olympi celsa qui Tempia incolit ,
Humilésque mentes poscit hîc additum sibi,
Intra Hospes Ingens, Hospite indignam Deo ,
Dignam futuram si modò incolas domum :
Intra, & domum fac Regiam ex gurgustio,
Ex carne Cœlum, Numinis sacram sedem.
Quia mentis ; una est quæ Creatoris sui
Capax, Olympi quem nec ambitus capit,
Nec si se Olympus millies excederet.

At quæ capax est , tu tenacem fac tui ;
Semélque lectam perpetim domum incole,
Hospes verende : fac eam propriam tibi,
Tibique soli serviat Domino domus.
Hîc, Christe, regnum posside, hîc solium loca ;
Minimùmque si quid fortè turbellæ cient
Lascivientes improbique servuli,
Subitò residat voce suppressum tuâ,
Omnésque jussi consilescent turbines.
Ut quando ventis impari vectus scaphâ,
Jámque decumanis pessum eunte fluctibus,
Uno procellam dispulisti verbulo,
Tuóque Ponti concidit nutu fragor.
Animam gubernet Pax tua & servet meam,
Divini amoris & sacræ lucis ferax ;

Pax

88 *Anima pia Thronus Dei.*

Pax dia, magnum cordis & mentis bonum.
Intelligendo quam potest nemo assequi,
Sed sentiendo : Tu mihi sensus daro
Queis bis creata mens tuam Pacem sapit,
Charites sorores, Charitatem, Spem, Fidem,
Queis mens novata, carnis (heu ! vivos nimis)
Sensus rerundat, turbulentæ, fervidæ,
Pacis Parenti dissidentis & sibi.

Ausimne carne vix subactâ idem loqui
Quod ille summam raptus ad sedem Dei,
Adhuc gravatus carnis, ut nos, compede ?
Euge anime, fidens fare quod Paulus prius,
Fidus magister ; Vivo, non ego tamen
Sed Christus in me, & ista in isto corpore
Quam vivo vitam, est vita Christi, non mea.
Unumque spiro spiritum Christi fidem.
Victore lethi amore qui me diligit,
Pro meque semet & mihi volens dedit.

Pia tranquillitas Dei speculum.

Cernitis ut mediis ardere videtur in undis
Cœlorum speculo Titan geminatus in udo,
Et rutilis ipsas radiis incendere lymphas.
Scilicet astrictis ventri Moderator habenis
Nè planam spirans faciem corruget aquarum,
Indulset Soli hæc agitabilis otia Ponti,
Ut se per requiem placidâ miretur in undâ.
Hæc requies fontes, hæc illibata colebat
Æquora, ab Authoris pura atque recentia dextra ;
Quando rudi flatus primos pulmone premebant
Infantes Zephyri, pudibundæque flabra timebant
Virginis undæ faciem libare verendam.

Tunc

Pia tranquillitas Dei, &c. 89

Tunc sacra mens hominis placidâ sedatior undâ,
Lethiferæ fraudis minimâ non aspera rugâ,
Perspicua, illimis, lucisque suisque Parentem
Tota reflectebat ; planoque in marmore mentis
Vivida divinâ facie radiabat imago ;
Non metuum Borea pravæque cupidinis Austro
Distorta, instabilis, sceleris non turbida coeno,
Quod mox triste nefas Stygiis invexit ab antris,
Et malus abrasit carnis de fœcibus æstus,
Quâ sanctam effigiem vah ! turpiter obscuravit.

O Sol Justitiæ, lucis fons magne perennis,
Intima qui radiis mentis penetrabilia lustras ;
Est lustrare parùm, tu nostram illustris amansque
Illustra, speculùmque tuâ tibi luce repurga.
Hinc turpans speculum fœx carnis crassa faceffat,
Aut (quod mortali fas est sperare) residat.
Flamina nata domi, motique aliunde tumultus,
Abstineant animi faciem caperare serenam,
Nec coram te ausint mutire aut hiscere venti ;
Ut claro & placido conspectus in æquore vultus
Divinus, proprio mirandus lumine, totam
Impleat , & magnâ dilatat imagine mentem.

Spirituum Genitor, regnum tua semper apud me
Obtineat splendens & notâ major imago.

Quantum



Quantum est quod nescimus.

Quoties oculis numerosa intentus in astra,
Quæ gemmis phrygiant nigræ velamina noctis,
Spectator tacitus miranti hæc mente revolvo ;

Quot rutilos video stellatæ fornicis ignes,
Et quot non video ! cùm nec centesima Cæli
Flammarum sit tota oculis pars obvia nostris.
En ut pauca vagas exercent sidera spiras ;
Cætera composito labuntur fixa recurso,
Dimensi inter se spatii servantia legem :
Ista sibi innatam radiis vibrantia vivis,
Illa repercussam lentè spargentia lucem :
Hinc cadit, aut similis procurrit stella cadenti,
Fulgureo longè proscindens æthera tractu ;
Illinc triste rubet, dirâque ærugine suryam
Protendit barbam minitans extrema Cometes.

Sed minùs ista moror pauca adventitia Cæli
Phænomena, ingenuis torus defixus in astris.
Illa corvæ suls fixa & constantia Cælis
Sidera demiror, certâ quæ lege pererrant
Orbes quæque suos ; cursúque imitante quietem,
Et placidè celeri se circumagentia gyro.
Nec levibus moles magna illa rotatibus obstat,
Cùm Cæli in spatio tot grandia corpora, nostræ
Immodicùm quantum globulum superantia Terræ,
Sint apices parvi. Proh vasti immanis Olympi
Ambitus, ingenio non mensurabilis ulli !
Limitibus tamen ille suis clausúsque locatúsque,
Authore immenso spatiis minor infinitis.

Infinite Author Cæli, Terræque, meique,
Cujus opus summum summâ virtute peractum

Quantum est quod nescimus. 91

Attonitis aspecto oculis, ignarus & hærens ;
Aut luce, aut veniâ, dubiæ succurrito menti.
Quos tua, quos oro Sapiëntia finxit in usus,
Fornicibûsque suis tot grandia corpora fixit ?

An tantum ut nobis (hui ! quantum immane remota)
Sint punctorum instar, quæ scintillantia longè
Sublustrés faciant tremulo fulgore tenebras ;
Aut mixtim albescant cano latitantia tractu ?
An totidem Mundos totidem dispertiit Astris ?
Anne iisdem, an variis diversos legibus Orbes
Communis rerum latè Natura gubernat ?
Quæ sacra discretos connectit copula Mundos ?
An veluti nostram Tellurem influxus Olympi
Afficit, influxum sentit Telluris Olympus ?

Quò te cæca rapis Ratio ? cur eminus audax,
Cominus imbellis Cœlos & sidera tentas,
Vinceris à Terrâ ? nam nec tibi brassica nota est,
Non ovum, non vermiculus, non graminis herba ;
Cum tibi nec causas liceat cognoscere rerum
Quas pedibus calcas, quid longè dissita quæris ?
Nil te scire scias hoc tandem discito, certo
Certiùs ; & dum te nôsse & demittere discis,
Tu sine consuetos stellas servare meatus,
Si vacat, & Cœlis per te licet esse quietis.

Summe sator Mundi, tu solus Maximus idem
Cognitor es rerum qui Conditor : extima vasis
Lambimus indocti doctique , sed intima soli
Sunt perspecta tibi : jus hoc tibi cedimus uni,
Omne sciens Author ; parvum est quod novimus omne.
Sed tua caligans ad grandia facta, veterni
Carnis, & heu ! mentis mihi conscius ignorantis,
Te Mundi atque Tui magnum celebrabo scientem,
Admiransque tibi dabit Ignorantia laudem.

Specta-



Spectacula Cæli.

Aulica nocturnæ properas miracula pompæ
 Visere, multifidis pendentia lumina lychnis,
 Unde reperiuntur regali in veste pyropi
 Purpuream ardentem lucem, viridémque smaragdi,
 Albam adamas, fulvúmque jubar vibratur ab auro :
 Illustres baccis Veneres, flammanis ocelli
 Artifices radiis ornantes vincere baccas;
 Utque leves celebrent choreas cum flore juventæ
 Patritiæ, pariter gemmis auróque micante.

His oculos, si sic tibi stat sententia, Marce,
 His oculos tu pascere tuos, quæ forsitan ægrum
 Te luxu faciant, victúmque cupidine cæcâ.
 Hic mecum, tu Crispe, vide meliora daturum
 Quæ nulli noceant festum spectamina Cælum.
 Hic mecum premito vivo sedilia musco
 Mollia, quæ prudens nobis natura paravit,
 Unde suas liceat spectare sedentibus altas,
 Ingenuas, nullis imitandas artibus artes.

Cernis ut extremo sudans in limite Titan,
 Gnaviter emenso spatio lætusque, triumphansque,
 Auricomâ sibimet fingit de nube coronam,
 Claram, mirificam, quæ puris vivida flammis
 Accendit varios Cælo ridente colores,
 Grande oris decus Occiduis, oculosque videntum
 Præstringens minùs atque minùs, dum fuscus Horizon
 Oscula Titanis rubicundo blanda pudore
 Excipit & reddit, circumfususque cubantem
 Hesperia sensim tegit & lodice focillat.

Ac velut Heroum post funus amabile nomen
 Latius ac melius modò quàm viventibus ipsis

Spargitur,

Spargitur, atque novos à funere ducit amores,
Merita recens madido lampas Phœbea cubili,
Indè sibi plures longè latèque propagat,
Quàm spectanda priùs, gaza cælestis honores.

Hui ! qualis subitò scutulati gloria Cœli !
Quæ sibi suspendit splendentia cænopa
Decumbens Titan ! queis hinc atque indè superbit
Cortinis, longo phrygiatis ordine ludens
Tesserulis ! ut dulce micant ostrum inter & aurum
Molliter ambigua ! sive ostrum fimbriat auro,
Sive has igniculis interpungentibus ostrum
Vermiculat ; dubio rubescunt murice flammæ.
Parte aliâ spiris lux versicoloribus ambit
Cæruleo prasinam superatam emblemate nubem.
Segniùs extremos tractus defessa colorat ;
Languidiùsque rubens hyacintho definit ostrum.

Rex Mundi croceos Orrus roseosque diei
Occasus hilarans, hilarant te facta verenda,
Artificem tibimet nunquam satis admirandum.
Delicias facis ipse tibi Deus, arte magistrâ
Illudens liquidis dirânsque coloribus æthram.
Nos fruimur læto tecum spectamine læti ;
Et tua iusta tui juber admiratio nostram.

Dædala dum stupeo picti discrimina Cœli,
Intextasque auro miror in axe rosas ;
His sensim inducit nigrum Nox invida velum,
Nec manet in pulchro qui fuit ore color.
Quando aliud Cœlum nullâ violabile nocte,
Quando alios oculos tu mihi Christe dabis,
Qui vegeti ciliis inconniventibus ausint
Cernere te æternum vivificumque jubar ?
His nec in Occasu nec Sol variabit in Ortus,
Ipse latens, dubio lilia mista croco.
Sed te uno æternum lætis, unoque beatis,
Unica ridebit lux color ipse Dei.

Q

Quis



Quis me liberabit ?

UT alligatos accipiter pedes
 Ligno tenaci compede loreâ
 Alternat, iratôque rostro
 Vincla petit, volucrêsque pandit
 Alas, acutis luminibus micans,
 Captivitatis non patiens suæ ;
 Sursumque nitens, spe videtur
 Jam vitreas Superare nubes ;
 Nisûsque tendens impete concito
 Lorum retentans, ter quater emicar,
 Et ter quater loro gravîque
 Pondere retrahitur deorsum ;
 Sic impediti compede carneâ,
 Terræque iniquis ponderibus graves,
 Sufflâmen injectum dolemus
 Ætheriæ Pietatis alis.
 Certè solutus mollibus imperIs,
 Mundique nexu & mancipio procul,
 Commertium vitâmque Cœli
 Et sitio & sapio perennem.
 At dum perennis proles homo Patris
 Terra inquilinus degit in hospita,
 Et mole carnis degradatur
 Pars superi pia mens Olympi,
 Sæpe evagamur vah ! nimis à Deo.
 Pars illa nostrî terrea non finit
 Se ferre sincero volatu
 Partem aliam melioris auræ
 Ad limen ingens & patrios lares,
 Sedem verendam lucis, & Oprimi

Lucis Parentis, se suosque
Luce sui jubaris beantis.

Quin ipsa lucis filia mens pia,
Mundi tenebris mersa nigrantibus,
Scotomate interdum laborat,
Aut gelido premitur sopore.

Mentisque fluxi corporis incolæ
Connata labes hæret originis,
Contage peccantium novata,
Ceus scabiem vitia affricantium.

Hinc intricatæ litis iniquitas,
Mendaciis illinc spes patrimonii,
Curæque mordaces revinctam
Multiplici quatiunt tumultu.

His præpeditæ retibus improbis,
Siticulosæ sanctæ animæ Dei,
Ad sacra vix, ac nè quidem vix,
Difficilem trepidante pennâ

Emoliuntur languidulæ viam,
Circumvolutæ nube caput cavâ ;
Tardèque surgentes, retrorsum
Mox celeres gravitate cedunt.

Tandem impeditas O Deus expedi ;
Abrumpe nodos, porrice pondera,
Exterge nubes, & soporis
Discute lethiferi veternum.

Hæc nostra divi murice sanguinis
Decora, carnis compede libera,
Nullóque Terræ devoluta
Pondere, vel maculata forde,

Trans astra pennâ se rapidâ ferat :
Tantóque sursum promptiùs evoler,
Quò longiùs desideravit
Vincta sacros Pietas volatus.



Xείρα.

Mundi Christe salus, & Regum Rege create
 Rex & Sacerdos permanens Ecclesiæ,
 Mirifico lætum divæ virtutis olivo
 Inuncte Princeps cœlitus sacrum caput :
 Non quodd inops olim fueris virtutis honoræ
 Es efficaci delibutus unguine,
 Nate Deo, Deus ipse, Patris solidissima Virtus,
 Nec inopiæ nec additamenti capax.
 At modò factus homo recipis quod didere possis,
 Totum supernæ Gratia myrothecium.
 Ista tuo, mi Rex, effusa in vertice, circum
 Fragrante latè membra rore proluit ;
 Ut vernus placidè demissus collibus imber
 Subjecta sicci rura lætificat soli.
 O semper tua membra , sacra quæ protegit umbra
 Infusus humeris crinis unguentis fluens,
 Exhilaret spirans olei cœlestis odorem
 A capite sancto depluens in nos Charis !
 Exhilaréntque caput laudisque & amoris odore,
 Tibi tuopte membra suavia balsamo !

Sacer



Sacer Anteros.

Huc specta Juvenis pie,
 In Mundi mediis casibus ambulans ;
 Si patrantis ocelluli
 Te flexu mala merx flexerit improbo ,
 Confestim tua primulo
 Vesanzæ Veneris vulnere faucia
 Mens, Christum objiciat suis
 Singultantem oculis in Cruce pendulum ;
 Harum scilicet anguium
 Præsens antidorum morsibus igneis.
 Cum flammæ rapiat tuum
 Arridens placitis pectus amoribus,
 Ut vivacia sulphura
 Vel tactu minimo percipiunt faces ;
 Huc obvertere te decet
 Affectûs aciem perpetuam tui,
 Unde ad te superans amor
 Tot noxas fluvio perpete defluit.
 Hic lethum superans amor
 Affixit placidum magnus amor tui
 Cœlorum Dominum Cruci,
 Et pro te immeritam dedit ad necem.
 Te fusus moveat cruor,
 Et contracta tua vulnera noxia ;
 Fletus sanguine decolor,
 Lictorum lacerum verberibus latus,
 Confixique natantia
 Divina in lachrymis lumina fervidis,
 Ut Sol nube sub uvida.
 At trans has lachrymas te bonus aspicit,
 Mittens languidulis tibi
 Hæc mandata oculis. Méne tot horrida

Cædis tormina perpeti,
 Hunc pro demeritis interitum tuis;
 Ut pœnæ vacuus metu
 Hoc purgatam animam sanguine polluas ?
 Hoc quisquam pretio meus
 In me turpe nefas cogitet aggredi ?
 Pro quo cæsus amo mori,
 Illine ullus amor sit potior meo ?

Sursum niti.

Quid me sæviter implicas
 Importune tuis Munde negotiis ?
 Quorum si quid amœnius
 Adblanditur, eò nequius heu ! mihi
 Memet surripit & Deo.
 Quare, O tota Patri debita mens Deo,
 Hoc te gnaviùs addecer
 Multâ vi tibimet sternere transitum,
 Trans conferta prementium
 Curarum cuneis agmina pervicis,
 Ad limen Superi Patris,
 Augustum generis principium tui.
 Hinc curæ, illecebræ, metus,
 Æstus, spes animi turbida penduli ;
 Hinc luctum generans amor :
 Omne hinc delictum tristitiæ ferax :
 Hinc interlita crimine
 Carnis molliculæ cedite gaudia.
 Omnes comprimat impetus
 Rex in mente sedens unus amor Dei.
 Solius metuens Dei
 Nullis sit metibus mens agitabilis.

Nullas

Nullas delicias perat
Cujus stat solidum delictum Deus.
Spes æterna fideliter
Uni fixa Deo, spes voret anxias,
Queis se fallere gestiunt
Quotquot pollicitis Mundus inebriat,
Nexu & mancipio suos.
At tu per scopulos, per vada lubrica,
Ad te, Christe, Salus mea,
Nitenti validam porrige dexteram.
Ad te currere inens avet ;
Curram si tua me magna trahit manus.
Virtus si tua defuat,
Quó tu, Sancte, præis non habilem sequi.
O cujus sine lumine
Torpet Tænariis in tenebris homo,
Fac te mens mea sentiat
Clarum vivificum Justitiæ jubar ;
CrySTALLIQUE vicem globi ,
Æterni radiis Solis inardeat.
Atque ut vespere primulo
Effulget variis læta coloribus
Nubes, foeta cadentibus
Titanis radiis ; hic animus brevis
Sub vitæ stadii exitum,
Affectans alio fulgere sub Polo,
Magnâ luce Dei micans,
Sese ostro Fidei purpuret & Spei ;
Divis totus amoribus
Implentis cupidum Numinis, aureus.



Spes humanae.

B A S S U S.

AN has remotas hortulanus quispiam
 Studuit cylindro æquare planitudines,
 Ut esset oculis mollior prolapsio,
 Prati in smaragdo lubrico ludentibus ?
 At quàm placenter, quàm decoris flexibus
 Sese virenti gemmeus prato latex
 Insinuat ! en ut insulas varias creat
 In se recurrens ; Utque stat blandissimo
 Pulchrè comatum limes aspectui nemus.
 O rigua prata ! O lymp̃ha Mæandri æmula !
 O nemus opacum ! Ruse quid moramur hîc ?
 Mens currere ardet conspicatum comminus
 Hæc grata Tempe. [R u f u s] Parce quæso cursui,
 Voraginoso crura nè solo induas,
 Priusquam apud te, B A S S E, perpuraveris
 Herbâsne possis terere suspensio pede
 Aquæ innatantes, quod solent motaculæ.
 Non ista prata quæ putas nec plana sunt ;
 Sed limus ulvis obsitus palustribus,
 Tumulis torosus, quos mali junci tenent.
 His unda stagnans hîc & hîc interjacet,
 Halans mephitim quàm nec anseres ferunt,
 Ultra paludem clivus erigitur brevis,
 Horrens rubetis triste, quæ nemus putas.
 Hæc, B A S S E, Tempe sic amœna sunt tibi.

B A S S U S.

Errantis errat sæpe mens oculi sequax.
 At me pigeret hujus erroris magis,

Nisi

Nisi nos doceret. R u f e imaginem vides
Spei dolosæ, res malas fucò boni
Sic obliuentis ut nocivæ maximè
Pellace vultu maximè renideant.
Quot spes inanes, R u f e, venati sumus,
Eminus amœnas, comminus spectantibus
Tristes futuras; mox ut exantlavimus
Cassum laborem, turpiter cœno hæsimus?

Permulta sæpe quò minùs sunt cognita
Magis expetuntur; & malo cupidine
Anteambulone pervicæ & cæcæ Spei,
Rebus remotis, quæque quid sint non liquet,
Imago lucri vel decoris affingitur.
Sic obvoluto capite, per fas & nefas,
Sudore multo, stulta gens mortalium
Ruit in malam rem, capta fallaci bono.

Nec Spes eodem semper est vultu nocens;
Quandoque falsis decipit coloribus,
Quandoque veris, quando sunt notæ satis
Res concupitæ, sed minùs noti sibi
Sunt ambientes, nec suas vires priùs
Novisse satagunt quàm capeffant, impares
Lævæque mentis, ardux stadium Spei.
Quæ turba amantum stantis in trocho Dæ,
Cupiundo fervens, judicando plumbea,
Adblandientis currit in stadio Spei!
En ut laborant, utque trudent mutuò,
In assequentes calce durâ sæviunt,
Cædunt prementes, æmulos prætervolant,
Agilésque cursu mox suâ fusi cadunt
Velocitate; calcat insequens cohors
Primos cadentes: sternitur latè solum
Cæsis, supinis, membra luxatis grayi
Lapsu, madente provolutis in luto.
Plures peremit quàm feri Martis furor
Falsum renidens dira Spes mortalibus;
Sed hos & ipsos quos ferus Mars perdidit
Spes interemit. O quot ærumnas, metus,

Pugnas,

Pugnas, repulsas sordidas vitabimus,
 Si spes nocivas, tot malorum femina,
 Adnixa ab imis vellimus radicibus !
 Nihil timebit, RUFUS, qui sperat nihil.

RUFUS.

Imò omnia timet, BASSUS, qui sperat nihil.
 Spe non rigata vita non vitalis est.
 Homo impetitus sortis aspræ fluctibus,
 Nisi spe levetur, pessum in infortunii
 Sidit barathro, velut adempto cortice
 Nandi imperitus ; frangit ærumnis gravi
 Vires animosque gelida Desperatio.

At fallit, inquis, vapida Spes hominum genus.
 Fallit, sed ipsa surrigit fallacia
 Animos jacentes, desefiscentes malis :
 Fallacibusque sæpe pollicitis Spei
 Miserrimorum læta debetur Salus.
 Sic dum perisse perspicax Republicam
 Cernens, sibimet attulit manus Cato,
 Multi irritâ spe partium victoriæ
 Vixere fortes, quàmque formidaverant
 Sunt sospitati Cæsaris victoriâ.

Sors ista vitæ sæpius scenam terit.
 Nec is tamen sum, BASSUS, adulanti Spei
 Qui contrâ aduler, quémque decipi juvet.
 Pendere qui vult pendeat laqueo Spei,
 Semétque dignum judicet suspendio.
 Meliora nobis fata condixit Deus.

At si magistræ credis experientiæ,
 Spes est in Orbe sortis adversæ bonum,
 Mælum fecundæ ; nam cadentes erigit,
 Stantésque frangit, dum facit præsentia
 Fastidientes, de futuris pendulos,
 Tumidos, inertes, delicatos, anxios,
 Fovétque morbum turbido cupidine
 Febricitantum. [BASSUS] RUFUS quod res est tenes.
 At sive tristis sive læta sors regit,

Spes nulla rebus in caducis anchoram
Figens, beatos aut honestos præstitit.
Utrumque præstat imminens perennibus
Spes orta Cælo, seque jam Cælo inferens.

Spes Cælestis.

SOrti sinistrae cur facis convitium,
Pusille Sergi ? dum laboras strenue
Tibimet tuopte ferre jumento malum.
Nam dic (per istam te rogo indulgentiam
Quâ te impotenti mancipas philautiæ)
An spe renaci sors fefellit te mala,
An ipse temet ; qui quod humanis Deus
Rebus negavit stultè ab ipsis exigis ?
Nè magna opum vis fidat ipso pondere,
Nè livor umbra prodeat honori comes,
Ærumna noxæ, dedecus turpi lucro ;
Ut semper agri certa sit fides tui,
Tuæque lætum quicquid arridet Spei
Pollicita præstet, nulla corrugetur tui
Faciem sereni scæta nubes grandine :
Et tale si quid gestiens cupidinis
Sibimet titillus pollicetur improbe.

Non est (tuæ si credis experientiæ)
Non est quietis statio, nec constantiæ,
Quod incolendum contigit homini solum :
Ubi si laborem mulcet ulla interquies,
Mediam duarum se procellarum facit ;
Nec quidquam eorum queis anhelus imminet
Morsum fidelem præbet anchoræ Spei :
Non celsi honores, non amici, non opes,
Non ipsa Virtus ; cum nec hincadolescere

In absolutum robur & firmum queat,
 Nec solida fragilis indipisci præmia.
 Sic ille voluit Arbiter rerum Deus,
 Ut nostra Cœli mens genus, memor sui,
 Cœlum sitiret, Cœlum, & udæ sperneret
 Telluris Orbem nobili fastidio.

Equidem vocantem, quâ præit, sequor impiger
 Super astra Christum ; celsus effœtum diem
 Post terga linquo, Solis emensus vices,
 Mihi candidato cœlitis Politæ,
 Quamquam gravato carnis immundæ jugo,
 Cupido Cœli pura, sancte pervica,
 Adolevit in Spem ; Spes reclusit in Deo
 Opes repôstas, quas nec auris audiit
 Nec vidit oculus, proprias fidelibus
 Carcere solutis, spèque libandas priûs
 In antecessum : fundus hic firmus, Spei
 Mordendus acri dente substat anchoræ.
 Portum salutis nactus, anchoram sacram
 Hic jacio fidens, nec Deo quidquam minûs
 Amplector hærens ; non movendus perperam
 Minûsve Boreæ turbulentis aut Noti.
 Zephyrîve blandi subdolâ pellaciâ,
 Quæ mox procellis asperetur Africi.
 Licetque jacter fictili vectus scaphâ,
 Mundique ventis debeam ludibrium,
 Immota perstat fixa cœlis anchora ;
 Et quando sævis pulsa longum fluctibus,
 Senioque tandem quassa dissiliet celox,
 Se vector animus naufragæ damno ratis
 Laribus paternis redditum mirabitur.

Fiat



Fiat voluntas tua.

PErenne vobis impero silentium,
Spei dolosæ pendulæ cupidines,
Dubixque sortis anxix formidines.

Quietis hostes turbulentæ quid , (malum !)
Obmurmuratis, deque rebus perperam
Tumultuatis quæ Dei in genibus jacent ?
In te recumbam totus, Optime Maxime,
Lætusque, gnarâ mente cui confiderim :
Cui quàm mihimet charior semper siem,
Qui filiorum perpes invigiles bono,
Potiusque des quod expedit quàm quod placet.

Una ergo cura, Genitor, incumbat mihi,
Ut recta, firma, juncta constanter tuæ
Mea stet Voluntas, quicquid aut agere aut pati
Sapiens Bonusque me Gubernator velis.
Tûque ut libebit, ceu lutum figulus solet,
Hoc finge pectus atque fortunas meas,
O qui nihil quod non sit optimum facis.
Sim, summe Rector, in tua quidvis manu,
Modò vas honori serviam proprium tuo.

Seu me decorum luce vestis aureâ,
Pro luce meritas lucidus grates agam.
Seu me tenebris condis obscurum caput,
Tibi pro tenebris gratias latens agam.
Seu me deorsum trudas, aut sursum levas ;
Seu fruge largâ, sive demenso instruis
Breviore mensam ; sive das vitam aut necem,
Non esse felix non queo, dum sum tuus.



EPIGRAMMATA.

I.

Siccine, Sancte, meo vestitus crimine pœnam
 Quam merui proprio corpore, Christe, luis ?
 Aut indutus ego meritum veste tuorum,
 Accipio tantæ præmia justitiæ.
 Desine conscia mens peccati horrere tribunal
 Æternum, & iusti Judicis ora Dei.
 Spiritus hic mutans Christo cum vindice vestem,
 Personam Christi sustinet, ille meam.

II.

Scilicet à sæva datur ista tyrannide nobis
 Optio, non ullis effugienda modis ;
 Aut pravè violanda fides Regique Deoque,
 Aut inopes fundo pellimur atque domo.
 Nec Mundum atque Deum simul est retinere potestas,
 Perdere continuò cogimur alterutrum.
 Quid dixi alterutrum, cum sit perdendus uterque,
 Si Mundi Dominum sperno tenere Deum ?
 Quid dubitem Mundum Mundi postponere Regi,
 Vel solâ officium commoditate probans ?
 Nam neque te, Deus alme, fruens te Munde carebo :
 An Domini rerum compos egere potest ?
 Munde vale : sed non procul hinc dimissus abibis,
 Dum mihi servo Deum, te quoque servo mihi.

III. Quum

III.

Quum precor ut liber vivam curisque solutus,
Non ego divitias te, Pater alme, rogo.
An se posse putet, cui mens sit sana, levare,
Adjiciens oneri pondera plura suo ?
Gratia multa mihi, non multa pecunia crescat ;
Hæc hominum mentes degravat, illa levat.

IV.

Stent alii illustres, & honoris torque decori,
Non mihi surgat honos, ne mihi crescat onus.

V.

Das mihi quod satis est largâ, Pater Optime, dextrâ ;
Quodque nihil merito plus satis esse rear.
At per te locuples, nisi te sentitque sapitque,
Nescio quid curæ sentit abesse rei.
Seu res arcta mihi seu fors obtingit opima,
Tecum dulcia sunt omnia, nil sine te.
Nil sine te Pater alme dato ; secus omnia tolle :
At mihi tu solum te dato, dives ero.

VI.

Mercēs ære gravi leves parâsti,
Emptor Tite sagax minutiarum ;
Vulsas Occiduo sub axe plumas,
Quassas exuvias Libys colubrarum,
Lectas littore cochleas in Indo,
Arentem crocodilum hiantē rictu,
Fartos stramine Sumatræ lacertos,
Falcataque Chamæleonta caudâ,
Mentiti articulum pedis Gigantis,
Tritonum vario colore squamas,
Et lectum filicis malâ arte semen,

Gryphis

Gryphis cornua, simiæque caudam.

Hoc natis patrimonium reponis.

Hinc natæ numerabitur tuæ dos :

Pro nummis gener auferet trecentas

Conchas littoris Indici striatas ;

Addetûrque virum unde nupta pascat

Mulgeris crocodilus, atque crudum

Quæ nunquam stomachum gravent, modò illas

Intractas jubeat jacere, gerræ,

Tricæ, quisquiliæque, quas nec assis

Contra ærugine pignerare curri

In summa queat eluritione.

Hoc te, Tite, velim semel rogatum,

Ut rerum pretium æstimes ab usu ;

Utque urigine pruriens emendi,

Hoc arctè teneas Catonianum,

Quicquid non opus est & asse carum est.

VII.

Viro Clarissimo Collegæ meo suavissimo

D^r PETRO GUNNINGO,

Professori Regio, & Collegii D. Jo-

annis Cantab. Magistro.

Quòd clarum horrificis micuisti lumen in umbris,
Inque procellosis fluctibus alta Pharos :

Quòd tuus armatas acies vultumque Tyranni

Contempnit sanctæ Relligionis amor ;

Monstra quòd hæreseon, capitumque frementia centum

Schismata, devictas dant tibi Petre manus :

Quòd studia & mores, prudens, mitis, severusque

Arbiter, ingenuâ cum gravitate regis ;

Hæc

Hæc laudent alii : tuæ te bene gesta celebrent,
 Virtutisque tuæ laus sit ubique comes ;
 At mihi, qui nobis quod dulce, quod utile quærens,
 Antefero laudi commoda nostra tuæ,
 Hoc unum laudare libet, quod habesque colisque
 Sinceræ mecum fœdus amicitia.
 Nempe tibi tali quod nos & nostra probantur,
 Petre, tuo nostrum surgit honore decus :
 Dùmque decus tantum notum omnibus esse laboro,
 Non tibi sed famæ consulo, Petre, meæ.

VIII.

GULIELMO BARKERIO *meo.*

O Salve mihi facite Vir ad unguem ;
 Quem miror modò publicè disertum,
 Privatim modò candidè facetum.

Cui fons ingenii politioris
 Puro luxuriat perennis amne ;
 Fundens ingenuas, domique natas,
 Non extra genitas amœnitates :
 Illis dissimilis quibus repòstus
 Est constans numerus domi jòcorum,
 Scurrilis soboles olens popinæ,
 Quos ultra subito aridi fatiscunt ;
 Ut vilis solet absque fonte rivus,
 Sordens colluvies nivis solutæ.

BARKERI pater elegantiarum,
 Vivo fonte tibi scaturientum ;
 Has quæ sponte tibi excidère gemmas
 Circumquaque legi & geri videbis,
 Cornicèsq; tuis nitere plumis.
 Surrepti salis est ubique multum,
 Perpauci proprias habent salinas.
 Et dum mellificant apes Hymetti,

R

Fuci

Fuci rapta ferunt in ore mella,
 Sic nunc vivitur, arte se tueatur
 Ordo quisque suâ; suâ quoque arte
 Cur non se tueatur ordo furum?

THOMÆ FOTHERBIO *meo.*

IX.

Hui! quæ, FOTHERBI chare, nobis obtigit
 Inanitatis scena, quam vitam vocant!
 In quâ inquietus vanitatis improbæ
 Trochus rotatur, quàmque rebus feriis
 Nemo æstimator æquus annumeraverit,
 Qui nil in ipsa præter ipsam quæritat.
 Est nempe vita perforatis utribus
 Dapem ingerendi & egerendi circulus;
 Carena rerum dissidentium sibi,
 Amor, odium, peccata, poenitentia,
 Peccata rursus, gaudio intextus dolor;
 Invidia ditem, pauperem Fastus premit:
 Hinc Spes renidet, indè Spein necat Metus.
 Ærumna mentem, conficit corpus Labos.
 Veniuntque flendi & efferendi liberi,
 Flendi & ferendi liberi superstites.
 Mendax agellus, furta, turbo publicus,
 Et iniqua lis res atterunt domesticas.
 At si viget res maximè & floret decus,
 Utrumque venis ingruens febricula
 Vitæque munus ilicet raptum venir.
 Tanti, FOTHERBI, non erat nos vivere.

X. *Eidem.*

X. Eidem.

VITÆ, FORTHERBÆ, candidate cœlitis,
 Tunc vita vitæ est digna demum nomine,
 Huic quando vitæ vita nobilior præest,
 Mentique mentem Christus ingenerat suam.
 Tunc turbulentâ sorte quæ volvi putes,
 Et ruere fraudis improbæ ludibria,
 Videas latente providentiâ regi,
 Bonis creante rebus ex malis bonas,
 Lucem in tenebris, tûram in inviis viam;
 Vertiginosis dum parat turbonibus
 Crucem malignæ præmium vertiginis.
 At sospitante fortis est iustus Deo,
 Annique Consul est sibi non unius.
 Infractus animus asperis & mollibus,
 Inter salebras, & dolosæ lubricas
 Noxæ illecebras ambulans cauto pede,
 Utriusque fortis effugit pericula.
 Cœli creatus civis, & Cœlo imminens,
 Nihil moratur macriusne an unctius
 Obsonet isto carnis in gurgustio.
 Non quid, sed à quo sit datum spectans, Dei
 Quod dextra porgit corde læto vescitur.
 Dei in secundis, faustam in adversis Dei
 Dextram Parentis mente gratâ suspicit.
 Suis utrinque qui salutem conficit.
 Quid plura? cum nos educet sibi Deus
 Per varia vitæ providus discrimina,
 Cœlisque cum sit Terra vestibulum pio,
 Est hæc, FORTHERBÆ, vita vitalis bonis.

XI.

Vivere si lætam cupis & sine crimine vitam,
 Bonæque morti præviā ;
 Nil quidquam facias dum spiritus hos reget artus,
 Moriens quod infectum velis.

XII.

Pio & erudito NICOLAO BRETTO.

Brette mihi quam das ad te laus sponte recurris,
 Et dum me celebras in celebrante manet.
 Grata tamen laus est à digno laude profecta :
 Gratum est cordatis me placuisse viris.
 Gratum etiam quòd nostra tibi quæ scripta probantur
 Lecta malè edoctis displicuere viris.
 Nec mihi met sciperem sciperent si nostra palatis
 Queis sapiunt Stygii sola venena lacus.
 At cum vera tuens falsis petar undique telis,
 Et lacerer nigræ dentibus Invidiæ ;
 Quòd certanti animos addis clamore secundo,
 Id quod te dignum est , candide BRETTE facis.
 Parce tamen laudi ; quam nec nos BRETTE meremur,
 Nec cupimus. Soli est debita tora Deo.
 Quòd magis ex hominum captantur præmia laude,
 Hoc minùs à Domino præmia vera fluunt.

Doctissimo

XIII.

*Doctissimo THOMÆ WATSONO,
S. Th. Bacc. Coll. D. Johan. Socio.*

Quod me nomine vix tibi
Notum resque meas propitius foves,
Ingentes habeo tibi
Quas impar nequeo reddere grarias.
At te quod bene ceperis
Id præstare tuus nunc amor obligat :
Et quod tu mihi non potes ,
Id debere tamen te tibi sis memor.

XIV.

Multum pollicitus, nihilque præstans
Spem nostram Linus haud fecellit unquam ;
Nec faller, nisi quando mente lævâ
Ipsius Fidei meam alligâro ;
Aut quum fallere Spes amans, docebit
Desperantem etiam potesse falli.

XV.

Non facis esto tibi quod nullo criminæ vitam
Volens sciensque polluis ;
Non fecisse bonum , neque justa ad facta volentem
Mentem appulisse, crimen est.
Nam quando ad lævam magnus Quæsitior iniquos
Seponet, ad dextram bonos,
Non mala disquiret quæ tu non feceris unquam,
Sed quod bonum non feceris.

R 3

XVI. Soni-

XVI.

Sortitus agri glebulam nec ingrati
 Nec invidendi, suavitate amicorum
 Famam secundam, simplicemque convictum ;
 In his beatam non ab his ago vitam.
 Nil quod foris stat intus hoc beat pectus :
 Humilem sed ingens hospes incolens mentem,
 In quo quiesco, quo calefco nonnunquam,
 Deus nihil non efficit mihi gratum,
 Amore dantis influente conditum.
 Intusque ridet gratiæ salutaris
 Radius benignus, gloriæque strictura ;
 Hæc intus orta gaudia intus hærebunt :
 Exhibit omne gaudium quod intravit.

XVII.

Regis in exilio, Regi Regemque secutis
 Nævole te nullus sævior hostis erat.
 Nunc solium implentis Philanax æcerrimus, hostes
 Principis ad Stygios deprimis usque lacus.
 Papæ ! quæ rediens edidit miracula Princeps !
 Nunc prodis Paulus qui modò Saulus eras.

XVIII.

Opes, honores, servitutes splendida ;
 Cupiditatis jam diu stomachum tuæ
 Gravant nec implent Quinte ; nos id quod levar
 Implereque mentes unice quæsitivimus
 Invenimusque, perpetem pacem Dei,
 Deumque pacis : pectus hoc substantiam
 Felicitatis esurit, non bractæas.

XIX. Ergo

XIX.

ERgò amitam tandem lachrymoso funere condis,
 Quò tibi larga Teges, Quinre, metenda venit.
 At quibus incuses infidum questibus Orcum,
 Sarcophagus vivam si tibi reddat anum?
 Macte animo, fera & tibi non nocitura redibit.
 Securus tabulis quæ tibi liquit habe.
 Sed quia funus amat lachrymas, age! pingitor idem
 Luctus in hoc abitu qui foret in reditu.

XX.

TOrus Alexandri voto non sufficit Orbis,
 Nec magis opratis sufficit ille meis:
 Et voti immensi veneror genus infinitum,
 Agnoscoque notas effigiémque Dei.
 Infinite Pater, solum te nostra cupido
 Infinita sibi comperit esse satis.

XXI.

Qui modò fideream miranti lampada Mundo
 Præbuit, incertum doctior an melior,
 Occidit heu! nostri Sol aureus occidit ævi,
 Jámque latens metam purpurat Occiduam.
 Cernis ut illustrem texant sibi posthuma limbum
 Lumina, & elapsi splendeat ignis honos,
 Ceu rutilis Titan sua tecta coloribus ornat,
 Hesperio faciem conditus Oceano.
 Sed modo digresso vanescunt Sole colores;
 Perperuum nostrî fulget in Orbe decus.

XXII.

*Qui sub isto Marmore quiescis
olim fuit*

PETRUS MOLINÆUS.

*Hoc sat viator ; reliqua nôsti, quisquis es
Qui nomen inclytum legis.
Laudes, Beati gloria haud desiderat,
Aut sustinet modestia.*

Obiit Sedani AD VI. NON. MART.
MDCLVIII.
ÆTAT. ANNO XC.

Clifforda



Clifforda Nobilitas.

Qualis cacumen nubibus abdita,
Nullisque ramos cæsa bipennibus,
Sacrum decus servat comarum,
Et solidum inviolata robur

Ilex, verusti diluvii memior,
Sub qua parentes compositi luto
Fregere glandem, quando frugum
Aurea gens inetuebat usum.

Hic immolârunt fraga Patri Deo,
Templis carentes innocuum genus
Majorum, & augustam nepotes
Indigenæ venerantur umbram.

Illam verentur tangere fulmina,
Truncisque nulli mobilis Africæ
Radicibus Terræ coævis
Jugera tota profundus urget.

Talis per annos innumeros domus
Latè decorus fulget apex tuæ
HENRICE, fortunâ tenaci,
Et memores superante Fastos.

Quam non tumultus contudit impotens,
Non celsa Regum dextra minantium,
Ipsûmque sub limen cruento
Tota cohors Procerum duello.

Quippe hanc benigni fausta Dei manus,
Virtusque fato cedere nescia,
Contra recurrentes ruinas
Asserit, & Pietatis ægis.

Injuriosi Temporis aleam,
Iras Tyrannorum exitiabiles,

Stragisque,

Stragésque, & armatas Brinnes
Numinis auspiciis retundens.

Pulchrè cadentes quid memorem Duces,
Invicta Morti pectora, queis domus
Clifforda, ceu vitis, per ipsum
Duxit opes animúmque vulnus?

Æterna viver secla *GEORGII*,
Torvè minacis terror Iberix;
Præclarus occupâsse *Ditem*
Hesperia lachrymante *Portum*.

Nunc magna magni sanguinis indoles,
Quovísque fundo fandus opimior
Virtus, in *HENRICUM* merentem
Cum patriis titulis recumbit.

Hâc quàm paterno stemmate notior,
Félixque lætis umbra clientibus,
Latè potestatem benignam
Per populos agitat volentes.

Robusta morum simplicitas viro;
Frons alma, celsi conscia spiritûs:
Mens docta reginas per artes,
Pace magis dubiúmne bello.

Te sera Olympi regia flagitet,
Quum duplicatis functus honoribus
Latè propagatos probaris
Nominis & Genii nepotes.

Hono-



*Honoratissimo Domino CAROLO
Baroni CLIFFORDO, Discipulo
quondam meo dilectissimo.*

S Alve progenies boni
Et magni, Superum cœtibus additi
HENRICI; veteri novum,
Virtute ingenuâ, magnanimâ, piâ,
Addentis generi decus.

O qui lætus avi fulgis honoribus,
Virtutis radiis quoque
Effulgere voles, justus, amabilis:
Solisque impiger æmulus;
Dum fulges, etiam vivificus, fovens,
Multis utilis, omnium

Dirabis placitis temet amoribus.
Et cum per medias tibi
Sit seeli scorias cursus; & horridum
Blasphemantibus Atheis,
Et tentaminibus flagitii, tuæ

Aures undique personent;
Incedes vitii per laqueos pius,
Castus, sobrius, integer:
Culro suppliciter Numine viribus
Adjutante suis tuas.

Sic Allobrogici trans latice lacus
Purus stantis aquæ fugit,
Immixtumque celer se Rhodanus rapit.
Atque ut clarius emicat
Nigris & gelidis flammâ prementibus
Circumfessa vaporibus,
Vivo discutens nubila fulgure;

Vires

120 *Honoratissimo Cliffordo.*

Vires acta retro novas
Ex ipsis vitiorum obsidionibus
Virtus vivida duplicet :
Et flammam opposito frigore contrahat
Ille in mente pius calor,
Quem charum ab teneris unguiculis foves.
Sic felicibus auspiciis,
Fortunate bonis orbe parentibus,
Sis longum soboli bonæ
Exemplo præiens, ipse parens bonus.
Sic semper bona Faustitas,
Et longis Pietas aurea sæculis,
Certo fœdere se sacras
Custodes generi constituent tuo.

M. S.

Nobilissimus RICARDUS BOYLE,
Honoratissimi RICARDI Burlingtoniæ &
Corcagiæ Comitû filius; Honoratissimi HENRI-
CI Cumbriæ Comitû, ex Honoratissima ELIZA-
BETHA unica filia & hæredis nepos.

Bonus bonis prognatus,

Excelsæ indolis juvenis,

Ingenio, industriâ, morûmque candore & suavitate
commendatissimus,

Pacis & belli artium feliciter studiosus,

Virtutem & honorem totus spirans,

Ad difficillimum bellum, Regis sui fratrem, Heroi-
cum Principem, sequutus; in acerrimo navali prælio
proximus ejus lateri dimicans, heu! fatali machina
globo interemptus, sanguine suo Principem, ejus a-
mantissimum, cadens consperxit; quasi suum pro spe &
columnine Angliæ caput iraderes, quod ante (ut Re-
gi patriæque debitum) promptus alacérque devo-
verat.

Ille sanè eâ virtute mactus, diutissimè & vivere
& florere meruit, mori gloriosius non posuit, nec pa-
triæ utiliùs, quàm vibratum in sacrum Principem
funestum telum corpore suo excipere.

Cum vero corpore per prælii tumultum in mare de-
voluto, mæstis parentibus defuerit lachrymosum funeris
solatium: Cumque liquidò marmori quo contegitur
suprema maledicentium amicorum alloquutiones, insculpi
nequeant: Hic ejus virtutis & nostri amoris.

Illustri Discipulo,

Charissimo capiti,

Monimentum statò:

Et quandiu post obitum vivam, huic operi coævum
permaneto.

Patris & suis ereptus fuit Jun. 3. 1666.

Annos natus xxiv.

Marris

Eidem.

M Atris amor, pia cura Patris, mea magna voluptas,
 Heu letho ante diem tradite ! rapte tuis !
 En ad quam trepidi te spem eduxere Parentes !
 Cede dolor ; Donat spe meliora Deus.
 Dona dat in Cœlis animæ condigna fideli.
 Dat vitam hoc letho perpetuare suam,

*Annæ Bariae Encomium*

Quod te, bellula, pectus eruditum
 Laudo lacteolo sinu regentem,
 Ah nè virgineus pudor tuarum
 Inspergat violâ nivem genarum.
 Hos canos vide : mitte suspicari
 Cui jam lustra decem peregit ætas,
 Qui nomen Sophiæ dedit severæ.
 Istos fideribus pares gemellis
 Germanorum Helenæ tuos ocellos,
 Ardore ingenuo colat Juventus,
 Si quæ digna regi igne tam sereno.
 Nos formæ roseum tux decorem,
 Quo non verna magis, tepente Maio,
 Aurora in croceis micat quadrigis,
 Quo puros oculo decet, videmus ;
 Jam dudum emeriti, diuque docti

Annæ Bariae Encomium. 123

Istos frigiduli gradi per ignes :
Qui nempe ex mediis solemus hortis,
Visis floribus aut odore solo
Lati simpliciter, redire inanes ;
Et nacti similem rosam tuimet,
Enatam modò, primulúmque hiulcam,
Quam ros ambrosio colit monili,
Inactâ fruimur, satís beati
Servâsse ingenuum rosis honorem.

Ast à flore tuæ, puella, mentis,
Non sic abstineo manum modestam,
Divinæ proci eruditionis.
Nempe hic virgineo magis tuus flos,
Ipsi dissimilis, perit relictus,
Decerptus manet, & novos ab ipsa
Ducit messe animos novúmque honorem.

Jámque edico, tibi caveto porro,
Nam si quid levius tibi timendum
A me, diripiam malus, ruámque
Velum virginei pudoris istud,
Quo tantas animi, modesta, dotes
Perstas omnibus invidere doctis.

Hui ! tène ut patiar tibi & Camœnis
Occultam canere, & tibi sepulchrum
Vivæ condere ? tén' avara, solam
Defossis opibus sinam incubare ?

Huc quotquot superestis eruditi
Huic cladi exitiôque litterarum,
Huc conferte manum, & simul puellæ
Eluctate superfluum pudorem.

Velum detrahite. En pudente pugnâ
Contra nititur, & regi laborat :
Vos vi rem gerite ; ocyùs puellam
Expugnate viri. Hem, sat est, reductum
Velum est. Nunc oculos beate vestros.

Papæ, quot Charites ! quid hîc repôsti
Theauri patet ! En chorus leporum,
Gallique ingenii eloquentiæque,

124 *Anne Bariae Encomium.*

En puræ Geniûs Latin itatis
 Graiarum penus elegantiarum,
 En quæ carmina multulenta fundit
 Quovis nectare dulciùs Camœna.
 Accedit pietate mens subacta,
 Incoctûmque animo tenax honestum;
 Prudens simplicitas, pudôrque lætus,
 Recti conscia mens quieta, fronsque
 Index candidulæ serena mentis.
 Nec constat bene virginisne mores
 Sancti sint magis an magis venusti.
 Mitto cætera quæis beata pollet
 Hæc docti patris erudita proles,
 Et virtutibus instituta matris.
 Quondam *Anna* æmula *thē pavu Maria*,
 Quum per consimiles licebit annos,
 Si non ista procis petita forma
 Doctrinæ officit, & Venus Minervæ;
 Immittens rapidos Amoris æstus,
 Quæis totum ingenii asperetur æquor,
 Planum nunc placidûmque mentis æquor,
 Ceu quondam Alcyoni favente Ponto
 Cœli se speculo vident in udo.
 At tu firma tuis amica Musis,
 Hanc, *ANNA*, ingenii tuere spartam,
 Claram (proh Deus!) atque fructuosam.
 Ast hîc fortè aliquis procus reclamet,
 Ergône ut Veneres Cupidinésque
 A tam bellâ animâ exules facessant?
 Ah! saltem Venerum Cupidinûmque
 Quædam flamina molliter susurrent,
 Ut quando Zephyri aura ludibundi
 Rugosam levis osculatur undam.
 Nam lux puriùs ingeni micabit
 Trans fluctus trepidos Amoris, ut Sol
 In mota varius refulget unda.
 His certè, tibi si magis probantur,
 Viſtas ecce manus damus libenter:

Certè

Doctissimo Fani Flitio. 125

Certè nè quis amor tibi A N N A amorem
Sacre detrahat eruditionis,
Sed rectricem animæ serenæ habenam
Doctrina & Pietas perenne tractent,
Hoc verò magis ac magis rogamus.

Doctissimo Fano Flitio.

FLiti noster amor, politioris
Doctrinæ penus elegantiaque;
Nam morosa tua & severa jura
Haud pili facio, & negotiosam
Rerum congeriem politicarum,
Quæ te surripiunt tibi tuisque.
Hæc ingrata tuæ involucra mentis
Tantisper removeto; Flitiūque
Da purum mihi da videre putum,
Totum delictum & meros lepores.

Te si diva Themis suum fatetur,
Quæ debes, age, redde jura, redde
Promissos mihi debitōsque versus:
Quos debes, age, redde Jane versus.
Sic sanè valeas, ut hocce nomen
Si non expedias sinam te inultum
Decoxisse mihi; Eia redde versus.
Queis si materiem requiris æquam,
Annam concelebra mihi *Bariam*.
Ipsam scilicet *Ep. Læon. Camœnam*;
Fac hic flosculus eruditionis,
Ad famæ decus efficace pennâ
Pennâ, Jane, tuâ cluat per Orbem.
Sic qui creditor imminet tibi nunc
Præstabis tibi, Jane, debitorem.



JOHANNI CASTILIONI

meo. Regis Sacellano.

Castilio amari dignior quàm diligi,
 Quòd tecum eidem Regio famulatui
 Adscriptus, aulæ limine abstineo volens,
 Domique privam rusticus vitam colo,
 In Principum aulis non merus prorsus tyro,
 Causam rogatus instituti edam mei.

Ea est quod aulam utcunque jam novi diu,
 Magisque memet, nunc minùs firmum senem,
 Cui sit theatro digredi consultius
 Tumultuosam quàm semel scenam ingredi,
 Ex qua pedem referre non sit integrum.
 Qui colla, victor hactenus, spernit dare
 Emerita luctæ tristis Invidentiæ.
 Satisque gnarus quàm sit exilis sibi
 Intus supellex, quam sit aliis auctior,
 Semet tueri cogitat, non tollere.

Non tollere istum satago, non egeo gradum :
 Doctus talentis, si mihi ad manum forent,
 Unam quietis unciam præponere.
 Modus iste nobis perplacet, paulùm ab luto
 Submotus, infra celsa subsidens juga
 Quæ nunc ab Euro nunc ab Austro vapulant.

Nec video quàm se plurimùm beaverint
 Me digniores, qui ferente Favonio
 Ad sacrum honoris subvolaverunt decus,
 Cui nempe debet nemo non assurgere,
 Nemo invidere ; stat viris multo id decus,
 Qui sorte primæ magnitudinis solent

Æquare

Æquare stellas, possidentes fulgidum
In Orbe celfo gemmeæ lucis jubar,
Nullam quietem. Perge Vir quo dignus es;
Tuæque certet doribus mentis favor,
Virtuti adæquans præmia meritis gradus;
Brevique dubitem melior an major fies.

Ego in reducta valle lætus hæc fruar
Auditione, dum senex inglorius
Memet quiete non inerte mulceo.
Et post solutum quem meæ provinciæ
Debeo laborem, sub rubentem vesperam
Purum meorum collium spiro ærem;
Nemoris ad oram sæpe suspensio gradu
Silénsque, vincto consimilis, ædonis
Flexus canoros aure capto pendulâ;
Aut in tapete quem tetendit Hesperus
Phœbo occubanti fixus oculis hæreo,
Qui discolorem fecit auro purpuram,
Aurum smaragdo, quique tessellis sinus
Variat striatos fulgidarum nubium.

Hinc Conditoris laude divâ me beans,
Lætus revertor ad lares pares mihi;
Rigórque lenis rore Somni, quod fat est
Lucis sequentis sustinendo munia.
Hunc si tenorem proprium facit mihi
Summi Parentis mitis indulgentia,
Non ampliori sorte permutem meam,
Proceribus, ipsisque invidendus Regibus.



E P I C E D I U M

Reverendissimi

GULIELMI JUXONI

*Archiepiscopi Cantuariensis,**Totius Angliæ Primatis &**Metropolitani.*

M Agne Heros, Musâ dudum mihi dicte pedestri,
 Heroâ dicende mihi mœstâque Camœnâ;
 Accipe iusta tuo quæ felix munere solvo,
 Infelix obitu, per opacas saltibus umbras,
 Seu Vesper pepulit, seu Solem Aurora reduxit
 Quæ per te teneo latè loca questibus urgens,
 Adstringens numeris gemitus, meritique Patroni
 Alternis laudes singultibus intertexens.

Occidis heu! patriæ lumen columénque gementis,
 Jamdudum ambigæ quis plùs tibi debeat uni,
 CAROLUS an populus, regimen civile sacrûmne,
 Celsîne an tenues, an oves oviûmne magistri,
 Scilicet his humeris geminata Ecclesia cura
 Cum fisco incubuit, nec mole & pondere magnum
 Fregit onus vires nervosâ mente ferentis.

Talis Atlas nifu curvæ cervicis Olympum
 Bajulat, intendens artus, fursûmque læcertis
 Hinc arque hinc vastum circumplectentibus Orbem.

O quàm te memorem magni commilito Regis
 Martyris, infandæ præbentis colla securi!
 Commissurus enim cum diro prælia letho,

Rapturûsque

Epicedium Archiep. Cant. 129

Rapturúsque ipsum sancte violentus Olympum,
Te sibi supremi socium certaminis unum
Armigerúmque vocat, fidúmque adjungit Achatem.

Túque laboranti comes indivulsus adhærens,
Fulmineum Verbi gladium, galeámque Salutaris
Poscenti tradis; tu fortia pectora circum
Justitiæ loricam aptas, clypeíque ministras
Magnum orbem Fidei rigidum septemplíce ferro,
Quo tela igniferi mala Vejovis extinguantur.
Ille ergò heroâ fortis pietate, tuísque
Audens consiliis, Christi vestigia servat
In Cruce calcantis Satanam, moriénsque reportat
Vitai æternum vícta de morte triumphum.

At simul excídit divum turba impia Regem,
Te comitem violenta rapit; qui nempe fidelis
(Hoc crimen fuit) angusto delectus amico
Conscius, & jussus morituri arcana tenebas;
Tentatura minis & cæco carcere, si qua
Erueret tibi quæ excedens mandata dedisset,
Sed Solem rutilo citiùs divellere curru
Quàm reticenda queat fido de pectore iussa.
Ergò ubi te partes frustra versavit in omnes,
Nec quicquam invenit robusta in mente dehíscens,
Vítta manum abstinuit, libertatíque remisit
Virtutem incolumem: fueras in carcere liber.

Hos eluctatus scopulos, Vir Magne, reductam
Producti, tacitus meliora in tempora vitam;
Ultima laturus divi mandata Parentis
Regnanti Nato; & coram est data copia fandi.

Hunc patrio celsum solio, vegetúmque tuísque
Donatum precibus, emergentémque ruinarum
Ex cumulo charam Christi cum videris ædem,
Te juvit vixisse diu, licet æger, anhelò
Cœlestem ad patriam conamine suspirares.

Attamen attitæ confecto in corpore vires
Te primum meritis non subduxêre verendo
Detrectantem oneri quod primo appendet honori.
Quin piudens pietas, & mens cultíssima summis

130 *Epiced. Archiep. Cant.*

Artibus, & nullâ Virtus effœta senectâ,
Pontificem sacris te præfecere supremum.

Heu quòd tam seril, quòd tam propè distat honoris
Ortus ab Occasu ! quòd amico Sole foveri
Post longas hyemes Ecclesia nostra renascens
Vix tandem potuit, paucisque, obitèrque, diebus !

O mentem retinens inter tormenta serenam,
Sancte senex, cujus, dira in fornace dolorum,
Fulsit viva Fides, obryzo clarior auro !

O sacer in cœlis memorique in mente tuorum
Æternum victure vale ! propriâque potitor,
Post Christum Mosémque hominum mitissime, pace.

Sed tristem occasum lætissimus excipit Ortus ;
Surgentisque Astri radiis splendet Horizon.

*In Magni BOCHARTI
historiam animalium.*

EDit Io Princeps munus regale BOCHARTUS,
Magnifico celsus podio. Subsellia prima
Patritii obtineant docti, sanctusque Senatus.
Doctorumque alter de Nobilitate secundâ
Pulvinis sedeat spectans in equestribus ordo :
Nos populus summâ in causâ ; Tamen inde videntes
Quanta stupefcenti donet spectacula Mundo.

Non tot ab extremis adveſta animalia terris
Romana exhibuit variis speciebus arena
Luxurians, quum Roma potens, molimine vasto
Per glaciale solum, per adustum Sole propinquo,
Quâ Sol æquoreis prodit, quâ mergitur undis,
Intima sævarum ſpoliabat lustra ferarum,
Spectandi cupidos oblectatura Quirites.

Quantula

Quantula pars labor ille tui, Vir Magne, laboris ?
Qui per inexpertas Romanis artibus artes,
Ignotas nostro Orbe feras dudúmque latentes,
Effodis è cæcis longâ caligine lustris.

Tu tibi per varix commercia plurima linguæ
Concilias linguæ divisas limite Gentes,
Concordésque tui famulas facis Amphitheatrî.
Cum Pœno tibi servit Arabs, tibi Maurus uterque,
Euphrates, Tigrísque, & Rhenus, & Ister, & Albis,
Et tibi jam notâ celebratus origine Nilus.
Et tandem Solymæ concors Samaritica tellus,
A te docta tuo fasces submittere Judæ.

Venantur tibi Parthus atrox, & Seres, & Indus,
Aurea Taprobane, Persis pharetrata, genúsque
Decolor Æthiopum calidi fervore Leonis.

Quin Roma occultos latè populata recessus,
Jam tibi fessa favet, sacrum mirata laborem,
Atque suam venerans aperítque & cedit arenam.

Túque tuam, numerosa tibi cùm copia surgat,
Cædibus haud violas aut sanguine tingis arenam ;
Nullis condis apris, nullis venabula pardis,
Nec fontes Scythico lacerandos objicis urso.
Sed dociles, Sophiæque feras documenta daturas,
Mandata accipiens Adami genus omne animantum,
Munificos corvos, promos condósque Prophetæ,
Et foetum Hebræo producis melle leonem.

Quid quòd magnificos affundis rebus honores
Exiguus ? quòd verna canis, quòd porcus arator,
Venator felis, fossórque cuniculus agri,
Et gallus vigil, & si quid depressius istis,
Nescio quid per te celsum & mirabile spirant.

Munere perfecto, doctorum tota (sed eheu
Quàm non densa cohors) authorem muneris invitum
Eia triumphali sublimem attollite curru.
Et radiante caput meritum redimite coronâ.

Turba favens, picti regiones præferat Orbis,
Oceano cinctas atque amnibus intersectas.
Navigiis spument & turpibus æquora phocis.

Stagna colant anates, ludant in litore mergi,
Mæander cygnis, crocodilis Nilus abundet;
Afra feris tellus, elephantis India nigris;
Cætera per proprias errent animalia terras.

Diversâ in tabulâ spectetur cana Vetustas,
Horrida, dimidium rarâ caput abdita nube;
Huic comes ex puteo tenebrarum emergat opaco
Filia nuda Croni, Genitorem amplexa trahentem;
Et nubem ex alto divus discriminet ignis.
Augustæ propior studiosa juvena quadrigæ
Festa Palæstinis præcingens tempora palmis
Saltet ovans, & canet Io jucunda triumphæ.

Hispano-



Hispanorum Peruanæ victoriæ.

Aurea ducebant Peruanæ secula Terræ.
 Aurea, quod servum nullus se traderet auro.
 Juris amor populis, facilis robustaque morum
 Simplicitas, arctisque comes mens sobria rebus.
 Census nullus eis privatus, at omnibus ingens
 Publicus, & vasti communia commoda regni.
 Lenia tranquillæ multebant otia gentes :
 Quippe quibus nec avara fames, nec cura futuri.
 Aurum ceu lapides ipsis commune ; sed iisdem
 Pluris erant auro lapides, omne utile pompa.

Ecce genus simplex hominum, qui ferrea nondum
 Arma nec ignivomi cognorant fulmina teli,
 Protinus incautum rabies invadit Ibera :
 Scilicet infantes populos, residensque, coruscis
 Insignes plumis, sudibus saxisque minaces.
 Egregiam laudem ! cataphracta Hispania vincit.

Hinc effusa novum Furiis immanibus Orbem
 Vexat, & Occiduas exhaurit cædibus oras.
 Non Regi augustæ reverentia Majestatis,
 Non senibus puerisque ætas, sexusque puellis
 Præsidio fuit, aut crudelia pectora flexit.

Una solet rapidum satiare juvenca leonem.
 Unguem vultur atrox agno desigit in uno :
 At nullâ Hispani satiantur cæde furores.
 Aggressi (horrendum !) Naturæ indicere Matri
 Exitium, penitusque humanam exscindere gentem.
 Inde ubi fusca graves America vertice Soles
 Excipit, ad gelidos Australis limitis axes,
 Per spatium immensi non enarrabile tractus,
 Omnia quæ licuit ferro sublata, labore
 Exhausta immodico, aut canibus lanigata cruentis.

Terra

Terra inculta suis luget viduata colonis;
 Passim vastities; quo tandem fine vel usu?
 Proh Deus! ut rapro recubet securus in auro
 Hispanus. Sat is est. stagner jam sanguine Terra,
 Stirps hominum pereat: rectè Natura peribit,
 Servet ut Hispanus flavam, sua numina, lamnam.

De Tabaco.

TErribili liceat tutò me credere turbæ,
 Armanti tubulis ignita micantibus ora;
 Ex quibus accensos ducens referensque vapores,
 Evomit horridæ glomerata volumina nubis,

Talis sulphuream volvebat cœca mephitim
 Viribus Herculeis Caci diffracta caverna,
 Rustantis piceo nigrantem turbine fumum,
 Et fumo intortos sinuosis flexibus ignes.

Non is sum, Socii, vestri qui commoda pæri
 Imminuam, madido forsân fomenta cerebro,
 Fortè etiam curis delenimenta molestis.

Adde quòd inter vos quum controvertitur, ille
 Qui causâ cadit & currâ ratione laborat,
 Fas putat occluso tubulum pressare labello,
 Ore ciere ignes admorâ ad fictile prunâ.

Ter quater adductum toties efflare Tabacum,
 Et sinuare gravi pungentia nubila naso,
 Responsi ad partum dum tu Lucina vocaris.

His quanquam auxiliis non rarò infirmus hebésque
 Indigeo, fugio morbo medicamina fœta.

Notum est fumivomæ quæ damna tyronibus artis
 Inferat, ut stomachum vomitu, vertigine frontem,

Alvum torminibus, tetri suffiminis haustus

Anxier, & gelidis quatiat sudoribus artus.

Ut geminatæ ædes oculis torpédine lippis

Subsiliant tremulum, spirisque undantibus errent.

Scilicet

Scilicet ista rudes agitant incommoda solos.
 At ego sim rudior ; illibataque per ævum
 Sint mihi radices hujus virtutis amaræ ;
 Non nostri fodicit cerebri penetralia fumus
 Mollia, sana tamen , nec multo interlita muco.
 An nimis obscuri ingenii, sed lucis amici,
 Obscurem angustam crassâ fuligine sedem !
 Nempe Dei speculum mentem purgare laborans,
 Si studeam cerebrum scopis everrere pæti,
 Quid nisi face novâ veteres detergere tentem ?

Nobilissimo Puerulo jam Poetæ.

O Mihi chara tui ! O spirans Genitoris imago !
 Sic oculos, sic ille manus, sic ora ferebat,
 Sic fortes animos, magnoque fidelia Regi
 Pectora ; sic fatis & Musis natus amicis,
 Vix puer Aonio fingeat carmina lusu,
 Infanti faciles demulcens pollice chordas.

Quàm bene proludit firmæ tener iste Camœnæ
 Impetus ! ut sensim fortes adolescit in æstus !
 Igniculis patrios jam scintillantibus ignes ;
 Promittitque Patrem, toto cui concita Phœbo
 Pectora, congenicum stimulabant carmine Martem.

Sic Linus assuerat, Phœbi dulcissima proles,
 Cyrrhæis jaculis Clarióque alludere plectro,
 Fatidicam laurum mordere audaculus infans,
 Et tremulo cytharam lusu pulsare paternam.

Euge puer, propriâ generi virtute patris.
 Exiguosque pedes in magnis fige Parentis
 Gressibus, hæc passus modò te grandire docebunt,

Et

136 *Nobilissimo Puerulo, &c.*

Et sanctos pietate viros, & pectore forti
Heroas, summósque metris æquare poëtas.
Gloria sic factis surget tibi digna. Sed heus tu !
Noster amor, torum si vis renovare Parentem,
Ut nos semper ames, foveas, tueare memento.

In Abrahami Aurelii Jobum Poetica Metaphrasi expli- catum.

Civis Idumæ quondam telluris Iobe ;
Quàm bene patritium Romanâ veste Quiritem
Te facis, & lato velas tua vulnera clavo !
Mincius indigenæ cesset meminisse Maronis ;
Major adest Genius, cui non vefanus Achilles
Dicitur, aut Tiryri pecudes, Æneîaque arma :
Sed Deus, ipse sanctâ gravitate tremendum
Intonat, & vocis percellit fulmine mentes.
Hoc versu imperium effatur, numerósque modósque
Ipse dat, & sacri foveat instrumenta furoris.
Talibus ora modis fracta de nube coruscus
Solvit, & obscurâ vestit caligine flammæ,
Terribilis quoties magnum per inane tonantes
Urget equos, volucrémque rotat super æthera currum.
Quum fremit ad tonitru fumúmque pavore volutat
Bruta licet, nutâtque suo sub pondere Tellus,
Ignibus æthra micat, properant vaga flumina retro ,
Pigrâque subsiliunt & Tartara consternantur.

Nec minor est quando pennis levioribus ales
Scindit iter medium, & sensim delapsus ab alto,
Fit Cœlo & Terræ ambiguus, celsúsque, humilísque,
Nunc plectri gravioris amans cytharam increpat acer,

Nunc

Nunc blando faciles demulcet pollice chordas ;
Accipitri similis, qui nunc sublimis ad æthram
Scandit, finitima plumam modò librat in aura,
Et liquido molles designat in aëre gyros.
Usque idem similisque sui, non ultima primis
Carmina, non mediis currunt diversa, sed inter
Millia tot parili procedunt singula passu.

Ac veluti largos volvit per secula fluctus
Ingens Pactolus, flavisque superbit arenis ;
Non secus Herous lætâ fluit aureus undâ,
Et facili longum decurrit flumine carmen.

An melior puris variare coloribus Eo ?
Quum croceo surgens flores demittit ab axe.
Scilicet ætherio saturatas nectare guttas
Diffundit lachrymis, gemmisque liquentibus agros
Lætificat, summas circum pendentibus herbas,
Cælum aperit, pluit argento, terrisque renidens
Aurea purpureo prætexit nubila limbo.

An cum fingit equum ? collo ferus ille minaci
Arduus indomitos animosi pectoris ignes
Naribus exspirat, fremitusque oculisque fatetur.
Excipit aure tubas, & ad armâ superbus ad arma
Emicat, in medios ultro ruit impiger hostes,
Et furit, ingenuumque viro stimulante furorem,
Ungula præcipitem subito rapit impete cursum.

An melior quando flentem miseratus Iobum
Solatur lachrymis lachrymas, querulusque gementi
Aggemit, Æolio ducens suspiria versu,
Et reddit planctus, & fletibus ulcera mulcet,
Aoniôque viri perfundit melle dolorem.

Salvete O docti gemitus, queis omnia cedunt,
Gaudia, vefanas æstro pungentia mentes.
Hinc procul O molles, Græcorum crimina, nugæ,
Cæcus Amor, meretrixque Venus, Satyrisque, Cyclopisque,
Et nunc ille Deus Ponti nunc bellua Proteus.

Jejunæ procul hinc veterum deliria Musæ ;
Cedere, divinos sapiunt hæc metra furores,
Atque merum vati spirant præcordia Numen.

Cedere

Cedite pernicies hodierni magna Papyri,
 Progenies, eheu nimum numerosa, Poëta:
 Frangite, si pudor est, calamos, succidite chordas,
 Et lucubratos Vulcano adolete labores.
 Hic equidem appendo citharam, dulcémque furorem,
 Hic plectrum & modulos & spem depono coronæ.

*Rubellioni ad Canonicas preces
 assiduo.*

S Acris amice cantibus Rubellio,
 Nostrique succentor Chori,
 Cui pura nostris concolores infulis
 Plumas honestat purpura.
 Tu dum rotatæ proruit cumulos nivis
 Boreæ protervus impetus,
 Vernante cantu nostra demulces sacra,
 Hiememque Templo submoves.
 Quæ te celebrem laude purpuratule?
 Tuæne sub specie later
 Alatus ut tu, cantor ut tu laudium
 Summi Tonantis Angelus?
 Qui dum organorum concavi pulsu tonant
 Ædis superbæ fornices,
 Adest benignus, & favet psallentibus,
 Et æmulos miscet sonos,
 Alis coruscans alacre gestientibus,
 Dei beatus laudibus.
 Si verò avis tu & verus es rubellio;
 Vestram fidem Fanatici!
 Avisne ut hymnis ex fera fiat cicur,
 Vos fecerint hymni feros?
 Ipsasque Templo dulce concilians aves
 Vos laus Dei Templo fuget?

Salvero

Salvero nostri fida pars Collegii,
 Totius exemplum Chori,
 Cui non severo fixit ullam codice
 Absentis aut tardi notam
 Præcentor acer. Sive Sol sanctas preces
 Oriens reducit aut cadens,
 Mediòve celsus axe, ru nunquam dees,
 In æde subsultim ambulans.
 Mox organorum pegma sublimis petis,
 Cantúque vincis organa,
 Gracili & sonorâ voce, cornicinum vicem,
 Acuens gravem symphoniam.
 At his, rubelle, pro tuis meritis pius
 Spargit tibi micas puer ;
 Quas tu per aream, huc & illuc saltitans,
 Sacro peracto colligas.
 Tún' dum canentum certa stant stipendia,
 Immunis unicus canas ?

Mitissa.

Mitissa celsa nobile ab Cypro genus.
 Cypríque blandâ blandior felis Deâ;
 Cui venera nigro illusa pellis limite,
 Ambagioso tortili volumine,
 Jaspide niter imbricata puriús :
 Plumâ columbæ rurturísve mollior,
 Ténero puellæ flore delicatior,
 Pellaciórque, nequior vulpeculâ,
 Qua nec pitheci gestuosi sunt magis,
 Qua vel sciuri ludibundi sunt minús.
 Mihi prodeunti prodeambulas comes ;
 Ego gestienti gestiens colludere,
 Cyclos sinúsque virgulam circummovens

Designo

Designo, túque virgulam prehendere
 Avida, in volucrem profilis volucrior,
 Citata cursu, præpes ungue, oculis micans,
 Lumbo huc & illuc flexilis versatili,
 Equásque gyros & sinus cum virgula.

Domum revertor, túque mecum; vix bene
 Lecturus aut scripturus assedi, statim
 (Musis ministra scilicet) mensæ infilis;
 Tenuíque roncho blanda re mihi affricas,
 Et usque & usque, réque inulceri jubes,
 Surrecta caudam rigidulam, dorso ardua.
 Mox affides, notásque quid rei geram,
 Tentare lusu certa quicquid movero,
 Versare chartam, morficare pennulam.
 Recénsque scriptam lineam, procacula,
 Tagace frictu litteram latam facis.
 Talitro repressa, mœsta retrahis pedem;
 Breviórque collo, pavida connives nocens
 Oculos pudentes; dein remotior sedens,
 Amans inandax, cui rex fiduciam
 Adimens, amorem non tamen minuit metus,
 Modesta supplex figis in me lumina.
 At jure Mitissa, ambigas mihi an tibi
 Sit cura major integrandæ gratiæ.

Sed exi, & ista si quid irarum premis,
 Mitissa, quicquid est apud me soricum
 Offensioni dedo mactandum tuæ.
 Hi luridi hostes, & mei & tui, meam
 Iram suâ cæde expient, satient tuam.



*Epistolam quam Iambo in MILTONUM
 Author subjunxerat, per operarum nostrarum
 festinantiam prætermisissam, hic exhibemus;
 ad paginam 36 Libelli secundi referendam.*

IN quod periculum me conjecerit prima hujus carminis cum *Clamore Regii sanguinis* editio, publicâ notitiâ dignum haud existimarem, nisi divini præsidii miraculum quo servatus sum incolumis, communi bonorum admiratione & summi Liberatoris laude dignissimum esset. Schedas meas ad Magnum *Salmasium* miseram qui eas eruditissimi Viri *Alexandri Mori* curæ commendavit; *Morus* Typographo tradidit, eisque Epistolam ad Regem sub Typographi nomine præfixit, oppidò eloquentissimam & bonæ frugis plenissimam. Istud *Mori* circa operas Typographicas studium, cum *Miltono* per Regicidarum in *Hollandia* coryceos innotuisset, pro comperto habuit *Miltonus Clamoris* authorem esse *Morum*: Unde ille *Miltoni* (sub titulo *Defensionis secundæ pro populo Anglicano*) virulentissimus in *Morum* libellus, cui insuper inimicos in *Hollandia* creavit; Erant enim tunc temporis Anglicani Tyranni extra sua pomœria maximè formidati. Spectabam interea tacitus, nec sine lento risu, fœrum meum ad alienas fores expositum; & cœcum atque furiosum *Miltonum* Andabatarum more pugnans & ἀεὶ πολεμίζων, à quo feriretur & quem contra feriret ignarum. At *Morus*, tantæ invidiæ impar, in Regia causa fringere cœpit, & *Clamoris* Authorem *Miltono* indicavit. Enimvero in sua ad *Miltoni* maledicta responsione, duos adhibuit testes, præcipuè apud perduelles fidei, qui Authorem probè nōssent, & rogati possent revelare. Unde sanè mihi & capiti meo certissimum impendebat exitium. At magnus ille iustitiæ vindex, cui & hanc operam & hoc caput libens de-

T

voveram,

voveram, per *Miltoni* superbiam salutem meam asseruit; ut ejus sapientiæ solemne est ex malis bona, ex tenebris lucem elicere. *Miltonus* enim qui plenis caninæ eloquentiæ velis in *Morum* investus fuerat, quique id ferme unicum *Defensionis secundæ* suæ fecerat, argumentum, ut *Mori* vitam atque famam laceraret; adduci nunquam potuit ut se tam crassè hallucinatum esse fateretur. Scilicet metuens nè cæcitati ejus populus illuderet, eumque compararent Grammaticorum pueri Carulo illi cæco apud *Juvenalem* qui piscem *Domitiano* donatum laudaturus

plurima dixit

*In laevum conversus, at illi dextra jacebat
Bellua.*

Perseverante igitur *Milto* totum illud periculosi in Regem amoris crimen *Moro* impingere, non poterant cæteri perduelles sine magna boni patroni sui injuria alium à *Moro* tanti criminis reum peragere. Cùmque *Miltonus* me saluum esse mallet quàm se ridiculum, hoc operæ meæ præmium tuli, ut *Miltonum* quem inclementiùs acceperam haberem patronum, & capitis mei sedulum *Veracissimè*. Parce risu, Lector; & Deo Liberatori, Optimo, Maximo, & Sapientissimo, summas mecum gratias age.

Schola



Schola Naturæ.

Quam ægrè à vobis avellor dulces agri, mitissimum cœlum, hospitales umbræ, herbose colles, rivi purissimi ! Apud vos diem innocuam condidi, aërem vernum spiravi, & oculis in suavissima varietate oberrantibus, penè mei oblitus, in vestris hæsi deliciis. Sic sanè hæream vobiscum ut vos sequar, & eum ad quem ducitis assequar. O Naturæ Author arque finis, fac nobis istas salutaris delicias. Huic quid sibi vult hæc luxuriantis Naturæ pellicia, ista Terræ Matris in hac senectute juvenilitas ad puellarum morem compræ, nitidæ & fertis redimitæ ? An ut stultorum animos pascat nihil nisi oculis videntium ?

*Juvenilis ista
prosa oratio
inter Poëma-
ta locum te-
neto.*

Imò librum, O homo, tibi aperit Natura. In eo quot flosculi, quot graminum fila, quot roris gemmulæ, totidem literæ : Rerum creatarum inter se nexa literæ in dictiones coeunt, tempestatum vicibus in periodos. Quin & in singulis literis sensus est integer. Non vides quàm perfecta sint singula, & sibi sufficiant ? Et tibi quoque, modò ad eas purgatum animum adhibeas. Aspicias instructissimam Naturæ supellestem ? Tota tua est. Tu cujus ? Ex eo quod accipis discere quid debeas. Nimirum tu tanti es cui Cœli in perpetuum gyrum se cogant, Sidera suos influxus immittant, Plantæ & animalia suo famulentur interitu ? An idcirco magnus ille aureæ lucis & caloris vivifici promus, dierum & noctium, æstatum & hiemum statas vicissitudines attemperat, & vaporum subinde ascendentium & descendentium dispensat alternationes, ut tibi uni ministret, & approbatione tuâ sese beet ? Heus tu, non tu es rerum finis sed medium, per quod ad Deum à quo fluxerunt recurrant ; & (quod in solemnibus divitum epulis usu venit) non te Deus magnificentie suæ arbitrum sed testem advocat, nec ad conviviarum saginam,

sed patrisfamiliâs laudem, suam mensam tot ferculis instruit. Non habes Naturæ dominium, sed usum. At quem usum? Ut Naturâ duce ad Deum iter ingrediaris, Naturæ Parentem agnoscas etiam tuum, ejus liberalitatem laudes, sapientiam mireris, amorem amplectaris. Neque verò te per longas ambages ad Deum Natura ducit; Gramini Sol & pluvix serviunt, Gramen pecori, Istud tibi, Tu si Deo, tunc in catena aurea quâ Cœlum Terræ copulatur primum annulum facis. Tunc in summis divinæ scalæ gradibus stas ubi te decet, Numini proximus: Tunc Orator es Universi; Et quia rerum creatarum solus loqueris & intelligis, omnia creata ore tuo Creatori laudis tributum pendunt, omnia mente tuâ Authori suo religantur.

At si æthram nunquam oculis notas nisi ut pluvias & ferenum augureris, Si stellis terminatur tua in Cœlum suspensio, & vaporum instar nunquam sursum niteris nisi ut crassior descendas, habes in statione tua quod te deprimat; Enimvero si Dei amorem & meditationem tollis, non est cur supra belluas, concives tuas, temet attollas; Illis ut tibi Sol oritur & stillant nebulae: Illis Terra viret, floret, & bonam copiam toto cornu profundit, idque nullo sudore rigata, nullis vomeribus violata. Illis præstò est Naturæ major indulgentia, vires magis ingenuæ, salubrius corpus, securior quies, vestis nativa & nunquam detrita, quam tu egenus ipsis diripis ut earum vestiaris exuviis. Hoc uno bruta superas quòd Deum amas & meditaris, cætera infimis magis infimus. Tu igitur amore, tu contemplatione sursum nitere; Istud potes etiam dum deorsum spectas; Videre est humi cœlestem sapientiam, & ad cujus radians jubar caligant suspicientium oculi, imaginem in inferioribus speculis, inconvenientibus palpebris contuemur.

Id verò à te postulat Deus, sive æquum est rogar. Id clamant ejus opera. Vult in illis aspici, sed veris oculis, Dei sapientiam, magnitudinem, bonitatem, etiam extra commoda nostra metientibus. Si in erucas incidis aut limaces viridaria tuâ corrodentes, non est cur in damnum tuum magis oculos intendas quàm in Naturæ industriam in ultimorum animalium tergoribus vermiculato opere ludentis. Etiam quod

quod proculcas licet admirari, & eum rerum ordinem laudare in quo id etiam ornat quod nocet.

Quum pecudes tuas recenseres, non fecisti satis huic meditationis debito, si tantum perputas quantum tibi lanæ hoc Junio, quot agni horni, quam pulli trimi adoleverint feroculi, quam opimi juvenci, & quanti proximis nundinis futuri. Nec agros tuos ita circumspicere sufficit ut jugera cum modis metiaris. Istud te dignius sic tecum reputare; Mihi hæc omnia virgulâ divinâ suppeditantur affatim, mihi præstant quod mihi non debent, egone Deo negem quod debeo? & Dei operum cum Deo vinculum in me abrumpi sinam? Egone qui pro omnibus Deo sum obæratuſ Deo reddam nihil? Quid verò reddam Deo? ad eum officia mea non perveniunt, nec ei potest quidquam rependi qui omnia possidet. At si non potes dare, potes rectè accipere, accepta referre, datis gratus & lætus frui, esse divinorum beneficiorum discipulus beneficus.

Noli putare hæc Tempe mera esse ambulacra. Scholam vides, imò Templum. Delectaris istâ simpuli garrulitate inter discolors lapillos trepidantis? Non ideo datur ut ejus murmur tibi in ripâ temere jacenti somnum conciliet. Præstat majus delectamento documentum. Perennis iste cursus qui per cataraſtas, ambages & perplexos errores viam tandem sibi facit ad Oceanum. Iste inquam te docet ut non ante quiescas in tuæ pietatis contentione quam ad ingens illud Divinitatis pelagus pervenias, & ab eo absorbearis ultimum; Nec viam tibi intercludant aut multiplices vitæ mæandri, aut negotiorum moles, aut calamitatum præcipitia.

Et quemadmodum cœli facies cærulea nonnisi in limpida & placida aqua spectatur, sic tranquilla duntaxat ingenia cœlestem colorem referunt. non turbida cupidinibus & vitiis lutulenta.

Si diluculo expergisceris & foras prodis præsto est diligentia tuæ præmium, primum omnium spectaculum; Sol oriens inter mille colorum discrimina, & primulis radiorum stricturis inter roris globulos renidens quibus summa herbarum folia acuminantur. Dum miraris supra illusarum nu-

bium emblemata, infra variè micantes gemmulas versicolorum nebularum æmulas, Ecquid subit tibi pomparum regiarum contemptus, & sumptuosæ Venerum nostrarum vanitatis, Seras & Indos margaritis exspoliantium? Quàm nihil sunt illa ascititia & longè petita ad spontaneam istam & subitanèam gloriam! Hui! quantillum est quod in rebus humanis miramur, dum veram admirationis materiam insuper habemus!

Quid singula persequar? Per omnia Dei & tui admonitor. Silicum ingrederis, ejus venerabilis horror tibi præsentiam Numinis incutiat. Si prati luxuriem calcas, cogitâ quàm multa ambulans teras quorum naturam mente non potes assequi. Canoras avicularum minuritiones totidem Hymnos puta quos Deo Creatori pangunt Sacerdotes minutuli. Si in nidum incidis, admirare pudibundus in ave naturalem industriam, quam nos, omnium scilicet *artium Magistri*, nec arte æquamus, nec cogitatione indipiscimur, Lilia tam splendide amicta, quæ neque nent neque texunt; Feræ victum nunquam providentes, semper invenientes, tuam condemnent avaritiam, animum de futuro anxium, de Dei amore semper vigili, heu! nimium sæpe dubitantem.

Denique sic cogita, Agrestes hæ delicix, hi floridi tapetes, viridis iste nitor intra paucos menses hiemis rigore intercident. Sic hæc vita, hoc robur, hæc aura fortunæ, ærumnis, senectute, morte, seriùs ocyùs contabescunt. Quare dum per tempestatem licet bonam frugem in nostra horrea maturemus congerere, & ante hiemem serere quod postmodum beati metamus, quando ipsi Dei messis erimus, in cœlestibus granariis reponenda.

Villa



Villa Cambrica.

IN agrestissimis *Cambria* montosæ recessibus mea fortuna se condidit, ibique loca mihi delegit adeò senta situ, adeò horrida, adeò squallida, ut eò nè Fortunam quidem quisquam ad societatem natus aut dignetur sequi aut ausit. Solum tenuæ, steriles arenæ, quanquam sub cœlo continuis imbribus sædo semper aridæ: Montes adeò macri ut nudata ossa passim exerant; Quæ quidem terreâ curæ olim vestita fuisse mihi fit verisimile, sed juges pluviæ dilutam ad ima secum devolverunt. Rupes præruptæ per sinuosam graduum seriem fastigiatim attolluntur. Inter hos gradus capellas & equos capellis aliquanto majores dubium errare dixeris an pendere. Unde pascantur vix concipio, & ipsi vix inveniunt: Sanè ubi lapis per rimas dehiscit succrescunt rubi, tribuli, & raræ herbulæ, quæ jejuni pecoris famem protrahant non satient. In præruptissima rupium crepidine erumpunt breviculæ arbores semipendulæ, deorsum semper ruituris similes; Ipsæ ex soli ingenio infelices, curvæ, re-torridæ, colono nihil offerentes nisi suspendium. Infra vallis angusta, & ipsa montosa, inter cujus rumulos vix alveum sibi fecit torrens qui per silices mutuo attritu lævigatos multa cum spuma & fragore sese præcipitat. Torrenti imminet clivus brevis, & clivo imposita eminet ædes rusticana quam rivus plenior & placidior alluit, & impetui suo, quasi ad Religionis reverentiam, quietem & silentium videtur imperare. Unum aut alterum stadium inde progressus à voragine absorbetur, & ad quartum lapidem rursus prodit, sed largior, nè frustra sese condidisse videatur.

Iste est juvenilis lusus, & prope carmine magis poetica.

Contra ædem in adversa ripa aperit se vasto hiatus caverna ingens, popularibus fabulis nobilis cujus intima spatia nullus ad hanc diem penetravit; Tum quia viator in inhospitali iti-

nere nullum invenit operæ suæ pretium, Tum quia crassus
 & sæculentus aer convenientem respirantibus animam non
 præbet. Præterea inutilem viam intercludunt flumina, & in-
 gentes lacus inundant, & subitæ voragines abrumpunt. Mo-
 dicum in interiora progressis specus in innumeras vias findit-
 tur, quarum perplexis ambagibus non tutum est sine *Ariad-
 nes* filo sese committere. At paulò penitiùs introgressis pa-
 vor curiositatem excutit, adeò quidquid tetigeris sordidum,
 quidquid calcaveris scabrum, quidquid audiveris stupendum,
 quicquid ad lucernam videris horridum est. Spatia perpetuo
 lapide camerantur. Humorem summa caverna exsudat, ut &
 latera quæ prætentantium manus lentâ & viscosâ uliginè in-
 ficiunt. Solum sub pedibus confragosum, in cujus salebris
 nemò absque scipione rectus potest consistere, nisi cacodæ-
 monis instar pedes habeat multifidos. At omniùm maximè
 formidabilis est fragor magno agmine decurrentium fluvio-
 rum, & quibusdam in locis quasi jam sub pedibus ebullanti-
 um. Meatus angusti in ampla spatia subito laxantur, in
 quibus Senatum habere putantur mali Dæmones, in aliis
 etiam forum & nundinas. Sed quidquid fabulentur indigenæ,
 equidem certus sum Horrorem, Noctem, Inopiam, & Ovi-
 dianam Famem, malos si quiquam Dæmones ibi stabulari :
 Qui nè indè unquam ad superos migrent, mihi consilium est
 os cavernæ obturare, & sic vicinæ consulere, cujus pecu-
 des quando illuc se ab imbre recipiunt nonnunquam deside-
 rantur, causantibus abactoribus terrenorum Lemurum insi-
 dias, & Diaboli criminantibus innocentiam. Sed jam in-
 feros relinquo, & agros meos circumspiciens, vix quidquam
 graminis hoc anni conspicio, adeò ver tardum in has partes
 devenit. Enimvero ver nobis non potest ante *Junium* inte-
 pescere, quibus Aurora paulò ante Meridiem exoritur. Eam
 enim montium coronam circum me habeo quam Sol in nostro
 Tropico vixdum superat, inter rupium flexuosas angustias
 quasi suffuratos radios obiter insinuans, nec multò post occi-
 dit. Hui ! hocine frigus, hæ cautes, hæ tenebræ mihi poti-
 tiundæ obtigerunt ? O poëticam felicitatem ! & quisquam
 voluerit in hæc inhospita tesqua Fortunam sequi ? At ego
 Fortunam illuc ideo sequor ut indè aveham. Hæc sanè
 loca

Com. in hæc verba Taciti. 149

locâ tam misera, tam sola, tam horrida, huic corpuscul^o quod satis est ministrant; Hinc mihi abundè suppetit undè in strenuo otio philosopher, & in cultissima civitate solitudines meas tantùm describam.

Commentatio in hæc verba C. Taciti ANNAL. VI.

POPPÆUS SABINUS principum amicitia Consulatam ac triumphale decus adeptus, maximisque provinciis per quatuor & viginti annos impositus, nullam ob eximiam artem, sed quòd par negotiis, neque superà erat.

IN uno exemplo habemus quid in Aulâ soleat, & quid expediat.

Solent magnis provinciis imponi non magna & excelsa ingenia, sed negotiis solùm & ægrè paria. Si enim Princeps versutus sit & magnus artifex, qualis *Augustus* aut *Tiberius*, procul habet magnarum artium homines. quia vult sua sibi habere consilia; & omnes oculos sedulò amovet qui in ejus animum possint descendere. Cùmque omnia solus administrare velit, & posse putet, sufficiunt ei ministri qui tantum nōrint quantum exequantur, non ultra; quia non facile in-

tra angusti obsequii metas cohibentur spiritus suâ magnitudine inquieti & agendi avidi.

Si verò Princeps est meticulosus & pusilli ingenii, non patitur circa se eximiarum artium viros, quia impar; & quos suspicit etiam suspectat, quidquid supra se est existimans plenum periculi.

Sed quocunque tandem fine Principes sibi deligant ingenia modica, equidem commodè in commune sic consultum existimo. Si enim in Principis amicitiam admittatur ingenium magni nominis, aut Dominum pro libito regit, aut à populo regiis amicitiiis semper infenso regere creditur, quâ opinione nihil æquè rem & existimationem Principis lædit, & seditionibus latiore portam aperit.

Minus tamen à tali homine est periculi si Regis amicitia contentus otium eligat, Magis si ullam partem Reip. attingerit: Sunt enim ut plurimum magna ingenia famæ atque potentia famelica, & in rebus gerendis id magis contendunt ut ostendant quid ingenio & gratiâ possint quàm quid maxime conducatur. Non primarii Ministri magno animo, sed prudente consilio & sedulo obsequio pax regni constat: Nec qui mala iussi faciunt adeò sunt noxii, quàm qui bona nimis bene, & Principis atque Senatûs consilia multiplici sapientiâ ita interpolant ut faciant sua.

Quid quod officium sibi attributum nunquam strenuè præstabit qui negotia habet sibi imparia, eaque tanquam se indigna & infra se posita despectat. Cujus rei triste experimentum dedit *Verulamius*, cujus mirata est *Anglia* in summa sapientia & eruditione summam rerum gerendarum supinitatem, quam suæ rapacitati prætendebant nequissimi famuli. Nempe vir ingeniorum suo ævo Princeps, qui universam rerum scientiam vasto animo circumplectebatur, sese nunquam mancipare potuit negotiis, quanquam magnæ fortunæ, minimis tamen, & mole non pondere difficillimis.

Perperam magna vocamus negotia quæ molem regni sustinent. Sunt quidem magni momenti & laboris, fortè etiam splendoris & emolumenti; Sed nulla occupatio verè magna est cujus est humilis theoria: Nec plurima munera, quibus salus regni constat, sublimem, sed fidam & patientem animam postulant.

postulant. Quemadmodum enim iidem affectus agitant gigantem & nanum, sic publica & privata negotia iisdem artibus geruntur, nec quaestura fisci aut ærarii aliter supputatur quàm domesticæ mercatorum rationes.

Sanè si excipis summæ rerum regimen, quod animos primæ capacitatis postulat, qui quasi Atlantes robustissimi Imperii Orbem sustentent; vix ullum in Aula munus excelsum poscit ingenium. Aulicus peritus esto in Principis studiis, & Aulæ moribus. Noverit quibus viribus polleat regnum, quibus morbis laboret; Quid velint, quid possint vicini: Quo pacto spartam quæ sibi obtigit & tueatur & ornet; Esto tædii & laboris patiens, in convictu facilis, in negotiis non acutus sed industrius, Et cauto temperamento æmulationem aut devitet alienam aut occultet suam.

Has artes quivis attigerit usu, nisi planè asperis moribus & lævo ingenio, & in Aula educatum aut diutius versatum sequentur non accersitæ.

Et profectò reputanti mihi quàm tenue & levidense illud est quod aulicam virtutem constituit, non modò Principem laudare libet qui à magnis ingeniis abstinet, sed & generosas & eruditas mentes increpare si eas unquam aulici muneris cupiditas incesserit; Maximè si ejus sortis fuerint cui minùs necesse sit ad ambitiosa aspirare. Quantumvis enim magni muneris splendor perstringat oculos, certum est magni ingenii felicitatem in rerum optimarum & excelsissimarum contemplatione sitam esse, quam prorsus ejurare cogitur qui vitam aulicam vivit.

O nè nimiùm inclarescant ingentes animæ! Nè Proceribus plùs satis notæ servili magnitudine violare jubeantur beatam contemplationem, divinum otium, & Cælo admotam mentem, & semet ad indigna suâ celsitudine negotia detrudere! Bene est quod à nostris Aulicis nihil istiusmodi periculi imminet eximiis animabus; & per eos magnis viris licet vivere obscuris & beatis.

Elenchus

M
M



Elenchus Poematum.

Liber Primus qui est Hymnorum in Symbolum Apostolorum.

<p>Hymnus I. <i>Credo in Deum Patrem &c.</i> Pag. 1</p> <p>Hymnus II. <i>Creatorem Cæli & Terræ</i> p. 6</p> <p>Hymnus III. <i>Et in Jesum Christum &c.</i> p. 14</p> <p>Hymnus IV. <i>Qui conceptus est &c.</i> p. 20</p> <p>Hymnus V. <i>Passus est &c.</i> p. 25</p> <p>Hymnus VI. <i>Sepultus</i> p. 31</p> <p>Hymnus VII. <i>Descendit ad Inferos</i> p. 35</p>	<p>Hymnus VIII. <i>Tertiâ die resurrexit &c.</i> p. 38</p> <p>Hymnus IX. <i>Indè venturus ut judicet &c.</i> p. 42</p> <p>Hymnus X. <i>Credo in Spiritum Sanct. p. 46</i></p> <p>Hymnus XI. <i>Sanctam Ecclesiam Catholicam</i> p. 51</p> <p>Hymnus XII. <i>Remissionem peccatorum</i> p. 56</p> <p>Hymnus XIII. <i>Resurrectionem carnis & vitam æternam</i> p. 62</p>
---	---

LIBER II.

Ecclesiæ Gemitus.

<p>Metrum I. pag. 1</p> <p>Metrum II. p. 6</p> <p>Metrum III. p. 12</p>	<p>Metrum IV. p. 21</p> <p><i>Magni Maues</i> p. 30.</p> <p><i>Magno Salmasio</i> p. 33.</p> <p style="text-align: right;"><i>In</i></p>
--	--

Elenchus Poematum.

<i>In Johannem Miltonum</i>	<i>Epicediū Comitum Cum-</i>
p. 36	<i>bria</i> p. 45
<i>In Zelotas Rebelles</i> p. 43	<i>Nobilissimo Puero</i> p. 48

LIBER III.

Sylva Variorum.

P <i>Araphrasıs Psalms</i>	<i>Aula Somnium</i> p. 57
<i>Super flumine Ba-</i>	<i>Pf. xliii. Judicame Deus</i>
<i>bylonis</i> pag. 1	p. 60
<i>Christiana felicitas</i> p. 4.	<i>Lucidum intervallū</i> p. 61
<i>Arx mea Deus</i> p. 5	<i>In Deo tutus</i> p. 62
<i>Natura sanum</i> p. 7	<i>In Deo fortis</i> p. 63
<i>Est Deus in nobis</i> p. 8	<i>In Deo quies</i> p. 65
<i>Schola Morbi</i> p. 11.	<i>Deus amoris in ira me-</i>
<i>Thyrsis</i> p. 14	<i>mor</i> p. 66
<i>Livia</i> p. 23	<i>Orate pro pace Jerusa-</i>
<i>Serena</i> p. 32	<i>lem</i> p. 68
<i>Votum pro Serena</i> p. 37	<i>Summum nec metuas di-</i>
<i>Temporis & vite flu-</i>	<i>em nec optes</i> p. 69
<i>men</i> p. 40	<i>Pf. xcvi. Cantate Do-</i>
<i>Sponsa lapsus & pœni-</i>	<i>mino Canticum</i> p. 71
<i>tentia</i> p. 42	<i>Terra Gemitus</i> p. 73
<i>Reditus ad Deum</i> p. 46	<i>Sponsa mittit ad Spon-</i>
<i>Alere matrem Christi</i>	<i>sum</i> p. 76
p. 48	<i>Sponsus mittit ad Spon-</i>
<i>Deo Liberatori Sacrum</i>	<i>sam</i> p. 77
p. 52	<i>Beatus Domine quem</i>
<i>Quid retribuam Do-</i>	<i>tibi admoves</i> p. 79
<i>mino</i> p. 56	<i>Sursum corda</i> p. 80
	<i>Velle</i>

Elenchus Poematum.

<i>Velle quod vult Deus</i>	<i>Doctissimo Jano Flitio</i>
p. 81	p. 125
<i>Mentis Serenum</i>	<i>Joh. Castilioni meo. Regis</i>
p. 82	<i>Sacellano</i>
<i>Pacis cœlestis anticipa-</i>	p. 126
<i>tio</i>	<i>Epicedium Reverendis-</i>
p. 83	<i>simi Guil. Juxoni Ar-</i>
<i>Senectuti gratulatur</i>	<i>chiepisc. Cantuar. &c.</i>
84	p. 128
<i>Pietas florida</i>	<i>In Magni Bocharti hi-</i>
p. 85	<i>storiam Animalium</i>
<i>Anima pia thronus Dei</i>	p. 130
p. 87	<i>Hispanorum Peruana</i>
<i>Pia tranquillitas Dei</i>	<i>victoria</i>
<i>speculum</i>	p. 133
p. 88	<i>De Tabaco</i>
<i>Quantum est quod nesci-</i>	p. 134
<i>mus</i>	<i>Nobilissimo Puerulo jam</i>
p. 90	<i>Poeta</i>
<i>Spectacula Cœli</i>	p. 135
p. 92	<i>In Abrah. Aurelii Jo-</i>
<i>Quis me liberabit</i>	<i>bum Poeticâ me-</i>
p. 94	<i>taphrasi explicatum</i>
<i>Reliqua</i>	p. 136
p. 96	<i>Rubellioni ad Canonicas</i>
<i>Sacer Anteros</i>	<i>preces assiduo</i>
p. 97	p. 138
<i>Sursum niti</i>	<i>Mitissa</i>
p. 98	p. 139
<i>Spes humana</i>	<i>Epistola in Miltonum</i>
p. 100	p. 141
<i>Spes Cœlestis</i>	<i>Scholâ Natura</i>
p. 103	p. 143
<i>Fiat voluntas tua</i>	<i>Villa Cambrica.</i>
p. 105	p. 147
EPIGRAMMA	<i>Commentatio in hac ver-</i>
TA	<i>ba C. Taciti Annal.</i>
p. 106	<i>Poppaus &c.</i>
<i>Clifforda nobilitas.</i>	p. 149
p. 117	
CAROLO Baroni	
<i>Cliffordo</i>	
p. 119	
<i>D. Ricardi Boyle Epita-</i>	
<i>phium</i>	
p. 121	
<i>Anna Baria Encomium</i>	
p. 122	

FINIS.